

西夏记

戴
锡
章

文硕阁

wenshuoge.com

目录

关于我们	3
徵引书目	5
卷首	9
卷一	12
卷四	22
卷六	33
卷八	45
卷九	55
卷十	64
卷十一	74
卷十二	81
卷十四	93
卷十六	107
卷十八	118
卷十九	128
卷二十	141
卷二十一	158
卷二十二	173
卷二十三	192
卷二十四	205
卷二十七	220

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

徵引书目

《旧五代史》 《五代史记纂误》 《五代史记纂误补》 《新五代史补注》
《宋史》 《辽史》 《辽史拾遗》 《金史》
《金史详校》 《元史》 《新元史》 《元秘史》
《元史译文证补》 《辽金元国语解》 《宋辽金元四史朔闰考》 《诸史拾遗》
《廿二史考异》 《廿二史札记》 《资治通鉴考异》 《稽古录》
《中兴小纪》 《续资治通鉴长编》 《续资治通鉴长编拾补》 《建炎以来系年要录》
《九朝编年备要》 《十朝纲要》 《续宋编年资治通鉴》 《宋史全文》
《通鉴续编》 《宋元资治通鉴》 《资治通鉴后编》 《资治通鉴后编校勘记》
《续资治通鉴》 《通鉴纲目发明》 《续通鉴纲目》 《通鉴长编纪事本末》
《金史纪事本末》 《西夏纪事本末》 《隆平集》 《东都事略》
《契丹国志》 《大金国志》 《元史类编》 《蒙兀儿史记》
《古今纪要》 《函史》 《续通志》 《松漠纪闻》
《燕翼贻谋录》 《太平治迹统类》 《宋朝事实》 《遵尧录》
《宣和遗事》 《宏简录》 《皇元亲征录》 《多桑书》
《包孝肃奏议》 《尽言集》 《说论集》 《诸臣奏议》
《王文正公遗事》 《韩魏公家传》 《韩魏公遗事》 《范文正公年谱》
《范文正公年谱补遗》 《范文正言行录》 《宋名臣言行录》 《名臣碑传琬琰集》
《广州人物传》 《西夏事略》 《西夏书事》 《新安志》
《朔方新志》 《浙江通志》 《甘肃通志》 《四川总志》

《寿光县志》 《福清县志》 《连城县志》 《米脂县志》
《宁夏府志》 《静宁州志》 《平凉府志》 《庄浪志略》
《河州志》 《延绥镇志》 《葭州志》 《甘泉县志》
《固原州志》 《吴堡县志》 《巩昌府志》 《一统志》
《读史方輿纪要》 《蜀典》 《西域水道记》 《建炎以来朝野杂记》
《文献通考》 《续通考》 《历代建元考》 《纪元汇考》
《纪元编》 《遂初堂书目》 《国史经籍志》 《世善堂书目》
《西夏艺文志》 《王允中郭景修墓志》 《大事记讲义》 《历代通略》
《九朝通略》 《读史漫录》 《历代史论》 《宋论》
《责备馀谈》 《古今人物论》 《读史大略》 《阅史郗视》
《读通鉴论》 《历代史案》 《通鉴辑览》 《评鉴阐要》
《张子全书》 《朱子全书》 《黄氏日钞》 《大学衍义补》
《图绘宝鉴》 《古今钱略》 《吉金所见录》 《古泉汇》
《厚德录》 《能改斋漫录》 《容斋随笔》 《日损斋笔记》
《十驾斋养新录》 《癸巳存稿》 《春明退朝录》 《东原录》
《文昌杂录》 《麈史》 《梦溪笔谈》 《东坡志林》
《蒙斋笔谈》 《晁氏客语》 《师友谈记》 《冷斋夜话》
《春渚纪闻》 《石林燕语》 《避暑录话》 《却扫编》
《墨庄漫录》 《梁谿漫志》 《老学庵笔记》 《贵耳集》
《吹剑录》 《藏一话腴》 《袖中锦》 《庶斋老学丛谈》

《卮斋琐录》 《烬馀录》 《沙州文录》 《皇朝事实类苑》
《册府元龟》 《事文类聚》 《玉海》 《翰苑新书》
《潜确类书》 《万姓统谱》 《山堂肆考》 《尚友录》
《渊鉴类函》 《骈字类编》 《西夏姓氏录》 《西夏国书略说》
《王文正笔录》 《儒林公议》 《涑水纪闻》 《澠水燕谈录》
《归田录》 《江邻几杂志》 《东斋录》 《东斋记事》
《龙川别志》 《后山丛谈》 《孙公谈圃》 《孔氏谈苑》
《画墁录》 《湘山野录》 《纪闻》 《倦游录》
《见只编》 《玉壶清话》 《东轩笔录》 《遁斋闲览》
《铁围山丛谈》 《道山清话》 《墨客挥犀》 《过庭录》
《萍洲可谈》 《高斋漫录》 《默记》 《挥麈录》
《挥麈后录》 《玉照新志》 《闻见近录》 《闻见前录》
《清波杂志》 《鸡肋编》 《北窗炙炙录》 《步里客谈》
《程史》 《贤奕》 《昨梦录》 《独醒杂志》
《耆旧续闻》 《清夜录》 《归潜志》 《续太平广记》
《扬文公谈苑》 《西夏译莲华经》 《佛祖统纪》 《咸下集》
《小畜集》 《南阳集》 《武夷新集》 《文庄集》
《文恭集》 《武溪集》 《安阳集》 《范文正集》
《河南集》 《蔡忠惠集》 《苏学士集》 《苏魏公集》
《司马文正集》 《赵清献集》 《公是集》 《彭城集》

《郈溪集》 《净德集》 《龙学集》 《宛陵集》
《刘忠肃集》 《王魏公集》 《范太史集》 《文潞公集》
《节孝集》 《欧阳文忠集》 《乐全集》 《范忠宣集》
《王荆公集》 《范侍郎遗文》 《广陵集》 《苏文忠集》
《冯应榴苏诗注》 《栾城集》 《黄山谷集》 《后山集》
《淮海集》 《石门诗钞》 《青山集》 《程伊川集》
《画墁集》 《西塘集》 《景迂生集》 《鸡肋集》
《姑溪居士集》 《潜溪集》 《学易集》 《道乡集》
《西台集》 《乐静集》 《摘文堂集》 《襄陵文集》
《竹隐畸士集》 《眉山集》 《杨龟山集》 《李忠定文集》
《初寮集》 《浮溪集》 《华阳集》 《鸿庆居士集》
《欧阳修撰集》 《九华集》 《渭南文集》 《魏鹤山文钞》
《濠水集》 《元遗山集》 《姚牧庵文集》 《清容居士集》
《道园学古录》 《至正集》 《颜习斋集》 《存研楼文集》
《潜研堂文集》 《烂溪集》 《养素堂文集》 《落帆楼集》
《宋文鉴》 《南宋文录》 《金文雅》 《西夏文缀》
《御制全史诗》 《宋诗钞》 《贡父诗话》 《中山诗话》
《后山诗话》 《彦周诗话》 《西清诗话》 《宋诗纪事》
《金源纪事诗》 《辽诗话》 《荀学斋日记》

卷首

西夏本赫连国地，而其先则魏拓跋氏后也（按，西夏先姓于弥，钱氏大昕《廿二史考异》、《元史·李恒传》，其先姓于弥氏，唐末赐姓李，世为西夏国主。按西夏之先本拓跋氏，于弥与拓跋音不相近，盖元时国俗之语。吴澄撰《李世安（即散木府）墓志》云：“公，西夏贺兰于弥部人也。”又《卜颜铁木儿传》作唐兀吾密氏，《察罕传》称唐兀乌密氏。北人读吾如乌，盖同族也。《李恒传》称于弥氏，与乌密声亦相近）。唐贞观初，有拓跋赤辞者归唐，太宗赐姓李，置静边等州以处之。其后析居夏州者，号平夏部。唐末，拓跋思恭镇夏州，统银、夏、绥、宥、静五州地，讨黄巢有功，复赐李姓。思恭卒，弟思谏代为定难军节度使（按，《通鉴考异》、欧阳修《五代史》作拓跋思敬，意谓《薛史》避国讳耳。按《旧唐书》、《实录》皆作思恭。《实录》天复二年九月，武定军节度使李思敬，以城降王建。思敬本姓拓跋，鄜夏节度使思恭、保大节度使思孝之弟也。思孝致仕，以思敬为保大留后，遂升节度，又徙武定军。《新唐书·党项传》白思恭为定难节度使，卒，弟思谏代为节度。思孝为保大节度，以孝荐弟思敬为保大留后，俄为节度。然则思恭、思敬乃是两人，思敬后附李茂贞，或赐国姓，故更姓氏，修合以为一人，误也。又《廿二史考异》，思敬当作思恭，宋人避敬字，多改为恭，而同时又有拓跋思敬其人者，乃并思恭亦误转为敬矣）。思谏卒，思恭孙彝昌嗣（按薛氏《旧史》及王氏《东都事略》，以彝昌为思谏子，与此异）。梁开平中，彝昌遇害，将士立其族子、蕃部指挥仁福（按欧阳《新五代史》及《东都事略》皆云：“仁福，不知于思谏为亲疏也。”《宋史·夏国传》彝昌遇害，将士立其族子、蕃部指挥使仁福。司马氏《通鉴考异》云：“仁福诸子，皆连彝字，则于彝昌，必父行也。”当以《通鉴》为正）。开平三年四月，梁祖降制，授仁福检校司空，充定难军节度使。未几，后唐武皇遣大将周德威会邠凤之师五万，同攻夏州。仁福固守月馀，梁援军至，德威遁去。梁祖喜之，超授检校太保、同平章事。仁福自梁贞明、龙德、及后唐同光中，累官至检校太师、兼中书令，封朔方王。长兴四年三月，卒于镇。其年，追封虢王。子彝超嗣（按《册府元龟》一百九十六，梁末帝乾化三年制：进封夏州节度使李仁福为陇西郡王。）彝超，仁福之次子也，历本州左都押衙，迁防遏使。仁福卒，三军立为帅。矫为仁福奏云：“臣疾已甚。”已，委彝超权知军州事，乞降真命。明宗闻之，遂以彝超为延州留后，以延帅安从进为夏州留后。朝廷虑不从命，诏邠州节度使药彦稠、宫苑使安从益等，率师援送从进赴镇，仍降诏谕之，云：“近据西北藩镇奏，定难军节度使李仁福薨。朕以仁福自分戎阃，远镇塞垣，威惠俱行，忠孝兼著。当本朝播越之后，及先皇兴复之初，爰及眇躬，益全大节。统临有术，远迩咸安。委仗方深，凋殒何速。忽窥所奏，深愴予怀，不朽之功，既存于社稷；有后之庆，宜及于子孙。但以彼藩地处穷边，每资经略。厥子年才弱冠，未历艰难，或亏驾御之方，定起奸邪之便。其李彝超，已除延州节度使观察留后，便勒赴任。但夏、银、绥、宥等州，最居边远，久属乱离，多染夷狄之风，少识朝廷之命。即乍当于移易，宜普示于渥恩。应夏、银、绥、宥等州管内，罪无轻重，常赦所不原者；并公私债负，残欠税物，一切并放。兼自刺史、指挥使、押衙已下，

皆勒依旧，各与改转官资。朕自总万机，惟宏一德，内安华夏，外抚戎夷，先既怀之以恩，后必示之以信。且如李从严之守岐陇，疆土极宽；高允韬之镇鄜延，甲兵亦众。咸能识时知变，举族归朝。从严则见镇大梁，允韬则寻除钜鹿。次及昆仲，并建节旄，下至将僚，悉分符竹。又若王都之贪上谷，李宾之吝朔方，或则结构契丹，偷延旦夕；或则依凭党项，窃据山河。不禀除移，惟谋旅拒。才兴讨伐，已见覆亡。何必广引古今，方明利害？只陈近事，聊谕将来。彼或要覆族之殃，则王都、李宾足为鉴戒；彼或要全身之福，则允韬、从严可作规绳。朕设两途，尔宜自择。或虑将校之内、亲要之间，幸彼幼冲，恣其荧惑，遂成骚动，致累生灵。今特差邠州节度使药彦稠，部领马步兵士五万人骑送安从进赴任，从命者秋毫勿犯，违命者全族必诛，先令后行，有犯无舍云。”其年夏四月，彝超上言奉诏，授延州留后。已迎受恩命，缘三军百姓拥隔，未放赴任，明宗遣阁门使苏继彦赍诏促之。五月，安从进领军至城下，彝超不受代，从进驻军以攻之。秋七月，彝超昆仲登城，谓从进曰：“孤弱小镇，不劳王师攻取，虚烦国家饷运，得之不武。为仆闻天子，乞容改图。”时又四面党项部族万馀骑，薄其粮运，而野无刍牧。关辅之人运斗粟、束稿，动计数千，穷民泣血，无所控诉，复为蕃部杀掠，死者甚众。明宗闻之，乃命班师。彝超亦上表谢罪，乃授彝超检校司徒，充定难军节度使。既而修贡如初。清泰二年，卒于镇。弟彝兴袭其位（按《册府元龟》三百八十九，长兴四年，隰州刺史刘燧凝言于帝曰：“臣闻李仁福有二子，彝超乃次子也。长子彝殷，为夏州留后。彝超征诏赴阙，则诸蕃归心矣。”据此，则又当以彝超继彝殷，未知孰是）。彝兴，本名彝殷，避宋宣祖讳，改“殷”为“兴”。初为行军司马，彝超卒，遂加定难军节度使。晋天福初，加检校太尉、同平章事。末帝嗣位，加检校太师。八年秋，彝兴弟、绥州刺史彝敏与其党作乱，为彝兴所逐。彝敏奔延州，彝兴押送到阙，骨肉二百馀口，朝廷以彝兴之故，絜送本道斩之。开运元年春，诏以彝兴为契丹西南面招讨使。汉乾祐元年春，加兼侍中。是岁，李守贞叛于河中，潜使人构之。彝兴为之出师，驻于延州之北境。既而闻守贞被围，乃收军而退。周显德中，累加至守太傅、兼中书令，封西平王。世宗即位，加太保。恭帝初，加太傅。宋初，加太尉。北汉刘钧结代北诸部来寇麟州，彝兴遣部将李彝玉，会诸镇兵御之，钧众遂引去。建隆初，献马三百匹。太祖大喜，亲视攻玉为带，且召使问曰：“汝帅腹围几何？”使言：“彝兴腰腹甚大。”太祖曰：“汝帅真福人也。”遂遣使以带赐之。乾德元年四月甲辰，彝兴献犛牛一（按康誉之《昨梦录》，西夏有竹牛，重数百斤，角甚长，黄黑相间，用以制弓，极佳。夏人常杂犀角以市焉。吴任臣《山海经注》谓即犛牛之类）。五年卒，太祖废朝三日，赠太师，追封夏王。子克睿立。克睿，初名光睿，避太宗讳，改“光”为“克”。彝兴之卒，自权知州事，授检校太保、定难军节度使。开宝九年，率兵破北汉吴堡寨，斩首七百级，获牛羊千计，俘寨主侯遇以献，累加检校太尉。太平兴国三年卒，太宗废朝二日，赠侍中。子继筠立。继筠，初为衙内都指挥使、检校工部尚书，克睿卒，自权知州事，授检校司徒、定难军节度观察留后。太宗征北汉，继筠遣银州刺史李光远、绥州刺史李光宪，率蕃汉兵列阵渡河，略太原境，以张军势。太平兴国五年卒，弟继捧立。继捧，初为衙内指挥使，嗣继筠为留后。继捧从父、绥州刺史、西京作坊使李克文表言：继

捧不当承袭，请遣使与偕至夏州。谕继捧，令入朝（《西夏书事》：太平兴国六年秋八月，银州刺史李克远袭夏州，不克。冬十一月，继捧以银州变闻。太宗诏令抚绥属族，无使滋乱）。七年，继捧以地献于宋。其弟继迁乃复兴，故叙首继迁云。（《宋史》、《辽史》、《旧五代史》、《长编》）

卷一

太祖神武应运法天神智仁圣至道广德孝光皇帝李继迁，继捧族弟也。高祖思忠，尝从兄思恭讨黄巢，拒贼于渭桥，表有铁鹤，射之没羽，贼骇之，遂先士卒。战没，僖宗赠宥州刺史，祠于渭阳。曾祖仁瀚，仕唐银州防御使。祖彝景，嗣于晋。父光俨，嗣于周。建隆四年，继迁生于银州无定河（按无定河有李继迁寨，见《米脂县志》），生而有齿。开宝七年，授定难军管内都知蕃落使。（《宋史·夏国传》）

夏五月己酉，夏州留后李继捧献其银、夏、绥、宥四州（按《东都事略》作以夏、银、绥、宥、静五州之地来归。《长编》作献其所管四州八县）。六月乙亥，遣使发继捧缁麻已上亲赴阙。其弟继迁奔地斤泽。

继捧之先，累四世未尝入觐。继捧至，宋帝甚嘉之，赐白金千两、帛千匹、钱百万。祖母独孤氏亦献玉盘一、金盘三，皆厚赉之。继捧陈其诸父昆弟多相怨怼，愿留京师，乃遣使夏州，护缁麻已上亲赴阙。独继迁居银州，不乐内徙。继迁时年二十（按《长编》作年十七），勇悍，有智谋，与弟继冲（《东都事略》作继忠）、亲信张浦等谋曰：“吾祖宗服食兹土逾三百年，父兄子弟列居州郡，雄视一方。今诏宗族尽入京师，死生束缚之，李氏将不血食矣，奈何？”继冲曰：“虎不可离于山，鱼不可脱于渊。请乘夏州不备，杀诏使，据绥、银，可以得志。”浦曰：“不然。夏州难起家庭，蕃部观望，克文兼知州事；尹宪以重兵屯境上，卒闻事起，朝发夕至；银州羌素不习战，何以御之？吾闻小屈则大伸，不若走避漠北，安立室家，联络豪右，卷甲重来，未为晚也。”继迁善之。伪称乳母死，出葬郊外，以兵甲置棺中，与其党数十人，奔入蕃族地斤泽。泽距夏州东北三百里。（《宋史·太宗本纪》、《夏国传》，《长编》卷二十三、二十五及《西夏书事》。按《夏国传》：太宗尝宴群臣苑中，谓继捧曰：“汝在夏州，用何道以制诸部？”对曰：“羌人强悍，但羁縻而已，非能制也。”）

十月，夏州奏：“击李继迁，破之。”（司马光《稽古录》。按《长编》第言，夏州言戎人拒命，发州兵击败之。）

十一月己酉，以李继捧为彰德军节度使，并官其昆弟夏州蕃落指挥使克信等十二人有差。

权知夏州克文，亦以唐僖宗所赐其祖思恭铁券及朱书御札上于朝，改博州防御使、绥州刺史。克宪初偃蹇，不奉诏。宋帝遣袁继忠往谕，克宪谓继忠曰：“李氏何负于朝廷？不能以一州相假乎？”继忠曰：“天子以夏州归顺，锡以车旗，予以银币，将擢其诸父、昆弟并居方面，宠荣极矣。绥、银僻在羌夷，民贫地瘠，朝廷召公等入京，共享富贵。今克文诣阙，绥州孤立无援，若犹怀顾望，一旦兵临，羌人嗜

利忘义，势涣心离，悔何及耶！”克宪迟疑久之，乃随继忠入朝。（《宋史·夏国传》、《袁继忠传》及《西夏书事》）

十二月，宋诏：赦银、夏等州常赦所不原者。（《宋史·太宗本纪》）

春三月，继迁入贡。内侍秦翰赍敕招之，不听。

继迁闻继捧等俱受恩命，遣所部诣麟州贡马及橐驼等物，奉表言：“世泽长存，祖功未泯，人心思旧，蕃部乐推，不望通显皇朝，但假馀生戎落，克遂肯构肯堂之志，常为不侵不叛之臣”云云。宋帝使秦翰赍敕谕曰：“朕恭迓天庥，懋昭皇极。山陬海澨，尽一车书；日照月临，罔非臣庶。尔河西李氏，世分旄钺，久任边疆，忠节著于前朝，丰功彰于昭代。属兹家庭多难，几化参商；幸逢恩诏曲全，无亏棣萼。业经同族共列王朝，何忍一夫远居荒俗！况夷落之内，或有跳梁；亲近之间，岂无煽动？敢行旅拒，难逃天诛，不特宗祀忽焉，抑且身名两败。细为善后，合念归诚。宠秩有加，不失当躬富贵；恩荣勿替，永贻奕世箕裘。祸福分途，从违早计。”继迁留翰宿帐中，出入无疑间。翰思手刃之，不得，乃还。（《宋史·秦翰传》及《西夏书事》）

夏五月，战于葭芦川，不克。

继迁数寇河西，银、夏诸州无宁日。宋帝令银、夏、绥、宥都巡检使田钦祚与西上阁门副使袁继忠率兵巡护。继迁从楮柞岭引众拒之，战于葭芦川，不胜，弃铠甲走。（《宋史·袁继忠传》）

秋九月，犯三岔口，又败。

继迁闻田钦祚、袁继忠屯兵三岔，控扼夏州要害，潜率众攻之，不胜，退入狐貉谷。钦祚等出万井口逐之。继迁请战，麾众围雄武军千人于后。继忠命龙卫指挥荆嗣往援，列阵格斗。继迁始却，失人马七百馀。已，钦祚军还，依山为营，继迁亦寨其下。钦祚与嗣募劲卒五十人，乘夜纵火击之。继迁不及备，营栅悉毁，军士死者千馀人。（《宋史·荆嗣传》）

西人攻宥州，巡检使李询击走之。

初，宋帝诏绥、银、夏等州官吏，招引没界外民归业。继迁见部下携贰，谓张浦曰：“我宗社久墟，蕃众饥敝。今中国以财粟招抚流民，亲离众散，殆不可支。”浦曰：“宋兵遍驻银、夏，势难与争。宥州富庶，恃横山为界，若诱诸部并力图之，厄险观变，亦克复之策也。”继迁乃诱西戎众，合二万人攻宥州。巡检使李询率所部蕃汉卒击走之。（《宋史·太宗本纪》及《西夏书事》）

冬十月，知夏州尹宪侦知继迁所在，与巡检使曹光实掩击之，获其母、妻，俘斩甚众。继迁走。

继捧之入朝也，以光实为银、夏、绥、麟、府、丰、宥州都巡检使。继迁逃入蕃落，为边患。光实与知夏州尹宪侦知继迁复至地斤泽，选精骑，夜发兵掩袭。再宿而至，斩首五百，烧四百余帐，获继迁母、妻及羊、马器械万计。继迁仅以身免。（《宋史·夏国传》及《曹光实传》。按《东都事略》获继迁母、妻，不详年月。《宋史·夏国传》系此事于太平兴国八年，《太宗纪》则在雍熙元年，传纪不合。又《长编》系于是年九月，与《宋史》系于十月又不合，《宋史》盖据奉到之日耳。又按《本纪》所俘千四百余帐，与《尹宪传》、《夏国传》、《长编》作焚四百余帐不同。）

十二月，聚兵黄羊平。

平在夏州北。招来蕃众，兵势复振。于是，羌豪野利等族，皆以女妻之。（《西夏书事》。按《宋史·夏国传》景德元年，继迁卒，子德明立，年二十三，母曰顺成懿孝皇后野利氏。考《帝纪》，太宗雍熙元年至真宗景德元年，共年二十，是德明生母非此野利氏可知。史臣曰：“番俗诸母众多，不能备详，职此故也。”亦见《西夏书事》。）

春二月，李继迁诱杀宋汝州团练使曹光实，遂袭银州据之。

继迁连娶豪族，转迁无常，渐以强大。而西人以李氏世著恩德，往往多归之。出其祖彝兴像，以示戎人，戎人皆拜泣，因语其豪右曰：“李氏世有西土，今一旦绝之。尔等不忘李氏，能从我兴复乎？”众曰：“诺。”初，继迁弃银州，番部拓跋遇入诉本州赋役苛虐，乞移居内地，宋帝不许，遂作乱，夏州巡检梁迥率兵讨破之。遇等散居山谷，遣人说继迁曰：“银州地居四塞，西接夏、绥，东邻麟、胜，公家先泽未远，若潜师以来，遇以番众济之，城可得也。”继迁问计于众，从弟延信曰：“地斤之役，乃备御之疏，非战斗之罪。漠北不足以立室家，今遇众来归，天假之便，失此不图，后悔何及？”张浦曰：“时不再来，机不可失！但曹光实老将知兵，若不诱之离城，攻其无备，我军大创之余，鹤唳风声，难保必胜也。”于是，遂与弟继冲、破丑重遇贵、张浦、李大信等起夏州，乃诈降，使人给光实曰：“我数奔北，势窘不能自存矣，公许我降乎？”因致情款，陈讲甥舅之礼，期某日降于葭芦川。光实信之，且欲专其功，不与人谋。及期，继迁先设伏兵，令十数人近城迎光实。光实从数百骑往赴之，继迁前导北行，将至其地，举手麾鞭而伏兵应之，光实遂遇害。光实从子克明，时护輜重在后，闻光实死，惧军乱，秘不发丧。阳令人西来传光实令，还军银州，而潜与仆张贵入敌中获光实尸以还。继迁遂袭银州据之。（《宋史·太宗本纪》、《夏国传》、《曹光实传》及《西夏书事》）

继迁自称定难军留后，以张浦、刘仁谦为都押牙，预署诸州刺史等官。

继迁既杀光实，假其旗帜，袭破银州，获军资器械无算，于是蕃族附者日众。李大信等议推继迁为定难节度、西平王，号令蕃众。张浦曰：“自夏州入觐，无复尺疆，今甫得一州，遽尔自尊，恐乖众志。宜先设官授职，以定尊卑，予署酋豪，各领州郡，使人自为战，则中国疲于备御，我得尽力于西土矣。”继迁曰：“是我心也。”遂称都知蕃落使、权知定难军留后。以浦、仁谦为左右都押牙，李大信、破丑重遇贵为蕃部指挥使，李光祜、李光允等为团练使；复署蕃酋折八军为并州刺史，折罗遇为代州刺史，嵬悉咩为麟州刺史，折御乜为丰州刺史，弟延信为行军司马，其余除授有差。（《西夏书事》）

三月，破会州，焚毁城郭而去。（《宋史·夏国传》）宋遣知秦州田仁朗等将兵讨继迁。

继迁围宋河西，三族寨将折遇乜杀监军使者，与继迁合。仁朗次绥州，奏请益兵，留月馀俟报。会继迁攻抚宁寨，仁朗喜谓诸将曰：“敌人逐水草散保岩险，常乌合为寇，胜则进，败则走，无以穷其巢穴。今继迁啸聚羌、戎数万，尽锐以攻孤垒，抚宁小而固，兵少而精，未可以浹旬破。当留信宿，俟其困，以大兵临之，分强弩三百，邀其归路，必成擒矣。”仁朗部署已定，欲示闲暇，日纵酒，零捕，不恤军事。帝知之，遣使召仁朗赴阙，下御史按问仁朗请益兵及陷三族状。仁朗对曰：“所召银、绥、夏兵，其州皆留防城，不遣。所部有千余人，皆曹光实旧卒，器甲不完，故请益兵。况转输刍粟未备，三族寨与绥相去道远，非元诏所救。昨臣已定擒继迁策，会诏代臣，其谋不果。”因言：“继迁得部落情，愿降优诏怀宋之，或以厚利啖诸酋长密图之；不尔，恐他日难制，大为边患。”宋帝特贷死，流商州。（《宋史·田仁朗传》）

夏四月，李继隆等击继迁，破悉利诸族。

王侁等出银州北，破悉利诸族，追奔数十里，斩三千馀级，俘蕃、汉老幼千馀，梟代州刺史折罗遇及其弟埋乞首，牛马铠仗所获尤多。又出开光谷西杏子坪，破保寺、保香族，斩其副首领埋乜已下五十七人，降银三族首领折八军等三千馀众，复破没邵浪、悉讹诸族及浊轮川东、兔头川西诸族。麟州诸蕃请纳马赎罪，愿改图自效，助讨继迁。王侁等遂与所部兵入浊轮川，斩首五千级。继迁及折遇乜遁去。是岁，又破咩嵬及岌伽罗臙十四族，吴移、越移等四族亦降。由是麟、夏、银三州复背继迁，归宋者百二十五族，户万六千馀。（《宋史·李继隆传》、《党项传》。按岌伽罗臙，《宋史·郭守文传》作岌罗臙。又《石守信传》守信子保兴，至道二年与范庭召等五路讨贼，有岌伽罗臙数族率众来拒。保兴选敢死士数百人，衔枚夜击，歼之。自是，吴移、越移诸族归降。据此，则又似在至道二年五路出师时。）

继迁攻宋夏州。

权麟州韩崇训领兵赴援，大败之，徙监夏州军。（《宋史·韩崇训传》）继迁与宋都巡检使石保兴战于黑水河，败绩。

继迁入抄。徙银、夏、绥、府都巡检使。尝巡按鞞子寨并黑水河，趋谷中，夏人知之，以数千骑据险，渡河求战。保兴所部不满二千人，乃分短兵伏于河浒，俟其半渡，急击之，斩首百馀级，追北数十里。（《宋史·石保兴传》）

春二月癸卯，继迁遣使降于契丹。

契丹西境直对夏州，党项东山诸部臣事者多。李氏自思恭赐姓，未尝外附。继迁见诸部溃散，谋于众曰：“吾不能克复旧业，致兹丧败，兵单力弱，势不得安。北方耶律氏方强，吾将假其援助，以为后图。”乃遣张浦持重币至契丹请附。契丹主隆绪意未决，西南招讨使韩德威言：“河西为中国右臂，向年府州折氏与银、夏共衡刘汉，致大兵援应无功；今李氏来归，国之利也，宜从其请。”契丹主纳之。（《辽史·圣宗本纪》及《西夏书事》）

夏四月，契丹授继迁定难军节度使、都督夏州诸军事。

契丹主以继迁效顺，遣侍中肖里得持诏，授继迁定难军节度、银夏绥宥等州观察处置等使、特进检校太师、都督夏州诸军事，继冲为副使。（《辽史·圣宗本纪》。按《辽史·百官志》，统和四年置夏州管内蕃落使，授李继迁。置四番都军所，授李继冲。与《圣宗纪》异。）

冬十月，贡于契丹。（《辽史·西夏外纪》）十一月，党项咩兀等族谋杀继迁，不果。

继迁凶忍，虐用其属，宥州党项咩兀等族首领、都指挥遇乜布九人谋诛继迁。时继迁克期攻银州，会诸族于无定河侧。遇乜布等以暗箭射之，中其鼻，创久不愈，师期乃缓。遇乜布以闻，宋帝赐敕书安抚之。（《宋史·党项传》及《西夏书事》。按《长编》三十五，王禹偁述翟守素言，继迁曾被左右暗箭射之，横贯于鼻，偶然不死，今面上疮痕尚存。似指此事，惟不言遇乜布姓名耳。）

十二月，请婚契丹。

继迁引兵五百骑款塞，愿婚大国，永作藩辅。契丹主诏以王子帐节度使耶律襄之女汀，封义成公主下嫁，赐马三千匹。（《辽史·圣宗本纪》）

继迁复攻夏州。

知夏州安守中以三万众战于王亭镇，败绩。继迁追至城门而返。（《宋史·夏国传》）

宋以继捧为崇信节度使，克宪为道州防御使，克文遣归博州，并选常参官为通判，以专郡政。

继迁数为边患，有言继迁悉知朝廷事，盖继捧泄之，故出之。（《宋史·夏国传》）

春三月，贡于契丹。（《辽史·圣宗本纪》）

夏五月，宋以继捧为定难军节度使，赐姓名“赵保忠”，遣归镇。

初，改感德军节度使，屡发兵讨继迁，不克。又数以敕书招谕继迁及同恶蕃部，继迁亦尝遣孔目官张浦，诣知环州程德元，自陈归顺之意。然继迁终不肯降，益侵盗边境。宰相赵普建议，欲复委李继捧以夏台故地，令图之。因召赴阙，赐姓赵氏，更名“保忠”，宋帝亲书五色金花笺以赐之，授夏州刺史，充定难军节度使、夏银绥宥静等州观察处置押蕃落等使，赐金器千两，银器万两，并赐五州钱帛、刍粟、田园。保忠辞曰，宴于长春殿，赐袈衣、玉带、银鞍马，锦彩三千匹、银器三千两，又赐锦袍、银带五百副、马百匹，命右卫第二军都虞候王杲领兵千人护送之。及还，保忠以土物为赆，杲拒而不纳。（《宋史·夏国传》及《长编》二十九。按继捧授定难节度使，徐氏干学《通鉴后编》于雍熙元年及是年两书其事，赐姓名则书在雍熙元年。毕沅《续通鉴》同，并两书赐姓名。）

冬十二月，宋以继迁为银州刺史、充洛苑使。

保忠本以不能钳制部落请入朝。及归，继迁视之，蔑如也。保忠期笼络继迁，至镇数月，上言继迁悔过归款，乃授继迁官，然实无降心也。（《宋史·夏国传》及《东都事略》）

春正月壬辰，李继迁与兄继捧有怨，乞与通好。契丹主知其非诚，不许。（《辽史·圣宗本纪》）

三月戊戌，契丹以义成公主归李继迁。（《辽史·圣宗本纪》。按《圣宗本纪》于统和四年十二月书，以王子帐耶律襄之女封义成公主，下嫁继迁。辽统和四年乃宋雍熙三年，与《宋史》正合。而《纪》于七年三月又书，以义成公主下嫁继迁，或系许婚在四年，下嫁则在七年也。见《续通志·西夏记》载注。）

贡于契丹。（《辽史·西夏外纪》）

冬十月，宋以定难军节度使赵保忠同平章事。（《宋史·太宗本纪》）十二月，掠西蕃贡使于橐驼口。

先是，诸蕃每贡马京师，为继迁邀击，周仁美领骑士为援，敌不敢犯。（《宋史·周仁美传》）

春正月，遣使如契丹谢婚。（《辽史·西夏外纪》）

三月，贡于契丹。

初，继迁流离沙碛，虽臣事契丹，贡不成礼。及契丹妻以公主，羌部慑服，输牲畜者日众。继迁遣使如契丹，献良马二十匹、粗马二百匹、驼一百头、锦绮三百匹，织成锦被褥五合，苁蓉、甘石、井盐一千斤，沙狐皮一千张，兔鹘五只，犬子十只。自后，每岁八节贡献。（《辽史·圣宗本纪》及《契丹国志》）

夏四月，保忠袭破宥州御泥布、啰树二族。

保忠奉宋帝诏市马，已获三百匹。二族附继迁，不肯卖马。保忠领兵掩杀二百余人，擒百余人，遂降其族。（《宋史·党项传》）

秋八月，赵保忠破继迁于安庆泽，继迁中流矢遁。（《宋史·夏国传》及《稽古录》）九月，遣使如契丹献宋俘。（《辽史·西夏外纪》）冬十月，攻夏州，赵保忠乞济师。

继迁谋取夏州，遣破丑重遇贵等至州诈降，谓继迁创甚，不能军。保忠信之，不设备。继迁阴合诸族渠帅，突攻州城。继捧出兵拒战，重遇贵等从中起，保忠仅以身免，遣使上表乞援。（《西夏书事》）

是月，复遣使如契丹，以败宋军告。（《辽史·西夏外纪》）

十二月，继迁下宋麟、鄜等州，遣使告于契丹。（《辽史·西夏外纪》。按是时继迁未得银、夏，焉能越取麟、鄜？《宋史》纪、传并不载。）

契丹遣使，封继迁为夏国王。（《辽史·西夏外纪》：张齐贤曰：“契丹与中国为难，虑继迁感中国之恩，断右臂之势，署王爵以縻之，遣戎使以镇之。王爵至，则刺史之命轻矣；戎使至，则动静皆伺之，向背之心异矣。夫夏国王之称，虚名也。而在契丹命之，于彼国无损，于中国为敌，其谋不甚深哉！”按《宋史·夏国传》

作雍熙三年，契丹册继迁为夏国王，与此异。）

春正月，继迁攻夏州。宋遣商州团练使翟守素，帅兵援赵保忠。

保忠与继迁战，不胜，乞师于朝。宋帝遣翟守素率兵援之，赐保忠茶百斤、上酝十石。（《宋史·太宗本纪》及《夏国传》）二月，遣使如契丹，告伐宋捷。（《辽史·西夏外纪》）

夏四月，遣李知白如契丹，谢封册。（《辽史·西夏外纪》。按《圣宗本纪》作杜白。）

七月，以下宋银、绥二州，遣使告于契丹。（《辽史·西夏外纪》）

继迁与宋并代、夏绥、麟府三镇部署孔守正战于大横冈，败绩。复战于白池，又败。守正至行庄，焚掠而去。（《宋史·孔守正传》）继迁奉表如宋请降。宋以为银州观察使，赐姓名。

继迁走漠北几十年，阻兵嗜杀，蕃部被役属者胥怨。夏州之战，虽败保忠兵，部下指挥朗吉等潜相携贰。闻翟守素将兵来讨，恐惧，奉表归顺。丙午，授继迁银州观察使，赐以国姓，名曰“赵保吉”。保吉又荐其亲弟继冲。帝亦赐姓，改名“保宁”，授绥州团练使。并授子德明管内蕃落使。行军司马王禹偁草制词，继迁送马五十匹为润笔，不受。（《宋史·太宗本纪》及《长编》三十二、三十七并《西夏书事》。按《西夏纪事本末》有敕封诏书，诏曰：“王者推赤心以待天，鉴丹书而念旧。疆场之事，虽守在于四夷；勋烈之家，固赏延于十世。银、夏等州蕃落使李继迁，驰声沙漠，袭庆旌旗。顷者因献提封，偶怀疑惧，流寓边塞，绵历岁时。式微之咏既深，在宥之恩宜及。赐之国姓，俾预于宗盟；授以廉车，用绥于夷落。尔其体匿暇之旨，坚效顺之诚，使兄弟以如初，保公侯之必复。钦若明命，勉思令图。可特授金紫光禄大夫、检校太傅兼御史大夫、银州管内观察使，封天水郡侯，食邑一千五百户，赐姓‘赵’，名‘保吉’，仍放朝谢，许便之官。”）

八月，保忠袭继迁，克之。

继迁虽降宋，劫掠如故。时居王亭镇，保忠往袭之，继迁奔铁斤泽，貌奴、猥才二族复夺其牛畜二万馀。（《宋史·党项传》）兀泥族首领泥中佶移，复背继迁归宋。

先是，佶移内附于宋，授慎州节度使。俄复归继迁。至是，其长子突厥罗与其首领黄罗，以千馀骑降府州。（《宋史·党项传》）

冬十月，保忠降于契丹，契丹封为西平王，复姓名曰“李继捧。”（《辽史·圣宗本纪》。按继捧降契丹事，《宋史》及诸书俱不载，惟陈桱《通鉴续编》载之。《辽史考证》谓继捧未尝附于契丹，盖继迁之误。）

赵保忠复破宥州御泥布、罗树二族。以朋附继迁也。（《宋史·党项传》）继迁攻会州熟仓族。

熟仓大族，东西蕃部五千馀帐，皆保聚岩谷，为环庆藩篱。继迁不得熟仓，不能入环庆。遣使诱之曰：“身已归朝，赐国姓，今后请勿相拒，共禀朝命。”诸酋勿应。继迁由铁斤泽引兵攻之，咩悉复率来离诸族拒战，继迁始退。（《宋史·党项传》及《西夏书事》）

十二月，契丹以继迁附宋，遣韩德威持诏谕之。（《辽史·圣宗本纪》）

春二月，韩德威掠灵州，继迁遣使诉于契丹。

初，继迁之附契丹也，德威请纳之。既得继迁，诸夷皆从，玺书褒奖。未几，继迁受赂，潜怀二心。奉诏率兵往谕，继迁托以西征不出。德威忿怒，至灵州俘掠而还。继迁遣使诉状。赐诏安慰。（《辽史·圣宗本纪》及《韩德威传》。按灵州，当作银州。是时，灵州尚属中国，继迁所据乃银州，《辽史》误。）

夏四月，请通陕西互市。

继迁自婚契丹，岁时贡献悉取资于蕃族，财用渐乏。时陕西尚严边禁，磧外商旅不通。继迁上言：“王者无外，戎夷莫非赤子。乞通互市，以济资用。”宋帝诏从之。（《西夏书事》）

冬十月，贡于契丹。（《辽史·圣宗本纪》）十一月，保忠贡鹞于宋。

号“海东青”。宋帝曰：“朕不事畋游也。”还之。（《宋史·太宗本纪》及《东都事略》）

宋禁青白盐，困继迁，旋除其禁。

先是，诸羌部落树艺殊少，但用池盐与边民交易谷麦，会馈挽趋灵州，为继迁所抄。转运副使郑文宝议以为“银夏之北，千里不毛，但以贩青白盐为命尔，请禁之。许商人贩安邑、解县两池盐于陕西，以济民食。官获其利，而戎益困，继迁可不战而屈。”乃诏：“自陕以西，有敢私市者，皆抵死；募告者，差定其罪。”行之数月，犯者益众。戎人乏食，相率寇边，屠小康堡。内属万馀帐亦叛。商人贩两池盐

少利，多取他径出唐、邓、襄、汝间邀善价，吏不能禁。关、陇民无盐以食，境上骚然。帝知其事，遣知制诰钱若水驰传视之，悉除其禁，召诸族抚谕之，乃定。（《宋史·夏国传》及《郑文宝传》）

夏四月，继迁攻庆州。

继迁虽复绥、银，犹以未得宥、夏等州，遣使入请，宋帝不许。继迁怒曰：“五州故地，先业留遗，拓土展疆，是诚在我。”乃令于众曰：“身虽薄德，承累世之泽，抚诸族之豪，安能迷运守常，没身沙漠？诸君其努力图之。”遂以李大信为蕃部都指挥使，率众犯庆州。州北直接沙漠，地形漫衍，无险可恃。时以继迁纳款，战守无备，兵至人情骇惧。知州刘文质以私钱二百万给赏，于是士皆奋斗，大信不能胜。（《西夏书事》。按《宋史·刘文质传》太略。）

秋八月，入原州。

陕西岁比不登，加以馈饷劳扰，民不堪命。继迁侦知虚实，率兵入原州，围牛栏寨，与团练使石普相持数日，乃还。（《宋史·许均传》）

卷四

太宗光圣皇帝李德明，小字阿移，太祖长子也，幼晓佛书，母曰顺成懿孝皇后野利氏，即位于枢前，时年二十三。宋咸平六年十二月，继迁兵败被伤，自度孤危且死，属德明必归宋，曰：“一表不听则再表，虽累百表不得，请不止也。”（数语见《宋史·向敏中传》。李氏《长编》云：“观德明初报张崇贵书云，未葬难发表章，意犹倔强不服，朝廷多方招谕，仅得其款附耳。疑继迁此等语，或德明假托，故二年后乃言之，非其实情，当此时固未言也。”）德明泣受命。又谓张浦曰：“公等并起等夷，谊同兄弟。孺子幼长兵间，备尝艰苦，今俾以灵、夏之众，虽不能与南、北争衡，公等戮力辅之，识时审务，或能负荷旧业，为前人光，吾无憾矣。”言讫卒。宋边臣以德明初立，乞诏抚之。因赐诏，令审图去就。又诏蕃族万山、万遇、庞罗逝安（《长编》作旺善、旺威、庞咩偷布安）、万子都虞候，军主吴守正、马尾（《长编》作马干）等，能率部下归顺者，授团练使，银万两，绢万匹，钱五万缗，茶五千斤，其有亡命叛去者释罪甄录。（《宋史·夏国传》及《西夏书事》）

遣使告哀于契丹。

契丹迎夏使于临潢驿。先期，于行宫左右下御帐，设使者幕次于东南。至日，北面臣僚各常服，其余臣僚并朝服入朝。使者至幕次，有司以嗣子表状先呈枢密院，准备奏呈。先引北面臣僚并矮敦已上近御帐，相对立，其余臣僚依班位序立。引告终人使右入，至丹墀，面殿立。引右上，立；揖少前，拜跪奏讫，宣问。恭身受圣旨。引右下丹墀，面北鞠躬。通班毕，引面殿再拜。不出班，奏“圣躬万福”，再拜。出班，谢面天颜，复位，再拜。出班，谢远接，复位，再拜。赞祇候，退就幕次。再入，依前面北鞠躬，通辞，再拜；叙恋阙，再拜。赞“好去”。礼毕。（《辽史·西夏外纪》及《礼志》）

三月，遣使如契丹，上继迁遗物。（《辽史·圣宗本纪》）麟、府兵袭神堆，御之，失利。

夏州蕃部攻洪德寨，阁门祇候段守伦率兵拒之，力战三日，擒获甚众。事闻，宋帝谕缘边部署钤辖：乘继迁死，速图攻取之策。于是，麟、府路出兵攻神堆，夏兵战不胜，营栅尽破。（《宋史·真宗本纪》及《长编》五十六）

始遣使如鄜延。

鄜延钤辖张崇贵移书德明，谕以朝廷恩信。德明遣使报称：未葬，难发表章，请俟释服稟命。崇贵请遣使吊问，令大臣至边，召其亲信张浦等议之。旋赐诏曰：“近据西路缘边诸州奏，汝父族下蕃部继续来投，具言汝父于灵州界云亡。相次鄜延路

钤辖张崇贵奏称，得汝回书，云葬事未毕，难发表章，乞就便申奏事。汝父生于边陲，素有勇敢。朝廷赐以土地，授之节旄，其于心诚，亦本忠顺，迺后始因间谍，自起忧疑，事一境之干戈，隔二纪之声教。朕为人父母，富有寰区，思息战以安民，俟输诚而改节，终期彼志，遐副朕心。今览奏陈，遽云丧逝，况早联宗属，曾列侯藩，自达予闻，能不伤叹？念汝守兹空塞，方在髫龄，属此艰难，谅增衷慕。又缘信人未至，所以慰问难行，勉自扶持，式终礼制。馀事已令张崇贵与汝期约商议，想宜知悉。”（《长编》五十六及《西夏纪事本末》。按《长编》，四月，张崇贵屡请遣大臣至边议赵德明事。五月甲申朔，以兵部侍郎、知永兴军府向敏中为鄜延路缘边安抚使。崇贵筑台于保安北十里许，召戎人所亲信者与定盟约。经置大小，皆出崇贵，而敏中实总其成焉。）

六月，潘罗支遣其兄邦逋支（《长编》作帕勒布齐）入奏于宋，愿率部族及回鹘精兵，直抵贺兰山讨除残孽，请发大军援助。

宋帝赐潘罗支诏曰：“渭州引送卿兄邦逋支并教练使杨超到京，览卿等蕃书奏状，言去年十二月二十八日与李继迁斗敌，大段杀下。按《外纪》蕃贼，却被贼人劫去牌印、官告、衣服、器械等，再乞颁赐。并望差筑城人给畚鍤，令使臣到彼，其隔过迁贼处人却投来者，并乞押来，其进奉马价乞支绢等事，并已依奏，别降宣命指挥。卿忠顺朝廷，保庇部族，誓杀凶狂之党，益坚臣子之心；远率种人，同拒贼党，战斗斯久，杀获颇多，每念尔诚，不忘朕意。此外，卿所奏欲取七月回鹘并六谷蕃部，宜往贺兰山掩杀贼众，乞大兵来灵州会合，管杀迁贼者。朝廷近知继迁已死，未经殡葬，所以未欲讨除。今卿等既领师徒，远平仇敌，免为后患，甚是良图，所乞会兵，即缘地理稍遥，月日未定。今朝议候卿等才集诸族人马起离西京，即差心腹人走马赍文字报泾原镇戎军部署司，已令至时不候朝旨，率兵前进，直至城泊、萧关、天都山，已来牵制贼徒，伏截道路。贼界定须两面救应，如此邀击，必可功成。彼中诸事，更切审详，伫静边陲，永保富贵。”（《宋史·吐蕃传》及《西夏纪事本末》）

继迁部将都尾（《长编》作都威）等，率其属叛附于宋。（《宋史·真宗本纪》）

继迁种落迷般囑（《长编》作敏楚克巴）及日逋吉罗丹（《长编》作日布结）二族戕潘罗支。

继迁既死，二族亡归者龙族，欲阴图罗支。是月，会迁党攻者龙，罗支率百馀骑赴援，将议合击，遂为二族戕于帐。者龙凡十三族，而六族附迷般囑及日逋吉罗丹。西凉府既闻罗支遇害，乃率龛谷（《长编》作康古）、兰州、宗歌（《长编》作总噶尔）、觅诺（《长编》作觅诺尔）诸族攻者龙六族，六族悉窜山谷中。六谷诸豪，乃议立罗支弟厮铎督（《长编》作斯多特）为首领。宋帝以迁党未平，藉其腹背

攻制，遂加铎督朔方军节度、押蕃落等使、西凉府六谷大首领。（《宋史·吐蕃传》）

西延家妙俄、熟魏数大族，叛附于宋。

宋诸将犹豫不敢应，曹玮曰：“德明野心，不急折其翮，后必颺去。”即日将兵薄天都山，受降者内徙，德明不敢拒。（《宋史·曹玮传》）是月，赵保忠卒于宋。

保忠状貌雄毅，居环列，奉朝请，常快快不自得。咸平中，丁内艰，以本官起复，迁金吾卫上将军，判岳州，移复州。至是病剧，上言有子永哥不肖，乞配春州。宋帝以其病语，乃授水州别驾。寻卒。天禧四年，录其孙从吉为三班奉职。（《宋史·夏国传》）

契丹赠继迁尚书令，遣西上阁门使丁振来吊慰。（《辽史·西夏外纪》）

八月，遣使如契丹，谢吊赠。（《辽史·西夏外纪》。按《外纪》此条与上条均系统和二十一年。考《宋史·夏国传》：继迁死在景德元年正月二日，景德元年，即辽统和二十二年也，《辽史》先一年，殊误，故特移系于此。）

十二月，德明孔目官何宪叛归于宋。

宪，灵州人，继迁破州城时得之，爱其才，使掌兵数事。德明立，授孔目官。尝劝德明勿杀潘罗支，以为后日纳款计，不听，乃挈家乘间走邠州请降，部署以闻，宋诏令乘传赴阙。（《长编》五十八及《西夏书事》）

是岁，夏人围麟州。

宋都巡检李继周击败之，又攻永宁，为药令族合苏所败，死者百余人。（《宋史》李继周及吐蕃传）

春正月，德明遣赵保宁如契丹请封。

德明嗣职期年，未膺封册，蕃族多怀观望。行军司马赵保宁言：“国家疆宇虽廓，自西凉扰乱、先王被害，蕃众惊疑，若不假北朝威令慑之，恐人心未易靖也。”德明遂遣保宁献方物契丹，以请封册。契丹主曰：“此吾甥也，封册当时至。”待保宁加礼遣回。（《西夏书事》）

二月，遣使如契丹，告下宋青城。

契丹自澶州之败，虽与中国讲和，其戎心未尝一日忘，故许德明封册，以为臂使之需。德明欲臣中国，虑其见疑，乃以兵下青城告。（《辽史·圣宗本纪》）

西凉府六谷首领厮铎督遣其甥喃昔（《长编》作格布锡）入贡于宋，上与赵德明战斗功状。（《宋史·吐蕃传》。按《长编》载此事于是年二月。其战在何时，《真宗纪》及《夏国传》皆不书。）

夏四月，出兵攻宋环州，击败之，执其酋庆移。（《长编》作庆结。《宋史·真宗纪》）与宋熟户旺家族战，败绩。旺家族擒军主一人，以献于宋。（《宋史·党项传》）

张崇贵复以书来议和。

宋帝召崇贵赴阙，面授方略。许德明以定难节度、西平王；赐金、帛、缗钱各四万，茶二万斤；给内地节度俸；听回图往来；放青盐禁，凡五事。而令德明纳灵州土疆，止居平夏；遣子弟入宿卫；送掠去官吏；尽散蕃汉兵及质口；封镜之上有侵扰者稟朝旨，凡七事。德明悉如约，惟以子弟入质及纳灵州为难。故亦禁盐如旧，不许回图。（《宋史·张崇贵传》。）

六月，遣牙将王旻奉表如宋，求纳款。

德明闻石隰部署耿全斌率兵入伏洛关招诱蕃族，诸部内附者数千人，禁之不能止。谋之张浦曰：“先王遗命，应即表闻，缘降之太易，彼将轻我。今兵复西凉，国威已振，请之，此其时也。”乃遣王旻以继迁遗言奉表入献，略曰：“同轨同文，王者大车书于一统；至神至圣，远人瞻天日于无疆。臣父承闕边陲，蒙恩优渥，方且心乎王室，拱北极而抒诚；靡意难起同袍，纠西蕃而生事，遂致鞠躬尽瘁，赍恨莫伸。然而恋阙深情，平时恳切；作忠遗教，垂没叮咛。臣赋性颡蒙，素怀恭顺，向居苦块，欲进表而无由；今属禪除，敢请臣之或后。恭维皇帝陛下，德超邃古，道建大中。海不择乎细流，朝宗者必纳；山岂遗乎土壤；环向者咸依。伏望，俯鉴孤忠，得尽小心翼翼；重怜微末，克遵先训谆谆。存没衔恩，子孙感德”云云。宋帝见表，赐旻锦袍、银带，遣侍禁夏居厚持诏答之，赏给甚厚。（《宋史·夏国传》及《西夏书事》）

宋以德明归款，谕河西诸蕃各守疆界。（《宋史·真宗本纪》）秋七月，契丹来册德明为西平王。

契丹主使北院枢密副使萧承德持节，封德明西平王，复姓李氏，赐车、旗、衣、币等物。（《西夏书事》）

九月，宋以德明誓约未定，命向敏中自知永兴军府改为鄜延都部署兼知延州，使经略之。（《长编》六十一）

德明始遣使入贡于宋。（《稽古录》。按《长编》作德明遣其都知兵马使白文寿来贡。）冬十月，德明遣赵保宁如契丹谢封册。

义成公主无所出。契丹册德明时，谕以善事公主，克光先烈。德明遣保宁往谢，且曰：“恪遵谕诏，未敢有违也。”（《西夏书事》）

十一月，河阳节度使王显请许德明称藩，不须纳质，又请通青盐以济边民之用。（《长编》六十一）宋吏部尚书张齐贤上疏，请备德明。

疏言：“臣在先朝，常忧灵、夏终为继迁吞并，言事者以臣所虑为太过，略举既往之事以明本末。当时臣下皆以继迁祇是怀恋父祖旧地，别无他心，先帝与银州廉察，庶满其意。尔后攻劫不已，直至降麟、府州界八部族蕃酋，又胁制贺兰山下帐族，言事者犹谓封奖未厚。洎陛下赐以银、夏土壤，宠以节旄，自此奸威愈滋，逆志尤暴，屡断灵州粮路，复扰缘边城池，数年之间，灵州终为吞噬。当灵州、清远军垂欲陷没，臣方受经略之命。臣思继迁须是得一两处强大蕃族方与为敌，此乃‘以蛮夷攻蛮夷’，古今之上策也，遂请以六谷名目封潘罗支，俾其展效。其时近臣所见与臣不同，多为沮扰。及继迁为潘罗支所杀，臣虑继迁之子德明乘大驾东幸之际，去攻六谷，向使潘罗支尚在，则德明未足为虞，今潘罗支已亡，厮铎督恐非其敌。望委大臣经制其事。”（《宋史·张齐贤传》）

十二月，德明又遣其教练使郝贵入贡于宋。（《长编》六十）宋博州防御使李克文卒。

克文在镇，恭谨守法，继迁之乱，口不言兵。卒，赠岳州防御使。大中祥符中，子继元为阁门祇候，上表言已与继迁本五从兄弟，名同上字，心甚耻之。愿改名守元。宋帝诏从之，擢供备库副使，厚其廩给。（《西夏书事》）

夏五月，德明遣其兵马使贺永珍如宋贡马。（《长编》六十三）甲辰，德明又遣其兵马使贺守文来贡。

先是，向敏中及张崇贵与德明议立誓约，久未决。德明虽数遣使修贡，然于七事讫莫承顺，累表但云乞先赐恩命，徐议之。时已有诏许德明毋纳灵州，既又赐敏中等诏，谕德明止遣子弟宿卫，及毋得攻劫西路进奉蕃部，纵有争竞，并取朝廷和断，他约悉除之，然亦不听回图往来及放行青盐之禁。乙巳，敏中等言二事苟不如约，恐乖前议，请皆与之。宋帝以德明变诈难信，倘务姑息，必貽后患，复赐敏中等诏，令熟计复奏。（《长编》六十三）

宋知镇戎军曹玮请急击德明，不报。

当德明请命于朝也，玮曰：“继迁擅河南地二十年，兵不解甲，使中国有西顾之忧。今国危子弱，不即捕灭，后更强盛不可制。愿假臣精兵，出其不意，擒德明送阙下，复河西为郡县，此其时也。”帝方以恩致德明，不报。玮知镇戎甚有威名，尝与夏人战，小捷，夏人引去。玮侦敌去已远，乃缓驱所掠牛羊、辎重而还，颇失部伍。夏人闻玮逐利行迟，师又不整，返袭之。玮愈缓行，得地利处乃止，以待夏人，将至，玮使人谕曰：“蕃军远来，必甚疲，我不欲乘人之急，请休憩士马，少选决战。”军方苦疲甚，皆欣然严军歇。良久，各鼓军而进，大破之。遂弃其牛羊而还。徐谓其下曰：“吾知贼已疲，故为贪利以诱之。比其复至，已行百里矣。若乘锐便战，犹有胜负。远行之人，若小憩则足痹，不能立，人气亦阑，吾以此取之。”（《宋史·曹玮传》及沈括《笔谈》。按《长编》：泾、原、仪、渭都钤辖秦翰亦请出兵击德明，不许。）

白池军主盛佶（《长编》作星结）潜输军情于宋。

佶从子名厓（《长编》作明叶）为宋府州兀泥族大首领，佶密遣使谕名厓云：“德明虽外托修贡之名，而点阅兵马尤急，必恐劫掠山界。”名厓以告，宋帝嘉之，降诏抚谕，就赐锦袍、银带。（《宋史·党项传》）

宋帝复赐向敏中等诏，使谕德明。

向敏中等言：“德明终未推诚，恐难尽副元约。但令遣长子、亲弟宿卫京师，及贡结誓表章，自今毋得攻却内属蕃部，纵有争竞，亦当奏裁，如诏书所指三事，颇为要切。候其亲弟到阙，并得誓章，则先许五事悉愿与之，姑务羁縻，以缓争战可也。”帝意许焉，又虑德明空接续进奉，肆其徼求，在彼固无亏损，而我渐失机会，复赐敏中等诏，令亟图之；并以边臣及蕃部所奏德明迫胁攻却事状付敏中等，且言所掠去蕃口纵不能给还，亦当重作要约，绝其后犯。因促贺守文等入辞，往诣敏中等面受诏书，归谕德明。（《长编》六十三）

六月，德明闻宋司天奏周伯星见，复遣贺永珍入贺。（《长编》六十三）

秋七月，熟户叶市、潘、保、薛等复叛归宋，德明表请诛之，不得。

继迁曾掠延州蕃部叶市、潘、保、薛等四族，安置绥州。已而，挈族来投镇戎军，秦翰出兵援之。德明诉其事于朝，愿举刑章。翰言：“四族本皆熟户，兹还旧居，非新有招纳也。”乃诏翰与张崇贵移牒报德明，自今勿复侵扰境外。（《长编》六十三）

遣使贡马于宋。

德明献马百五十匹，谢前答赐之物。宋赐袈衣、金带及器币等答焉。并谕自今答赐，勿复谢恩。（《长编》六十三）八月，德明谋侵麟州，不果。

河东蕃落诸将因德明信约未定，皆训练士马，科率器械以待。德明谓其图己，点集诸族兵马，谋入河东，掠麟、府诸州。内属蕃户侦知，以报向敏中，请命帅臣镇之。已而，德明兵不出。（《长编》六十三）

宋与德明议要约，久不决。

向敏中等与德明议朝廷所降要约事，德明累遣人告敏中等云：“遣亲弟宿卫，上世未有此例，其他则愿遵承。”仍欲以良马、橐驼千计入贡，辞意恳切。敏中等以闻，且言要约未备，故不敢请行封爵。帝曰：“远方之俗，本贵羁縻耳。”乃诏谕敏中等：“如德明再遣人至，果不欲令亲弟宿卫，则所乞回图往来及放行青盐之禁，朝廷并不许，然不阻其归顺之志也。”陈尧叟言：“青盐如置榷场，官亦不可买之，盖平夏青盐甚多，若官买必须官卖，既乱禁法，且解州两池盐不复行矣。”帝曰：“德明如遣子弟宿卫，则许放行青盐，岂是不乱禁法也？今榷场既不为买，当先以文告谕之，若异时德明复有恳请，则当今榷场量定分数收市。”（《长编》六十三。按五月十九日，诏以要约三事付敏中，令与德明议。至此月十九日，敏中始复奏，首尾凡九十日，盖以此事必再三往返，故非一时可决耳。《会要》载敏中此奏于七月十三日，与《实录》不同，然其事则不异，恐《会要》误也。德明后此四旬始进誓表，实九月二十八日，而《会要》以为七月二十七日。若七月二十七日既进誓表，何故历九月至十月一日始行封爵乎？《会要》误。见《长编》注。）

行牒，索降蕃于鄜延。

景德初，绥州蕃部指挥色木结皆以等附宋，帝命给府州地居之。至是，德明行牒鄜延，请还本道。朝议以色木结皆以归投在进誓表前，谕止之。（《长编》六十四）

九月，德明降宋。

鄜延钤辖张崇贵入奏：德明遣牙校刘仁勛来进誓表，请藏盟府，且言所乞回图及放行青盐之禁，虽宣命未许，然誓立功效，冀为异日赏典也。帝嘉奖，赐诏曰：“卿门承勋绪，世享国封，屡拜章函，来修贡职，愿为屏翰，以绍祖先。朕乃眷至诚，用颁温诏，令陈信誓，洞见倾输，嘉奖之怀，寤兴良积。”（《长编》六十四及《西夏纪事本末》。按崇贵入奏在是月丁卯先。癸卯，向敏中、张崇贵等言，赵德明累表归顺，词意精确，望降诏慰谕，从之。）

冬十月，宋以德明为定难军节度使兼侍中，封西平王。

制曰：“利用建侯，外监方国，抚宁陬落，临长士民。在名器以斯崇，匪勋贤而弗授。故定难军节度使赵保吉男德明，袭其令绪，蔚有长才，举宗联命氏之荣，奕世荷殿邦之寄，务尊王室，动守朝经，率职献琛，拜章请吏，眷言恭顺，宜及褒崇。是用建上将之旌旗，锡真王之印绶。纁乃旧服，镇于夏台。於戏！信誓之言，与丹青而炳焕；宠荣之固，同带砺以绵长。期宣翼戴之勤，协赞混同之化，永作藩辅，不其美欤！可特进检校太师兼侍中、夏州刺史、充定难军节度使、夏银绥宥静等州管内观察处置押蕃落等使、上柱国，封西平王，食邑六千户，食实封二千户，赐推忠保顺亮节翊戴功臣，仍依内地节度使例给俸。”又录德明誓表，令渭州遣人赍至西凉府，晓谕诸蕃转告甘、沙首领。（《宋史·真宗本纪》《夏国传》及《长编》六十四。按《宋史·石普传》：赵德明纳款，诏降制命，鄜延路都总管石普言，不宜授以押蕃落使，使之总制属羌，则强不可制矣，乃止兼管内蕃落使。与《夏国传》不同。）

宋以内侍左右班都知张崇贵为赵德明旌节官告使，太常博士赵湘副之。

赐德明裘衣、金带、金鞍勒马、银万两、绢万匹、钱二万贯、茶二万斤。（《长编》六十四。）

宋诏西边州、军：德明已受朝命，缘边屯戍量留步兵，馀悉分屯河中府、鄜州、永兴军，以就刍粟。（《长编》六十四。按《宋史·孙全照传》：赵德明纳款，朝议减西鄙戍兵，令屯近地。全照以边防不可无备，未即奉诏。上曰：“全照是好勇多言者，德明使已至阙，复何虑焉。”又《长编》是年十一月，邠宁、环庆都部署孙全照请令张崇贵严戒德明：自今蕃部归投诸州者，无得入境追逐。上曰：“德明族帐继有归投者，德明虽遣追逐，未尝敢入境也。若从全照所奏，恐致危疑。”乃谕全照：“如德明果遣骑入境，则具以闻。”）

德明遣人致书延州，送遗驼、马、土物。宋帝诏令向敏中等复书，以礼物答之。（《长编》六十四。）十一月，酋长苏尚娘复叛归宋，不纳。

镇戎军曹玮言：“叛去酋长苏尚娘，复求归附。”诏报玮曰：“尚娘反复无信，特恐狙诈，以误边吏。又使德明缘此为词，不可纳也。”（《宋史·党项传》。按《长编》是年九月，知镇戎军曹玮言，伊普才迭三族首领率其属来归，欲发兵应接。上以德明输贡效款，议加朝命，乃诏玮等：如旧系熟户，则依例安置，自馀勿为发兵。又十月甲戌，赵德明上言：“臣所管蕃部，近日不住归镇戎军，盖曹玮等招纳未已。缘臣已受朝命，乞赐晓谕。”诏以德明誓表遍谕边臣。）

契丹耶律唐古，禁奸民鬻马于夏界。（《辽史·耶律唐古传》）

德明遣使如宋，贡御马二十五匹，散马七百匹，驼三百头，以谢朝命。（《长编》六十四）

是月，德明又遣使入贡于宋。（《长编》六十四）

春三月，德明遣牙吏如宋，贡马、驼，谢廩给。

德明自称草土臣，献马五百、橐驼二百，谢给俸廩。宋帝诏赐德明裘衣、金带、器币。旧制，贡物谢恩，止给来使缗帛，帝以德明进奉频仍，特加赐焉。德明又请因进奉使赴京，市所须物，从之。（《长编》六十五）

张崇贵请设缘边安抚使，控西夏。

崇贵言：“德明输款请吏，贡奉之使，道路相属。望依北面例，择官有吏干知边事者为缘边安抚使，疆场事务，听以便宜。”帝曰：“西鄙宁静，别无经营，苟德明能守富贵，无虑朝廷失恩信也。增置官属，徒为张皇，不若委卿静制之。”（《长编》六十五）

夏四月，建馆舍于绥、夏二州。

德明以中国恩礼优渥，天使频临，遂于绥、夏州建馆舍二：曰“承恩”，曰“迎晖”。五百里内，道路、桥梁修治整饬，闻朝使至，必遣亲信重臣，郊迎道左；礼仪中节，渐有华风。（《西夏书事》）

五月，德明母罔氏薨。

宋边臣请遣使吊问，王钦若曰：“此特边臣奏耳，德明未尝来告。”帝曰：“夷人何知礼，不若使边臣谕之，俟其奏至，即遣使吊祭，起复、赙赠，亦准藩臣例也。”钦若曰：“闻德明诸母甚多，异时安可一一推恩？”王旦曰：“德明今自称草土臣，若朝廷不降制起复，则德明于礼难安。”帝然之，授德明起复镇军大将军、左金吾卫上将军、员外置同正员，馀如故。命殿中丞宣城赵穉为吊赠、官告等使。德明以乐迎告至其母柩前，明日衣禪衣受赐，泣曰：“蕃夷母丧，蒙天子吊赠、起复之命，宠荣极矣！”（《长编》六十五）

遣使告哀于宋、契丹。（《西夏事略》）遣使如宋，请修五台山十寺。

为追荐其母罔氏也。宋遣阁门祗候袁瑀为致祭使，护送供物至山。（《宋史·夏国传》。按《长编》：德明请诣五台寺修设，追荐其母。陈尧叟欲令张崇贵谕以路由河东，多涉军垒不便，听由镇州路往。上曰：“宜令崇贵答以不敢奏闻，若诚愿则

听致施物于鄜延，委崇贵差人送五台也。”又《长编》：瑀至夏州，遗忘抚问辞，且发言轻易，及还，坐落职。）

复献马五百匹于宋，助修章穆皇后园陵。（《宋史·夏国传》）秋七月，契丹使来吊祭，又遣使起复。德明对待使者如宋使仪。（《辽史·圣宗本纪》）

谋劫西凉，袭回鹘。

宋边臣侦知，言于帝。帝以六谷、甘州，久推忠顺，思抚辑之。乃遣使谕厮铎督，令援结回鹘为备。（《宋史·吐蕃传》。按《长编》：上谓王钦若等曰：“德明屡言，西凉府原属部内，见各纳质及人使往来；且继迁因攻西凉，为其所毙。今德明意将阻绝六谷，使不得预缘边属户。朝廷若不绥抚，则德明足以复仇。近秦翰译六谷蕃书来上，但言为德明所侵略无宁日，见蒐兵警备。可以六谷书付张崇贵，令谕德明。）

行牒延州，请止保安军修驿。

自德明纳款，宋帝令缘边城池依誓约应行修葺外，自馀移徙寨栅，开复河道，无大小悉禁之。时保安军起葺驿舍，德明移牒延州，言边民疑惧不安，愿罢其役。从之。（《长编》五十六）

索夏州民刘严等，不得。

先是，夏州民刘严等二千余人来归，诏以延川县旷土给之。令各有蓄积。而所居当绥州要路，向者德明部族入寇，多为所擒戮。及德明归顺，屡移牒求严等复还。宋帝难之，颇严边禁。（《长编》六十五）

德明请置榷场于保安军，许蕃民贸易，从之。

宋令以驼、马、牛、羊、玉、毡毯、甘草易缯帛、罗绮；以蜜、蜡、麝脐、毛褐、原羚角、硃砂、柴胡、苁蓉、红花、翎毛易香药、瓷漆器、姜桂等物，非官市者听与民交易，入贡至京者纵其为市。（《宋史·食货志》）

冬十月，请行《仪天历》。

宋初用周时旧历，建隆二年，始命司天少监王处讷别造新历，命名“应天”。太平兴国间，改为“乾元。”真宗嗣位，命司天监史序考验前法，研核旧文，取其枢要，成《仪天历》。时咸平四年三月也。西夏自继迁俶扰，羌戎不知正朔几二十年。德明遣贡使，表请宋帝以新历及冬服赐之。初，诏延州牙校赍往，比闻德明葺馆舍

、修道路以俟使命，乃命阁门祇候往赐，德明受而行之。（《长编》六十七及《宋史·律历志》）

德明请于麟州西置榷场，行互市。宋帝以延州已置，不许。（《长编》六十七）

卷六

景宗武烈皇帝李元昊，小字嵬理（《长编》作叶迈，曾氏《隆平集》作崖块），国语谓惜为“嵬”，富贵为“理”，后更名曩霄。太宗德明长子也，母曰惠慈敦爱皇后卫慕氏。性雄毅（《长编》作性凶鸷猜忍），多大略，善绘画，能创制物始。圆面高准，身五尺馀。少时好衣长袖绯衣，冠黑冠，佩弓矢，从卫步卒张青盖。出乘马，以二旗引百馀骑自从。晓浮图学，通蕃汉文字。案上置法律，常携《野战歌》、《太乙金鉴诀》。弱冠，独引兵袭破回鹘夜洛隔可汗王，夺甘州，遂立为皇太子。数谏其父母臣宋，德明辄戒之曰：“吾久用兵，疲矣。吾族三十年衣锦绮，此宋恩也，不可负。”元昊曰：“衣皮毛，事畜牧，蕃性所便。英雄之生，当王霸耳，何锦绮为？”德明卒，乃袭位。（《宋史·夏国传》）

遣使如宋、契丹报哀。

使臣至宋，宋帝辍朝三日，令司天监定举哀挂服日辰。其日，乘輿至幕殿，服素服。太常博士引太常卿当御坐前跪，奏请皇帝为夏王赵德明薨举哀，又奏请十五举音，又奏请可止。文武百僚进名奉慰。告哀使、副以下朝见，首领并从人作两班见。先首领见，两拜后，班首奏：“圣躬万福。”又两拜，随拜万岁。喝“赐例物酒食”，跪受，起，又两拜，随拜万岁。喝“各祇候”，退。从人仪同。是日，皇太后至幕殿，释常服，白罗大袖。白罗大带，举识如皇帝仪。（《宋史·礼志》）

宋赠德明太师、尚书令兼中书令。以尚书度支员外郎朱昌符为祭奠使，六宅副使、内侍省内侍押班冯仁俊副之，赙绢七百匹、布三百匹，副以上酝、羊、米、面。将葬，赐物称是，皇太后所赐亦如之。（《宋史·夏国传》）

冬十一月，遣使如契丹贺应圣节。（《辽史·兴宗本纪》）契丹使来，册封元昊为夏国王。（《辽史·兴宗本纪》）

宋使工部郎中杨告为旌节官告使，来授元昊为定难军节度使、西平王。

制曰：“胙土受氏，维王所以褒有功；建国承家，非贤不能保厥世。乃眷西陲之守，方畴外御之劳，式涓刚辰，庸告列位。故定难军节度、夏银绥宥静等州管内观察处置押蕃落等使、开府仪同三司、检校太师、守太傅、尚书令、持节都督夏州诸军事、行夏州刺史、上柱国、夏王、食邑两万一千户、食实封七千户赵德明男元昊，器怀英达，义节坚明，孝恭尽于事亲，恩信长于御众。惟乃先正，奉于本朝。嘉捍难于边衡，赐同姓于宗籍。象贤继世，尔实宜之。於戏！书盟府之勋，既载山河之誓；瞻元侯之略，岂无弓矢之传。尚体顾怀，勿忘钦率。可特授特进、检校太师兼侍中、持节都督夏州诸军事、夏州刺史、充定难军节度使、夏银绥宥静等州管内观察处置押蕃落等使、上柱国、西平王，食邑六千户，食实封一千户。仍赐推忠保顺

亮节翊戴功臣。”使者至其国中，元昊迁延遥立，屡促之，然后至前受诏。及拜起，顾其左右曰：“先王大错，有国如此，而乃臣属于人！”设席自尊大，告命徙坐即宾位，不为屈。既而飧告于厅事，其东屋后若有千百人锻声。告阴知其必叛，还朝秘不敢言。（《宋史·夏国传》及《梦溪笔谈》、《西夏纪事本末》）

改姓嵬名氏，称“吾祖”。

元昊既袭封，衣白窄衫，毡外红里，冠顶后垂红结绶，表异蕃众。复以李、赵赐姓不足重，自号嵬名氏，称“吾祖”。“吾祖”，华言可汗也。于是属族悉改嵬名，蕃部尊荣之，疏族不与焉。（《宋史·夏国传》）

元昊改元显道。

元昊招纳亡命，申明号令，以兵法勒诸部。每举兵，必率部长与猎，有获则下马环坐饮，割鲜而食，各问所见，择取其长。因避其父讳，改中国明道元为显道，称于国中。（《宋史·夏国传》。）

春正月，贡于契丹。（《辽史·兴宗来纪》。）三月，下秃发令。

元昊欲革银、夏旧俗，先自秃其发，然后下令国中，使属蕃遵此，三日不从，许众共杀之，于是民争先秃发，耳垂重环以异之。（《长编》一百十五）

夏四月，宋使来赐太后遗物。

章献皇太后崩，宋帝使供备库副使李用和持太后遗留物赐元昊。（《长编》一百十二）五月，升兴州为兴庆府，遂立官制。

元昊自先世并吞西土三十余年，聚中国所赐资财无算，外倚契丹为援，异谋日甚。升兴州为府，改名“兴庆”，广宫城，营殿宇，其名号悉仿中国所称。故事，羌俗以帐族盛大者为长官，亦止有蕃落使、防御使、都押牙、指挥使之职。至是，始立文武班，曰中书，曰枢密，曰三司，曰御史台，曰开封府，曰翊卫司，曰官计司，曰受纳司，曰农田司，曰群牧司，曰飞龙苑，曰磨勘司，曰文思院，其制多与宋同。自中书、枢密、宰相、御史大夫、侍中、太尉以下，命蕃汉人分为之。而其专授蕃职，有宁令，有谟宁令，有丁卢，有丁弩，有素赍，有祖儒，有吕则，有枢铭，皆以蕃号名之。（《宋史·夏国传》及《西夏书事》）

别服式。

文资则幘头、靴笏、紫衣、绯衣；武职则冠金帖起云缕冠、银帖间金缕冠、黑漆冠

，衣紫旋襴，金涂银束带、垂蹠躡，佩解结锥、短刀、弓矢鞬，马乘鲛皮鞍，垂红纓，打跨钹拂；便服则紫皂地绣盘毯子花旋襴，束带；民庶青、绿，以别贵贱。（《宋史·夏国传》）

十二月，契丹禁夏国使沿路私市金铁。（《辽史·兴宗本纪》）

春正月，元昊称制改元。

元昊虽仍贡奉，然车服、仪卫，悉拟帝制。至是，策士杨守素上言：“王者神武立功，德威御众，要必建元表岁，以示维新。国家累世经营，规模宏远，犹遵中国旧号，岂足彪炳皇猷，昭示区宇？”元昊乃下谕，改显道三年为开运元年。逾月，或告以石晋败亡年号也，乃改广运。（《宋史·夏国传》及《西夏书事》。按广运，《夏国传》作广民，此从《长编》）

是月，元昊始攻府州。（《长编》一百十四。又六月乙丑，府州言，元昊自正月后数入寇。诏并、代部署司严兵备之。）宋始为夏人除馆舍。

元昊岁遣人至宋，出入民间无他禁。宋臣韩亿请下诏，为除馆舍礼之，官主贸易，外虽若烦扰，实羁防之。（《宋史·韩亿传》）秋七月，掠环庆。

庆州西七十里为马岭寨，寨北十馀里有蕃部杀牛族，领族帐二千馀户，负险自固，向不附中国。元昊令为前驱，掠环、庆州境，杀戮居人，朝廷下诏约束，不听。八月，乃遣入内供奉官周惟德往环庆路，体量边事。（《长编》一百十五及《西夏书事》。按《长编》：八月，徙知定州、神龙卫四厢都指挥使刘平为环庆路副都部署。平尝言：“臣在陕西见元昊车服僭窃，势且叛矣。宜严备之。”不听。及是，帝戒平曰：“知卿有将略，故委以边寄，卿其勉之。”加赐钱百万。）

冬十月，复攻庆州，执都监齐宗矩。

初，庆州柔远寨蕃部巡检崑逋，攻破西夏后桥诸堡。于是，元昊称兵报仇，缘边都巡检杨遵、柔远寨监押卢训以兵七百与战于龙马岭，败绩。环庆路都监齐宗矩、走马承受赵德宣、宁州都监王文援之，次节义峰，伏兵发，执宗矩。久之，始放归。（《宋史·夏国传》。按《续纲目》于是年七月书赵元昊反，寇环庆。考《宋史·夏国传》及《东都事略》，元昊入寇俱不系七月，且入寇环庆在先，称兵报仇在后，自是两事，《续纲目》混而为一，叙次颠倒。再考《宋史·仁宗纪》：景祐元年十二月，赐赵元昊佛经。盖是时元昊虽僭拟改元，然犹遣使奉贡，故礼赐如故。至宝元元年，上表自言称帝，《本纪》乃始书反，似当以《本纪》为断。说见《通鉴辑览》注。）

元昊鸩其母卫慕氏。

母族人山喜谋杀元昊，事觉，元昊鸩其母杀之，沉山喜之族于河。（《长编》一百十五。按《宋史·夏国传》云母卫慕氏死，遣使来告哀，不云元昊鸩其母。卫慕，《长编》作母米，注见前。）

遣使如宋告哀。（《宋史·夏国传》）

宋诏起复镇军大将军、左金吾卫上将军，员外置同正员。以内殿崇班、阁门祗候王中庸为致祭使，起居舍人郭劝为吊赠兼起复官告使。元昊赂遗劝等百万，劝悉拒不受。（《长编》一百十五）

元昊复立额藏渠怀氏为太后。夏语称“乌尼”。“乌尼”者，太后也。（《长编》一百十五）十二月，宋赐佛经。

元昊献马五十匹，求佛经一藏。诏特赐之。（《长编》一百十五）

是年，填星犯舆鬼。占者云，大臣有变。元昊大肆杀戮。（《西夏书事》）

西夏称广运二年

宋加元昊中书令。

宋帝受尊号，加恩内外。遣内侍省都知冯从顺至兴州，进元昊中书令，元昊受之益倨。富弼奏状：“朝廷累次遣使，元昊多不致恭，或故作滞留而不迎；或佯为忽遽而见迫；或欲负展而对；或欲专席而居。虽相见之初，暂御臣下之服；而送出之后，便具帝者之仪。”（《宋史·夏国传》及《长编》一百二十四）

夏五月，杀妃卫慕氏。

卫慕，元昊舅氏女，幼孤，育于惠慈太后。当后被弑时，氏以大义责元昊，元昊尽诛其族，因氏怀妊，幽之别宫。及生子，野利氏谮其貌类他人，元昊怒，并子杀之。（《长编》一百六十二及《西夏书事》）

秋七月，以兵犯环庆。

元昊使首领讹遇等率兵数入犯，环庆路部署司请下鄜延路移文约束，从之。（《长编》一百十七）攻唃廝囉，败绩。

元昊遣其令公苏奴儿（《长编》作索诺尔），将兵二万五千攻唃廝囉，败死略尽，苏奴儿被执。（《宋史·夏国传》）元昊自将攻猫牛城，屠之。

苏奴儿既败，元昊自率众攻猫牛城，一月不下。既而诈约和，城开，乃大纵杀戮。（《宋史·夏国传》）又攻青唐、安二、宗哥、带星岭诸城。

唃廝囉史部将安子罗（《长编》作阿萨尔）以兵绝归路，元昊昼夜角战二百馀日，子罗败，然兵溺宗哥河及饥死过半，并兵临河湟。唃廝囉知众寡不敌，壁鄯州不出，阴间元昊，颇得虚实。元昊已渡河，插旗帜识其浅。唃廝囉潜使人移植深处，以误元昊。及大战，元昊溃而归，视帜渡，溺死十八九，虏获甚众。自是，数以奇计破元昊，遂不敢窥其境。（《宋史·夏国传》及《吐蕃传》。按李氏《长编》不取“自是，数以奇计破元昊”二语，谓为饰说，盖得其实。）

索古渭地于宋，不与。

青唐蕃部藿毡世居古渭，积与夏人有隙，惧而献其地于宋。秦州范祥纳之，请缮城屯兵，又括熟户田。诸羌靳之，相率叛。夏人欲得渭地久，移文来索。后帅张升以祥贪利生事，请弃之。诏傅求往视，求以为城已讫役，且已得而弃，非所以强国威。乃诏谕羌众，反其田，报夏人以渭非其有，不应索，正其封疆而还。（《宋史·傅求传》）

西夏称广运三年

妃索氏自杀。

始，元昊攻猫牛城，传者以为战没。索氏喜，日调音乐。及元昊还，惧而自杀。（《长编》一百六十二）夏四月，羁天竺国进奉僧于夏州。

天竺入贡，东行经六月至大食国，又二月至西州，又二月至夏州。先是，僧善称等九人至宋京，贡梵经、佛骨及铜牙菩萨像，留京三月，宋帝赐束帛遣还。抵夏州，元昊留于驿舍，求贝叶梵经不得，羁之。由是，西域贡僧遂绝。（《宋史·天竺传》及《西夏书事》）

始制蕃书，改元。

元昊自制蕃书，命野利仁荣演绎之，成十二卷。字形体方正，类八分，而画颇重复，又若符篆，教国人用以纪事。群臣上表献颂，遂改广运三年为大庆元年。（《宋史·夏国传》。按沈存中《笔谈》作遇乞造创蕃书，累年方就，至是始献。与此异。胶西柯先生曰：“《宋史》：元昊自制蕃书，教国人以纪事之文用蕃书。沈存中

《笔谈》载西夏野利遇乞制蕃书事，最详。则谓元昊命国中悉用蕃书，与《宋史》微不同。考《宋史》元昊未制蕃书以前，有蕃学、汉学，及制国书，命野利仁荣主蕃学，则屏汉文不用。故其后干顺病善学，又复立汉学也。命国人以纪事之文用蕃书，当是元昊以后之制，《宋史》稍误矣。今敦煌石室有西夏《国史》数卷，皆蕃书，为西儒伯希和所得。”）

冬十二月，复举兵攻回鹘，取瓜、沙、肃三州。

瓜、沙、肃诸州，本唐归义军，向陷于回鹘。建隆中，节度使曹元忠以州附宋，子孙世主军事。元昊引兵攻之，求援于回鹘不应，三州相继没。于是，元昊尽有河南故地。（《宋史·夏国传》）

升州、郡，益边防。

元昊既据夏、银、绥、宥、静、灵、盐、会、胜、甘、凉、瓜、沙、肃诸州立国，而以石堡、洪门诸镇，升为洪、威、龙、定四州，又以肃州为蕃和郡，甘州为镇夷郡，置宣化府。东尽黄河，西界玉门，南接萧关，北控大漠，地方万余里。倚贺兰山为固，料兵设险：以七万人护卫兴庆，五万人镇守西平，五万人驻贺兰山。左厢宥州路，以五万人备鄯、延（有克胡山、升平塔、那娘山诸路。以乌延口、藏底河界台为界堠。内包杏子河、白洛嘴、啰兀岭等险要）、麟（有屈野川、大河谷、麻也娘诸路。以饶咩、浪松、本晋堆为界堠。内包神堆、泽荒堆、三泉等险要）、府（有端正平、榆木川、升啰岭诸路。以樛柞岭、青没怒川、浪骨堆为界堠。旁约吴庞烽、女萌烽、立于谷、龙移川等险要）。右厢甘州路，以三万人备西蕃（有扑丁原、庄浪族、乔家族诸路。以麻宗山、乳酪河为界堠。内包斫龙川、采牟岭等地）、回纥（有合黎山、浚稽山、居延塞诸路。以牛头、朝那山为界堠。内包张掖、敦煌等地）。自河南洪州、白豹、安、盐州，至罗洛、天都、惟精山等处，以五万人备环（有陷道口、打米谷、蕤毛嘴、乌丁原诸路。以牛圈里、罗节砦为界堠。内包虾蟆、折姜诸和市）、庆（有西蔡移、骆驼巷、萌门、三岔诸路。以勒崖原、为卓望、王尚原、里干谷为界堠。旁约苍鸡、七逋、多移塔、通祖、卢门城等地）、镇戎军（有吃啰岔、立马城、杀獐川诸路。以劈通流、枿拖岭为界堠。旁约肖关、寺子盆、没烟前、后等峡）。自河北至午腊{艸弱}山（《长编》作卧啰娘山。吴兴祚《方輿纪要》：元昊河南曰盐州路，河北曰安北路。与《宋史·夏国传》异），以七万人备契丹（有金肃、河清诸路。并黄河为界堠。内包唐隆镇、没儿雀、悉命、女女、越都等蕃族）。而御边善战尤倚山讹，山讹者横山羌，平夏兵不及也。

定兵制。

西夏风气强梗，民多耐寒暑，忍饥渴，而性恶雨雪。其部族一家号一帐，小族数百帐，大者千馀帐。故制：年登十五为丁，每有战斗，随族之大小出丁助阵。元昊立

制：率二丁取正军一人，每负担一人为一抄。负担者，随军杂役也。四丁为两抄，馀号空丁。愿隶正军者，得射他丁为负担，无则许射正军之疲弱者为之，故壮者得正军为多。凡正军给长生马驼各一。团练使以上，帐一、弓一、箭五百、马一、橐驼五，旗、鼓、枪、剑、棍、棒、少袋、披毡、浑脱、背索、锹镢、斤斧、箭牌、铁爪篱各一（曾氏《隆平集》云，凡年六十以下，十五以上，皆自备弓矢、甲胄而行，与《宋史·夏国传》异）。刺史以下，无帐无旗鼓，人各橐驼一、箭三百、幕梁一。兵三人同一幕梁。幕梁，织毛为幕，而以木架。有炮手二百人，号“泼喜”，陡立旋风炮于橐驼鞍，纵石如拳。得汉人勇者为前军，号“撞令郎”。若脆怯无他技者，令往守肃州，或迁河外耕作。合国内诸州计之，总兵五十馀万（《隆平集》云，赵德明时兵十万而已，元昊遂逾十五万，自以地广兵劲，敢行叛逆。今以《宋史·夏国传》考之，曾说尚略）。别立擒生军十万。兴灵之兵精练者又二万五千，别副以兵七万为资贍，号御围内六班，分三番宿卫。每有事于西，则自东点集而西；于东，则自西点集而东；中路则东西皆集。用兵多立虚寨，设伏兵包敌。以铁骑为前军，乘善马，重甲，刺斫不入，用钩索绞联，虽死马上不坠。其兵凡三千，分十队，队各有长：一、妹勒，二、浪遇移讹，三、细赏者埋，四、理奴，五、杂熟屈则鸠，六、隈才浪罗，七、细母屈勿，八、李讹移岩名，九、细母嵬名，十、没罗埋布。每出入，前后环拥，设备甚严。战则先出突阵，阵乱则冲击之，步兵挟骑以进。发兵则以银牌召酋长，面受约束。昼则举烟扬尘，夜则篝火为候，出战率用只日，避晦日。赍粮不过旬。战则大将居后，或据高险。弓，皮弦，矢，柳，中之必贯甲（《隆平集》云，夏兵长于骑射，不善刀枪，而柳弓皮弦，遇雨雪则不能施，又其所短）。故所向无不破也。（《宋史·夏国传》及《儒林公议》）

立军名。

唐制，节度使下，刺史亦得掌兵。宋惩五代之弊，特设通判以莅州政，其征调、征伐、进退军将，仍听节度使表闻。德明复自置防御使职。元昊地广兵众，因分左右厢，立十二监军司：曰左厢神勇（驻天都山，）曰石州祥祐（《宋史·夏国传》种谔克米脂、进攻石州，意即其地），曰宥州嘉宁（驻宥州），曰韦州静塞（驻韦州），曰西寿保泰（驻柔狼山北），曰卓啰和南（驻黄河北岸），曰右厢朝顺（驻夏州弥陀洞），曰甘州甘肃（驻唐删丹县故地），曰瓜州西平（驻瓜州），曰黑水镇燕（驻兀刺海城），曰白马强镇（驻盐州），曰黑山威福（驻汉居延故城，东北限大泽，西北接沙碛）。诸军并设都统军、副统军、监军使一员，以贵戚豪右领其职；馀指挥使、教练使、左右侍禁官数十，不分蕃汉，悉任之。（《宋史·夏国传》）

元昊落起复。（《长编》一百十九）攻兰州。

元昊欲南侵，恐唃廝囉制其后，复举兵攻兰州诸羌，侵至马衔山。筑城瓦蹶、凡川会，留兵镇守，绝吐蕃与中国相通路。（《长编》一百十九）诱西蕃叛唃廝囉。

初，唃廝囉娶李立遵女，生二子：曰瞎毡，曰磨毡角。又娶乔氏，生子曰董毡。立遵死，李氏宠衰，斥为尼，錡之廓州。瞎毡等结母党李巴沁，窃载其母出奔，瞎毡据河州，磨角毡据邈川，抚有其众，唃廝囉不能制。元昊闻二子怨其父，阴以重赂间之，且诱诸酋归附。有温逋哥子一声金龙（温逋哥本唃廝囉论逋，论通者，相也。温逋哥作乱被杀），拥众万馀叛附元昊，结为姻婚。唃廝囉势蹙，更与乔氏西徙历精城。（《长编》一百十九。按本注引《元符陇右日录》云，元昊既行赂间唃廝囉二子，遂举兵数犯宗哥，及破耗牛城，唃廝囉势折，西徙青唐，与赵囉《聚米图经》徙居历精城异。或谓历精即青唐也，当考。按一声金龙，一作伊实济噜。历精，一作哩沁。）

宋士人张元、吴昊来归。

元昊之叛，其谋皆出于华州士人张元（周春《辽诗话》据《传奇》，元字雷复）与吴昊。张与吴，其始名，不可得而知。或曰：张许州人也，客于长葛间，以侠自任。县河有蛟长数丈，每饮水转桥下，则人为之断行。一日，蛟方枕石而饮，张自桥上负大石中蛟，蛟婉转而死，血流数里。与关中姚嗣宗皆负气倜傥，有纵横才，相与友善。张累举进士不第（熊克复《九朝通鉴》、李氏《长编》谓张元为华州进士，又元作源，俱误）。吴亦久困场屋，无以自伸。且张尝为县宰所笞，乃与吴薄游塞上，覘览山川风俗，慨然有经略西鄙意。放意诗酒，出语惊人。尝与客饮驿中，一客邂逅至，主人者延之，张初不识知也，客乃顾张曰：“彼何人斯？”张厉声曰：“皮裹骨头，肉人斯。”应声以铁鞭击之死，主人涂千金之药，久之乃苏。将谒大帅，耻自屈不肯往。乃砉大石，刻诗其上，使壮士拽之于通衢，三人从后哭之，欲以鼓动诸帅。诸帅果召与相见，踌躇未用间，张、吴径走西夏。常时，张每夜游山林，则吹铁笛而行，声闻数里，群盗皆避。其将之西夏也，濒行过项羽庙，竭囊沽酒，对羽极饮，酹酒泥像。又歌“秦皇草昧，刘项起吞并”之词，悲歌累日，大恸而去。时，帅以急骑迫之，不及乃表嗣宗入幕府。张、吴既至夏，闻元昊有意窥中国，念不出奇无以动其听，乃相与更其名，即其都门之酒家，剧饮终日，引笔书壁曰：“张元、吴昊，来此饮酒。”逻者见之，知其非国人也，迹其所憩执之。元昊责以入国问讳之义，二人大言曰：“姓尚不理会，乃理会名耶？”时曩霄未更名，且用中国赐姓也。于是竦然异之，日尊宠用事。事闻于宋，诏徙其族于房州，讥察出入，饥寒且死。知州陈希亮曰：“张、吴事虚实不可知，使诚有之，为国者终不顾家，徒坚其为贼耳。此又皆其疏属，无罪。”乃密以闻，诏释之。既而复赐其家钱、米，以反间之，改隋州以羁縻之。未几，二人间使谍者矫中国诏释之，未有知者。后乃闻西人临境作乐，迎此二家而去。（王巩《闻见近录》、《容斋三笔》、岳珂《桯史》及《宋史·陈希亮传》）

秋七月，更定礼乐。

夏州沿党项蕃俗，自赤辞臣唐，始习尊卑跪拜诸仪。而其音乐，尚以琵琶，击缶为

节。僖宗时，赐思恭鼓吹全部，部有三驾：大驾用一千五百三十人，法驾七百八十一人，小驾八百一十六人，俱以金钲、节鼓、鼗、大鼓、小鼓、饶鼓、羽葆鼓、中鸣、大横吹、小横吹、鼙栗、桃皮笳笛为器。历五代入宋，年隔百馀，而其音节悠扬，声容清厉，犹有唐代遗风。迨德明内附，其礼文仪节、律度声音无不遵依宋制。元昊久视中国为不足法，谓野利仁荣曰：“王者制礼作乐，道在宜民。蕃俗以忠实为先，战斗为务，若唐宋之缠节繁音，吾无取焉。”于是于吉凶、嘉宾、宗祀、燕享，裁礼之九拜为三拜（沈括《笔谈》云，元昊令国中悉用胡礼，即此），革乐之五音为一音（王巩《闻见近录》：增五音为六，与《夏台事迹》异），令于国中，有不遵者族。（《西夏书事》）

冬十一月，设蕃、汉二字院。

元昊既制蕃书，尊为国字，凡国中艺文诰牒，尽易蕃书。于是立蕃字、汉字二院，汉习正、草，蕃兼篆、隶，其秩与唐、宋翰林等。汉字掌中国往来表奏，中书汉字，旁以蕃书并列；蕃字掌西蕃、回鹘、张掖、交河一切文字，并用新制国字，仍以各国蕃字副之。以国字在诸字之右，故蕃字院特重。（《西夏书事》）

西夏称天授礼法延祚元年

春正月，表请供佛五台山。

元昊使人往来中国，熟悉边臣因循之势，久思攻取河东。是时，欲识进兵道路，表请供佛五台，乞使臣引护并给馆券。宋帝从之。（《长编》一百二十一。按《宋史·夏国传》不纪月。）

三月，贡于契丹。（《辽史·兴宗本纪》）夏四月，元昊妻薨。

元昊妻契丹兴平公主也，生与元昊不睦，至是薨。契丹遣北院承旨耶律庶成持诏来诘其故（《辽史·兴宗本纪》。按《儒林公议》：夏国元昊取契丹女，伪号兴平公主，乃宗真之姊也。元昊待之甚薄，因婉被病，元昊亦不往视之，以至于歿。宗真忿恨，然亦无如之何，但遣使慰问之而已。朝廷不知其故，以为元昊畏耶律之强，讽宗真，使促元昊归款，失之甚矣。）

秋九月，元昊从父山遇叛降于宋，不纳，被杀。

初，元昊自五台还，悉会诸族酋豪，刺臂血和酒置髑髅中，共饮之，约先攻鄜延，自德靖、塞门、赤城路三道并入，酋豪有谏者辄杀之。山遇数止元昊，不听。山遇畏诛，遂挈妻子叩延州来降，且言元昊将反状。时知延州郭勖以为自德明纳款四十年，有内附者未尝留，不敢受。奏入，诏令约回。山遇不可，即命监押韩周执山遇

等械镗送元昊，示朝廷不疑之意。元昊集骑，射而杀之，并戮其族无遗类。由是西人怨惧，向化之心绝矣。（《长编》一百二十二。按《涑水记闻》十二，宝元元年九月十六日，鄜延路都钤辖司奏：今月五日，六宅副使、金明县都监、新寨解家河卢关路巡检李士彬申，四日戌时，男殿直怀宝及七罗寨指挥使引到宥州团练侍者密藏福罗，以赵元昊所给告身三道来云，山遇令公先在元昊处为枢密，元昊数诛诸部大人且尽，又欲诛山遇。八月二十五日，山遇自河外与侍者二人逃归。既济河，集缘河兵断河津三处。二十八日，山遇使其弟三太尉者，将宥州兵监河津诸屯。九月一日，告密藏福罗以事状，哭且言曰：“去年大王弟侍中谋反，欲杀大王，赖我闻之，以告大王。大王存至今日，我之力也。今乃欲杀我，汝为我赍此告身三道，赴金明导引，告延州大人，我当悉以黄河以南户口归命朝廷。朝廷欲得质者，以我子若我弟皆可也。大王来追，我自以所部兵拒之。汝至南得何语，当亟来，我别以马七八百匹献朝廷，更令使者自保安军驿路告延州，我此月三日集宥州监军兵至河上，悉发户口归朝廷也。”密藏福罗至金明，以状言本司。契勘前此，元昊所部有叛者，为元昊所诛，已具奏闻。今山遇云欲归朝廷，本司商量令李士彬还其告身，谕以元昊职贡无亏，难议受其降款，遣之还。臣等仍恐虏为奸诈，已戒缘边刺候严备去讫。又奏：六日保安军北蕃官巡检殿直刘怀中状申，词知山遇等于二日起兵，有众二千余人，劫掠村社族帐，只在宥州境内。寻得保安军等状云：五日寅时，山遇及弟二防御、三防御等，将麾下十五骑至，皆被甲执兵，告指挥使云欲归命朝廷。臣等已令保安军诘问山遇等所以来事故，勒令北归。仍令缘边部族首领严兵巡逻，或更有北来户口，皆约遣令还，毋得承受，别致引惹者。诏鄜延路都钤辖司：严飭缘边诸寨及番官等，晨夜设备，遣人诃候，如虏人自在其境互相攻战，即于界首密行托落，毋得张皇。或更有山遇所部来投告者，令李士彬等只为彼意婉顺约回，务令安静。所诃知事宜节次驿置以闻，仍下环庆泾原路部署司、麟府路军马司准此。又《长编》：善约特名惟亮，与弟惟永分掌左右厢兵，其从弟惟序亦亲近用事。善约特有勇略，国人向之。元昊恶其不从己，尝语惟序曰：“汝告善约特反，吾以善约特官爵与汝。不然，俱族灭矣。”惟序不忍，更以告善约特。善约特欲来降，与惟永谋，惟永曰：“南朝无人不知乌珠所为，将不信兄，兄必交困。”善约特曰：“事已至此，无可奈何。若南朝有福，则纳我矣。”遂告其母，母曰：“汝自为计，我年八十馀，不能从汝去，为汝累，当置我室中，纵火焚之。”善约特等涕泣如母言。及为韩周所执，号哭称冤，周见元昊于宥州，元昊衣锦袍，黄绵胡帽，不肯受善约特等，曰：“延州诱我叛臣，我当引兵赴延州，于知州厅前受之。”周说谕良久，乃肯受。时元昊自称乌珠已数年。乌珠者，华言青天子也，谓中国为黄天子。元昊既杀善约特，遂谋僭号。按善约特即山遇，《长编》作善约特，《宋史》作山遇。）

冬十月，元昊用其党杨守素之谋，筑坛受册，称始文英武兴法建礼仁孝皇帝，国号大夏，改元天授礼法延祚。

时年三十。追谥其祖继迁曰神武皇帝，庙号太祖。父德明日光圣皇帝，庙号太宗。

（《长编》一百二十二及《宋史·夏国传》。按毕沅《续通鉴考异》、《宋史·夏国传》谓祥符五年，德明追尊继迁为太祖应运法天神智仁圣至道广德光孝皇帝，庙号武宗，此最谬误。德明本未僭号，安得私尊其父为帝？且既云太祖，即是庙号，安得又有武宗之称？就如所言，则继迁在德明时已有四十字之谥，何又云元昊追谥神武耶？）

始大建官。

元昊既称帝，始大建官，以野利仁荣、嵬名守全、张陟、张绛、杨廓、徐敏、张文显为中书、枢密、侍中等官，专主谋议；以杨守素、锺鼎臣、嵬名聿荣、张延寿为官计、受纳、诸司，主文书；以野利旺荣、野利遇乞、成逋克成、赏都卧<者多>、如定多多马、窦惟吉分驻十二监军司地，主兵马；其余拜授有差。（《宋史·夏国传》）

十一月，祀神西凉府，遂不遣贺郊人使。

元昊遣潘七布昌里马乞（《长编》作攀密布伊里马奇）点兵集蓬子山，自诣西凉府祀神。时中国南郊，故事，诸藩有贡。元昊因自帝，不复使贺宋。帝诏陕西、河东旧与元昊界互市者，所在禁绝之。（《宋史·夏国传》及《仁宗本纪》）

宋诏：有能捕元昊所遣刺探事者，赏钱十万。（《长编》一百二十二）

宋以夏竦为泾原、秦凤安抚使，范雍为鄜延、环庆安抚使，经略夏州。

时边臣多议征讨，故有是命。竦上奏曰：“继迁当太宗时遁逃穷蹙，而犹累岁不能剿灭。先帝鉴追讨之敝，戒疆吏谨烽堠、严卒乘，来即驱逐之，去无追捕也。然拓跋之境，自灵武陷没之后，银、绥割弃已来，假朝廷威灵，其所役属者，不过河外小羌尔。况德明、元昊，相继猖獗。以继迁穷蹙，比元昊富实，势可知也；以先朝累胜之士，较当今关东之兵，勇怯可知也；以兴国习战之帅，方沿边未试之将，工拙可知也；继迁窜伏平夏，元昊窟穴河外，地势可知也。若分兵深入，糗粮不支，师行贼境，利于速战。倘进则贼避其锋，退则敌蹶其后，老师费粮，深可虞也。若穷其巢穴，须涉大河，长舟巨舰，非仓卒可具也。若浮囊挽梗，联络而进，我师半渡，贼乘势掩击，未知何谋可以捍御。臣以为不较主客之利，不计攻守之便，而议追讨者，非良策也。”因条上十事，当时颇采用之。（《宋史·夏竦传》。按竦上十事：一、教习强弩以为奇兵；二、羁縻属羌以为藩篱；三、诏唃廝囉父子并力破贼；四、度地形险易远近、寨棚多少、军士勇怯，而增减屯兵；五、诏诸路互相应援；六、募土人为兵，州各一、二个人，以代东兵；七、增置弓手、壮丁、猎户，以备城守；八、并边小寨，毋积刍粮，贼攻急则弃小寨，入保大寨，以完兵力；九、关中民坐累若过误者，许人入粟赎罪，铜一斤为粟五斗，以贍边计；十、损并边

冗兵、冗官及减骑军，以舒馈运。）

宋遣左侍禁鲁经持谕唃廝囉，使击元昊。

自西凉为继迁所陷，潘罗支旧部往往归唃廝囉，又得回纥种人数万。廝囉居鄯州，西有临谷城通青海，高昌诸国商人皆趋鄯州贸易，以故富强。宋欲使背击元昊以披其势，因授节钺，仍兼邈川大首领，寻加河西节度使。唃廝囉约尽力。（《宋史·吐蕃传》）

卷八

西夏称天授礼法延祚四年

春正月，宋诏鄜延、泾原两路同进兵来讨果。

宋帝与两府大臣共议，陕西帅臣具攻、守二说奏之，宋帝取攻策，诏鄜延、泾原会兵，取正月上旬入讨。范仲淹言：“正月塞外大寒，不如俟春深，贼马瘦人饥，势易制。”且乞留鄜延一路，以备招纳，或择利进城废寨，以牵制元昊。韩琦奏言：“两路协力，尚惧未能大挫黠虏。若鄜延以牵制为名，则是委泾原孤军尝于贼手，非计之得。”乞督令鄜延进兵同入。宋帝以奏示仲淹，仲淹言：“臣与琦等皆一心，非有怯弱。但战者危事，一或差失，则平定之期转延岁月。况横山蕃部散居岩谷，亦多设堡控扼险处，入界兵少则难追，多则难进，未见其利。”琦又令尹洙至延州约进师，仲淹曰：“我师新败，士气丧沮，今但见败形，未睹胜势，吾不敢任也。”洙太息曰：“公不及韩公矣！韩公云：‘凡用兵，当置胜负于度外’。”仲淹曰：“大军一动，万命所悬，乃置之度外乎？诚仲淹所不及。”洙沮去。琦复上奏曰：“仲淹意在招纳，使朝廷强之，终非己谋，将佐闻之，必无锐志。臣以元昊倾国入寇，不过四五万，老弱妇女举族而行。吾逐路之兵自守，势分力弱，故遇敌不支。若大军并出，鼓行而前，乘敌骄惰，破之必矣。乞别命近臣，以观贼隙，如何进讨，断在不疑。”宋帝终难之。时传闻宋师大举，谋清野据险以待，一俟宋师诸路入界，并兵以敌。既而闻宋师不果出，乃已。（《长编》一百二十九、一百三十及《宋史》范仲淹、韩琦等传并《东轩笔录》）

归塞门寨主高延德于延州请和，安抚副使范仲淹答以书。（按元昊请和于仲淹，《宋史·夏国传》叙在好水之战后，《范仲淹传》叙在好水之战前。）

仲淹既见延德，察元昊未肯顺事，且无表章，不敢闻于朝廷。乃自为书谕以逆顺，遣监押韩周同延德还抵元昊。其书曰：“正月日，具位某谨修诚意，奉书于夏国大王：伏以先大王归向朝廷，心如金石。我真宗皇帝，命为同姓，待以骨肉之亲，封为夏王。履此河山之大，旌旗、车服，降天子一等。恩信隆厚，始终如一。齐桓、晋文之盛，无以过此。朝聘之使，往来如家。牛、马、驼、羊之产，金、银、缯、帛之货，交受其利，不可胜记。塞垣之下，逾三十年，有耕无战。禾黍云合，甲冑尘委，养生葬死，各终天年。使蕃、汉之民，同尧舜之俗，此真宗皇帝之至化，亦先大王之大功也。

“自先大王薨背，今皇震悼，累日嘻吁，遣使行吊赙之礼，以大王嗣守其国，爵命崇重，一如先大王。昨者，大王以本国众多之情，推立大位，诚不获让，理有未安，而遣行人告于天子，又遣行人归其旌节，朝廷中外，莫不惊愤，请收行人，戮于都市。皇帝诏曰：非不能以四海之力支其一方，念先帝岁寒之本意，故夏王忠顺之

大功，岂一朝之失而骤绝之？乃不杀而还。假有本国诸蕃之长，抗礼于大王，而能含容之若此乎？省初念终，天子何负于大王哉！

“二年以来，疆事纷起，耕者废耒，织者废杼，边界萧然，岂独汉民之劳弊耶！使战守之人，日夜豺虎，竟为吞噬，死伤相枕，哭泣相闻，仁人为之流涕，智士为之扼腕。天子遣某经度西事，而命之曰：‘有征无战，不杀非辜，王者之兵也。汝往钦哉。’某拜手稽首，敢不夙夜于怀。至边之日，见诸将帅多务小功，不为大略，甚未副天子之意。某与大王虽未尝高会，向者同事朝廷，于天子则父母也，于大王则兄弟也，岂有孝于父母而欲害于兄弟哉？可不为大王一二而陈之！

“《传》曰：‘名不正则言不顺，言不顺则事不成。’大王世居西土，衣冠、语言皆从本国之俗，何独名称与中朝天子侔拟？名岂正而言岂顺乎？如众情莫夺，亦有汉、唐故事：单于、可汗皆本国极尊之称，具在方册。某料大王，必以契丹为比，故自谓可行。且契丹，自石晋朝有援立之功，时已称帝。今大王世受天子建国封王之恩，如诸蕃中叛朝廷者，大王当为霸主率诸侯以伐之，则世世有功，王王不绝。乃欲拟契丹之称，究其体势，昭然不同。徒使疮痍万民，拒朝廷之礼，伤天地之仁。《易》曰：‘天地之大德曰生，圣人之大宝曰位，何以守位曰仁。’是以天地养万物，故其道不穷；圣人养万民，故其位不倾。又《传》曰：‘国家以仁：获之、以仁守之者百世。’昔者，唐末天下恟恟，群雄咆哮，日寻干戈，血我生灵，腥我天地，灭我礼乐，绝我稼穡，皇天震怒，罚其不仁，五代王侯，覆亡相续。老氏曰：‘乐杀人者，不可如志于天下。’诚不诬矣。后唐显宗，祈于上天曰：‘愿早生圣人，以救天下。’是年，我太祖皇帝应祈而生，及厉试诸难，中外忤戴，不血一刃，受禅于周。广南、江南、荆湖、西川，有九江万里之阻，一举而下。岂非应天顺人之至乎！由是罢诸侯之兵革、五代之暴垂，八十年天下无祸乱之忧。太宗皇帝圣文神武，表正万邦，吴越纳疆，并晋就缚。真宗皇帝奉天体道，清静无为，与契丹通好，受先大王贡礼，自兹四海，熙然同春。今皇帝坐朝至晏，从谏如流，有忤雷霆，虽死必赦，故四海之心，望如父母，此所谓以仁获之，以仁守之，百世之朝也。某料大王建议之初，人有离间，妄言边城无备，士心不齐，长趋而来，所向必下。今以强人猛马，奔冲汉地，二年于兹，汉之兵民，盖有血战而死者，无一城一将愿归大王者，此可见圣宋仁及天下，邦本不摇之验也。与夫间者之说，无乃异乎！今天下久平，人人泰然，不习战斗，不熟纪律。刘平之徒，忠敢而进，不顾众寡，自取其困，馀则或胜或负，杀伤俱多。大王国人必以获刘平为贺，昔郑人侵蔡，获司马公子燮，郑人皆喜，惟子产曰：‘小国无文德而有武功，祸莫大焉。’而后郑国之祸，皆如子产之言。今边士训练渐精，恩威已立，有功必赏，败事必诛，将帅而下，大知纪律，莫不各思奋力效命，争议进兵。如其不然，何时可了。今招讨司统兵四十万，约五路入界，著其律曰：‘生降者赏，杀降者斩；获精强者赏，害老幼妇女者斩；遇坚必战，遇险必夺；可取则取，可城则城。’纵未能入贺兰之居，彼之兵民降者、死者，所失多矣。是大王自祸其民，官军之势，不获而已也。

“某又念皇帝‘有征无战，不杀非辜’之训，夙夜于怀，虽师帅之行，君命有所不受，奈何锋刃之交，相伤必众。且蕃兵战死，非有罪也，忠于大王耳；汉兵战死，非有罪也，忠于天子耳。使忠孝之人肝脑涂地，积累怨魄，为妖为灾，大王其可忽诸？朝廷以王者无外，有生之民皆为赤子，何蕃、汉之限哉？何胜负之言哉？某与招讨太尉夏公、经略密学韩公尝议其事，莫若通问于大王，计而决之，重人命也。其美利甚众。

“大王如能以爱民为意，礼下朝廷，复其王爵，承先大王之志，天下孰不称其贤哉！一也。如众多之情，三让不获，前所谓汉、唐故事如单于、可汗之称，尚有可稽，于本国语言为便，复不失其尊大，二也。但臣贡上国，存中外之礼，不召天下之怨，不速天下之兵，使蕃、汉边人复见康乐，无死伤相枕、哭泣相闻之惨，三也。又大王之国，府用或缺，朝廷每岁必有物帛之厚赐，为大王助，四也。又从来入贡使人，止称蕃吏之职，以避中朝之尊，按汉诸侯王相皆出真拜，又吴越王钱氏有承制补官故事，功高者受朝廷之命，亦足隆大王之体，五也。昨有边臣上言，乞招致蕃部首领，某亦已请罢。惟大王告谕诸蕃首领，不须去父母之邦，但回意中朝，则太平之乐，遐迩同之，六也。国家以四海之广，岂无遗才？有在大王之国者，朝廷不戮其家，安全如故，宜善事王以报国土之知，惟同心向顺，自不失其富贵，而宗族之人必更优恤，七也。又牛、马、驼、羊之产，金、银、缯、帛之货，有无交易，各得其所，八也。大王从之，则上下同其美利，生民之患几乎息矣；不从，则上下失其美利，生民之患何时而息哉？某今日之言，非独利于大王，盖以奉君亲之训，救生民之患，合天地之仁而已乎！惟大王择焉。不宣，某再拜。”（《长编》一百三个及《范文正集》。按《长编》是月，元昊又遣人至泾原请和，泾原路走马承受崔宣以闻，上谓辅臣曰：“贼多诡计，欲懈我师尔，宜诏逐路部署司益守备。”）

宋泾原军袭威福军，遣蕃官骨披（一作郭拜）等伪降，不纳。

黑山威福军，驻黄河西，泾原都监桑恹率兵袭之，焚族帐、掠马驼甚众。元昊遣指挥骨披等四人，诈投恹军，设誓愿为中国效力。恹以告安抚使韩琦，琦不可。（《长编》一百三十一）

二月，侵宋渭州，败任福于好水川。

元昊遣使至延州约和。韩琦闻之，曰：“无约而请和者，谋也。”命诸将戒严，而自行边至高平。元昊果遣众攻渭州（按《长编》琦行边趋泾州，而谍者言：“元昊阅兵戡章会，谋寇渭州”），薄怀远城。琦亟趋镇戎军，尽出其兵，又募敢勇得万八千人，使任福将之。以耿傅参军事，泾原路驻泊都监桑恹为先锋，钤辖朱观、都监武英、泾州都监王圭各以所部，从福节制。琦戒福等：“并兵自怀远趋德胜寨，至羊牧隆城（一作扬博隆城）出敌之后。诸寨相距才四十里，道近粮饷便。度势未

可战，则据险设伏，待其归邀击之。”福引轻骑数千，趋怀远城捺龙川（一作纳克隆川），遇镇戎军西路巡检常鼎、刘肃，与敌战于张家堡南，斩首数百，夏人弃马、羊、橐驼，佯北。武英以为前必有伏，众不听。桑恹引骑趋之，福踵其后。谍传敌兵少，福等颇易之。薄暮，与恹合军，屯好水川，川与能家川隔在陇山外。观、英屯笼络川，相距五里，约翌日会兵川口，不使夏人一骑遁。然已陷其伏中矣。路既远，刍饷不继，士马乏食者三日。元昊自将精兵十万，营于川口。候者言夏人有寨数不多，兵益进。诘旦，福与恹循好水川西行，出六盘山下，距羊牧隆城五里，与夏军遇。恹为先锋，见道旁置数银泥合，封袭谨密，中有动跃声，疑莫敢发。福至发之，乃悬哨家鸽百余，自合中起，盘飞军上。于是，夏兵四合。恹先犯，中军继之，自辰至午酣战。阵中忽树鲍老旗，长二丈馀，恹等莫测。既而鲍老挥右则右伏出，挥左则左伏出，翼而袭之，宋师大败。恹、刘肃及福子怀亮，皆战没。小校刘进，劝福自拔，福不听，力战死。

初，渭州都监赵津将瓦亭寨骑兵三千馀，为诸将后继。是日，朱观、武英兵会能家川，与夏人遇。阵合，王圭自羊牧隆城以屯兵四千五百人助观略阵，阵坚不可动。英重伤，不能出军战，自午至申，夏军益至，东阵步兵大溃，众遂奔。圭、英、津及参军耿傅、队将李简、都监李禹亨、刘钧皆死于阵。观以千馀人保民垣，发矢四射，会暮，夏军引去，将校士卒死者万三百人。

始，圭望见福麾帜尚在围中，欲援出之，军校有顾望不进者，圭斩以徇，乃东望再拜曰：“臣非负国，力不能也，独有死尔！”乃复进战，击杀数百人，铁鞭至挠曲，手掌破裂，犹奋身跃马，三中箭三易马，最后得其下马，左右驰击，又杀数十人，飞矢中其目，遂死。

英知必败，劝傅避去，傅不答。英叹曰：“英当死。君文吏，无军责，奈何与英俱死？”观亦戒傅少避贼锋，而傅愈前不顾，身被数创乃殒。前一夕，傅在观营，夜作书遗福，以其日小胜，前与夏军遇，深以持重戒之，自写题观名以致福军中。傅死后，或言福之败由傅督战太急，福等既违节度，虽死不足与。既而福随军孔目吏彭忠得傅戒福书，具白琦，琦即奏之。尹洙为作《悯忠》、《辨诬》二篇。

方元昊倾国入犯，福临敌受命，所统皆非素抚之兵，既又分出趋利，故至甚败。奏至，仁宗震悼。夏竦使人收散兵，得韩琦檄于福衣带间，言罪不在琦，犹夺一官。

是役，张元从元昊在军中参赞为多，战既胜，元题诗于界上寺壁云：“夏竦何曾耸，韩琦未是奇，满川龙虎辇，犹自说兵机。”（《宋史·夏国传》、任福、武英、王圭、耿傅等传及《长编》一百三十一。周辉《清波杂志》）

进攻刘璠堡。

泾原熟户万馀帐向来骄悍，元昊六盘山之战皆其向导，故兵行径路及设伏之处，一如宿计。是时，引元昊乘胜围刘璠。范仲淹遣环庆都监刘政将锐卒数千来援，夏兵闻之，遂还。（《长编》一百三十一。又《长编》：元昊反，王尧臣建言：“泾原路熟户万四百七十馀帐，帐之首领各有职名，曹玮帅本路威令明著，常用之平西羌，其后边备稍懈，守将惟务姑息，浸成骄黠。自元昊反，镇戎军及渭州山外皆被侵扰，近边熟户亦遭杀虏。蕃族之情，最重酬赛，因此衅隙激怒之，可复得其用。请遣人募首领愿效用者籍姓名并士马之数，及千人听自推其谋勇者一人，授以班行及巡检之名，使将领出境，破荡生户，所获财富，官勿检核，得首级及伤者给以赏物，仍依本族职名补迁及增俸钱。”诏如所请。）

潜结契丹为援。（《长编》一百三十五）令野利旺荣答范仲淹书。

初，韩周等持仲淹书入西界，逆者礼意殊善。行既两日，闻山外诸将败亡，周等抵夏州，留四十馀日。元昊俾其亲信野利旺荣为书报仲淹，别遣使与周俱还，且言不敢以闻兀卒。书辞益慢，仲淹对使者焚其书，而潜录副本以闻，书凡二十六纸，其不可以闻者二十纸，仲淹悉焚之，馀又略加删改。书既达，大臣皆谓仲淹不当辄与元昊通书，又不当焚其报。（《长编》一百三十一）

夏四月，掠仪、秦二州。

夏国首领各将其种落兵，谓之“一溜”（一作流）。少长服习，如臂使指，既成行列，举手掩口，然后敢食，虑酋去遥见，疑其语言，其整肃如此。元昊之犯渭州，初分兵为四溜，期集于好水川，任福所遇乃先至之一溜也。猝遇福军而骇，欲奔所聚之地，福不知虚实，乘急追逐，遂陷大阵。然诸将力战，至死不肯退。夏兵虽胜，杀伤亦相当，故攻刘璠堡不克，还屯天都山，令游骑剽掠仪、秦二州属户，闻秦凤副都部署曹琮料简乡弓手数万人，发骑士设伏以待，乃退。（《宋史·曹琮传》及《韩魏公家传》、《长编·田况上兵策十四事》）

宋钤辖杜惟序破夏三寨。

好水之役，惟序领骑兵数千由怀安路破夏三寨，斩首数百级，获马、牛干计。（《长编》一百三十一）五月，宋徙范仲淹知庆州。

初，元昊反，阴诱属羌为助，而环庆酋长六百余人，约为向导。事寻露，仲淹以其反复不常也，至部即奏行边，以诏书犒赏诸羌，阅其人马，为立条约，诸羌皆受命，呼为“龙图老子”。仲淹守边数年，与韩琦齐名，为夏人所畏，诸羌为之语曰：“军中有一韩，西贼闻之心骨寒；军中有一范，西贼闻之惊破胆。”（《宋史·范仲淹传》及《东部事略》。按《事文类聚·外集》引《名臣传》骨作胆。《骈字文类编》引《宋史》，骨亦作胆，二之字作知。）

宋帅夏竦揭榜购元昊。

竦屯鄜州，揭榜塞上云：“有得赵元昊头者，赏钱五百万贯，爵为西平王。”元昊闻之大怒，使人入市卖箔，陕西获箔甚高，倚之食肆门外，佯为食乞，故遗去之。至晚，食肆窃喜，以为有所获也，徐展之，乃元昊购竦之榜，悬箔之端，云：“有得夏竦头者，与钱两贯。”竦闻之，急令藏掩，而已宣播远近矣，竦大惭沮。其见轻侮如此。（《谈苑》。按《宋史·夏竦传》作元昊尝募得竦者与钱三千，与此作两贯不同。）

六月，宋诏陕西诸路总管司严边备，毋辄入夏境；夏人至，则御之。（《宋史·仁宗本纪》）宋以西界团练李兴为供备库副使、寿州都监。

初，兴既内附，而部署司言：“兴，元昊亲信，恐不得其情。”故徙之南方。（《长编》一百三十二）秋七月，犯麟、府二州。

与宋麟、府路巡检张昺遇于深柏堰，夏人数千，昺分兵追击，斩首百馀级，夺兵械、马、牛数百。（《宋史·仁宗本纪》及《张昺传》。按《长编》：鄜州走马承受傅季明言：“元昊寇麟、府，闻其死伤者三万馀人。”上谓辅臣曰：“此谍者非骄我，即欲缓诸路牵制之兵尔。可令鄜延部署司严飭边备。”按《长编》犯麟、府作八月。）

与宋人战于青眉浪，败绩。

元昊围麟州，都监王凯等乘城拒斗，昼夜三十一日始解去。敌犹钞掠，会凯与同巡检张昺护粮道于青眉浪，夏人大至，与昺相失，乃分兵出其后，夹击之。复与昺合，昺接战，流矢贯双颊，昺拔矢斗愈力，夺马十二匹，斩首百馀级。（《宋史》王凯、张昺传）

八月，攻府州。宋殿侍乜罗（一作密拉）叛宋来附。

元昊攻麟州不克，进攻府州。州城险且坚，东南有水门，崖壁峭绝，下临大河。夏人缘崖腹微径鱼贯而前，城上矢石乱下，乃退。一日，夏人乘城西南隅庌下，将登，众嚣曰：“城破矣！”昺乘陴大呼搏贼，夏人稍却，飞石中右目下，身被三创，昼夜督守不退。夏人乃转攻城北，士卒复力战，夏人死伤甚众。州无井，民取河水以饮，夏人断汲路，昺与通判张旨夜开门，率兵击，夏人小却。以官军壁两旁，使民出汲，复以渠泥覆草积，夏人望见，以为水有馀，知城终不可得，乃引去（按《东轩笔录》：麟州踞河外，扼西夏之冲，城中无井。庆历中，有戎人谓元昊云：“围之半月，即兵民渴死矣。”元昊以兵围之数日，城中大窘。有军士献策，愿取沟泥，使人乘高以泥草积，州将从之。元昊望见，遽语献策戎人曰：“尔言无井，今

乃有泥以护草积，何也？”即斩戎人解去。按《洮水记闻》载此事，亦作围麟州，此本《宋史》作府州，未知孰是。初，有蕃部乜罗为殿侍，求锦袍。驿料管勾麟府路军马事康德舆不与，乜罗颇有怨言。后有潜乜罗与敌通，战则反射汉人，乜罗无以自明，乃谋附夏。指挥张岳闻之，召乜罗与饮，乜罗泣曰：“我岂附贼者耶？盖逃死耳。”岳以告德舆：“乜罗信叛矣。不可不杀。”德舆不听，曰：“今日岂杀蕃部时耶？”岳曰：“叛者特乜罗，非众所欲也。请为君召与饮，仆崖谷中，声言坠马死，安知汉杀之。”德舆犹豫不决，以问所亲，所亲恶岳，短毁之，岳计不行。夏人果以乜罗为向导，自后河川入袭府州。蕃汉欲入城，德舆闭门不纳，或降夏人或为夏人所杀，不可胜计。德舆按兵不出战，但移文转运司调军食。知府州折继闵极力御之，得不陷。及陷丰州，德舆才出屯州城外数里，三日而还。居民望见，以为夏人复至，皆弃其所赍，入保城郭。（《宋史》张岳、张旨、康德舆等传。按《洮水记闻》：康定二年，府州奏：“七月二十三日，西贼不知万数，围逼州城，攻击四日夜乃退。寻令乡兵赵素等探候，西贼尚在后河川、赤土岭、毛家坞一带，下寨未起，去州三十二里，州司窃虑西贼虚作退势，诱引大兵追逐，别设伏兵奔冲州城。见不辍，令人探候及申并代部署司，乞救应”。次麟府路走马承受公事樊玉奏：“窃见来路军马司准麟州公文，自七月二十七日被西贼攻围西城，二十八日至九月九日午时，其贼拔寨过屈野河西山，上白草十一带下寨，去州约十五里。其夜，当州令通引官魏智及百姓兼千、白政等偷路往州东探候，建宁寨已为西贼所破。贼于周回下七寨，杀虏寨主、监押及寨内军民，焚荡仓场、库务、军营、民居、敌楼、战棚皆尽。其贼亦不辍，下屈野河来奔冲州城，当州日夜拒守，军民危围。令遣百姓李珣飞骑长夜偷路去，急乞军马司星夜进城，发兵救应。”按康定二年，即庆历元年，盖改庆历在是年十一月，故《记闻》书二年。）

宋诏鄜延部署许怀德以兵万人援麟、府。（《长编》一百三十三。按《洮水记闻》：麟州之围，苗继宣募吏民有能通信求援于外者，通引官王吉应募。继宣问曰：“须几人从行？”吉曰：“今虏骑百重，无所用处。”请秃发，衣胡服，挟弓矢，赍粮饷，为胡人，夜缒而出，遇虏问，则为胡语答之。两昼夜，然后出虏寨之外，走诣府州告急，府州遣将兵救之。吉复间道入城，城中皆呼万岁。及围解，诏除吉奉职本州指使。吉尝从都监王凯及中贵人将兵数千人，猝遇虏数万骑，中贵人恐惶，以手帛自经，吉曰：“官何患不死？何不且令王吉与虏战，若吉不胜，死未晚也。”因使其左右数人守中贵曰：“贵人有不虞，当尽斩若属。”因将所部先登，射杀虏大将，虏众大奔，众军乘之，虏坠崖死者万馀人。奏上，凯自侍禁除礼宾使、本路钤辖。吉自奉职除礼宾副使。吉尝与夏虏战，其子文宣年十八从行。战罢不见文宣，其麾下请入虏中求之，吉止曰：“此王吉子，而为虏所获，尚何以求为？”顷之，文宣挈二首以至，吉乃喜曰：“如此，真我子也。”吉每与虏战，所发不过一矢，即舍弓肉袒而入，手杀数人，然后反，曰：“及其张弓挟矢之时，直往抱之，使彼仓猝无以拒吾，则成擒矣。吾前后数入其阵，未尝两矢也。”）

是月，元昊攻金明寨，破宁远寨，寨主王世亶、兵马监押王显死之。（《宋史·仁

宗本纪》) 进陷丰州，杀其知州王馀庆、兵马监押孙吉。

城孤无援，故陷。元昊遣兵屯要害，绝麟、府饷道。（《宋史·仁宗本纪》及《夏国传》）

宋诏河东路：“元昊入寇麟、府，所过城寨有能出奇设伏掩击者，量功优奖之。军马或致伤折，亦不加罪。（《长编》一百三十三）与宋将赵振等战于深柏堰，败绩。

元昊既破丰州，将袭近寨，故为振所取。（《宋史·赵振传》）屯兵琉璃堡，为并代都钤辖张亢所破，弃堡遁。

元昊久困麟、府，州民及僧道诣阙请益兵，廷臣以二州在绝塞，咸议弃河外，守保德。会并代钤辖张亢奉诏至，与张岢合兵为战守计。夏容州刺史雅布移守贵以兵攻之，屡败，悉众据府北之琉璃堡，分列三寨。亢使谍伏寨旁草中，见老羌方炙羊髀占吉凶，惊曰：“明当有急兵，且趣避之。”皆笑曰：“汉儿方藏头膝间，何敢尔！”亢知无备，夜引兵袭击。大破之，俘获万计。夏人弃堡遁。（《宋史·张亢传》及《长编》一百三十三及一百三十四）

与宋人战于三松岭，败绩。

元昊之攻麟、府也，宋帅高继宣率师渡河屯府谷，间遣勇士夜乱夏营，又募黥配厢军，得二千余人，号“清边军”，命偏将王凯主之。军次三松岭，夏众数万围之，“清边军”奋起，斩首千馀级，其相躡藉死者不可胜计。（《宋史·高继宣传》）

约契丹侵宋。

谋待冰合渡河攻河东。知并州杨偕言于朝曰：“若朝廷不思御捍之计而修宁远寨，是求虚名而忽大患也。”（《长编》一百三十四）九月，遣使如契丹献宋俘。（《辽史·兴宗本纪》）

冬十月，宋夏竦罢。分陕西为四路，各置使，以韩琦、王沿、范仲淹、庞籍领之。

竦集幕职兵官，议五路进讨，凡五昼夜。屏人绝吏，所谋秘密处置军马、分擘粮草，皆有文字，已成书，两人之力不能举，封钥于一大柜中。一夕失之，竦等大骇，阴令访求。不数日，却在柜上，盖元昊使其客为之也。竦进兵之议遂格。由是乞罢。宋帝乃分秦凤、泾原、环庆、鄜延为四路，各置经略安抚招讨使。时琦知秦州，

沿知渭州，仲淹知庆州，籍知延州，诏分领之。张方平言：“泾原最当敌冲，王沿未惬人望，不当与琦等同列。”不报。琦上言：“请于鄜、庆、渭三州，各更益兵三万人，拔用有勇略将帅统领训练，预分部曲，远斥堠，于西人举动之时，先据要害，来则命驻扎之兵观利整阵，并力击之。又于西人未集之时，出三州已整之兵，浅入大掠，或破其和市，招其种落，筑垒拓地，别立经制。朝廷节俭省费，倾内帑三分之一分助边用，使行间觐贼。如此，则二三年间，贼力渐屈，平定有期矣。”（《长编》一百三十三、一百三十四及《谈苑》）

与宋延州军战于桥子谷，不克。

初，夏兵入汉界，宋军分地谨守，不敢拒战，故往来如履无人之境。自鄜延、环庆诸路设备，复布探马、侦候，兵至即会合掩击，于是稍知顾忌。时延州守庞籍以金明西北浑州川水土肥沃，川尾桥子谷为夏国险隘，令部将狄青筑招安寨于谷旁。元昊遣兵三万争之，麾骑挑战，六班散直张五持铁筒出斗，夏兵辟易退还。自是，兴、灵东界兵不得并力西出。（《宋史·庞籍传》）

攻宋大顺城。

宋诸将皆闭城自守，范恪率兵二千馀战克之。又犯高平军、刘璠堡，亦不克，引还。（《宋史·范恪传》）犯府州边塞。

兵马监押窦舜卿欲袭击，举烽求援于大将王凯，凯弗应。舜卿度事急，提州兵出战，胜之。明日，经略使问状，凯惧，要以同出为报，舜卿欢然相许，不自以为功。（《宋史·窦舜卿传》）

宋改元，赦书敕边吏，来通善意。

西师久未解，元昊虽屡胜，然死亡、创夷者相半，人困于点集，财力不给，国中为“十不如”之谣以怨之。宋臣张方干因其困敝上言：“陛下犹天地父母也，岂与犬豕豺狼较乎？愿因郊赦，引咎示信，开其自新之路。”帝喜曰：“是吾心也。”是岁，改庆历。赦书敕边吏，通其善意。（《宋史·张方干传》、《夏国传》）

宋诏殿前、马步军司：应西界人先隶军籍者，具名以闻。

初，夏州人韩怀亮更名福，为神卫军士。枢密院虑刺探朝廷机事，乃下开封府鞫状。而福自元昊未叛时内附，隶神卫军，破白豹城有功，补承局，非元昊所使刺事者。诏特迁一资，仍令密捕谍人之在京城者，而降是诏。（《长编》一百三十四）

宋知保安军刘拯，来诱野利旺荣降。

初，野利旺荣复书，语犹嫂。知延州庞籍言，诸路皆传元昊为西蕃所败，又野利族内叛，黄鼠食稼，天大旱，其国内既多忧虞，必为纳款之计。遂令知保安军刘拯谕旺荣言：“公持灵、夏兵，倘内附，当以西平茅土分册之。”知渭州王沿、总管葛怀敏亦使僧法淳持书来招，并以金宝贻之。（《宋史·夏国传》及《东都事略》）

十一月，争建宁寨，大败，悉撤诸路兵还。

建宁据麟、府之中，最号险要，元昊令蕃卒据之。时麟州郊赏至府州，府饷麟地距百四十里，非兵卫不敢前。张亢率所部护送，夏人抄之不得，间聚蕃众数万，屯柏子寨，邀亢归路。亢所将才三千人，亢激怒之曰：“若等已陷死地，前斗则生，不然为贼所屠无馀也。”士皆感厉。会天大风，顺风击之，俘斩无算。转战至建宁寨，寨兵披靡走，乃修复寨址。夏人出兔毛川争之，亢令张岳伏短兵强弩数千于山后。亢以万胜军皆京师新募市井无赖子弟，罢软不能战，夏人目曰“东军”，素易之，而怯虎翼军勇悍。亢阴易其旗以误夏军，夏军果趋“东军”，而值虎翼卒，搏战良久，伏发，夏众大溃，尽撤诸路兵还。至是，麟府馈路始通。（《宋史·张亢传》及《长编》一百三十四）

宋塞雁门备元昊。（《宋史·富弼传》）宋文学参军梁造请入西界，说元昊归款。

知永兴军范雍为言于帝，帝谓辅臣曰：“造乃言边事得官者，恐其言语肆诞，为夷狄所轻，不可许也。”（《长编》一百三十四）是年，沙州回鹘来侵，却之。

回鹘土产，珠玉为最；帛有兜罗绵、毛毡、絨锦、注丝、熟绦、斜褐；药有膈肭脐、硃砂；香有乳香、安息、笃耨。其人善造宾铁刀、乌金、银器，或为商贩，市于中国、契丹诸处。往来必由夏界，夏国将吏率十中取一，择其上品，贾人苦之。后以物美恶，杂贮毛连中，然所征亦不费。自元昊取河西地。回鹘种落窜居山谷间，悉为役属。曹琮在秦州，欲诱之共图元昊，得西川旧贾，使谕意。于是，沙州镇王子遣使入贡，奉书曰：“我本唐甥，天子实我舅也。自李氏取西凉，遂与汉隔。今愿率首领讨夏。”已而，以兵攻沙州，不克。又徇唐隆镇，降首领来守顺等。唐隆为西蕃大部，与麟、府仅隔一河，元昊围麟、府，分兵破之。守顺请降，徙之夏州。未几，与麟州蕃官麻崖（今作马崖）、府州巡检默喇（今作密拉），俱脱归中国。麻崖、默喇，皆元昊胁以入西者也。（《宋史·曹琮传》及《长编》一百三十四）

卷九

西夏称天授礼法延祚五年

春正月，契丹遣使如宋，求关南地。

契丹以宋与夏交兵，欲乘衅取瓦桥关以南十县地。乃集群臣议，南院枢密使萧惠曰：“宋人西征有年，师老民疲，陛下亲帅六师临之，其胜必矣。”北院枢密使萧孝穆曰：“我先朝与宋和好，无罪伐之，其曲在我。况胜负未可逆料，愿熟察之。”契丹主从惠言，乃遣翰林学士刘六符等致书于宋取故地，及问兴师伐夏之故。宋旋遣使，许增岁币，乃罢。（《辽史·兴宗本纪》、《萧惠传》及《宋史·富弼传》。按《长编》：富弼使契丹，契丹主曰：“元昊称藩尚主，南朝伐之，不先告我，何也？”弼曰：“北朝向伐高丽黑水，岂尝报南朝乎？天子令臣致意于陛下曰：‘向不知元昊与弟通姻，以其负恩扰边故讨之，而弟有烦言。今击之则伤兄弟之情，不击则不忍坐视吏民之死，不知弟何以处之？’”国主顾其臣语，良久乃曰：“元昊为寇，岂可使南朝不击乎？”）

宋将王仲宝来攻金汤城，进围宥州，不克。

金汤东距延州德靖寨四十里，西南距庆州柔远寨八十里，为中国和市处。元昊自麟、府还，虑延庆兵入界，以重兵守金汤。环庆副部署王仲宝与鄜延都监狄青率兵袭击，杀数百人，进攻宥州，大掠五日。元昊遣兵拒却之。（《宋史·王仲宝》、《狄青传》。按《长编》：枢密院言：“环庆副部署王仲宝等破金汤等城，斩首才二十七级，而官军战没者四十九人，深虑戎人复来犯边，欲令鄜延路预设备御。”从之。）

筑阿干城，破西蕃瞎毡于龛谷。

瞎毡与父唃廝囉猜阻，始据河州，继徙龛谷城，自立文法，无所属。宝元中，陕西经略安抚都监赵珣招之，遗以绀锦，瞎毡听命，屡通贡于宋，授澄州团练使。是时，元昊筑城阿干河旁，距龛谷七十里。宋命瞎毡为缘边巡检使，出兵图之。元昊恶其逼，遣将攻龛谷，大破之。唃廝囉不能救。（《长编》一百二十三、一百三十五。）

宋补夏降人讹乞为怀化将军。

时蕃部巡检赵明勾到西界团练使讹乞并蕃官等共二十三户。范仲淹奏请补官，并赏赐银碗、头巾角、茶、交椅、银带、锦袄等物。（《长编》一百三十五及《范文正公年谱补遗》）

野利旺荣使蕃将浪埋、赏乞、媚娘等三人诣青涧城种世衡请降。

世衡知其诈，曰：“与其杀之，不若因以为间。”留使监商税，出入骑从甚宠。（《宋史·种世衡传》）宋来行间。

始，元昊分山界战士为二厢，命两将统之：野利旺荣统明堂左厢；遇乞统天都右厢（魏泰《东轩笔录》：夏将野利刚浪、遇乞二人能用兵，山界人户善战，中间刘平、石元孙、任福之败，皆二将谋也。庆历中，种世衡守青涧城，用僧王光信赍书间之，元昊大怒，夺遇乞兵，杀之。薛氏《通鉴》：西夏刚浪号野利王，其弟号天都王，皆元昊腹心也。《宋史·种世衡传》：元昊未臣，其贵人野利刚浪、遇乞兄弟亲信用事，世衡使王嵩遗书间之，皆诛死。《夏国传》及《庞籍传》则言，籍与世衡致书野利旺荣，并无刚浪名。考《石林燕语》，庞颖公知延州，元昊亲信臣野利旺荣遣牙校李文贵来。朝廷幸其至，使籍作书答之。是刚浪即旺荣也，见《西夏书事》注）。二将能用兵，元昊倚为腹心。种世衡方城青涧，即谋有以去之。有紫山寺（《东轩笔录》作悟空寺，《补笔谈》作紫山寺）僧王光信者，勇善骑射，习知蕃部山川道路。世衡察其坚朴可用，延至门下，改名嵩，诱令冠带，因出师常使为向导，数荡族帐，以功白于帅府，表授三班借职，充指挥使。且力为办其家事，凡居室、骑从、衣食之具无不备，恣其所欲，供亿无算。嵩酗酒狎博，靡所不为。世衡待之愈厚，留岁馀，嵩亦深德世衡，自处不疑。一日，世衡忽怒谓嵩曰：“我待汝如此，而阴与贼通，何相负也！”拽下械系捶掠，极其苦楚。凡一月，濒于死者数矣。嵩终不怨，曰：“嵩丈夫也，公听奸人言，欲见杀有死耳，终不以不义自污。”世衡察其不负，为解缚沐浴，延入卧内，厚抚谢之。曰：“汝无过，聊相试耳。欲使为间，其苦有甚于此者，汝能为我卒不言否？”嵩泣对曰：“蒙将军恩教，致身荣显，常誓以死报，而未知其所，况敢辞捶楚乎？”世衡乃草遗野利书，书辞大抵如世间问起居之仪，惟以数句隐辞，如尝有私约，而劝其速行之意。书于尺素，且膏以蜡，置衲衣间，密缝之。告嵩：非濒死不得泄，若泄时当以负恩，不能成吾事为言。并以画龟一幅、枣一都为信，俾遗野利。嵩受教，始及山界，即为逻兵所得，送野利处。致世衡命，出枣龟投之。野利知见侮，笑曰：“吾素奇种将军，今何儿女子见识？”度必有书，索之。嵩佯目左右，既而答以“无有”。野利不敢匿，乃封其信上元昊。数日，元昊召野利与嵩俱西北行数百里，至一大城曰“兴州”，先诣一官寺曰“枢密院”，次曰“中书”，有数胡人杂坐，野利与焉。召嵩廷诘世衡书，问所在，嵩坚执前对。稍稍去巾带，加执缚，至于捶楚极苦，嵩终不易其言。又数日，召入一官寺，厅事广楹，皆垂斑竹箔，绿衣小竖立其左右，嵩意元昊宫室也。少顷，箔中有人出，又以前问责之曰：“若速言，死矣！”嵩对如前，乃命曳出诛之。嵩大号，且言曰：“始将军遣嵩密遗野利王书，戒不得妄泄。今不幸空死，不了将军事。吾负将军！吾负将军！”箔中急使人追问之，嵩具以对。乃褫衲衣，取书以进。书入移刻，始命嵩就馆，优待以礼。元昊于是疑野利，阴遣爱将教练使李文贵，以旺荣旨报世衡。且言不达所遗书意，或许通和，预赐一言。世衡疑是元昊使，未即见，命属官日即馆舍劳问，问及兴州左右则详，至野利所部多

不悉。适擒生虏数人，因令隙中视之，生虏能言其姓名，果元昊使。世衡乃延见使者，并以白庞籍，籍曰：“此诈也。”乃留文贵不遣。世衡又尝以非罪怒一蕃落，将杖其背，僚属为之请，莫能得。其人被杖已，即奔元昊。元昊甚亲信之，得出入枢密院，岁馀尽得其机事以归。众乃知世衡用其为间也。（《宋史·种世衡传》及《梦溪笔谈》、《东轩笔录》、《涑水记闻》、《五朝名臣言行录》）

据宋承平寨，文思使周美以兵出芙蓉谷，破之。

元昊据承平，诸将会兵议攻讨。洛苑副使种世衡请赍三日粮，直捣贼穴。周美曰：“彼知吾来，必设伏待我。不如间道，掩其不意。”世衡不听，美独以兵西出芙蓉谷，大破敌。而世衡等果无功。（《长编》一百三十五）

略宋土塿寨，知保安军周美迎击于野家店，追北至拓跋谷，大败其众。军还，筑栅于葱梅（《长编》作帕美）官道谷，以扼敌路。

美复率众由厅子部西济大理河，屠札万多移（《长编》作嘉勒千多叶）二百帐，焚其积聚而去。（《宋史·周美传》）遣兵援黑神堡，复犯延州。

元昊筑黑神诸堡，扼延州要路。东路都巡检马怀德平荡之。元昊遣兵四万蹶其后，复入延州界，趋仆射谷。怀德分兵数千，据谷旁高原以待。夏兵恐失地利，挥众搏战，怀德力拒，不得进。（《宋史·马怀德传》）

夏五月，宥州侍中默香（一作密香）叛附于宋。

默香素掌宥州兵马，庞籍使嵬泥（一作圭年）族军主阿克（一作阿克阿）入西侦伺，默香告以国主请兵契丹，使为备。旋与其属堪嵬（一作堪威）、布遇乞（一作布达约噶）遣人赍告敕请内附，求封爵。宋帝授顺德军节度，封顺德郡王，赐姓名“白守忠”。堪嵬，会州防御使；布遇乞叙州防御使，各赐袭衣、金带。默香等仍居宥州如故。（《长编》一百三十六。按是月，西界团练使纳斡亦降宋，除右班殿直。）

谟宁令野利仁荣卒。

仁荣，野利后疏族，多学识，谙典故。元昊建号之初，显庸创制，动静咨之，尝论兴、灵立国大势，言：“一王之兴，必有一代之制。议者咸谓化民成俗，道在用夏变夷，说殆非也。昔商鞅峻法而国霸；赵武胡服而兵强。国家表里山河，蕃汉杂处，好勇喜猎，日以兵马为务，非有礼乐诗书之气也。惟顺其性而教之功利；因其俗而严以刑赏，则民乐战征，习尚刚劲，可以制中国、馭戎夷，岂斤斤言礼言义可敌哉？”及卒，元昊三临其丧，恸曰：“何夺我股肱之速也！”命厚葬之，赠富平侯。

。（《西夏书事》）

宋帅范恪会诸道兵，攻夏十二盘及咄当迷子寨，陷之。

当战急，时恪中流矢，督战愈力，视炮石中有火爨者，恪取号于众曰：“贼矢石尽，用灶下爨矣。”于是士卒争奋，果先得城。恪有弓胜一石七斗，其箭镞如铍，名曰“铍弓”。又于羽间识其官称姓氏，凡所发必中，至一箭贯二人。（《宋史·范恪传》）

宋城大顺城。争之不得。

宋庆州西北马铺寨，当后桥川口，在夏人腹中。范仲淹欲城之，度夏人必争，密遣子纯祐与蕃将赵明先据其地，引兵随之。诸将不知所向，行至柔远，始号令之，版筑皆具，旬日而城成，即大顺城是也。夏人觉，以骑三万来战，佯北，仲淹戒勿追而过河。已而河外果有伏。大顺既城，而白豹、金汤皆不敢犯。（《宋史·范仲淹传》。按《传》云：“大顺既城，白豹、金汤，夏人皆不敢犯。”考仲淹奏议云：“臣窃观延安之西，庆州之东，有夏界百馀里侵入汉地，中间金汤、白豹、后桥三寨，阻绝延、庆二州经过道路，使兵势不接，策应迂远。自来虽曾打破，无招降之术、据守之谋，汉兵才回，敌据如故。”又《李复圭传》：熙宁三年，遣别将破其金汤、白豹西人和市。又《地理志》：进筑白豹、金汤，俱在元符二年，则庆历中二城尚未内属，未可云犯也。见《西夏书事》注。）

纳妃没移（一作摩移）氏，营天都山居之。

妃为没移皆山（一作克结星）女，元昊因天都与泾原路接，山川平易，劲骑疾驰渭州，旦暮可至，特营宫室居之，日与没移氏宴乐其中。天都守将野利遇乞，后野利从父也。谓其下曰：“吾女嫁二十年，止故居。今新得没移氏，即为修内，何重之若是耶？”元昊闻而恶之。（《长编》一百六十二。按是岁营宫室于天都山，又见《长编》韩琦、范仲淹《奏议》。）

宋筑细腰、葫芦诸寨，明珠、灭臧族复归宋。

宋环州之西、镇戎之东，有葫芦泉一带蕃部，与明珠、灭臧相接，阻环州、镇戎经过道路。明珠，灭臧之居，北接夏境，二族劲兵数万。范仲淹闻泾原欲袭讨之，上言曰：“二族道险，不可攻，前日高继嵩已丧师。平时且怀反侧，今讨之，必与贼表里，南入原州，西扰镇戎，东侵环州，边患未艾也。若北取细腰、葫芦众泉为保障，以断贼路，则二族安，而环州、镇戎径道通彻，可无忧矣。”遂城之。（《宋史·范仲淹传》及《文集》）

与宋兵马都监周美战于无定河，败绩。

美乘胜至绥州，杀其酋豪，焚庐帐，获牛、马、羊驼、器械三百计，因城龙口平寨。夏人以精骑数千来袭，美以百馀骑破之。（《宋史·周美传》）

秋闰九月，元昊攻定川寨，宋泾原路马步军副都总管葛怀敏战没，元昊遂大掠渭州引还。

先是，元昊声言入寇，攻镇戎军，王沿命副都总管葛怀敏督诸寨兵御之。己卯，至瓦亭寨，遣本寨都监许思纯、环庆都监刘贺以蕃兵五千馀人为左翼，天圣寨主张贵为殿后。戊子，进屯五谷口。知镇戎军曹英、泾原路都监赵珣、西路都巡检李良臣、孟渊皆自山外来会，沿边都巡检使向进、刘湛为先锋，赵瑜总奇兵为援。

及大军次安边寨，给刍秣未绝，怀敏即离军，夜至安远堡北一里而舍。庚寅，领大军自镇戎军西南，又先引从骑百馀以前。走马承受赵政以为距敌近，不可轻进，怀敏乃少止。晚，趋养马城。曹英及泾原都监李知和、王保、王文、镇戎都监李岳、西路都巡检使赵珣等分兵屯镇戎城西六里。夜则入城自守，凡三日，至是亦趋养马城，见怀敏，闻元昊徙军新壕外，乃议质明掩袭。赵珣谓怀敏曰：“敌远来，利速战。宜依马栏城布栅，扼敌归路，固守镇戎以便饷道，俟其衰击之，可必胜。不然，必为所屠。”怀敏不听，命诸将分四路趋定川寨，刘湛、向进出西水口，赵珣出莲花堡，曹英、李知和出刘璠堡，怀敏出定西堡。

既而，知和与英督军夜发。辛卯，刘湛、向进行次赵福新堡，遇敌，战不胜，保向家峡。而赵珣、曹英、李良臣、孟渊等将趋定川，怀敏且令援赵福堡。未行，谍言贼已屯边壕上，复召珣等入定川，会李知和麾下蕃落将报敌五千人列定川寨北，顷之，王文、李知和、定川寨主郭纶又报已拔寨逾壕。怀敏命赵珣与其子宗晟先行。日几午，怀敏入保定川寨。敌毁版桥，断其归路，别为二十四道，以过军环围之，又绝定川水泉上流，以饥渴其众。刘贺率蕃兵斗于河西，不胜，众溃。

怀敏为中军，屯寨门东偏，曹英等阵东北隅。敌四面俱至，先以锐兵冲中军，不动，回击曹英，会黑风自东北起，部伍相失，阵遂扰，士卒攀城堞争入。英面被流矢，仆壕中，怀敏所部兵见之，亦奔骇。怀敏为众所拥，蹂躏几死，舆至瓮城，久之乃苏。怀敏选士据门桥，挥手刀以拒入门者。赵珣等拥刀斧手前斗，及以骑军回合御敌，敌众稍却。然大军无斗志，赵珣累驰入，劝怀敏还军中。

是夕，敌聚火围城四隅，临西北呼曰：“尔得非部署厅上点阵图者耶？尔固能军，乃入我围中，今将何往？”夜四鼓，怀敏召诸将计议，莫知所出，遂谋结阵走镇戎军。赵珣请自笼竿城往，曰：“彼无险，且出贼不意。”众不从。及旦，怀敏束马东南驰行二里许，至长城壕，路已断，敌周围之，怀敏及诸将曹英等十六人皆遇害。

，馀军九千四百余人，马六百余匹悉陷于敌。怀敏子宗晟与郭京等还保定川。

时韩质等领军三千保莲花堡，刘湛等领军一千保向家峡，皆不赴援。于是敌长驱直抵渭州，幅员六七百里，焚荡庐舍，屠掠居民而去。

先是，通判尹源遗怀敏书曰：“敌举国而来，其利不在城堡，而兵法有不得而救者，宜驻兵瓦亭，择利而后动。”当怀敏进兵镇戎，王沿亦以书戒勿入，第背城为寨，以羸师诱敌，发伏击之，可有功。怀敏皆不听，故败。怀敏时推名将，惟郭逵曰：“喜功傲幸，徒勇无谋，可擒也。”怀敏死，宋诸将为之夺气。元昊气益骄，诏谕镇戎兵民，有定关辅之言。盖宋之叛人不乐处夷狄中，心谋侵据汉地，所得城垒，必使汉人守之，如契丹得山后诸州，皆令汉人为之官守，故教之侵没汉地也。（《宋史·仁宗本纪》、葛怀敏、尹源、王沿、郭逵等传及《长编》一百三十七、《范文正集》。按尹洙《上环庆招讨使范希文书》：“定川之役虽速战可咎，然当其未败时，某与韩公料其必败，盖以事势得之，则似不独主将罪也。兵兴五年，我师之败数矣，能穷我之所以败，则知彼之所以胜。为敌所诱而取覆者，特一事耳。愿明公深思其已然，以为将来之策。”又《长编》：泾原路安抚使王尧臣言：“今体量定川之败，其失有四：不住瓦亭，奔五谷口，一失也。离安远堡北不入镇戎军，由西南直移养马城，二失也。自养马城越长城壕赴定川，三失也。定川见贼，不能尽死，四失也。其长城壕深阔各五七丈，最为险固。旧有板桥，为贼毁去，断官军归路，别筑道二十四自行。贼马雍定川水泉上流，将佐无觉知者。而怀敏素强愎，其属谏止多不听，始则贪功轻敌，至定川贼众四集，仓皇不知所从，遂议南遁，使数万之众投于死地。劲兵利器，如委沟壑。用兵以来，无辱于此。望敕边臣，自今深鉴前弊，不可更驱士旅以陷败机也。”）

与宋知原州景泰战于彭阳地，败还。

元昊众十万分二道，一出刘璠堡，一出彭阳城，入攻渭州。葛怀敏援刘璠堡，战没。夏师遂乘胜逾平凉至潘原。泰率兵五千，从间道赴援。遇夏人彭阳西，泰依山而阵，未成列，夏骑往攻，泰阴遣二百骑分左右翼，张旗帜为疑兵。夏师伪遁，泰将校请进击，泰止之，遣士搜山，果得伏兵，与战，夏人死者千余人。（《宋史·景泰传》。又《长编》：先是，上以西边诸将数有战功，特召见之。环庆都监、宫苑副使范全入奏：“近刺知天都左右厢点兵，然未知寇出何路。”上曰：“适有边奏，已犯高平军刘璠堡，可乘驿亟往。”遂迁礼宾使、荣州刺史、环庆钤辖，手诏令趣范仲淹麾下起兵赴援。全昼夜兼行，比至平凉贼已解去。）

宋遣李文贵还。

宋帝因契丹使言元昊欲归款，诏庞籍招纳，元昊苟称臣，虽仍僭号，亦无害；若改称单于、可汗则固大善。籍以为元昊骤胜方骄，若中国自遣人说之，彼益骄蹇不可

与言。乃自青涧城召文贵，谓之曰：“汝之先主及今主之初，奉事本朝，皆不失臣节。汝曹忽无故妄加之名，使汝主不得为臣，纷纷至今。彼此之民肝脑涂地，皆汝群下之过也。汝犯边之初，以国家久承平，民不习战，故屡为汝胜；今边民益习战，汝之屡胜岂可常耶？我国家富有天下，虽偏师小衄，未至大损。汝一败，则社稷可忧矣。天之立天子者，将使博爱四海之民而安定之，非必欲残彼而取快也。汝归语汝主，若诚能悔过从善，称臣归款，以息彼此之民，朝廷所以待汝主者，礼数必优于前。”文贵顿首曰：“此固西人日夜之愿也。龙图能为言之朝廷，使彼此休兵，其谁不受赐？”籍乃厚赠遣之。（《长编》一百三十八）

纵王嵩归延州，复遣李文贵以野利旺荣等书议和。

元昊固欲和，而耻先发，及文贵还，闻籍语大喜。亟遣嵩还，使与文贵以旺荣及弟旺令、嵬名环、卧誉诤等书，抵籍议和。且云：“如日之方中，止可顺天西行，安可逆天东下？”籍嫌其不逊，未敢复书。请于朝，会宋帝厌兵，且议招怀，使籍以书许其和。而书称旺荣为“太尉”，籍言：“太尉，天子上公，非陪臣所得称，使旺荣当之，则元昊不可复臣矣。令其书自称宁令或谟宁令，皆虏中官称，于义无嫌。”诏从籍言。既而旺荣等又以书来，欲仍其僭号，而称臣纳款。籍曰：“此非边臣所敢知也。”时方议修泾原城寨，籍恐元昊败其功，故与往复计议，抑止其僭，亦不决然绝也。（《长编》一百三十八）

杀野利旺荣及遇乞。

元昊性忌刻，多诡计，左右用事之臣，有疑必诛。自王嵩间入，忌旺荣有二心，因事诛之，灭其家。其弟遇乞，常守天都山，号“天都大王”，与元昊乳母白姥有隙。遇乞尝引兵，深涉汉境数宿，白姥乘间谮其欲叛，元昊疑而未发。种世衡诱得西酋苏吃曩，厚遇之。吃曩之父，得幸遇乞。世衡许吃曩金带、锦袍、缘边职任，使盗遇乞宝刀，刀乃元昊所赐者。世衡倡言：遇乞内投，以刀为信。今为白姥谮死，乃越境设祭（王氏《东都事略》：元昊使其妻之兄宁令、舅野利旺荣及刚浪分将左右厢兵，最用事。旺荣死，世衡欲并间刚浪，因设祭境上。是王氏不知刚浪为旺荣，并不知有遇乞也）。为文书于版，多述野利兄弟有意本朝，并叙涉境相见之，欢哀其垂成而失。入夜，令人持其文，杂纸币焚之，照耀川谷。西人走视，悉取所委祭具、金银千馀两，并得所赐刀，及纸灰中版，其文尚未灭。以献元昊，元昊见刀信之，遂夺遇乞兵，赐死（《长编》：世衡以庆历五年正月七日卒，其时野利兄弟未诛也。范仲淹《志世衡墓》云：“尝遣谍入敌中，凡半岁，敌臣诛者二、三人。谍者还言其谋得行，而世衡已歿。上方怀来，故其绩不显。”而《孙甫奏议》于庆历三年十二月即有近闻元昊杀其用事之臣遇乞等。与《宋史·世衡传》同）。遇乞兄弟有大功，死不以罪。自此君臣相猜，至不能军。（沈括《笔谈》。按韩琦《仁宗实录》：渭州百姓范仁义、张家堡十将张遂诣王沿言：“遇乞、刚浪、城逋三人，阴欲内附。”沿遂遣仁义等持书入西夏。事觉，元昊族三家，杀仁义，配遂居摊

粮城。及契丹西伐，获遂以归。司马光《涿水记闻》：种世衡死，其长子古诣阙言：“世衡在青涧城尝遣王嵩入夏，反间其用事臣野利旺荣兄弟，皆被诛，元昊由是势衰纳款。经略使庞籍掩父功，自取两府。”籍时在枢密院，具言嵩入夏界即被囚，元昊委任旺荣如故。元昊欲和，先令旺荣为书遗边臣。元昊妻，即旺荣妹，元昊黜其妻，旺荣怨望。元昊称臣后二年，旺荣谋杀元昊，事泄夷族，非因嵩反间也。又《长编》：元昊纳没移氏，营天都山居之。妻野利氏之叔遇乞有怨言，元昊怒。会有告遇乞兄弟谋以宁令哥娶妇之夕作乱，元昊遂族遇乞、刚浪、城逋等三家。曾氏《隆平集》所载亦如之。诸说互异，见《西夏书事》注。）

十一月，宋以韩琦、范仲淹、庞籍为陕西安抚、经略、招讨使，置司泾州。

先是，帝以泾原伤夷，欲令范仲淹与文彦博对易，遣内侍王怀德喻旨，仲淹谢曰：“泾原地重，臣恐不足以独当。愿与韩琦同经略泾原，并驻泾州。琦兼秦凤，臣兼环庆。一则中外稍安，事不率易。二则泾原有警，臣与韩琦可合秦凤、环庆之兵，犄角而进。若秦凤、环庆有警，亦可率泾原之师以相应援。三则通修环庆、镇戎诸寨，借此两路事力，必能速有成功。四则臣与韩琦日夜计议，选练兵将，渐复横山，以断贼臂，不数年间，可期平定。愿诏庞籍兼领环庆，以成首尾之势。秦州委文彦博，庆州用滕宗谅总之，孙洙亦可办集。渭州，一武臣足矣。”于是复置陕西四路都部署、经略安抚兼缘边招讨使，命韩琦、范仲淹、庞籍分领之。仲淹与韩琦开府泾州，而徙彦博帅秦，宗谅帅庆，皆从仲淹请也。（《长编》一百三十八）

出兵争马蹄川，不胜。

延州塞门及河东丰州地，旧有属户聚居，经元昊驱掠，遂为隙地。团练使周美连筑清水、佛堂诸堡，进城马蹄川，招徕蕃族。元昊令数万骑攻之，兵势大震。经略使趣诸将城黑水以待。美独以兵二千，遣管勾机宜楚建中御之，夏兵与战，不胜而还。（《长编》一百三十五）

太子宁明卒。

宁明天资聪慧，好学，明大义，然性仁慈，不乐荣利，常从定仙山道士路修篁学辟谷法，朝夕不少懈。元昊恶之。一日试问以养生之要，曰：“不嗜杀人。”再问以治国之术，曰：“莫善于寡欲。”元昊怒曰：“此子语言不类，岂霸王之器乎？”不许入见。宁明忧惧，未几，习道气忤，食不入，死。遗奏以荒旱荐臻、民不堪命为言，未请白衾入棺，以识不能体亲之罪。元昊见而哀之，令仍以太子礼葬。又立宁令哥为太子，元昊素爱宁令哥，因野利氏请立之。时白气如绳，贯日中再。群臣以为言，不听。（《长编》一百六十二及《西夏书事》）

契丹使萧塔列噶来议伐宋，

约元昊出别道以会，宋疆候戒严，通判安肃军李及之言：“契丹以与夏人甥舅之故，特以慰其心，且姑张虚势以疑我，必不失誓好，愿毋过虞。”已而果然。（《辽史·萧塔列噶传》及《宋史·李及之传》）

党项部人叛契丹来附。元昊使人诱之也。（《辽史·耶律侯晒传》）遣人入吐谷浑诸蕃市马，契丹禁之。

初，契丹于云中路置西南两招讨、西京兵马部署司、南北大王府、乙室王府、山金司，以控制西夏，惮其强也。元昊自彭阳败回，数遣人于吐谷浑、党项诸处市马。契丹主虑其势盛，禁约诸蕃，令沿边筑障塞以防之。（《辽史·西夏外纪》及《百官志》）

是岁，青涧有兀二族已受夏官，种世衡遣将诛之。其他受牒如兀二族者百馀帐，咸俱纳所得夏文券、袍带于世衡。（范文正《种世衡墓志》）

卷十

西夏称天授礼法延祚六年

春正月，契丹遣同知析津府事耶律敌烈、枢密院都承旨王惟吉来议与宋和。（《辽史·兴宗本纪》）宋建渭州笼竿城为德顺军，谋取横山。

初，曹玮开山外地，置笼竿、羊牧隆城、静边、得胜四寨，募弓箭手，给田，使耕战自守。其后，将帅失抚御，稍侵夺之。众遂怨怒，劫得胜寨主姚贵，闭城叛。时安抚使王尧臣奉使还，过境上，作书射城中，谕以祸福，招降之。因建议，谓笼竿城蕃汉交易，市邑富庶，全胜近边州郡，夏人久有窥伺之意，请建置为军。

时元昊巢穴，实在河外，河外之兵，懦而罕战。惟横山一带蕃部，东至麟、府，西至原、渭，二千馀里，人马精劲，惯习战斗，与汉界相附，每大举侵宋，必为先锋，故西夏以山界蕃部为强兵。又宋陕西四路之兵几二十万，非不为多，然各守城寨，每路战兵大率不过二万馀人，坐食刍粮，不敢动举，岁岁设备，常若敌至，不知夏人之谋果犯何路。夏人则不然，种落散居，衣食自给，忽尔点集，并攻一路，故夏众动号十馀万人。以宋分散之兵，拒西夏专一之势，众寡不敌。且西夏为客，当劳而反逸；宋为主，当逸而反劳，是以元昊屡胜。宋帅韩琦、范仲淹，乃谋于鄜延、环庆、泾原路，各选劲兵，掠取横山，招纳部族，进筑城堡，更用春秋时吴国三师破楚之法，更番出入。以困苦之，故迭城大顺、葫芦诸城。至是，又有笼竿城之役。自是，元昊遂不支矣。（《长编》一百三十九及一百四十九）

遣使如宋请和。

元昊既杀野利旺荣、遇乞，谋臣已去，始知为种世衡所卖。又国饥民怨，屡为韩琦、范仲淹所扼，势不能支，遂决计请和。乃遣其六宅使、伊州刺史贺从勖（韩、范《文集》勖俱作勉）与李文贵至延州，上书自称“男邦泥定国兀卒上书父大宋皇帝。”兀卒，译言即吾祖也。但称其新所改名曩霄，而不称臣。从勖又致契丹使人，谕令早议通和之意。又言本国自有国号，无奉表体式，其称兀卒，盖如单于、可汗之类。若南朝使人至本国，坐蕃宰相上，兀卒见使人时，离云床，问“圣躬万福”。而从勖亦自请诣阙。庞籍使谓之曰：“天子至尊。荆王，叔父也，犹奉表称臣。今名体未正，不敢以闻。”从勖曰：“子事父，犹臣事君也，使从勖得至京师，而天子不许，请归更议之。”籍乃具以闻。且言元昊词稍顺，必有改事中国之心，愿听从勖诣阙，更选使者往其国申谕之，彼必称臣。凡求丐之物，当力加裁损，必不得已，则少许之。若所求不违，恐豺狼之心未易盈厌也。（《长编》一百三十九，又《长编》：右正言、直集贤院田况言：“西界遣贺从勖等持书至阙，将许入见。自昊贼叛命以来，屡通书。今名分未定，若止称元昊使人，则从勖未必从；若以伪官进名，则是朝廷自开不臣之礼。宜且令从勖在馆而就问之。”）

二月，遣使如契丹，贺加上尊号。（《辽史·兴宗本纪》）契丹以元昊罢兵，遣使报宋。耶律敌烈等使夏国还奏罢兵，故报宋。（《辽史·兴宗本纪》）

右正言梁适使延州，与庞籍议所以招怀元昊之礼。（《长编》一百三十九）宋召范仲淹为枢密副使，以郑戢知庆州。

戢尝行边至镇戎军，趣莲花堡，天寒，与将佐置酒。元昊拥兵近塞。会暮，尘起，有报敌骑至者，戢曰：“此必三川将按兵回，非敌骑也。”已而果然。（《宋史·郑戢传》）

三月，献俘契丹。

定川之役，获镇戎军巡检李良臣，至是献于契丹。（《西夏书事》）

夏四月，宋遣保安军判官邵良佐、张士元、张子奭、王正伦等来，许册封为夏国主，岁赐绢十万匹、茶三万斤。

宋以元昊名分未正，使签书保安军判官事邵良佐假著作郎与从勛至夏州，更议之。先是，良佐与贺从勛诣阙，馆于都亭西驿。承受使臣取元昊书至中书、枢密院，谕从勛以“所赍来文字名体未正，名上一字又犯圣祖讳，不敢进，却令赍回。其称男，情意虽见恭顺，然父子亦无不称臣之礼。自今上表，只称旧名，朝廷当行封册为夏国主，赐诏不名。许自置官属。其宴使人坐朵殿之上，或遣使往彼，一如接见契丹使人礼。如欲差人于界上承领所赐，亦听之。置榷场于保安军，岁赐绢十万匹、茶三万斤，生日与十月一日赐赉之。许进奉乾元节及贺正。其沿边兴复寨栅，并如旧。”仍命良佐与从勛等往议之。其大臣或谓良佐曰：“今兹用兵，如富者与贫者赌博，贫者只宜常胜。使富者胜，贫者必匮。”其不逊如此。又语众曰：“我求罢兵，而南朝不许。”用此以归怨激众。（《宋史·仁宗本纪》、《夏国传》及《长编》一百四十、龚鼎臣《东原录》）

遣使如契丹进马、驼。

时宋集贤校理徐靖奉使在北，契丹主示以元昊表状，以见夏国畏服之意。（《辽史·兴宗本纪》及《长编》一百五十四）

秋七月，复遣如定事舍（《通鉴纲目》作儒鼎伊实）等如宋议和。

时元昊倚契丹，邀索无厌，所要请凡十一事。其欲称男而不为臣，犹执前议也。宰相晏殊等厌兵，将一切从之。欧阳修言：“闻朝廷欲以殿中丞任颢馆伴元昊所遣来人。闻邵良佐昨来自彼，仅免屈辱而还。今元昊来人，欲乞更不差官馆侍，送置驿

中，不须急问。至于监视馈犒，传道语言，一了事班行足矣。”不从。谏官蔡襄言：“元昊始以‘兀卒’之号为请，及邵良佐还，欲更号‘吾祖’，足见羌戎悖慢之意。纵使元昊称臣，而上书自称曰‘吾祖’，朝廷赐之诏书亦曰‘吾祖’，是何等语耶？”会盐铁判官任颢为馆伴，一切折以义，词屈而去。群臣亦多言不宜许和者。孙甫言：“自元昊梗命，终不敢深入关中者，以唃廝囉等族不附，虑为后患也。今中国与之和，获岁遗之厚，彼必专力以制二蕃，强大之势，自兹为始。”韩琦亦言：“今训兵数万，号令齐一，阵伍精整，而熟户蕃兵，日渐可指臂而使。贼若倾国而来，则清野守塞，令其坐困；若偏师稍至，则据险乘便以邀之，得当而后已。待其退散，我兵以其间，岁三五出入以扰之，元昊诸厢兵多在河外，必且疲于奔命。”（《宋史·夏国传》、《孙甫传》及《长编》一百四十二。按《长编》八月壬戌，翰林侍读学士、左司郎中杨偕知越州。时元昊乞和而不称臣，偕以谓“连年出师，国力日蹙，宜权许之，徐图诛灭之计”。谏官王素、欧阳修、蔡襄累幸劾奏：“偕职为从官，不思为国讨贼，而助元昊不臣之请，罪当诛。陛下未忍加戮，请出之，不宜留处京师。”帝以其章示偕，偕不自安，故求外补。未至越州，改杭州。）

宋诏边吏，量敌奋击，毋轻出。

从安抚使王尧臣之请也。尧臣自陕西回，上言：“陕西兵二十万，分屯四路，然可使战者止十万。贼众入寇，常数倍官军，彼以十战一，我以一战十，故三至而三胜，由众寡不侔也。泾、原近贼巢穴，最当要害，宜先备之。今防秋甚迩，请益团土兵，以二万屯渭州，为镇戎山外之援；万人屯泾州，为原、渭声势；二万屯环、庆；万人屯秦州，以制其冲突。且贼之犯边，不患不能入，患不能出也。并塞地形虽险易不同，而兵行须由大川，大川率有寨栅为控扼。贼来利在虏掠，人自为战，故所向无前。若延州之金明、塞门寨，镇戎之刘璠、定川堡，渭州山外之羊牧隆城、静边寨，皆不能扼其来，故贼不患不能入也。既入汉地，分行钞略，驱虏人畜，劫掠财货，士马疲困，奔趋归路，无复斗志。若以精兵扼险，强弩注射，旁设奇伏，断其首尾，且追且击，不败何待？故贼之患在不能出也。贼屡乘战胜，重掠而归，诸将不能追击者，由兵寡而势分也。若尚循故辙，必无可胜之理。”

又论延州、镇戎军、渭州山外三败之由，“皆为贼先据胜地，诱致我师，将帅不能据险击归，而多倍道趋利，兵方疲顿，乃与生羌合战，贼始纵铁骑冲我军，继以步卒挽强注射，锋不可当，遂致掩覆。此主帅不思应变以惩前失之咎也。愿敕边吏，常远斥堠，遇贼至，度远近立营寨，然后量敌奋击，毋得轻出。”宋帝诏以其言戒边吏。（《宋史·王尧臣传》）

再遣杨守素如宋，乞称臣，市青盐，纳盐易茶及增岁币。

宋臣孙甫言：“张子奭使夏州回，元昊复称臣，然乞岁卖青盐十万石，兼欲就京师

互市诸物，仍求增岁给之数。臣以谓西盐数万石，其值不下钱十馀万缗。况朝廷已许岁赐二十五万，若又许其卖盐，则与遗契丹物数相当。使契丹闻之，则贪得之心生矣。况自德明之时，累乞放行青盐，先帝以其乱法不听。及请之不已，追德明弟入质而许之，是则以彼难从之事杜其意也。盖盐中国之大利，又西戎之盐味胜解池所出，而出产无穷，既开其禁，则流于民间无以提防矣。兼闻张子奭言：‘元昊拒命以来，收结人心，抄掠所得，旋给其众，兵力虽盛，用度随窘。’当此之时，尤宜以计困之，安得汲汲与和，曲徇其请乎？”

包丞亦言：“臣伏见西虏再遣杨守素诣阙请命，而朝旨方议纳其诚款，此亦安民御边之长策也。风闻道路云，元昊欲岁纳青盐，贸易茶货，然未审虚实。缘元昊数州之地，财用所出，并仰给于青盐。自用兵以来，沿边严行禁约者，乃困贼之一计尔。今若许以岁进数万石，必恐禁法渐弛，奸谋益炽，不惟侵夺解盐课利，亦虑浸成大敝，关防或未能制。若稍行捉捕，则弃前恩结后怨，此亦必然之势也。”（《宋史·孙甫传》及《包孝肃奏议》。按《韩魏公家传》：子奭回，元昊虽复欲称臣，然岁乞卖青盐，及增岁给之数。公又言：“子奭尝谕西界，令尽还前所侵延州地，终未听从。此于朝廷所系者大，且栲栳、塞门、安远、黑水等寨自为贼所破，直至延州更无障碍。其承平、长宁、南安等寨，亦当时仓卒弃之，今若遂不修复，则斥堠至迫而边民不敢耕殖，岂得为延州之利乎？又闻贼更欲每年入中青盐十万斛，今只以解盐半价约之，已及二十馀万贯，并所许岁币仅四十馀万，此乃与北敌之数相当。议者又欲许其入中青盐，却复所侵边地。臣窃思之，亦恐未为全计也。缘青盐只于保安军入中，必难尽易，当须官自辇置别州，且疲弊之后可复兴此劳役乎？自来沿边熟户与西界蕃部交通为常，大率以青盐价贱而味甘，故食解盐者殊少。边臣多务宽其禁，以图安辑。惟汉户犯者坐配隶之刑，曾无虚日。今若许入中青盐，其计官本已重，更须增价出卖，则恐沿边蕃汉尽食西界所贩青盐，无由禁止。解盐之利，日渐侵削，而陕西财用，不得不屈矣。是使西贼蓄锐俟时，祸变不测，其势必然。今急欲议和者，但见目前苟且之利，而不顾贻患于国家。欲乞朝廷熟虑，今来所许岁币已厚，须是尽还延州侵地，方与约和。其欲入中青盐，决不可许。若西贼缘此未肯纳款，即乞早议修复侵废城寨，为一路经久保守之计。”）

团练使讹济（《长编》作鄂特结）侵环州，为苏家族薛乞（《长编》作实吉）所执。

元昊虽使议和，然时纵兵窥伺环、庆等路。讹济怨其兄讹乞内降，擅侵掠环州，苏家族巡检、三班奉职薛乞诱执以献。（《长编》一百五十五）遣使上表于契丹，请伐宋。

元昊迎契丹旨议和，及邵良佐来议反不承纳，谓朝廷既欲议和，何须往问北朝，色殊不悻。至是，如定等奉使未还，意为中国羁留，潜令点集兵马，遣使契丹，请出师南伐。契丹主不许。盖契丹是时聚兵塞上，大为战具，求宋关南地，无意出兵，

特欲以虚声恐喝，于中收渔人之利，实无助夏意也。（《西夏书事》）

冬十月，侵党项。

契丹遣延昌宫使高家奴来让之，因造船于天德军，将谋伐夏。或谓宋知庆州郑戩曰：“虏态难常，我盍备之？”戩曰：“虏出无名，匈奴本以甲马战斗，今争舟楫之利，是弃长技而取所短，彼将取败，我焉用虞？”后契丹果以败闻。（《辽史·西夏外纪》及胡宿《郑戩墓志铭》）

十二月，复遣张延寿等如宋议和。

元昊所求诸事，中朝皆未之许，又遣延寿持书至中国议，虽肯上表称臣，而书中年用甲子，国号止易一字，仍欲通市青盐及自贸易，又乞增岁赐至三十万。宋帝仍令任颢押伴，礼折之。（《长编》一百四十五及《五朝名臣言行录》。按《长编》：十一月乙酉，陕西宣抚副使田况言：“自冬初诸路得谍者，皆声言西界迤邐约腊、纲朗威等诸腹心谋叛贼，事觉被诛，国中大乱。臣窃疑朝廷方遣使议和，贼所希甚大，若心实欲和，则当夸示凶势，幸我曲从，以厌其私。岂肯诈扬此声，自见危弱。此其势实衰而亟求款附也。若其国人果叛，犹且倔强，妄有干求，不宜过有许与，示边人以弱。如谍者所得皆诈，则蓄谋怀毒，志未可量。虽尽副所求，只足纳侮。朝廷既恃和懈备，贼乃羸形伺隙，祸发所忽，昔人所戒。望与二府大臣熟计其事，其岁给恐不可复增也。”）

契丹城河清军及金肃州，以兵争之，不克。

自李氏归顺契丹，使介往来，特开直路，以趋上京。是时谋伐夏，徙民五百户，建河清军；复割燕民三百户，置金肃州。元昊遣兵二千馀争之，不克而返。（《辽史·地理志》及《西夏书事》）

西夏称天授礼法延祚七年

春二月，侵宋青涧川。

元昊欲先割地，然后议和，遣众于延州界上，修筑城垒，广占边境，见疆吏不敢与争，遂纵蕃骑数百掠青涧川，为左班殿直折保忠所败。保忠，西界蕃部马山，内附赐名者也。（《长编》一百四十七及一百五十六）

使臣张延寿还，复以兵掠宋秦州。

延寿屡向押伴任颢要索，颢密以陈宋帝，惟许榷场及添岁赐五万，馀不许。延寿还

，元昊以兵临秦州之平川，族户一千馀帐，焚掠殆尽。（《西夏书事》）

围青涧城，与宣武副都头刘岳等战，不胜。（《长编》一百四十九）党项等部叛契丹来附。

去年侵党项，契丹来让，不听。复遣使诱之，至是党项等部及夹山部落呆儿族（按《东都事略》作保家族。《范文正言行录》作银瓮族）八百户，与山西部落节度使屈烈皆叛契丹宋降。（《辽史·西夏外纪》）

夏五月，遣兵援叛党。

契丹主以党项叛，遣南面招讨罗汉奴率所部讨之。党项乞援，元昊发兵助战，杀契丹招讨使萧普达、四捷军详稳张佛奴等。（《辽史·兴宗本纪》）

契丹诏征诸道兵，会西南边来讨。

西夏本与契丹约，相左右以困中国。契丹背约，结好于宋，获重币。元昊有怨言，故契丹出兵压夏境，并筑威塞州以备夏。呆儿族屡杀威塞役兵，契丹主疑元昊使之，故有是役。（《辽史·本纪》及《宋史·富弼传》）

遣人如宋上誓表。

表曰：“两失和好，遂历七年。立誓自今，愿藏盟府。其前日所掠将校、民户，各不复还。自此有边人逃亡，亦毋得袭逐。臣近以本国城寨，进纳朝廷，其栲栳、镰刀、南安、承平故地及他边境蕃汉所居，乞画中为界，于内听筑城堡。凡岁赐银、绮、绢、茶二十五万五千，乞如常数。臣不复以他相干，乞颁誓诏，盖欲世世遵守，水以为好。倘君亲之义不存，或臣子之心渝变，使宗祀不永，子孙罹殃。”（《宋史·夏国传》。按李心传《朝野杂记》岁赐之数作二十五万。）

六月，遣使如阻卜乞师，阻卜执送契丹。

元昊闻契丹集兵声讨，遣臣寮邑改请兵于阻卜。阻卜酋长乌八，执使者送于契丹，且请以兵助。契丹主出驻永安山，使延昌宫使高家奴（《东都事略》、《长编》俱作延庆宫使耶律元衡）以伐夏告于宋。（《辽史·兴宗本纪》）

秋七月，遣使朝于契丹。（《辽史·兴宗本纪》）八月，使如契丹，契丹执之，以兵窥唐隆镇。

夏国唐隆镇所居嘉舒、克顺等七族，旧属府州，逃入西界。元昊入犯时，又掠麟、

府人户，安置其地，生齿日繁，分为十四族。是时元昊虽与契丹异，犹遣使朝贡。契丹主责以纳叛背盟罪，使抗对不屈，羁之弗遣。元昊复使人贡，询以事宜，又不以实对，契丹主执而笞之，发兵屯宁仁、静寇两镇，待河冻即过唐隆，掠取户口。元昊知其谋，遣兵沿河严备之。（《辽史·兴宗本纪》）

九月，宋以契丹主亲征夏国，遣徐靖致赆礼。

时宋欲加元昊封册，而契丹以兵临西境，遣使言为中国讨贼，请止毋和。朝议难之，会靖数言契丹挟诈，不可轻许。即遣靖往报，而留夏国封策不发。其复书略曰：“若以元昊于北朝失事大之礼，则自宜问罪。或谓元昊于本朝稽效顺之故，则何烦出师。矧延州昨奏，元昊已遣杨守素将誓文入界，倘不依初约则犹可沮还；如尽遵承则亦难却也。”（《辽史·兴宗本纪》、《宋史·徐靖传》及《长编》一百五十一）

遣杨守素如宋求封册。

范仲淹奏，乞所有封册之礼，须候西北收兵举行，于体稍便，乞朝廷再三详审。吴育亦言：“契丹受恩为日已久，不可纳一叛羌，失继世兄弟之欢。今二蕃自斗，斗久不解，可观形势，乘机立功。万一过计，亟纳元昊，臣恐契丹窥边赵、魏，朝廷不得毫发之助，而太行东西且有烟尘之警矣。宜使人谕元昊曰：‘契丹，汝世姻，一旦自绝，力屈而归我，我所疑也。若无他者，当顺契丹如故，然后许汝归款。’告契丹曰：‘已诏元昊，如能投谢辕门，即听内附。若犹坚拒，当为讨之。’如此，则彼皆不能归罪我矣。”（《宋史·吴育传》及《范文正公年谱》）

冬十月，契丹来伐，拒战于贺兰山，败绩。

契丹主亲将骑兵十万出金肃城；遣皇太弟、天齐王重元为马步军大元帅，将骑兵七千出南路；北院枢密使、韩国王萧惠将兵六万出北路；东京留守、赵王萧孝友率师以从。夏与契丹仅隔大河，向无城堡可守。契丹兵三路济河，长驱直入四百里，无人迹。又以萧术哲将卫兵，耶律义先为十二纛都监，据德胜寺南壁以待。元昊遣党项谍者出觐敌，契丹获之，射鬼箭（《辽史·国语解》：凡主亲征，服甲胄，祭诸先帝，取死囚一，置所向之方，乱矢射之，名射鬼箭，以祓不祥。及班师，则射所俘）。遂以左厢兵潜屯贺兰山北。萧惠遣殿前副检点萧迭里得、护卫经宿直古迭纵兵搏之，元昊亲率兵掩击，围之数重。迭里得等奋勇力斗，左右驰射，跃马直击中坚，夏众不能当，大溃而退。（《宋史·夏国传》及《辽史》萧术哲、耶律义先、古迭、迭里得等传）

元昊请降于契丹，上表谢罪。

元昊见契丹兵至益众，大惧，乞降。契丹主以元昊前后反复，遣萧滴洌来觐诚否。滴洌因为元昊陈述祸福，元昊请退师十里，俟收叛党以献，且进方物。契丹主命北院枢密副使萧革迓之。（《辽史·西夏外纪》、《兴宗本纪》及《萧滴洌传》）

契丹军次河曲，元昊亲率叛党三部诣降。

时两军各据山，严兵相待。契丹主诏萧革，诘其纳叛背盟之故。元昊伏罪，赐酒许以自新。大合乐，仍折箭为誓，各还营。（《辽史·兴宗本纪》及《长编》一百五十二）

契丹谋袭夏营，反为夏人所乘，败还。夏人执萧胡睹。

契丹主既受元昊降，欲还。萧惠以为元昊忘奕世恩、萌奸计，车驾亲临，不尽归所掠。天诱其衷，使彼来迎，天与不图，后悔何及！且大军既集，宜加讨伐，不可许和。契丹主犹豫未决。元昊以未得成，言退师三十里以候。凡三退，将百里，每退必赅其地，契丹马无所食，因许和。元昊乃迁延以老之，度其马饥士疲，因纵兵急攻惠营。诘旦，契丹督数路兵掩袭，夏人列拒马于河西，蔽盾以立，惠击败之。元昊走，惠麾先锋及右翼邀之。夏人千馀溃围出，契丹师逆击。大风忽起，飞沙眯目，军乱，夏人乘之，蹂践而死者不可胜计。元昊乘胜攻南壁，契丹师大败，契丹主从数骑走，几不得免，元昊命勿追。初，元昊获契丹人，辄劓其鼻，有奔北者惟恐追及。及契丹主免也，伶官罗衣轻止之曰：“且观鼻在否？”契丹主怒，以毳索系帐后，将杀之。既而元昊入枢密使萧孝友寨，执附马萧胡睹以去。（《辽史·萧惠传》、《伶官传》、《西夏外纪》及《宋史·夏国传》。按萧胡睹，《宋史·夏国传》作鹞突姑。）

元昊遣使以先被执者归契丹，契丹亦遣所留夏使还之。（《辽史·兴宗本纪》）宋赐元昊誓诏。

夏界连接诸蕃，有茶数斤可易羊一口。元昊于茶数，尤多邀索。中朝许以五万斤，下三司拟取往年赐夏国大斤茶色号（欧阳修《奏状》：五万斤大斤，有三十万小斤之数），定为则例。知制诰田况力争之。元昊知不可得，遣杨守素、尹与则入请誓诏。宋帝赐诏曰：“朕临制四海，廓地万里，西夏之土，世以为胙。今乃纳忠悔咎，表于信誓，质之日月，要之鬼神，及诸子孙，无有渝变，申复恳至，朕甚嘉之。俯阅来誓，一皆如约。”（《宋史·夏国传》及《长编》一百四十九）

十一月，与契丹平，契丹主还。

契丹主第将校功罪，欲诛萧孝友，以太后救免。是役也，耶律宜新一军独全。契丹主惧为宋所知，乃出榜幽州，称元昊归款，以自夸大，其略曰：“元昊曩自先朝，

求为钜援，据一方之裂壤，迨三世以袭封。”又曰：“鸱音易变，犬态多端，忘牢养之深恩，恃狂悖之凶性。擅诱边俗，巧谋欢邻，罪既贯盈，理当难赦。是用躬驱锐旅，往覆危巢，方迹贼庭，乞修觐礼”云云。然燕人皆知其妄，宋之谍者又见其舆尸重伤者自西相继而至，其败益明。（《辽史·萧孝友》、《耶律古昱传》及《儒林公议》）

献契丹俘于宋。

宋帝诏：止受表而却其俘。时契丹遣林牙耶律宗睦来，告讨夏人回。徐靖言：“朝廷受表却俘，此诚欲敦示大体，两存其好也。窃缘臣昨到契丹，敌中君臣将元昊表状皆示与臣，其间亦有毁讟本朝之语，但敌主佯冒元昊小人，翻覆交斗两朝，如此而已。臣愚以为今，亦宜使馆伴宗睦者，将元昊献俘表示与宗睦，兼言本朝不受所献，复令送还北朝之意。使敌人知本朝闻其败衄，不敢分外邀求也。”（《长编》一百五十四）

中书令张元卒。

元至夏不二年，官至太师、中书令。国有征伐，辄参机密。常劝元昊取陕右地，据关辅形胜，东向而争，更结契丹兵，时窥河北，使中国一身二疾，势难支矣。既元昊议和，争之不听。及与契丹构兵，知所志不就，终日对天咄咄。未几，疽发背死。（《西夏书事》）

十二月，契丹遣同知点检司事耶律裒履奉诏来索萧胡睹，三返，放胡睹归。（《辽史·耶律裒履传》及《西夏外纪》）宋范仲淹札经略司起发军马，赴乾兴寨驻扎防托。

以西人点集壮人、壮马，往环州故也。（《范文正公年谱补遗》）遣使贡于契丹。（《辽史·西夏外纪》）宋册命元昊为夏国主，更名曩霄。

其册文曰：“咨尔曩霄，抚爱有众，保于右壤。惟尔考服勤王事，光启乃邦。泊尔承嗣，率循旧物。向以称谓非礼，疆候有言，鄙民未孚，师兵劳戍。而能追念前眚，自归本朝。腾章累请，遣使系道，忠愍内奋，誓言外昭，要质天地，暴情日月。朕嘉尔自新，故遣尚书祠部员外郎张子奭充册礼使，东头供奉官、阁门祗候张士元充副使，持节册命尔为夏国主，永为宋藩辅，光膺宠命，可不谨欤！”仍赐对衣、黄金带、银鞍勒马、银二万两、绢二万匹、茶三万斤。册以漆书竹简，籍以天下乐锦。金涂银印，方二寸一分，文曰：“夏国主印”，龟纽锦绶。涂金银牌、缘册法物，皆银装金涂，覆以紫绣。约称臣，奉正朔，改所赐敕书为诏而不名。许自置官属。使至京，就驿贸易，宴坐朵殿。使至其国，相见用宾客礼。然宋每遣使往，馆于宥州，终不复至兴、灵。而元昊帝其国中自若也。

子奭既行，寻有诏，即所在止之，候契丹使至别议。富弼深言其不便，曰：“若北使未至而子奭先去，天下共知事由我出。若候北使至方行，则是以讲和之功归于契丹。万一北使知我尚未封册，词或不顺，又不可却拒元昊而曲就契丹。如此，则是朝廷举动，坐为契丹所制，而又前后反复，大为元昊所薄矣。伏乞断自宸衷，速令子奭行封册之典。”（《宋史·夏国传》及《长编》一百五十三。按陆游《老学庵笔记》：“仁宗时册命赵元昊为夏国主，盖用江南故事，然亦赐诏，凡言及卿字处即缺之，亦或以国主代卿字。”当时必有定制，然不尽见于《国史》也。）

是岁，宋命国子博士高良夫往延州，会夏人划疆界。

良夫与西界杨守素商量立界，久不决。范仲淹言：“夏国一面称大段点集军马，待与契丹相杀。一面却与汉家争些小疆界。臣谓契丹、元昊，除是天亡时，则有战争，不顾利害；若顾利害，则无战争之理。或二蕃连谋，窥伺中原，则今后契丹先起事端，候朝廷抽减陕西军马往河北，然后元昊入寇，则陕西四路皆可忧虞。乞朝廷察此情状，不可信凭，大为之备，免致临时败事。”（《范文正公年谱补遗》）

宋侵夏武英州地。

时宋边吏多因事邀功，泾原路铃辖擅于武英州凿边壕、置堡寨，陕西转运使俞献卿度必招寇患，亟檄罢之。未几，夏人果至，杀将士，塞所凿壕而去。（《宋史·俞献卿传》。按武英州，刘敞《俞献卿墓志》作武延川。）

卷十一

西夏称天授礼法延祚八年

春正月，遣使如契丹进鹞。

契丹自西征败衄，山前后困敝殆甚。又女真、渤海，所在扰乱。元昊知其衰，常以兵掠其境。契丹主怒，欲起倾国兵讨之。元昊因以白鹞贡。（《辽史·兴宗本纪》）

二月初，遣使如宋贺正旦。

时使臣聿则以留延州议事，故后至也。宋帝赐口宣云：“王岁肇新，人正伊始。眷乃世藩之属，主兹邦土之封。爰效忠规，聿修贡式，缅怀款至，良用叹嘉。”（《宋史·仁宗本纪》、《长编》一百五十四及《文恭集》）

复互市。

天圣中，陕西榷场二。及元昊称帝，互市绝，保安军榷场遂废。陕西并边主兵官，犹与属羌交易，后并禁之。元昊数请复，乃复置场于保安军及镇戎军之安平寨。（《宋史·食货志》）

宋诏陕西、河东经略司：夏国虽复称臣，其令边臣益练军，毋得辄弛边备。从吴育之言也。（《长编》一百五十四）

三月，宋枢密副使庞籍言：元昊已受封册，请早令延州保安军立定封界。（《长编》一百五十五）夏人三千余人，劫掠宋筓箠会城。（《范文正公年谱补遗》）

夏四月初，遣人如宋贺乾元节。（《宋史·仁宗本纪》）驻兵葫芦河。

元昊凡入塞，先遣人放牧牛羊，与蕃户、汉人相习久之，然后纵兵肆掠，故缘边莫之为备。是时，令二万骑游牧近宋界柵至葫芦河一带，蕃汉人户恐元昊复袭破鄜州故事，惊惧，宋边帅遣使来问。（《范文正公年谱补遗》）

五月，归石元孙。

谏官、御史奏：元孙军败不死，为国辱，请斩于塞下，以示西人。贾昌朝独引《春秋》谷臣、知罃故事，请赦之。因入对，又袖出《魏志·于禁传》以奏曰：“前代将臣覆没而还，多不加罪。”帝乃贷元孙，编管全州，子弟尝受阵亡恩泽者，并追

夺之。（《长编》一百五十五。按李元纲《厚德录》：贾文公昌朝为中丞，刘平、石元孙陷西虏，或诬以降，议收其族。昌朝言事未可知，乃不果收。及在相位，元孙自西夏归，议赐死。昌朝独曰：“自古将帅被执归，不死。”元孙得不死。）

闰五月，遣使如宋谢册命。又遣蕃僧吉外吉、法正等谢赐佛经。（《长编》一百五十六。）遣使贡于契丹。（《辽史·兴宗本纪》）秋七月，宋使来贺生日。

宋帝赐生日使礼物，口宣云：“绍复前徽，述修贡职。素秋建始，良用诞弥。用示眷恩，式将庆赐。无忘朝宠，益济世忠。”（《文恭集》）宋诏陕西四路：依近降夏国誓诏，毋得招纳西界蕃户。

先是，环庆经略司诱西界作过蕃官朗干等七百六十二人，朝廷恐因而生事，故约束之。（《长编》一百五十六）八月，宋保安军移文来诘地界，不听。

初，元昊献栲栳、镰刀诸寨，继言九州十三县向属故土，乞赐还，中国不许。及进誓表，宋帝诏延州保安军别定封界，其余皆如旧境。元昊不肯如约。鄜延经略司以闻，诏保安军移文宥州，令遵守誓约指挥。元昊迁延不奉诏。（《长编》一百五十七。按九州十三县，陈师道《后山谈丛》作求割三州十六县，此据徐靖《奏状》。州县之名，史不详载。）

出遇乞妻没藏氏为尼。

元昊杀旺荣、遇乞。久之，野利后诉旺荣兄弟无罪。元昊悔之，令求遗口，得没藏氏于三香家，迎养宫中。已，与之私。野利后觉之，不忍杀，使出为尼，号“没藏大师”，居于兴州戒坛寺。（《长编》一百六十二）

冬十月，宋始来颁历。（《宋史·仁宗本纪》）契丹以所俘夏国羊马献于宋。（《宋史·仁宗本纪》）请宋岁赐毋逾岁暮，不许。

夏人以岁赐缓移宋边，曰：“愿毋逾岁暮。”宋帝诏吏报许，知敷政县李师中更牒曰：“如故事”。枢密院劾为擅改制书，师中曰：“所改者郡牒耳，非制也。”朝廷是之，薄其过。（《宋史·李师中传》）

十一月，宋诏河东、陕西经略司：自今内属蕃部，毋得侵扰西界。犯者当以军法论。如西界人马先犯境，方听出兵捍御之。（《长编》一百五十七。又十二月，河东经略司言：“比奉诏，蕃部内寇，即许出兵捍御。若西界人马至境，不许出兵。”诏如西界辄入，先放箭射官军，即领众掩杀之。）

子阿理谋逆，杀之，及妃咩米（一作密克默特）氏。

咩米氏，元昊第四娶，生子阿理，无宠，屏居夏州王庭镇。阿理年渐长，谋聚众为乱。其党卧香乞（一作鄂桑格）以告，元昊执阿理，沉于河，遣人赐咩米氏死。（《长编》一百六十二）

十二月，宋诏延州：自今夏国有合议边事，先具经划利害以闻，其常事，听一面移文宥州。（《长编》一百五十七）侵屈野河西，执麟州指使魏智。

西界人马至屈野河西，智等引兵约回，智遇伏，为西人所执。知州领众追逐，至银川寨，夏人遁。诏河东经略司：“累戒逐路，务遵誓诏。今西人本无斗意，而以兵追逐，为边生事，其边吏并劾罪以闻。”（《长编》一百五十七）

宋诏诸路缘边经略司，无得招诱西界蕃部。（《长编》一百五十七）遣杨守素至保安军，索在汉人户。

元昊初上誓表，言所掠蕃汉人户，两不相还。至是，遣杨守素自陈事宜，理索在汉人户。宋帝诏保安军引伴至延州，示以元进誓表谕之。既而又索所降黄族军主黄伊特等四十九人。伊特等畏诛，与其族人各勒兵马，愿死汉境。鄜延经略司言：“伊特等来投，在朝廷未降约束前，恐不宜遣去，以快西人之忿。”从之。（《长编》一百五十七）

西夏称天授礼法延祚九年

春正月，遣使如宋贺正旦。

进奉使至宋管城，适孙沔出帅环庆，亦宿于此，或白当避驿者，沔曰：“使夏国主自入朝，亦外臣也，犹当在某下，况陪臣乎？”夏使遂宿白沙。宋帝闻而嘉之。（《倦游录》）

遣使如宋献地，复索过界人户。

先是，杨守素持表及地图来献鄂尚、绷乌、伊特、恰布等城寨九处，并理索过界人四百余户。然所献城寨并在汉地，但以蕃语乱之。其投来边户，亦原属汉界，不当遣还。己丑，降诏谕夏国主曰：“向膺典册，昭启国封。方逾岁月之周，自固丹青之信。忽披奏牍，且览绘图，具详忠顺之诚，务为悠久之计。爰因敷请，亦尽输陈。去冬尝有边属户蕃部，先没在西界，不因招诱而归；骨肉住坐，本不系逃背之人，兼誓诏所不载，适因来奏，更设誓条。已敕边臣：‘自今如有逃过汉界，虽系旧边户，亦不为容纳。’其缘边封境，只以誓诏所载为定。其坚永好，以副朕怀。”（《长编》一百五十八、《西夏纪事本末》）

以兵索叛蕃于宋，不与。

蕃酋孟香率千余人叛附于宋。事闻，宋帝诏知庆州杜杞如约。杞言：“如约当还。而孟香得罪夏人，势无还理。遣之，必反为边患。”议未决，夏人以兵入界求孟香，孟香散走自匿，夏兵驱杀边户，掠夺牛马，而求孟香益急。朝议责杞，亟索而还之。杞言：“夏人违誓举兵，孟香不可与。”因移檄夏人：“不偿所掠，则孟香不可得。”夏人不肯偿所掠，杞亦不与孟香，夏人后亦不敢复动。（欧阳修《杜杞墓志铭》。）

夏四月，复请宋边臣毋纳过界蕃户。宋帝诏从其请。

诏曰：“自膺典册，已历岁年，敦守信盟，确然不易，朕于君臣之义，尤笃初终。昨诏自今更有人民逃过汉界，虽系旧属户蕃部，亦不容纳，即当部送本处。今所请欲以此一事，附入前来誓诏，用以秘藏，以彰悠远。朕嘉从国主之意，兼所益事条，已颁下边将遵守。彼所睹闻，更在严飭疆吏，勿纵侵犯，安民保福，以永无穷”。（《长编》一百五十八、《西夏纪事本末》）

作避暑宫。

夏俗皆土屋，或织牦牛尾、古历毛为盖，惟有命者得以瓦覆，故国中鲜游观所。元昊于城内作避暑宫，逶迤数里，亭榭台池，并极其胜。（《宁夏府志》）

五月，筑后桥诸堡。

后桥蕉嵩寨及十二盘诸堡，向为中国所破。元昊令属下蕃户累至其地，开筑旧堡。环庆路以闻。宋帝诏经略司，谓其地虽系汉界用兵所得，然夏国今纳款称臣，不欲出兵拒绝，其令彼土蕃户住坐如故，仍划壕为界。（《长编》一百五十八）

秋七月，宋使来贺生日。

宋帝赐口宣曰：“奕世资忠，承邦济美。三朝开序，六射协辰。爰导寿祺，式将惠赐。益思恭德，庸对宠章。”（《文恭集》）

八月，宋诏陕西、河东经略司：“西人虽纳款称臣，然其心诡譎难信。恐诸路乘罢兵之后，渐弛边备，其益务练士卒，完城壁，常若寇至。有不如诏者，亟以名闻。”（《长编》一百五十九）

九月，宋遣刑部员外郎张子奭往保安军，与夏人议疆界。

先是，元昊言，先以兵马收获承平州分水向西一带境土，既分赏得功将校，今边臣数有所争，未协累年之议。至是，宋帝命子奭往议，仍以诏谕元昊。（《长编》一百五十九）

请宋没宁浪地，不得。

初，夏国既献鄂尚、绷乌、伊特、恰布等九寨，又纳丰州故地，欲以没宁浪等处为界。下河东经略郑戢，戢言：“没宁浪等处并在丰州南，深入府州之腹。若如其议，则麟、府二州势难以守，直宜以横阳河为界。”宋帝仍以戢所上地图付张子奭往议，会子奭道病，乃遣著作佐郎楚建中往延州，同议夏国封界。（《长编》一百五十九。按《长编》注，建中时管勾鄜延经略司使机宜文字，与夏人杨守素议地界，有众暴至，二轻骑疾前，引满向建中，建中披腹使射，曰：“吾不憚死，惧祸西国。”众服其量。又《宋史·楚建中传》：元昊归款，建中白府请筑安定、黑水八堡以控东道。夏人果来，闻有备，不敢入。）

十一月，宋命都巡检马怀德、国子博士高良夫来划界。（《宋史·马怀德传》）契丹遣西南面招讨使萧蒲奴率兵未伐，夏人逆战，败之。

蒲奴以兵二千据河桥，聚巨舰数十艘，仍作大钩，人莫测。战之日，布舟于河，绵亘三十馀里，遣人伺上流，有浮物辄取之。契丹军既失利，蒲奴未知，适有大木顺流而下，势将坏浮梁，断归路，操舟者争钩致之，桥得不坏。（《辽史·萧蒲奴传》）

西夏称天授礼法延祚十年

春二月，子谅祚生。（《宋史·夏国传》）起高台寺。

元昊五月五日生，国中以是日相庆贺。旧俗止重冬至，元昊更以四孟朔为圣节，令官民礼佛，为己祈福。至是，于兴庆府东一十五里役民夫建高台寺及诸浮图，俱高数十丈，贮中国所赐《大藏经》。广延回鹘僧居之，演绎经文，易为蕃字。（《甘肃通志》）

契丹萧蒲奴复以兵深入夏境，大掠而还。（《辽史·萧蒲奴传》）宋严边备，诏环庆、鄜延两路勤讲习。（《长编》一百六十）叛人叩宋延州请降，不纳。

程琳为陕西安抚使，尝获戎首不杀，戒遣之。夏人亦相告，毋捕汉民。久之，有叛族数百驱牛羊叩边请降，且言：“契丹兵至衙头矣，国中乱，愿自归。”琳曰：“彼诈也。契丹至帐下，当举国取之，岂容有来降者？吾闻夏人方捕叛者，此其是耶？不然，诱我也。”拒不受。已而夏人果以骑三万临境上，以捕降者为辞。琳谍知

之，闭壁倒旗，戒诸将勿动。夏人疑有备，遂引去。（《宋史·程琳传》）

夏四月，通银星和市（一作宁星和市）。

初，杨守素等划界，既以横阳河为定议，而于麟州屈野河西地则云：“吾马足所践，即为吾土。”不肯明立界至。宋帝命知麟州张继勋勘之。继勋言：“夏人日逼屈野河，耕垦畜牧，或兴置寨栅。若即以河西为禁地，实与州城相距，非便；若用咸平五年以前界至，则太远难守；当以大中祥符中所定为则。”遣临塞堡监押马宁、指使殿侍康均诣宥州，与监军司言之。元昊命把关太尉曹勉、管勾和市曹谓均等曰：“中国若肯通银星和市，则河西疆界一切如约。”经略司令入保安军自陈。勉等至军，朝议以为疆界既肯如旧，许之。（《长编》一百八十五）

夺子妇没移氏，立为后。

元昊凡七娶（《宋史·夏国传》作五娶，此从李氏《长编》，下同）：一卫慕氏；二索氏（《传》以索氏为第五）；三都罗（一作多拉）氏，早死；四咩米氏，五野利氏（《传》以野利氏为第三），生三子：长宁明，次宁令格，次薛哩（一作锡哩）早死；六耶律氏（《传》以耶律氏为第一），契丹公主也；七没移氏，即营天都山居者。至是，为太子宁令格娶妇没移氏，见其美而自纳焉，号为“新皇后”。（《长编》一百六十二）

六月，废后野利氏。

野利氏，遇乞从女也（司马光《日记》载庞籍语：“元昊妻即旺荣妹”，与《宋史·夏国传》异）。身颀长，有智谋，常戴金起云冠，令他人无得冠者，封宪诚皇后，元昊素畏之。自纳没移氏，别居天都山，后稀得见。旺荣、遇乞之死，后已不平；及夺子妇没移氏，益失宠，出怨望语。元昊闻之，黜居别宫，不复相见。（《长编》一百六十二）

秋七月，筑离宫于贺兰山。（《甘肃通志》）九月，徙榷场于顺宁寨。

元昊因保安榷场僻陋，马、羊无放牧地，请徙顺宁。然蕃商卒不至。（《长编》一百六十一）

西夏称天授礼法延祚十一年

春正月朔，日赤无光。元旦行朝贺仪，群臣相顾失色。（《西夏书事》）宁令格弑其父元昊，不死。没藏讹庞（一作罗滂）诛宁令格。

宁令格愤其父元昊之夺其妻也，杀之，不死，劓其鼻而去，匿讹庞家，为讹庞所杀。（《长编》一百六十二。按沈括《笔谈》：元昊后房先生一子，曰宁令受。后又纳没藏讹庞之妹，生谅祚而爱之，宁令受之母恚忌，欲除没藏氏，授戈宁令受图之。宁令受间入元昊室，猝与元昊遇，刺之。不殊，诸大佐没藏讹庞辈仆宁令受，梟之。与《长编》异。又按《宋史》：谅祚小字宁令格，此宁令格当又是一人。）

元昊薨

因鼻疮死（按元昊死，《宋》、《辽》二史俱不言为其子所戕），年四十六。在位十七年，改元开运一年，广运二年，大庆二年，天授礼法延祚十一年。谥曰“武烈皇帝”，庙号景宗，葬泰陵。（《长编》一百六十二及《宋史·夏国传》）

卷十二

毅宗昭英皇帝李谅祚，景宗元昊子也。小字宁令哥，国语谓欢喜为宁令。两岔，河名也，母曰宣穆惠文皇后没藏氏，从元昊出猎，至此而生谅祚，遂名焉。以天授礼法延祚十年二月六日生，十一年春正月方期岁（《宋史·夏国传》：谅祚，景宗长子也。钱大昕《诸史拾遗》云：《传》云谅祚以庆历七年二月六日生，八年正月方期岁，亦恐未然，元昊子谅祚最幼，不得言长子）即位，改元延嗣宁国元年。（《长编》：没藏氏初为尼，寓于兴州之戒坛院，既娠而曩霄死，曩霄遗言立从弟委格宁令，其大酋诺伊尚都等与没藏讹庞议所立。没藏大族也，讹庞为之长，众欲如遗言立委格宁令，讹庞独弗许，曰：“委格宁令非子，且无功，安得有国？”诺伊尚都曰：“国今无主，然则何所立。不然，尔欲之乎？尔能保有夏土，则亦众所愿也。”讹庞曰：“予何敢哉。夏自祖考以来，父死子继，国人乃服。今没藏尼娠先王之遗腹，幸而生子，则可以嗣先王矣，谁敢不服？”众曰：“然。”遂立没藏尼为太后。曩霄既死三月，谅祚生。据此，则以谅祚为元昊遗腹子，与《宋史》不同。果如所说，没藏氏既已斥出为尼，其生子又在元昊死后，讹庞拥立，夏国将相岂无一人异议？其说恐不足信，宜仍以《宋史》为断。）

谅祚幼养于母族讹庞，讹庞因专国政。二月，遣使报哀于宋、契丹。使宋者为杨守素，守素乃康定中为元昊谋不称臣、纳所赐节者也。宋帝以任颢尝屈夏使臣，复使馆伴。颢问守素元昊所以死，守素不能对。终其去，不敢桀骜。三月，遣使上元昊遗物于契丹。宋遣开封府判官、尚书祠部员外郎曹颖叔为祭奠使，六宅使、达州刺史邓保信为吊慰使，赐绢一千匹、布五百端、羊百口、面米各百石、酒百瓶。及葬，仍赐绢一千五百匹，餘如初赙。

谅祚初立，方幼，三大将分治其国。宋臣谓：“可因此时以节度使啖三将，使各统所部分，以弱其势，可不战而屈矣。”判延州程琳曰：“幸人之丧，非所以示外国，不如因而抚之。”或请乘隙举兵，知庆州孙洙亦言：“伐丧，非中国体。”帝纳其言（《范忠宣集·王尚恭墓志》：孙威敏公经略环庆，辟掌机宜。庆历八年，夏元昊为子宁令哥所弑，国人诛之，立其幼子谅祚，而来告哀。谓孙公曰：“元昊负恩，屡挫官军，忠臣义士，痛心顿足，未能擒戮。今父子相残而立其幼，殆天亡贼也。因请未赐王爵，止授以节帅之名。择其强臣，宠以高官，使分其权，复以厚赏招致近边豪酋，渐渐收其用，以壮吾藩篱，则西陲可久安。不然，后难制也。”孙公奇其言，为奏上之）。四月，遂遣尚书刑部员外郎任颢充册礼使，供备库副使宋守约充副使，册谅祚为夏国主。契丹亦遣永兴宫使耶律裒里、右护卫太保耶律兴老、将作少监王全慰奠。九月，遣使如宋谢祭奠。十二月，又遣使谢封册。铁不得国与夏有隙，遣使如契丹，乞以本部兵助攻夏国，不许。（《宋史·夏国传》、《仁宗本纪》、《辽史·西夏外纪》、《兴宗本纪》及《长编》一百六十三至一百六十五。李焘曰：“《程琳本传》云朝廷既行册礼，夏人方围庆阳，琳止诏使于鄜曰：夷狄贪此，可纾庆阳之难。”乃具礼币赐予之数移报之，果喜，即日迎册使，而庆

阳围亦解。按谅祚此时方自保不暇，何敢更围庆阳？《本传》必误。）

西夏称延嗣宁国元年

春，遣使如契丹贺正旦，契丹留使者不遣。

元昊临终遗言曰：“异日力弱勢衰，宜附中国，不可专从契丹。盖契丹残虐，中国仁慈，顺中国则子孙安宁，又得岁赐、官爵；若为契丹所胁，则吾国危矣。”是时，契丹以南壁旧怨，不肯行封册。及遣使贺正迟期，遂羁使者。会集诸道兵，遣北院枢密副使萧惟信以伐夏告宋。（《辽史·兴宗本纪》及《西夏书事》）

遣使如宋，进奉贺正马、驼。

宋帝赐诏曰：“诏夏国主，省所差人进奉贺正马、驼共一百匹头，事具悉。履端纪岁，万邦咸稟于王正；效贡以时，奕世克修于藩职。载阅充庭之实，深惟守土之勤，遐体倾输，不忘叹奖。今回赐银、绢、茶等具如别录，至可领也。其差来人所赐物色，亦具赐目。故兹诏示，想宜知悉。春寒，比平安好否？书指不多及。”（《欧阳文忠集》）

夏六月，遣使贡于契丹。契丹复留使者不遣。（《辽史·兴宗本纪》）秋七月，契丹主再举来伐。

以耶律仁先与皇太弟重元为前锋。时契丹师分三道：韩国王萧惠等所将者为南道；其北道则行军都统耶律敌鲁古将之；中道则契丹主自将。（《辽史·兴宗本纪》、耶律仁先、萧惠等传）

八月，契丹主渡河，夏人遁，因取唐隆镇据之。（《辽史·兴宗本纪》及《长编》一百七十七。按《辽史·耶律多珍传》云：“西征。诏多珍由别道会于河滨，敌兵阻河而阵，帝御战舰绝河击之，大捷而归。”毕氏《通鉴考异》据《本纪》云：“辛酉，渡河，夏人遁，乃还。”以为契丹当时未尝大捷。及观王拱辰《别录》，载契丹主与拱辰言，云夺得唐隆镇云云，则《多珍传》所云绝河击之大捷虽非事实，亦非尽无因也。）

九月，契丹萧惠等与夏人战，败绩。

惠自河南进，战舰粮船绵亘数百里。既入夏境，侦候不远，铠甲载于车，军士不得乘马。诸将请备不虞，惠曰：“谅祚必自迎车驾，何暇及我？无故设备，徒自弊耳。”数日，契丹军未营，候者报夏师至，惠方诘妄言罪，谅祚军从阪而下，惠与麾下不及甲而走。追者射惠，几不免，军士死伤甚众。当惠之失利也，契丹主犹欲进

兵，耶律仁先力谏，乃还。（《辽史》萧惠、耶律仁先传）

冬十月，契丹北道行军都统耶律敌鲁古与夏人战于贺兰山，获李元昊妻。

敌鲁古率阻卜诸军，由北路趋凉州，至贺兰山，获元昊妻及其官僚家属。遇夏人三千来战，殪之。乌占敌烈部详稳萧慈氏奴（一作慈实努）中流矢，与南克耶律斡里俱死焉。慈氏奴，萧惠子也。（《辽史·兴宗本纪》及《慈氏奴传》。按《长编》：契丹使殿前副检点耶律益、彰德节度赵柬之告宋，言三路兵伐夏；契丹主出中路大捷；北路兵至西凉府，获羊百万、驼二十万、牛五百，俘老幼甚众；惟南路小失利。而宋之边奏，皆以为辽主济河不遇敌，无水草，马多死，耶律贯宁大败于狮子口，惟刘五常获陕西所陷属户羌二十余人而已，与《辽史》诸传异。又按《西夏书事》作获国主母没移氏。）

西夏称天祐垂圣元年

春正月，契丹遣使来问罪。（《辽史·兴宗本纪》）

二月，遣将洼普、猥货、乙灵纪等，率兵攻契丹金肃城，南面林牙耶律高家奴等破之。洼普被创，遁去。杀猥货、乙灵纪等。（《辽史·兴宗本纪》）

三月，以战败契丹，献捷于宋。保安军以誓诏无泛遣人例，拒不纳。（《长编》一百六十八）与契丹殿前都点检萧迭里得战于三角川，败绩。

斩侯者八人，擒观察使。（《辽史·兴宗本纪》及《萧迭里得传》。按《西夏书事》，观察使作讹都移。）

是月，契丹命西南招讨使萧蒲奴、北院大王宜新、林牙萧撒抹得等率师来伐。以行宫都部署别古得监战，复遣同知北院枢密使萧革按军边城，以为声援。（《辽史·兴宗本纪》）

夏四月，契丹西南招讨使萧蒲奴等入夏境，不与敌遇，纵军俘掠而还。（《辽史·兴宗本纪》）五月，契丹兵围兴庆府，大掠。

林牙萧夺刺至去岁萧惠败绩之地，获夏侦候者，知人烟聚落多国人陷没而不能还者，尽俘以归。（《辽史·萧夺刺传》）洼普降于契丹。

初，洼普兵败，讹庞欲诛之，没藏氏使练兵贺兰山，以责后效。及契丹兵深入，惧诛，率所部降。（《辽史·兴宗本纪》及《西夏书事》）六月，契丹破摊粮城。

城在贺兰山西北，国中储粮处。契丹兵攻破之，尽发廩积而还。（《长编》一百六十八）

秋九月，侵契丹边。敌鲁古遣六院军将海里击败之。（《辽史·兴宗本纪》）冬十月，契丹主还，遣使请平，不许。

谅祚母遣使，乞依旧称藩。使还，契丹主诏谕：“别遣信臣诣阙，当徐图之。”（《辽史·兴宗本纪》）

十二月，谅祚遣使上表于契丹，乞依旧称臣如母训。（《辽史·兴宗本纪》及《西夏外纪》）

西夏称天祐垂圣二年

春二月，契丹来索党项降户。

元昊时，纳党项降户数千。河曲之役，请率诸部待罪。后因战胜不遣。至是，契丹遣北院都监萧友括来索，没藏氏不与。（《辽史·兴宗本纪》）夏四月，契丹使还，表请代党项进献。

没藏氏既留降户不遣，萧友括还，恐契丹诘责，奉表乞代党项献马、驼、牛、羊等物，契丹主许之。（《辽史·兴宗本纪》）

遣使如契丹，求唐隆镇及乞罢所建城邑，契丹主不许。（《辽史·兴宗本纪》）

六月，契丹安置元昊妻于苏州。（《辽史·地理志》：苏州本高丽南苏，兴宗置州。《通鉴辑览》作蓟州。）

并前后所俘夏人，同置苏州。以伐夏所获物遣使遗宋。（《辽史·兴宗本纪》）

西夏称天祐垂圣三年

春二月，宋诏夏国岁遣首领进奉，其引伴、押伴，自今选练习边事人。（《长编》一百七十二）夏五月，阻卜酋长兀里得遣使请附，不纳。

阻卜久臣契丹，其王屯秃古斯及酋长豁得刺、喘只葛拔里思，常以马、驼、毡、玉贡献。兀里得与豁得刺弟斡得构隙，虑其侵掠，遣使至夏国请附，没藏氏惧契丹兵威不敢受。（《辽史·属国表》及《西夏书事》）

冬十月，遣使如契丹，乞弛边备。

契丹以谅祚幼弱，强臣用事，常置重兵诸边，戒飭封堠。没藏氏遣近臣吃多已贡物契丹，乞弛边备。契丹主使萧友括慰谕之。（《辽史·兴宗本纪》及《西夏书事》）

宋遣阁门祗候周永清押时服来赐。

永清至宥州，夏人受赐不跪。诘之，恐而跪。（《宋史·周永清传》）

西夏称福圣承道元年

春二月，移牒索古渭州地。

古渭，西蕃界，距秦州三百里，道经哑儿峡。宥州兵卒牧牛羊其地，常为青唐酋藁毡掠取。监军司怒，将攻之，藁毡惧不敌，籍土入献，冀得戍兵以御夏兵。宋知秦州范祥欲立奇功，亟往城之。又括熟户田，蕃部惊扰，相率叛。讹庞欲得其地久，移文中国，言：“古渭本我地，朝廷置州于彼，有违誓诏。”宋帝诏户部副使傅求按视，求召谕羌众，反其田，报宥州，以渭非素有，不应索，正其封界，乃不复言。（《宋史·傅求传》及《长编》一百七十五。按《宋史·梁适传》：古渭初建寨，间为属羌所抄，益兵据守，羌众惊疑。时适以观文殿大学士知秦州，具牛酒召谕其种人，且罢所益兵，羌遂不为患。与《傅求传》异。）

三月，契丹主赐诏许平，遣使往献。（《辽史·兴宗本纪》）夏五月，侵宋环庆。

经略司以闻，宋帝诏边吏严备，毋得辄有侵軼。（《长编》一百七十四）

秋九月，遣使如契丹进降表。（《辽史·西夏外纪》作七月，谅祚进降表。《本纪》作九月，盖七月遣使，九月始至耳。）

契丹旋遣南面林牙高家奴等，奉诏来抚谕。（《辽史·兴宗本纪》）

西夏称福圣承道二年

春正月，遣使如契丹贡方物。

契丹主以谅祚降非诚心，谕使者曰：“尔主若念国威，不忘姻好，当心怀恭顺，不在贡献勤怠间也。”却其物不受。（《辽史·兴宗本纪》及《西夏书事》）

夏五月，上表契丹，乞进马、驼。契丹主诏岁贡之。（《辽史·兴宗本纪》）秋七月，侵宋古渭寨。

夏兵数至古渭，剽掠人畜，秦凤经略司请于邻路益兵五千为备。（《长编》一百七十六）遣使如契丹求婚。

时宋三司使、吏部侍郎王拱辰为回谢契丹使，虑契丹再与通姻好于中国不便，因讽契丹主曰：“南朝亦知北朝公主先聘与元昊，殊不礼待，忧幽而卒”。契丹主曰：“直是饮恨而卒，然祇是皇族之女。”拱辰曰：“虽知祇是宗女，亦须名为陛下公主下嫁，岂可如此不礼？今或陛下更与通亲，母乃太自屈也。”契丹主曰：“更做甚与他为亲，只封册至今亦未曾与。”拱辰又曰：“今来陛下且与函容，亦是好事。陛下于西羌用兵数年，其杀获胜负亦略相当，古语谓‘争城，杀人盈城；争地，杀人盈野’，岂是帝王仁德好事！”契丹主曰：“极是也。”（《辽史·兴宗本纪》及《长编》一百七十七小注）

冬十月，遣使如契丹进誓表。

并请誓诏。契丹主赐以车服，而不许誓诏。（《辽史·兴宗本纪》）

西夏称福圣承道三年

春二月，遣使如契丹贺上尊号。（《辽史·兴宗本纪》）

绥州蕃族阿讹（一作阿克阿）等叛附于宋。

宋帝以谅祚幼弱，不欲生边事，诏约还之。（《长编》一百七十九）宋赐《大藏经》。

夏使求市史传及佛经，押伴王尚恭以史有东晋元魏间事，不可示夷狄，止与佛书。（《长编》一百七十九及范忠宣《王尚恭墓志》）三月，没藏讹庞侵耕屈野河西地。

麟州西北枕睥睨曰红楼，下瞰屈野河，其外距夏境尚七十里，并无堡障、斥堠。天圣初，州官相与讼河西职田，久不决，转运司奏为禁地，官民并不得耕植。于是民有窃耕者，夏人辄夺其牛，曰：“汝州官尚不敢耕，汝何为至此？”由是河西遂为闲田。夏人始于洪崖坞、道光谷间，插木为小寨三十馀所，盗种寨旁田，元昊时已侵十馀里。谅祚立，中外事悉讹庞主之，知河西田腴利厚（《长编》云：“其田外则蹊径险狭，杉柏丛生，汉兵难入；内则平壤肥沃宜粟麦，故敌不忍弃也），令民播种，以所收入其家，东侵不已，距河仅二十馀里，宴然以为己田。游骑直至城下

，或过城东，往来自若。（《长编》一百八十五）

秋七月，河东遣使召定界至，没藏讹庞不听。

河东管勾军马司贾逵徼巡，见祚庞所侵田过界，督责麟州守王亮，亮惧以闻。宋帝诏边吏约束之，颇加驱掠。知并州庞籍言：“河西称臣奉贡，未失臣礼。今不先以文告，而遽行驱掠，使归曲而责直，非中国体。”乃遣使以义理约还，讹庞不可。籍又使人亟召，更定疆界，亦偃蹇不奉命。（《宋史·夏国传》及《长编》一百八十三）

遣吕效忠侵宋，宋知德顺军周永清击擒之。

永清有威略，尝募勇士，夜驰百里，来袭营栅，斩首三百级，俘数十人，掳去橐驼、甲马万计，城中无知者。并寨禁地三百里，夏人盗耕不可禁。永清拓籍数千顷，置射士二千，声闻敌廷。降者引入帐下，待之不疑，多得其死力。（《宋史·周永清传》）

八月，契丹兴宗薨于行宫，皇子洪基立，是为道宗，改是年为清宁元年。（《辽史·兴宗本纪》。按《西夏外纪》作二十三年兴宗崩，疑误。）契丹遣王观来报哀。（《辽史·王观传》）

九月，契丹遣使来赐兴宗遗物。（《辽史·道宗本纪》）遣使如契丹贺即位。（《辽史·西夏外纪》）冬十月，起承天寺。

没藏氏好佛，因中国赐《大藏经》，役兵民数万，相兴庆府西偏起大寺，贮经其中，赐额“承天”。延回鹘僧登座演经，没藏氏与谅祚时临听焉。（《西夏书事》。按《朔方新志》：承天寺，夏谅祚所建。洪武初，一塔独存，有记。又按《记》载瘞佛顶骨曰：“天祐纪历，岁在摄提，”则夏英宗谅祚天祐垂圣元年，宋仁宗皇祐二年庚寅也。其藏舍利曰“天庆三年”，则桓宗纯祐天庆三年，宋宁宗庆元二年丙辰也，年月与此俱异。）

十一月，使如契丹会葬。

契丹葬兴宗于庆陵，夏与中国、高丽使并会。（按《辽史·道宗本纪》：会葬只有宋、高丽，无夏。此从《西夏书事》，或别有据。）

西夏称福圣承道四年

春三月，河东禁银星和市。

讹庞不肯定屈野河界，恐汉兵先据其境，辄屯兵河西以诱官军。庞籍戒官吏曰：“夏人仰吾和市，如婴儿之望乳。若绝之，彼必自来，毋得过河与战。”乃悬榜于边，禁绝银星和市，于是国中财用渐乏。（《西夏书事》及《长编》一百八十五）

秋七月，移牒索蕃官蔺毡。

宥州移文保安军，乞抽还修古渭寨军卒，并索叛蕃蔺毡。宋帝诏以蔺毡世为蕃官，不得擅索，令保安军报之。（《长编》一百八十三）九月，遣李守贵巡视屈野河。

屈野河侵扰日甚，宋帝命殿直张安世、贾恩为都同巡检，经制之。讹庞专为谰言，迫之则格斗；缓之则就耕，终无归意。安世等与庞籍移牒宥州诘责，没藏氏见牒，遣幸臣李守贵至屈野河勘之，还白所耕皆汉地，没藏氏责令讹庞还所侵田。会守贵乱作，不果。（《长编》一百八十五。惟李守贵作嘉伊克。此从《西夏书事》。）

冬十月，国母没藏氏死。

初，有李守贵者，尝为遇乞掌出纳。宝保细吃多已者，尝侍元昊及没藏氏尼于戒坛院，故出入无所间。没藏氏即通守贵，又通吃多已。守贵愤怒，于是杀吃多已及没藏氏。讹庞族守贵，独保养谅祚，因以其女妻焉。时谅祚生九岁矣。（《宋史·夏国传》及《长编》一百八十四。又《长编》注，是年十月丁卯，《实录》书环庆经略司言：“夏国小大王阿叔嵬迷裂皈与没藏讹庞杀其国母及补细相公，而讹庞挈小大王归其族，已戒边镇预备之。按所谓小大王即谅祚也，补细相公即吃多已也。嵬迷裂皈或是李守贵，然与正史不同。）

遣祖儒嵬名聿则及庆唐徐舜卿如宋报哀。

宋帝赐回口宣云：“省所奏母薨讣告事具悉。不图凶凶，奄失慈怙。忽闻来讣，用怛于怀。弃背以还，哀摧难处。惟当抑割，无致殒伤。抚念所深，喻言何既。”（《宋史·夏国传》及《文恭集》）

宋以集贤校理冯浩假尚书刑部郎中，直史馆、文思副使张惟清假文思使，为正、副使来吊慰。

赐夏国主诏曰：“诏夏国主：丧葬之仪，孝子之大节；赠赙之礼，国家之至恩。眷惟忠顺之邦，宜厚哀荣之恤。缅知荼毒，深用恻伤。俾遣使车，勉膺慰锡。今差文思院使张惟清充吊慰使，兼赐安葬故母物色，具如笔录，至可领也。故兹诏示，想宜知悉。冬寒，比平安好否？书指不多及。”（《宋史·夏国传》及《欧阳文忠集

》)

遣使如宋，献遗留马、驼，并谢吊慰。（《宋史·夏国传》）

西夏称<者单>都元年

春正月，讹庞以兵屯屈野河西，至三月然后去。宋建二堡防之。

宋知并州庞籍以夏人盗耕河西田不已，乃令通判并州司马光按视之。光言：“麟州城西临屈野河，自河以西直抵界首，五六十里并无堡障、斥堠，以此虏得恣耕其田，游骑往往直至城下，或过城东，州人不知。去岁已于河西置一小堡，以处斥堠之人。亦曾申经略司，乞于西增置二堡。会今春以来，虏骑屯聚，遍满河西，经略司牒令候西人退散，别申取指挥。今虏众尽已退去，自州城以西至大横水浪爽平，数十里间绝无一人一骑。若乘此际，急于州西二十里左右增置二堡，每堡不过十日可成。比至虏中再行点集，此堡已皆有备，虏不能为害。如此，则麟州永无侵轶之虞，州兵出入有所宿顿，堡外先侵之田虏皆不能耕种。臣之愚心，亦为国家固争屈野河西田者，非少此尺寸之地，盖以虏侵耕至河，则麟州孤危。果能成此二堡，以为麟州耳目藩蔽，于事诚便。”遂归白于庞籍，籍即令依前申修筑二堡，仍令精加探候，广设堤备。又言：“二堡城后，然后废横戎、临寨二堡，撤其楼櫓，徙其甲兵，以实新堡，列烽燧以通警急。从衙城红楼之上俯瞰其地，犹指掌也。有急，则州及横阳堡出兵救之；敌来耕则驱之，已种则蹂践之，敌盛则入堡以避。如是，则堡外三十里之田必不敢耕种，州西五六十里之内晏然矣。”庞籍遂檄麟州如其议。（《宋史·郭恩传》及司马光《论屈野河西修堡状》）

三月，宋以张元故，殿试进士均免黜落。

旧制，殿试皆有黜落，临时取旨，或三人取一，或二人取一，或三人取二。故有累经省试取中，屡摈弃于殿试者。故张元以积忿降元昊，大为中国之患。朝廷始囚其家属，未几复纵之。于是群臣建议，归咎于殿试黜落。是岁诏：进士与殿试者，皆赐及第出身有差，均不黜落，遂为定制。（《宋史·仁宗本纪》及王栻《燕翼诒谋录》。按李复圭《记闻》云，是春以进士群辱欧阳修之故，殿试并赐及第，不落一人，与此异。）

夏五月，与宋师战于断道坞，败之，执其管勾麟府军马公事郭恩等。

讹庞既无归田意，遂团兵宿境上，逮三月，稍增至数万人。守将敛兵弗与战。二堡役既兴，恩及知麟州武戡、走马承受公事内侍黄道元等，以巡边为名往按视之。会诇者言，敌兵盛屯沙黍浪（《宋史·夏国传》作沙鼠浪，《续通志·西夏载记》作沙尔硕克朗），恩欲止不行。道元怒，以言胁恩，五月五日夜，率步骑一千四百馀

人，不甲者半，循屈野河北而行，无复步伍。夏人举火卧牛峰，戡指以谓恩曰：“敌已知吾兵至矣。”道元曰：“此尔曹故欲沮我师。”及闻鼓声，道元犹不信。行至谷口，恩欲休军，须晓乃登山。道元奋衣起曰：“几年闻郭恩名。今日懦怯，与贾逵何殊？”恩亦愠曰：“不过死耳！”乃行。比明，至忽里堆（《续通志·西夏载记》作呼喇堆），敌数十人皆西走，相去数十步，止。恩等踞胡床，遣从骑呼之，敌不应，亦不动。俄而火起，敌骑张左右翼，自南北交至。堆东有长堑，其中有梁，谓之“断道坞”。恩等东据梁口，与力战。自旦至食时，敌自两旁堑中攀缘而上，四面合击，恩众大溃。通判夏倚方在红楼，见敌骑自西山大下，与推官刘公弼率城中诸军，闭门乘城。武戡走东山，趣城东，抉门以入。恩、道元及府州宁府寨兵马都监刘庆皆被执，使臣死者五人，军士三百八十七人，已馘耳鼻得还者百余人，亡失器甲甚众。恩不肯降，乃自杀。（《宋史·仁宗本纪》及夏国、郭恩等传。按欧阳文忠《吴育墓志》：庞丞相经略河东，与夏人争麟州界，亟筑栅于白草。公以谓约不先定而亟城必生事，遽以利害，牒河东移书庞公，且奏疏论之，朝廷皆不报。已而夏人果犯边，杀骁将郭恩，而庞丞相与其将校十数人皆以此得罪，麟、府遂警。）

六月，遣使如宋谢吊祭。（《宋史·仁宗本纪》）秋八月，宋禁陕西和市，仍诏定新立封堠里数。

知并州庞籍言：“经略司已令殿中丞孙兆议定横阳河为府州界，然后三分，许一分与夏国，若不听即绝之。请严禁陕西和市。”初，西人侵耕屈野河西地，籍谓非绝其互市则内侵不已。且闻出没藏讹庞之谋，若互市不通，其国必归罪讹庞，年岁间然后可与计议。宋帝从之仍诏定新立封堠里数，绘图以闻。（《长编》一百八十六及《宋史·食货志》。按《长编》注：三分许一，盖当时夏人侵界六十里，只令退四十里也。）

冬十一月，宋禁绝河东私市。

宋自法禁日弛，夏入与边民窃相贸易，日夕公行。故虽无岁遗之物，互市之利，犹可枝梧。讹庞不肯立屈野河界，经略使以闻。宋帝下诏：“西人如驱牛、马于沿边私采民谷，令所在禁绝之。”时有夏人与熟户犯禁，庞籍获之，即斩于犯所，于是两界凜然。（《长编》一百九十一及司马光《论西夏札子》）

十二月，遣兵袭鄯延。

讹庞自忽里堆之胜，恐中国声讨，日事点集，遣众万馀犯鄯延境。时提点刑狱陈安石摄帅事，预饬边民戒严。兵至，无所获而还。（《宋史·陈安石传》）

遣使如宋进奉贺正马、驼。（《西夏纪事本末》）

西夏称鄯都二年

春正月，契丹太皇太后崩，遣使来报哀。（《辽史·道宗本纪》）

夏五月，遣使如契丹会葬。（《辽史·道宗本纪》，按《西夏外纪》作四月）

吐蕃捺罗部阿作（《长编》作纳克垒阿匝尔）等叛唃廝囉来降，遂遣兵攻唃廝囉，败绩。

被掳酋豪六人，橐驼、战马颇众。陇逋、公立、马颇（《长编》作隆博、哩恭、玛颇克）三大族亦叛降唃廝囉，会契丹遣使送女妻其少子董毡，乃罢兵归。（《宋史·吐蕃传》）

秋九月，宋诏河东经略使：西人议府州横阳河界，恐麟州势孤绝，其相度利害以闻。（《长编》一百八十八）表宋，乞赎《大藏经》。

诏曰：“诏夏国主，省所奏伏为新建精蓝（按《佛祖统纪》作国内新建伽蓝），载请赎《大藏经》帙、签牌等，其常例马七十匹充印造工直，俟来年冬贺嘉祐四年正旦使次附进，至时乞给赐藏经事具悉。封奏聿来，秘文为请，惟觉雄之演说，推善于无穷。嘉乃纯诚，果于笃信，所宜开允，当体眷怀。所载请赎《大藏经》帙、签牌等，已令印造，候嘉祐四年正旦进奉人到阙，至时给付。故兹诏示，想宜知悉。春寒，比平安好否？书指不多及。”（《欧阳文忠集》）

西夏称鄯都三年夏五月，讹庞据屈野河。

麟、府西南接银州，西北接夏州。庆历中，元昊纳款，知麟外门长继勋奉诏定界，至而文案无存。访之州人都巡检使王吉，吉言：“继迁未叛时，麟州之境，西至俄枝、盘堆及宁西峰，距屈野河皆百余里。西南至双烽桥、杏子平、弥勒、长干、盐坑等，距屈野河皆七十馀里。咸平五年，继迁围麟州，陷浊轮寨。大中祥符二年，始置横阳、神堂、银城三寨，皆在屈野河东，使蕃、汉义军分番守之。又使寨将与缘边酋长分定疆境。横阳寨西至故俄枝堆四十里，州城西至大横水六十里，西南至浪爽平五十里。神堂寨西至伺候峰三十五里，西南至赤犍谷掌四十里，次南至野狸坞三十里。银城寨西至榆平岭四十里，西南至清水谷掌五十里，次南至洪崖坞四十里，次南至道光谷、中岭六十里。于是，继勋等据此分定界至，遂以为例。讹庞虽东向侵耕，犹馀二十里为闲田。及断道坞战胜，无复顾忌，妄指屈野河中央为界，遣兵沿河屯驻，白昼迫逐汉人，夜则过河剽窃，见逻者辄逸还。且于银城以南至神木堡，或十里、或五七里外，悉令部民侵种不已。（《长编》一百八十五）

秋八月，没藏讹庞杀六宅使高怀正、毛维昌。

谅祚以二人妻乳哺功，赏赉甚厚。二人恃其宠，时与国事，或采民间利弊闻。讹庞心恶之。会高怀正以贷国人银，毛惟昌窃衣元昊盘龙服，事觉，讹庞诛其全家。谅祚止之，不可。（《长编》一百六十二）

冬十月，契丹约西蕃兵取凉州，不果。

契丹既与唃廝囉通姻，数遣使由回鹘路至河湟，约唃廝囉举兵攻夏国，欲徙董毡居凉州，与之相近。讹庞闻之，增兵备河西。会唃廝囉以道远兵难合，乃止。（《长编》一百八十八）

十二月，遣使如宋，进奉贺正马、驼。

宋赐夏国主诏曰：“王正首岁，皇历颁春。眷惟继世之忠，先效守藩之职。勤修时贡，来旅明庭。言念倾输，良深叹奖。”（《西夏纪事本末》）

西夏称祐都四年上书于宋，请去蕃礼从汉仪。（《宋史·夏国传》）夏五月，保安军牒索叛蕃胡守中，执还之。

守忠为保安蕃官，边吏失于抚绥，走投夏国。中国索之急，执还伏诛。（《长编》一百九十二）秋七月，讹庞遣使河东议界至。

夏国所产羊、马、毡毯，用之不尽，必以其馀与他国交易。而三面戎狄，鬻之不售，故中国和市不能不通。自河东禁绝私市，官民胥怨。讹庞乃遣使至麟、府，请退河西田二十里还中国，愿通和市。经略使梁适不从。（《西夏书事》）

冬十月，国中盐市绝。

河东私市虽绝，然因河西解盐价高，商贩青盐往来如织，国中犹恃为利。宋帝使薛向为转运使，平解盐价，商民不复冒禁私贩，于是青盐利亦绝。（《长编》一百九十二）

十一月，讹庞掠鄯延。

讹庞因财用日乏，遣人于鄯延沿边德靖等十堡寨开垦生地，剽掠人畜。戍兵捍之，不止。（《长编》一百九十二）

卷十四

惠宗康靖皇帝李秉常，毅宗谅祚长子也，母曰恭肃章宪皇后梁氏，治平四年冬即位，时年七岁，改元乾道，尊母梁氏为太后。是岁，宋将林广破华阳寨。（《宋史·夏国传》及《范忠宣集·林广墓志铭》）

西夏称乾道元年

春正月，梁太后摄政。（《宋史·夏国传》）以乙埋为国相。

梁氏悉以国政委乙埋，乙埋擢其子弟并居近要，于是诸梁权日甚。（《西夏书事》）二月，遣使如辽报哀。（《辽史·道宗本纪》）三月，辽使来吊祭。（《辽史·道宗本纪》）

遣使献遗物于辽。（《辽史·道宗本纪》）遣新河北转运使、刑部郎中薛宗道等如宋告哀。

宗道等多所要请，执礼不逊，且欲服<毛求>文金带入见，押伴使刘航皆折正之。宋帝问杀杨定事，宗道言：“杀人者，先已执送之矣。”乃赐诏曰：“惟尔先父，保有西陲，忽览讣书，良深軫念。眷言荼毒，情何可任，勉励孝忠，用副存抚。逮诸亲信之列，亦同慰谕之怀。”余令薛宗道等宣谕，并谕令上大首领数人姓名，当爵禄之。俟崇贵至，即行册礼。（《宋史·夏国传》及《西夏事略》、《西夏纪事本末》。按《文潞公集》：熙宁元年，论夏国册命云，薛宗道至，若所赍表祇是告哀，别无陈诉，及宗道于押伴官处别无传达言语，欲令孙构因聚会款曲间，只作己意问之，云：“先国主薨谢，今来何人继嗣焉？”他若云某人继嗣，即却问：“是先国主之何亲？”是子，即更问云：“是嫡子否？”若云是嫡，即与更问曰：“先国主盛年弃世，今来嗣子必是幼小。”他若有对，便随机答之。少间，即更说与：“自古外国必须中国册命者，方可取重于诸蕃。今者西夏以累世贡奉，故当册命嗣子。然朝廷以夏国自嘉祐以来，于麟州界上掩杀郭恩，及于泾原侵掠固家堡子，后又于大顺城作过，有违誓表，如此非一。以至先帝上仙，不时来祭，今上登极，亦不入贺。然朝廷曲示含容，尚存事体，而夏国终不省过。又于去年十一月中，宁顺寨界上杀害却知保安军杨定等三人。如此不道，今来朝廷未必便行封册之礼，须与夏国重别商议，再具誓表，信纳丁宁，务成久远，方可商议封册。若依前，却有侵犯边境，贡奉不时，岂恭顺和好之理？”若宗道别为分疏，即随其言以理折难。若云：“某祇是赍表来告哀，不敢与闻他议。”即且说与：“今来使还，须是子细说与本国知委，候议定，别具誓表来，朝廷须有商量，亦是使人了事之功效也。”又《韩魏公家传》：初，夏国乞遣使诣阙，告谅祚之哀。公奏曰：“西夏自诱害杨定以来，与朝廷相绝。今遽遣使来告，即见其国内饥丧，乘此危迫，故急来赴诉。此时若不直以彼国前后违犯誓诏之事先行诘责，及令缚送害定等人李崇贵、白供奉等归

朝廷行遣，以雪数家之冤，以正国体，俟其一一顺服，然后开纳。苟便如元昊身死之初，亟行小童册命之礼，且要无事，即恐一失机会，转难控制。”）

遣使如宋求封册。

宋方责夏人不修职贡，欲择人诘其使。河北转运使韩缜适陞辞，宋帝命之往。缜至驿问罪，使者引服，自后累遣人赴宋。宋臣范纯仁曰：“外貌虽若恭顺，而西人顿买汉物过多，似不为频来之计。”（《宋史·韩缜传》及《范忠宣奏议》）

辄送杀杨定者李崇贵等于宋，且请和。

崇贵至，云：“定奉使谅祚，尝拜称臣，且许以归沿边熟户，谅祚遗之宝剑、宝鉴及金、银物。”初，定之归，上其剑、鉴，而匿其金、银，言谅祚可刺，帝喜，遂擢知保安。既而夏人失绥州，以为定卖己，故杀之。至是事露，帝薄崇贵等罪而削定官，没其田宅万计。宋欲官其任事之酋，因使纳塞门、安远二寨而还绥。（《宋史·夏国传》）

五月，出兵筓箧城。

秦州僻在东南，距夏国差远。东自仪州南界生户八王族抵水洛城，是为夏属党留族地。其西路自山外石门峡正南百里，由筓箧城转三都谷，至安远、伏羌寨。次西为干川谷，在古渭州西北，约三百里至宁远寨，亦合于伏羌。自夏兵累掠秦凤，西边熟户被扰，宋帝遣宰相韩琦知永兴军，经略陕西。琦议筑筓箧古城，与古渭相犄角，以秦凤副总管杨文广董其役。文广声言城喷珠，率众潜趋筓箧。比暮至其所，部分已定。迟明，夏兵大至，与文广搏战，不胜而退。临行，遗书文广曰：“当白国主，以数万精骑逐汝也。”（《宋史·杨文广传》）

秋七月，攻甘谷城。

筓箧既城，宋帝赐名甘谷。乙埋恶其控扼要害，潜兵袭之，与秦凤都监张守约遇，分两翼夹攻。守约以五百人逆战，挺身立阵前，自节金鼓，发强弩注射，殪其酋，遂却。（《宋史·张守约传》）

九月，集兵折姜会。知原州种古来攻，拒战，不胜。

折姜会距环州永和寨一百二十里，本属中国，自元昊时，据为和市处。乙埋屡争甘谷城，不克，点集诸监军司屯其地。种古自原州帅师来击，被杀者二千余人。（《宋史·种古传》）

冬十月，辽来册秉常为夏国王。（《辽史·道宗本纪》）

十二月，遣使贡于辽。（《辽史·道宗本纪》）

西夏称乾道二年

春二月，宋遣河南监牧使刘航等来册为夏国主。

赐诏曰：“朕肇膺皇历，奄宅万邦，凡抚远人，必推大信。乃顾西陲之守，实殚累世之忠。爰自近年，颇隳故矩，以至间令首领，诱害边臣，浸违宪度之常，自绝贡输之路。方行诘问，忽报凶哀，而能惩事以谢愆，沥哀而请命，念方罹于荼毒，尝曲示于慰存。乃复羁送罪酋，载驰使介，愿坚诚节，规欲日新。今又奉表，及奏已稟从圣旨，归纳塞门、安远二寨，仍乞别进誓文，永遵臣礼。详览来请，朕意嘉之。夏国既再修职贡，所宜谨守信誓，无或扰犯边圉，重取悔尤。至于顺汉西蕃，亦毋得辄有侵掠。候誓表到日，即遣使封册，并以绥州给还，所有岁赐，自封册后并依旧例。朝廷必当诫飭边吏，约束属户，各守疆场，不得交侵，则阜安边俗，式臻富庶之期；绍续世封，克保宠荣之福。”

时秉常初立，宋臣多有劝伐夏者。知邓州郭申锡请捐前故，听其子袭爵。监察御史张舜民上言：“西夏强臣争权，不宜加以爵命，当兴师问罪。”宋帝不听，故有是役。航还，夏主遗以宝带、名马，航皆却勿受。（《宋史·夏国传》、郭申锡、张舜民等传、《九朝编年备要》及《西夏纪事本末》）

三月，侵宋秦州，陷刘沟堡，杀守将范愿。（《宋史·夏国传》）遣都罗重进如宋。

初，宋欲官爵夏之首领，计分其势。延帅郭逵以为彼必不受诏，且彼既恭顺，宣布以大信，不当诱之以利。秉常果不奉诏，遣都罗重进来言曰：“上方以孝治天下，奈何反教小国之臣叛其君哉？”于是，前议遂罢。（《宋史·夏国传》）

宋使来赐誓诏。

初，谅祚进誓表，乞班誓诏，并请以安远、塞门二寨易绥州。至是，宋赐誓诏曰：“诏夏国主，省所进誓表：‘臣闻固基业者，必防于悔吝；质神祇者，宜务于要盟。考核彝章，讨论典故。河带山砺，始汉室以流芳；玉敦珠盘，本周朝之垂范。庶使君臣之契，邦国之欢，蔚为长久之规，茂著古今之式。矧茂恩于累世，受赐于有年。当竭情诚，仰期宸听。窃以上联世绪，累受列封，本宜存信以推忠，岂谓轻盟而易动。盖此酋戎之画，助成守土之非，然而始有衅端，已归倾逝。昨者期在通欢之美，曾申沥款之诚，爰降绋函，宛垂谕旨。敢陈恳幅，上达至聪。悦给还于一城

，即纳归于二寨，惟赖至仁抚育，巨德保安，冀原旧誓之文，用复交欢之永。伏遇尧云广荫，轩鉴分辉，幸宽既往之辜，深察自新之恳。将使庆流后裔，泽被溥天，泊垂赐予之常，恪谨倾输之节。臣敢不昭征部族，严戒酋渠，用绝惊骚，俾无侵轶。非不知畏天而事大，勉肩卫国之猷；背盟者不详。寅懍奉君之体，若乃言亡其实，析众神而共诛；信不克周，冀百殃而咸萃。自敦盟约，愈谨守于藩条；深愧愆尤，乞颁回于誓诏’。具悉。朕绍承天命，尽四海而抚怀之。况尔世守西土，为国藩辅者乎！今复惩既往之非，笃自新之志，质于天地，要之鬼神，载贡誓文，纳忠王室。朕方推大信，以示万邦，俯同兹言，永无有易。其进纳塞门、安远二寨，已指挥延州候交割讫，却给还绥州。各依旧界，仍自行封册，以后岁赐，并如旧例，其餘约束事节，一依庆历五年正月二十二日誓诏施行。朕已戒飭边吏，各守封疆。所宜显谕国人，藏书祖庙，永保休福，诏诸子孙。指词已孚，故不多及。”

誓诏付夏国主，三月将行册礼，复先以诏曰：“诏夏国主，兹阅函封，重申誓约，本诚心之自笃，为封守之远图。朕已飭使人，将驰册礼。既荐绥于世土，宜先谕于边氓，庶遂耕耘之私，永无兵革之患。緬惟忠顺，当体眷勤。”册曰：“维熙宁二年，岁次己酉，三月戊辰朔，十四日辛巳，皇帝若曰於戏！昔尧合万邦而民风和，周建列土而王业懋，若古申命，盖国家之成法也。咨尔秉常，迪性纯一，饰躬靖虔，生禀山川之灵，旧传弓钺之赐，抚有西夏，尊于本朝。知事君必尽其节，知守国当保其众。乃内发诚素，外孚誓言，质之天地而不欺，要之日月而不昧。朕用稽酌故典，表显徽实。赐尔以茅土之封，不为不宠；加尔以车服之数，不为不荣。涓辰既良，备物既渥，诞举不册，以华一方。今遣朝奉郎、守尚书司封郎中、上轻车都尉、赐紫金鱼带刘航，文思副使、银青光禄大夫、检校太子宾客兼御史大夫、上骑都尉、彭城县开国伯、食邑七百户刘恣持节，册命尔为夏国主，为宋藩辅。夫履谦顺者，靡不膺长福；怀骄肆者，靡不蹈后虞。率身和民，时乃之绩。往钦哉，祇予一人之彝训，可不慎欤！”（《西夏纪事本末》）

秋七月，遣使如辽谢封册。（《辽史·道宗本纪》）八月，表宋请从旧蕃礼，从之。

诏曰：“尔世居西垂，屏卫中夏。既服朝廷之新命，宜从蕃国之旧仪，以绍祖风，且坚臣节，宜依来请，用遂乃诚。”盖夏国自谅祚请去蕃礼从汉仪之后，常服中国衣冠。至是，始复其初。（《宋史·夏国传》及《西夏纪事本末》）

九月，犯庆州。

夏国与边民私市，中国屡禁不止。是时，以受册不谢，宋帝诏：“自今有违者，经略司及官吏同罪，能告捕者赏之。”由是私贩遂绝。梁氏以货用缺乏，出兵攻庆州，大掠人户而还。（《西夏书事》）

冬十月，宋城绥州。

先是，秉常既侵秦州，复上誓表，请纳安远、塞门二寨以乞绥州。宋帝使韩缜与夏人议，亦许之矣。鄜延宣抚郭逵上言曰：“此正商于六百里之策也。非先交二寨，不可与绥。”朝议以为然。然时已有诏，使逵焚弃绥州。逵曰：“一州既失，二寨不可得。中国为夏人所卖，安用守臣为？”藏其诏不出，上言绥州具存，且自劾违诏之罪。诏褒逵。既誓诏已降，夏人犹不归二寨。夏主遣其臣罔萌讹来言：“欲先得绥。”逵命机宜文字赵禹如夏，交所纳二寨，且定地界。罔萌讹对曰：“朝廷本欲得二寨，地界非所约。”高曰：“然则塞门、安远二墙墟耳，安用之？二寨之北，旧有三十六堡，且以长城岭为界，西平王祥符所移书固在也。”罔萌讹语塞。高以夏人渝盟，请城绥州，不以易二寨。时陈升之、韩琦亦不欲废，事遂格。

秉常上誓表，更赐诏曰：“诏夏国主，所奏差嵬名挨移等赴塞门地分，与赵秘丞商量分划塞门、安远，交领绥州。虽差人去与赵秘丞一两次相见，终不与定夺了当。兼宥州续得保安军牒，开坐中书、枢密院同奉圣旨，安远、塞门蕃族住坐，久已著业，应难起移，任令蕃族依旧住坐所有，绥州更不给还。及云岂将边圉之末图，有抗大廷之诚命愿详悉于云为，免稽留于事理等事具悉。朕嗣膺丕历，勤抚庶邦。凡德泽之所加，固迩遐之无间。矧惟西夏，屏于一方。比载览于誓文，寻俯同于诚请，逮按还于旧境，忽构述于异端。因念二寨之民，岂无固俗之恋，使各安其生聚，且曲示于人恩。盖徇彼情，匪乐生事，重披来奏，尚有所陈。宜自斥于末图，庶共恢于远略。向都罗重进等赍到誓表，备详恭顺。既降誓诏，遂令延州交割塞门、安远讫，却还绥州，并须合依旧界。及得延州奏，夏国遣来人，祇要交割寨基。比移牒宥州，指说旧日界，至回牒却称赵高妄有指执，显是不依旧诏交割旧界。朝廷务悖大体，将示含容。其二寨已令延州更不交割，绥州固无给还之理。自守所宜，遵循誓诏，永保安静，无令任事首领，辄起事端。”遂城绥州，改名绥德城。（《宋史·夏国传》、《郭逵传》及《西夏纪事本末》）

遣使如宋谢封册。

夏国使者罔育讹来谢封册，王安石曰：“今既封册秉常，宜坚明约束，勿令边将生事，妄立城堡，争小利害，自作不直。”宋帝以为然。（《宋史·夏国传》及《续资治通鉴长编拾补》）

十一月，遣使如辽乞赐印绶。

辽自圣宗封李氏王爵，虽有西平、夏国之号，并未赐以印绶。梁氏用罔萌讹言，遣使求之，辽主不与。（《辽史·西夏外纪》及《西夏书事》）侵顺安、黑水诸寨，围绥德城。

夏以亲军夹河，壮骑侵顺安、绥平、黑水等寨。宋诸将请击之，判延州郭逵曰：“敌远来，利在速战，其锋未可当。”令毋得轻出。谍告曰：“贼粮欲尽矣。”逵稍出兵应之。已而绥德城告急，曰：“贼益兵大至，定仙山烟火皆满。”逵曰：“贼师其遁。”诸将皆疑，逵曰：“鸢鸟之击，必匿其形。兵果来，岂示人以众？此张虚声，惟庸将乃疑耳。”终不大出兵。（《范太史集·郭逵墓志铭》）

是岁饥。

宋臣文彦博请禁止汉人与西人私相交易，因言西界不稔，斛食倍贵，大段将牛、羊、青盐等物裹私博斛斗入蕃，不惟资假盗粮，兼妨沿边及时计置收余军储。令欲再下逐路经略、安抚司，依累降指挥施行。（《文潞公集》）

西夏称天赐礼盛国庆元年

夏四月，宋禁河东、陕西边民与西人交市。（《长编》二百十）遣兵筑八堡于绥德城。

夏攻绥州不克，以兵二万距城四里筑八堡。郭逵曰：“彼气方锐，不可与战，又不可止，但听使为之，俾其去而平之。”夏人既成堡，各留二三百人戍之。未几，逵遣其将燕达等攻其二大堡，一日克之。移檄宥州曰：“夏国违誓诏，侵城汉界，其罪甚大。若能悔过，悉听汝还。或不从，则诛无噍类。”于是馀堡戍卒皆逃去。（《长编》二百十四及《范太史集·郭逵墓志铭》）

五月，筑闹讹（一作纳斡）堡，宋人宋袭，大败。

时夏人又筑堡于庆州荔原堡北，曰闹讹，众号十万。其堡在境外二十里。及闻延州堡败，亦止不筑。蕃部巡检李宗谅地近敌堡，害其田作，乃率众千余人，与夏人战于闹讹。知庆州李复圭合蕃、汉兵三千，遣裨将李信、刘甫、种咏、郭贵等助之。信等诉众寡不敌，按兵不出。复圭威以节制，亲画阵图方略授之。兵进，宗谅战不利，还趋堡，信闭门不纳，宗谅还战而没。复圭责信观望，信等引兵三千，往十二盘击夏人。信等先射，夏人曰：“我与宗谅有仇，不与宋兵战也。”信曰：“宗谅，我熟户。”复射之。夏人曰：“汝真欲战耶？”乃纵两翼围之，且令曰：“杀兵，勿杀将。”遂大败，复圭惧，罪信等以自解。复出兵邛州堡，夜入栏浪市，掠老幼数百。又遣别将破其金汤、白豹、西和市，斩首数千级。其袭金汤也，夏人已去，惟杀其老幼一二百人。以功告捷，而边衅大起矣。（《宋史·夏国传》、《李复圭传》及《长编》二百十四。按夏震式《资治通鉴后编》校勘记：此事《宋史》所载，既与《长编》不同。而《宋史，本纪》、《李复圭传》及《夏国传》又自互异。《长编》言李信等以观望致败，《宋史》纪、传俱不载其事，此《长编》、《宋史》之不同者。《李复圭传》言夏人筑垒于其境，不犯汉地，复圭遣信自荔原堡夜

出袭击，败还。《夏国传》：夏人筑闹讹堡，复圭遣李信等出战，大败。而《本纪》言夏人犯大顺城，复圭以方略授信等，兵少取败。《夏国传》载夏人筑垒，李信等之败在五月，夏人攻大顺城、郭庆等之死在八月；《本纪》以信等败为夏人犯大顺城时事，两事混而为一，俱书在八月，此《纪》、《传》之互异者。《夏国传》言李复圭既斩信自解，复出兵邛州堡，夜入栏浪市，掠老幼数百，又袭金汤，杀其老幼一二百人。八月，夏人大举入环庆，攻大顺城。《李复圭传》言复圭斩信自解，又遣别将破其金汤、白豹、西和市，斩首数千级。后七日，秉常举国入寇，此《传》之互异者。此以《夏国传》正《本纪》之误较合。）

宋将林广破十二盘、多娘、大原、诈娘四寨。

夏人攻荔原堡，李信战不利。本道命广深入牵制敌势，遂破十二盘、多娘、大原、诈娘四寨。（《范忠宣集·林广墓志铭》）六月，西蕃董裕来请婚，不果。

董裕，董毡族弟，两人素不睦。蕃僧结吴叱腊（一作结干恰尔）、康遵新罗结（一作康藏星罗结）迎诣武胜军，共立文法，图并诸羌。遣使至夏国请婚，梁氏将许之。会中国招降其大酋撒四（一作萨瑚）数人。结吴叱腊等约解法废婚，议亦寝。（《长编》二百十三）

秋七月，宋复袭金汤，败之于洛河川。

梁乙埋以金汤被掠，增兵戍之。复圭遣将李克忠、蕃官赵馀庆复率众袭之。夏伏兵洛河川以待。战甫合，突冲阵为二，宋军大败。克忠归路已断，领残众东出鄯延，月馀始得达庆。（《长编》二百十四）

八月，大举攻宋环庆。

初，夏人声言，将出鄯延。宋钤辖高敏屡白李复圭曰：“兵家之事，声东击西。环庆尝破白豹、金汤，结衅已深，不可不备。”已而夏人果以兵三十万，分道入环庆，遂攻大顺城、柔远寨、荔原堡、淮安镇东谷、西谷二寨、业乐镇，兵多者号二十万，少者不下一二万。屯榆林，距庆州四十里，游骑至城下，九日乃退，杀其钤辖郭庆、高敏、魏庆宗、秦勃等。当夏人之入境也，姚兕时驼荔原堡，先羌未至，据险张疑兵诸山上，使敌不得散掠境内，间出奇兵击之。有悍酋临阵甚武，兕前，射中其目，斩首还，一军欢呼。明日，来攻益急，兕手射数百人，裂指流血，又遣子雄引壮骑驰掩其后，自执旗从城上麾之，夏人不敢当，度堡不打破，乃退。攻大顺城，围庆州七寨，宋钤辖梁从吉率兵八百余人逆战，获夏人酋领一人。宋总管杨遂驻兵大义，以高敏为先锋将。夏人攻大顺水寨，敏出通路，自寅及午，且战且前，多所斩获。次榆木，援兵不至，中流矢死。张吉者，庆州卒也，为淮安镇守烽，夏人攻东谷掠得之。胁以兵，使呼城中曰：“淮安诸寨已破，宜速降。”吉反其词曰

“努力！诸寨无虞，贼粮尽且去矣。毋庸降！”夏人怒，杀之。（《宋史·夏国传》及姚兕、高敏、张吉等传，《长编》二百十四。又《长编》：先是，夏人十数万寇边，李信、刘甫败于瓠子岭，进围荔原堡，连城皆坚壁。知宁州萧注夜启关，宴饮如平时，人恃以无恐。注复为书抵李复圭，言寇必不深入，姑坚壁，俟其欲去而后击之。复圭不听，遣郭庆等以兵数千通大顺城，全师覆没。）

夏人设伏乌鸡川，将袭林广，不克。

广尝护监军行边，将及乌鸡川，遽率众由间道葭山行，道遇属羌以路险远告，不听。众莫测其意，后果闻夏人伏乌鸡川。及闻，广已由他道还，遂引去。而属羌来告者，盖亦谍也。广又夜过洛河，夏人来袭，广扬声令军中选强弩数百列岸侧，实卷甲疾行，夏人疑，不敢渡。（《范忠宣集·林广墓志铭》）

进攻柔远。

夏人既不得广，乃益兵攻柔远，围之。林广预戒守者不得轻动，虽火城中，无辄扰。已而果有谍发火于蒿场，城中寂然，夏人计遂不得行。翌日，夏人至马平川，大持攻具来攻城。众汹惧，广被甲引兵，开他门，示将出夺其马。夏人去城救马，广复入，遂得益修守备。因募属羌敢死者，夜缒城下，潜攻夏营。夏人战，数不利，乃引去。（《范忠宣集·林广墓志铭》）

与宋将折克行战于葭芦川，败绩。

当夏人攻环庆时，克行以兵三千护饷道，与夏人遇，战于葭芦川，先登，斩级四百、降户千、马畜万计。诸老将矍然曰：“真折太尉子也！”（《宋史·折克行传》）

与宋知渭州蔡挺战于胡卢河，败绩。

谍告夏人候胡卢河，挺出奇兵迎击之，夏人溃，分诸将蹶而讨之，荡其七族。（《宋史·蔡挺传》）吐蕃董毡来袭。

当夏人攻环庆时，董毡乘虚入夏境，大克获，宋赐玺书、袍带，奖激之。（《宋史·吐蕃传》）宋以李师中知秦州。

宋边帅前此多屯重兵于境，夏师至则战，婴其锋锐而内无以遏其入。师中简善守者列塞上，而使善战者居中，令诸臣曰：“即寇至，坚壁固守。须其去，出战士尾袭之。”约束既熟，常以取胜。（《宋史·李师中传》）

宋将刘绍能败夏人破啰川。（《宋史·刘绍能传》）九月，侵怀宁寨。

延州当三路之冲：西北金明寨；正北黑水寨；东北怀宁寨。而怀宁直横山，其径尤捷。乙埋遣兵，距寨六十里筑细浮图寨，宿重兵守之。旋以三万骑薄怀宁城，竟日不退。西路诸巡检贾翊与延州巡检燕达将所部五百入跃马奋击，所向披靡，夏兵不胜而走。（《宋史·燕达传》及《范太史集·郭逵墓志》）

冬十月，宋诏延州，毋纳夏使。

判延州郭逵言：“西界将来关报贺正旦使等，牒至未审许与不许收接？”诏逵作已意答以：“为尝寇庆州，不敢收接引伴。”（《宋史·神宗本纪》及《长编》二百十六）

十一月，攻环庆。宋将张玉以万人来救，解其围。（《西夏事略》）攻大顺城，宋都监燕达等击走之。

夏人攻大顺，宋帝诏知延州郭逵出师为援。逵谍知秉常幼，留宥州，即遣燕达悉破近边诸寨，声言捣虚攻宥州。凡九战，其酋皆遁。又遣田守度出德靖寨，伺其归邀击之。夏人闻逵将袭宥州，亟奔还，守度破之于金汤。（《范太史集·郭逵墓志铭》）

宋延州官军袭金汤川，不攻而退。

延州右侍禁王文谅，即讹庞家奴。昭文馆大学士韩绛宣抚陕西，爱其才，奏为指使，督蕃将赵馥庆讨夏国，期会于金汤川之结明萨庄。文谅甫抵金汤，去结明萨庄尚二十里，见夏兵众，引归。馥庆至，不见文谅军，亦退回。（《长编》二百二十）

与鄜延都巡检使白玉战于新寨，败绩。

李复圭治庆州之败，既斩李信等，又欲罪玉，郭逵申救得免。已而大捷于新寨，宋帝谓逵曰：“白玉能以功补过，卿之力也。”（《宋史·郭逵传》）

十二月，侵宋镇戎军三川寨，巡检赵普伏兵邀击，败之。

夏人夜引轻骑过边壕，抄掠镇戎军，普伏兵壕外邀其归，击之，获马十二匹而还。（《宋史·神宗本纪》及《长编》二百十八）绥州监军吕效忠帅师犯德顺军，败死。

陕西诸路闲田数千顷，募人为弓箭手，每人给屋，贷口粮二石，半耕半战。德顺军所募尤劲勇。效忠率万骑侵渭州，攻德顺。知军事周永清出兵拒敌，效忠战败被获。永清令勇士夜驰百里，捣其巢，俘斩复数千人。（《宋史·周永清传》）

是岁，宋复绝夏岁赐，断和市。（《长编》二百十五）

西夏称天赐礼盛国庆二年

春正月，遣使如宋贺正旦。

夏人犯环庆后，复遣罔萌讹来贺正。延帅赵高请边吏离其心腹，因以招横山之众，此不战而屈人兵也。宋帝不许，诏以来年应赐夏国银、绢，令宣抚使分贮四路安抚司处，以备犒赐夏属来归者。于是罔萌讹怏怏而回。（《宋史·赵高传》及《长编》二百十七。又《长编》：诏近指挥陕西、河东诸路：如有夏国投来蕃部，不以多少，并令接纳，厚加存抚。近日惟鄜延、环庆屡奏投来人户，而诸路并不知有无，可询其实封以闻。）

筑啰兀城。

梁乙埋闻中国立更戍法，分置陕西五路四十二将，谋大举，乃筑城于抚宁故县北之滴水崖。崖石峭拔，高十馀丈，下临无定河，谓之啰兀城，以扼横山冲要。延州左麒麟使折继世与知青涧城种谔谋曰：“横山之众尽欲归汉，大兵若出界取啰兀，河南地可奄有也。”谔言于宣抚使韩绛，议由绥德进兵攻啰兀，创建六寨，以通麟府，包地数百里，则鄜延、河东有辅车之势，足以制夏国。令谔以所部兵二万出无定河，诸将皆受节制。谔趣河东兵，先趋银州。乙埋集众铁冶沟邀击之，河东兵大溃。宁州团练使刘闢亲自殿后，率锐骑搏战，飞矢蔽体，不少却，乃解。（《长编》二百十六，《宋史·刘闢传》。按《范育奏议》：“昨闻宣抚使发麟府军马出界，过铁冶川尽日行狭隘中，若遇数百人则只轮不返，幸乘虚骤进，夏不及计，故得完师。然既过之后，夏即以严师为备，诸将许咸吉等却由陕西界回兵，与《宋史·刘闢传》异。）

都枢密使哆腊战于马户川，败绩，弃啰兀城走。

哆腊闻种谔将至，率钤辖十三人，引兵三千屯啰兀城北马户川。谔令前部高永能六千骑迎之，哆腊五战不利，率众走保立赏平，坚壁不出。谔遣以妇人衣三袭，潜遣吕真率千人蹑其后。会大风尘起，哆腊望见，惊曰：“汉兵至矣！”皆溃而走，遂城啰兀。吕公弼上言：“谔既城啰兀，又增堡障。今大兵杀获已多，虏方怀忿，日夜聚兵，必为边患。愿罢城筑，专为持重计。”韩绛又命德顺军判官游师雄同提举常平刘闢往鄜延，与主帅措议战守之策。初，瑄欲自延州入安定、黑水堡，过绥平

塞，地逼敌境。师雄疑其有伏，请由他道。已而谍者至，言夏人尝伏精兵数千于黑水旁，伺其过掩之。将诘以机事，琯惊曰：“向非公，堕于敌矣。”已而绛言谕入夏之功，破贼马户川，斩首千级，乞加旌赏，从之。（《长编》二百十九至二十及张舜民《游师雄墓志》。按《宋史·吕公弼传》：韩绛宣抚秦晋，将取啰兀城，令河东发兵趋神堂新路。公弼曰：“夏必设伏待吾。永和关虽回远，可安行无患。”乃由永和。既而新路援兵果遇伏。与《游志雄墓志》相发。）

二月，遣使求援于辽。

啰兀之失，国中点兵不集。遣使如辽乞援，辽主许发腹里兵三十万助之，于是国中气复振。（《长编》二百二十。又《长编》：先是，宣抚使奏夏人点集不起，或云往仇赛西蕃。上曰：“此何意也？”王安石曰：“彼或先并力讨西蕃，弹压已定，乃来与中国争，缘今便与中国争，亦未见其利。”上曰：“能如此，乃是有谋。”安石曰：“前见梁氏委计于诸首领，或恐诸首领计虑及此。”冯京又言：“或闻就契丹借兵士，疑契丹不肯。”安石曰：“夏贼若果借兵于契丹，即不为得计，恐其不至如此。”及是，探报契丹阴发腹里兵三十万往西界，不令中国知，上曰：“果有此否？”安石曰：“虽有此，不足怪。陛下即位即经营绥州，又取银州（取银州当考）破其唇齿之势，彼以为中国若已服夏国，当觐幽燕。若乘中国有事之时，能挠我权，则其庸多矣。夏国主幼，妇人用事，忿而无谋，或请师于契丹，则为契丹计，虽许之何为不可，可以挠中国而无损于我。契丹优为之，但恐其无远略，不能出此。”上曰：“果及此，则奈何？”安石曰：“陛下诚以静重待之，虽加一契丹，于边事亦不至狼狈。若欲进取，非臣所知，且我坚壁清野，积聚刍粮以待敌，则敌未能深为我患，而彼两国集于境上，其刍粮何以持久？我所患者在于刍粮难继而已，爱惜刍粮，无伤民力，而以静重待敌之衅，则外患非所恤也。”）

与宋将李浩战于赏堡岭川，败绩。

韩绛城啰兀，浩领兵战赏堡岭川，杀大首领讹革多移，斩首千三百馀级。（《宋史·李浩传》）三月，陷宋抚宁诸城。

初，种谔进筑永乐川、赏捕岭二寨，分遣都监赵璞、燕达筑抚宁故城，及分荒堆，三泉、吐浑川、开光岭、葭芦川四寨与河东路修筑，各相去四十馀里。韩绛得空名告身、宣^{束力}及锦袍、银带，抚纳降附。至边，尽召蕃官、蕃部厚犒之，军士怨望；又夺骑兵马，曰：“此辈不能战。”以与蕃部，有抱马首号泣者。绛又尝遣权管勾机宜文字游师雄按视啰兀城、抚宁和市，师雄言：“啰兀无井泉，抚宁在平川，皆不可守。”已而夏人来攻顺宁寨，遂围抚宁。折继昌、高永能拥兵驻细浮图，去抚宁咫尺，啰兀兵势尚完。谔在绥德节制诸军，闻夏人至，茫然失措，欲作书召燕达，战悸不能下笔，顾运判李南公，涕泗不已。由是新筑诸堡悉陷，啰兀亦不守，将士没者千馀人。初，宋帝遣户部副使张景宪等按视，景宪受命即奏曰：“二城

不可守，臣固不待到而后知。”行未半道，抚宁已陷。至鄜延，条奏所见：百姓憔悴，师旅咨嗟。及言入鄜延界，询啰兀利害，无一人言便者，乞速毁废。会庆州军叛，诏弃啰兀城。（《宋史·夏国传》及《长编》二百二十至二十一。按《闻见近录》：夏人围啰兀甚急，得宋禁卒，语之曰：“汝语城中，张大吾军，使速降，当与汝爵禄。”卒敬诺之。致卒危梯上，下瞰城中，卒辄大呼曰：“西贼人少粮尽，朝夕去矣。”城中坚守之。贼怒，醢之。又《长编》：上尝问宣徽南院使郭逵曰：“种谔取啰兀、抚宁二寨，或闻夏人复欲取之，当何如？”逵曰：“愿速备抚宁，则啰兀无患。”上曰：“何也？”逵曰：“昔夏人取灵武，先击清远，然后灵州失守。今抚宁地平而城小，戍兵不多，万一用前策，则必先取抚宁。抚宁破，啰兀随之矣。”上深以为然。未及往备，而抚宁已陷，遂弃罗兀。按啰兀《长编》作娄城。）

与宋将嵬名山战于大理河，败绩。

种谔既取绥州，折继世以骑步万军于怀宁寨。入晋祠谷，往银川，分名山之众万五千户，居于大理河。夏人往攻，再战皆败。名山遂同折继世守绥州。（《宋史·折德晟附传》）

银州将香崖争荒堆寨，败于吐浑河，以其众降。

香崖以数万众争荒堆，击败庆州指使王文谅巡徼兵。已而麟府都监王文郁大军至，香崖伏兵吐浑河侧以待，战不胜。夜遣人持剑约降，文郁许之。诘旦，与偕行。半道，崖部忽噪而起，文郁击之，追奔二十里。据险大战，矢下如雨，文郁徐引渡河，谓吏士曰：“前迫强敌，后背天险，韩信驱市人且破赵，况尔曹皆百战骁勇耶！”士感奋进击，夏人大溃，降其众二千。（《宋史·王郁文传》及《长编》二百二十六）

夏四月，宋遣环庆都钤辖仵赞以兵屯邠泾、河中。

时环庆新经兵变，且西夏未庭，故遣赞等训兵万五千人分屯要郡。（《宋史·神宗本纪》及《长编》二百二十二）五月，宋遣燕达援啰兀戍卒。

啰兀之弃，达来援，取戍卒輜重，为夏人所邀，且战且南，亡失颇多。（《宋史·夏国传》及《燕达传》）遣使至绥德城议和。

夏用事臣罔萌讹、结明爱数劝梁氏犯边。抚宁之役，虽复诸堡，而啰兀城外三百里间，庐井焚弃，老少流离，已废春耕，又绝岁赐，财力并绌。罔萌讹以韩道喜之执，与梁乙埋不和。蕃部以告环州种诊，诊遣使谕，有能擒此二人及同谋首领献者，赐予无所吝。于是国中疑贰。韦州监军司牒环州请和，乙埋亦遣人至绥德见知城折

克隼，言国主欲得绥州，和好如旧。环庆、邠延两路以闻。（《长编》二百十六及二百二十三。又《长编》：上论西人请和事，王安石以为当明示欲和，以怠其志，徐与之议，以坚其约，此攻敌人心之道也。）

请宋降问罪诏书。

宋沿边诸路闻夏国请和，放行和市，而于内投蕃部，夏人各在界首叫呼，或顺便交还，或逐回被杀。枢密院言：“夏国款塞，前此惟在延州顺宁寨。若诸处各与通语言、互市易，恐彼此参差，有失事机。”宋帝下诏戒飭。诏未至，环州种诊已回牒韦州，许以和好。于是梁氏又遣人言，乞朝廷先降问罪诏书，方敢以罪状表上。（《长编》二百二十三至二十四）

秋八月，宋以正韶主洮河安抚司事。

宋熙宁元年，王韶上《平戎策》三篇，其略以为：“西夏可取。欲取西夏，当先复河湟，则夏人有腹背受敌之虞。夏人比年攻青唐，不能克，万一克之，必并力南向，大掠秦、渭之间，牧马于兰、会，断古渭境，尽服南山生羌，西筑武胜，遣兵时掠洮、河，则陇、蜀诸郡当尽惊扰。瞎征兄弟其能自存耶？今唃氏子孙，唯董毡粗能自立，瞎征、欺巴温之徒，文法所及，各不过一二百里，其势岂能与西人抗哉！武威之南，至于洮、河、兰、鄯，皆故汉郡县，所谓湟中、浩、大小榆、枹罕，土地肥美，宜五种者在焉。幸今诸羌瓜分，莫相统一，此正可并合而兼抚之时也。诸种既服，唃氏敢不归？唃氏归则河西李氏在吾股掌中矣。”宋帝异其言。至是，以韶主洮河安抚司事。

会蕃部俞龙珂在青唐最大，渭源羌与夏人欲羁属之，诸将议先致讨韶因按边，引数骑直抵其帐，谕以成败，遂留宿。明旦，两种皆遣其豪随韶以东。初，王安石子雱年十三，得秦卒言洮河事，叹曰：“此可抚而有也，使西夏得之则敌强而边患博矣。”王韶开边，安石力主其说，盖兆于此。（《宋史·神宗本纪》及王韶、王雱等传）

遣使贺辽天安节。

夏使与中国使兵部郎中楚建中、陕西转运使沈起同至，廷见时，两使者位著相等，起争曰：“夏使陪臣尔，岂得与王人齿！”独升东朝，夏使不敢并。（《宋史·神宗本纪》及《沈起传》）

九月，入贡于宋，且输平，愿以二寨易绥州，乞如旧约，不许。

梁氏频称款塞，辄以虚声摇边。宋帝谕环庆等州：“不须遣人回答。如西人再至，

令往顺宁寨依故例，经军北巡检转报。”于是梁氏遣大使阿泥崑名科荣、副使吕宁焦文贵，由延州入贡，奉表乞绥州，略云：“臣近承边报，传及睿慈，起胜残去杀之心，示继好息民之意。入神胥悦，海宇欢呼，仰戴诚深，忭跃曷已。恭惟皇帝陛下，深穷圣虑，远察边情，念兹执戟之劳，恤彼交兵之苦，岂谓一城之地，顿伤累世之盟。觐斥边吏之云为，乃是天心之惻隐。况此绥州，居族岁久，悉怀恋土之思；积愤情深，终是争心之本。远施命令，早赐报移，得遵嗣袭之封，永奉凝严之德。<立宁>使枕戈之士，翻成执耒之人。顿肃疆场，重清烽堠。顾惟幼嗣，敢替先盟！翘仰中宸，愿依旧约。贡琛贄宝，岂惮于逾沙；向日倾心，弥坚于述职。”学士景之辞也。宋帝诏答曰：“昨览边臣所奏，以夏国去秋自绝朝廷，深入环庆路，杀掠熟户，侵逼城寨，须至举兵入讨。朕为人父母，亟令班师，无得穷武。今国主遣使归款，欲继旧好，休兵息民，甚善。所言绥州，前已降诏，更不令夏国交割塞门、安远二寨，绥州更不给还。今复何议！止令鄜延路经略司定立绥德城界至外，其余及诸路并依见今汉蕃住坐、耕作界至，立封堠、掘壕堑，内外各认地分樵牧耕种，贵彼此更无侵軼。俟定界毕，别进誓表，回班誓诏，恩赐如旧。”因并赐陕西、河东经略使司诏曰：“敕夏国再差崑名嚷寨等进誓表谢恩，朝廷已降诏，并依庆历五年正月二十二日誓诏施行。”又赐鄜延等路经略使不得生事诏曰：“敕夏国再差都罗重进等赍到誓表，及进纳安远、塞门二寨，词理恭顺。朝廷已降誓诏，并依庆历年誓诏施行。”（《宋史·夏国传》及《长编》二百二十三、二百二十六，《西夏纪事本末》）

冬十月，宋复禁陕西、河东私市。（《长编》二百二十七）十二月，宋归夏俘。

时赵高为鄜延路经略使。宋帝诏询问降羌，如有愿归夏国者，先以名闻。诸路准此，仍牒宥州，令于逐路界首交割。初，帝论西人内附者，或以胁迫，非其诚心，欲令愿归者从之；不愿者随便措置，可以省粮食、免检察，且足以示广大推恩。乃下诸路详议，已而有是诏。（《宋史·神宗本纪》及《长编》二百二十九。又《长编》：其后，知原州种古言：“招降蕃部可用为乡导，不当问其愿归。盖汉官多恶蕃部，恐迫胁令归即反害恩信。”上曰：“如王广渊计，但欲遣归。盖广渊与韩绛不相能。”安石曰：“今绛已被斥，留得蕃户，陛下亦必不以此为功；纵遣去，亦不复加绛罪，不知广渊为此何意？”上曰：“欲表见绛所为皆非。”安石曰：“陛下但当论利害，不当探人未必然之私意。臣固尝论，留得此辈无所利，但恐为患。臣近见张守约言，古渭一带，属户多饿死者。今边障极虚，中国久来熟户尚不暇救恤，乃更欲招夏国老弱收养，岂为得计？”上曰：“中国人故多，诚不赖夏人，然言者谓收纳夏国人，使彼人少，即于彼有害。”安石曰：“陛下欲弱彼，则先须强此。欲害彼，即先须利此。今陛下所御将帅，一心奉陛下所欲为，然后可任以整缉边事；边事各有条理，然后可以挠夏国。今熟户饿死，将帅不能救恤，陛下尚不得闻知，如何乃能困夏国？臣愚以谓方今所急，在知将相之情，以道御之，使不敢偷惰欺慢，然后边可治。边可治，则如秉常者虽欲扫除，极不为难。若未能如此，即无困夏国之理。”）

卷十六

西夏称大安四年

春三月，遣嵬心（一作威沁）入边刺事被诛，遂执西州蕃户兀胜（今作纳木沁）以归。

初，秉常诱边民刘勃怡作奸细，侦中国虚实，事觉被诛。已，遣蕃户嵬心入环州，匿于熟户吹宁家，声言点兵大集，先攻环庆，为逻者所获，经略司根究得实，又诛之。秉常怒，纵兵入熙河，执珠旺族蕃户兀胜等数人归，囚于地牢，经五日放还。

（《长编》二百八十八。按《长编》：是年正月丁酉，上批：“据高遵裕所奏，西人理索伊克等事，此必尝有熟户出界，因索不获，遂于河市纵火，以攄一时之忿。深恐羌人酬赛，结成边隙，可速指挥鄜延路经略司，止作准环庆路牒访闻柔远寨熟户因理索人口，尝私侵入西界地分，见根究。移宥州照会，庶羌酋如此非朝廷意，亦显本路未尝容其侵扰。”后十馀日，再批：“令吕惠卿更详羌情缓急，万一或未尝侵犯彼界，即勿发此牒。”）

夏四月，立熙河封堠。

秉常遣人于熙河界内掘坑，画十字，立草封为堠。宋都总管司走马承受公事长孙良臣以闻，宋帝令鄜延路移牒戒约之。（《长编》二百八十九）六月，获河东刺事人资允。

资允，麟州银城寨熟户，入西界侦事被获，已而逃归。（《长编》二百九十）宥州牒鄜延路，请禁侵耕。

麟州星最浪、木瓜铺诸处，向为中国废地，自熙宁八年后，居民颇事垦辟。夏蕃部攘之不得，指为侵耕生地，诉于监军司。监军司以闻，秉常令宥州移牒请禁之。（《长编》二百九十。按《长编》：是月戊辰，鄜延经略使吕惠卿言：“宥州牒称：麟、府二州边人侵耕生地，乞降回宥州牒本。”诏管勾麟府路军马高遵一等：“验定西人所争地界，旧曾与不曾开耕？系与不系两不耕地？速保明以闻。”）

秋，盗割宋鄜延稼，不得。

是岁，鄜延大稔。夏人屯一千骑于大会平，将取稼。都监高永能简精骑，突过其营，骑卒惊溃，获钐辮二人，转六宅使。夏人患之，令曰：“有得高六宅者，赏金等其身。”（《宋史·高永能传》）

冬十月，宋使阁门祗候赵戡来赐时服。

故事：受中国给赐，必遣使赍表谢。时赵戡押赐仲冬时服至，秉常以蕃书附之入谢，戡辄收接。宋帝诏毁其书，令开封府劾戡罪。（《长编》二百九十六）

十二月，宥州牒宋，请重定边界。

初，宥州请中国禁麟、府耕地，宋帝令边民不得违禁，而诏西人巡马亦宜悉依旧处过住。鄜延经略使吕惠卿牒谕宥州，以马五匹易取所掳人民。宥州回牒言，请遣官与本国边臣重将苏御带分立文字，依理识认，悉毁所耕地，然后将本界前后逃背捉杀人马于界首交会。宋帝不许。（《长编》二百九十五）

河东使来议丰州耕地。

河东丰州旧有属蕃保聚，自元昊入侵掠，以西来、永安、保宁三寨外，尽成旷土，两界久以生地互争。河东守王崇拯与首领议，以沙河为界，委官标量合耕地各三十顷，顷各有畸，于是丰州界至乃明。（《西夏书事》）

西夏称大安五年

春二月，遣蕃户昌宁诈降于鄜延，被诛。

秉常所遣刺事人屡为中国捕诛，乃使昌宁诈为投顺，中国授以田宅，宥州佯以牒索，宋帝不许。宁潜与蕃部苏尼等要结，刺探边事以报，久之事露，为鄜延经略司所诛。（《长编》二百九十七）

三月，获麟、府官军吕重等，寻归之。

秉常以麟、府耕地未定，命蕃部见中国边民辄射杀之。重等巡视其地被获，经略司遣人来索，始放归。（《长编》二百九十七）

夏六月，夏人自满堂川入大会平，杀防田人马，兵官宋都监李浦等逼逐出塞。（《宋史·夏国传》）秋七月，侵绥德城。（《长编》二百九十九）九月，宋人来袭。

绥德城把截杨永庆声檄巡边而掩取蕃部首级，诈言斩犯边人。诏毁永庆出身文字，送西京编管。（《宋史·夏国传》）遣使贡于辽。（《辽史·道宗本纪》）

冬十一月，牒河东，请交会人户。

梁乙埋遣蕃官张灵州奴伪为汉人，入边侦事，为泾原游兵所获。乃移牒河东，言以

所掳汉界诸边人马与本国被捉人马交换。经略司以闻，宋帝许之。（《长编》三百一）

是岁，侵宋镇戎军。

夏人以万骑往攻，适知镇戎军张守约巡边，与之遇。守约不解鞍，简兵五百逆战，众寡不侔，势小却。夏人张两翼来，守约挺身立阵前，自节金鼓，发强弩殪其酋一人，夏人遂退。（《宋史·张守约传》）

西夏称大安六年

春正月，复行汉礼。

秉常连次犯边，每得汉人辄访以中国制度，心窃好之，乃下令国中悉去蕃仪，复行汉礼。诸臣阿梁氏者皆言不便，梁乙埋与其叔母亦相继劝秉常，不听。（《长编》三百十二）

二月，谋攻邈川。

秉常以西蕃董毡复臣中国，受西平节度使职，遣众谋袭邈川。已，闻其城主温訥支郢成已遣阿令京款塞，乃撤兵还。阿令京，温溪心弟也。（《长编》三百二）

夏四月，械宋环州叛族于宋。

宋环州肃远寨慕家白子等，剽属羌为乱，张守约讨平之，馀遁入夏国。守约驻师境上，檄取不置，夏人震恐，居数日，械以来，斩于市。（《宋史·张守约传》）

侵宋当川堡。

宋六宅使高永能以千骑来逆，度不能支，依险设疑兵，且斗且却，而令后骑扬尘，若援兵至者，奋而前，围遂解。（《宋史·高永能传》）秋七月，宋备夏人蹂绥德田。

鄜延路侦夏人欲选骑兵蹂绥德田，宋帝诏令经略司精审规候，如得实，令所属将副选汉蕃兵择要地设伏，伺其侵入，痛掩杀之。（《长编》三百六）

夏人将筑城于河州界，宋诏禁止之。

西界首领禹臧结逋药、蕃部巴鞠等，以译书入告于宋，言夏国集兵，将筑撒逋达宗

城于河州界：黄河之南，洮河之西。熙河路经略司以闻，帝曰：“若如所报，乃属河州之境，岂可听其修筑？深虑经略司不详上件所指地分，都为无备驱逐约阑次第，可速下本司多备兵马禁止之。”（《长编》三百六）

九月，宋来赐生日礼物及仲冬时服。

宋帝诏令使人将来到夏国，许比附三路沿边臣僚，并令听乐，以太皇太后服未满期故也。（《长编》三百八）冬十一月，返宋环州田。

夏境与环州犬牙相错，每获，夏人必侵掠其田，多弃弗理。知庆州俞充檄所部以时耕植，募家族山夷及叛户入西者三百为卫，又遣将张守约耀兵塞上，夏人乃反其田。（《宋史·俞充传》）

是岁，攻宋刘沟堡。

宋将刘昌祚领骑二千出援，夏人伏万骑于黑山而伪遁，卒遇之，战不解。薄暮，大酋突而前，昌祚抽矢一发，殪之，馀众悉遁。帅李师中上其功曰：“西事以来，以寡抗众，未有如昌祚者。”昌祚善骑射，箭出百步之外，夏人得箭以为神，持归事之。（《宋史·刘昌祚传》）

西夏称大安七年

夏四月，将军李清谋以河南地附宋，梁氏杀之。

秉常以爱行汉礼，为梁氏所恶，梁乙埋等皆不悦。将军秦人李清说秉常以河南地归宋。梁氏知之，遂置酒诱清，执而杀之。（《宋史·夏国传》及《长编》三百十二。按《东都事略》云：“有李将军者为秉常诱汉娼妇、乐人，梁氏执杀之。”与《宋史·夏国传》异。）

梁氏囚其主秉常。

梁氏既杀李清，幽秉常于兴州之木寨，距故宫五里许。令乙埋与罔萌讹等聚集人马，斩断河梁，不通音耗。于是，秉常旧时亲党及近上用事诸酋各拥兵自固，乙埋数出银牌招谕，不从，国内大乱。（《长编》三百十二）

五月，统军禹臧花麻移文熙州，请讨梁氏。

花麻素不悦梁氏，见秉常失位，移文熙州，称夏国母子不协，杀其重臣，上下汹汹，若发兵来讨，请举族以应。宋帝诏知州苗授密谕使人云：“自三月以来，诸路探

报，夏国变乱，所说不一。今河津南北阻隔，人情去就，次第可写一文字为信。”因厚赆遣还。（《长编》三百十二）

六月，宋保安军移牒宋诒。

曰：“夏国世世称蕃，朝廷岁时赐与。比年以来，遵奉誓诏，谨修贡职，恩义甚至。今闻国主为强臣所制，不能专命国事，亦未能悬测存亡。今朝廷将差降赐生日及仲冬国信使入界，未审至时何人承受？及本国见今何人主领？请速具报，以须闻达。”盖以尝夏国应答之辞也，梁氏不报。（《长编》三百十三）

秋七月，宋命李宪等分道来讨。

时宋谍者言秉常死，宋臣俞充言：“秉常为母梁氏所戕。或曰：虽存而囚，不得与国政。其母宣淫凶恣，国人怨嗟。秉常亡，将有桀黠者起，必为吾患。今师出有名，天亡其国，度如破竹之易，愿得秉传入覲，面陈攻讨之略。”鄜延总管种谔亦疏言：“西夏内乱，宜兴师问罪，此千载一时之会。”且对宋帝大言：“夏国无人，秉常孺子，臣往，持其臂以来尔。”宋帝壮其言，始决计用兵矣。孙固数言：“举兵易，解祸难。必不得已，请声其罪，薄伐之，分裂其地，使其酋长自守焉。”宋帝笑曰：“此真酈生之说尔！”滕元发亦上言：“继迁死时，李氏几不立矣。当时大臣不能分建诸豪，乃以全地王之，至今为患。今秉常失位，诸将争权。天以此遗陛下，若再失此时，悔将何及！请择立一贤将，假以重权，使经营分裂之，可不劳而定，百年之计也。”宋帝亦奇其策，而不能用。乃诏大举征夏，命李宪出熙河，种谔出鄜延，高遵裕出环庆，刘昌祚出泾原，王中正出河东，五路并进，皆会兴、灵，而以李宪总师。（《宋史·夏国传》及俞充、种谔、孙固、滕元发等传）

以兵袭西蕃西啰谷。

西啰谷，西蕃斫龙城所属，在守巴堡南。梁氏以国中内乱，恐西蕃窥其隙，令三头项人直抵西啰谷劫制蕃部。西平节度使董毡使养子阿里骨率兵击之，斩三百级，降百二十三人。（《长编》三百十四。）

宋诏吐蕃首领董毡集兵会伐。（《宋史·神宗本纪》。按《长编》：六月辛巳，手诏：“应熙河路及朝廷所遣四将汉、蕃军马并付都大经制、并同经制李宪、苗授依阶级法总领照应，董毡出兵，俟得蕃中要约时日，斟酌机会调发，随处驻扎。如董毡欲得兵马过界共力攻贼，选官部分本路蕃弓箭手量所用人数以往。若夏国母亲来，或止遣大兵，即候董毡人马交锋，夏人有退败之势，见隙可乘，相度机便，与本路诸将出界共力杀逐。如董毡以夏人方顾内难，别无侵虞，敢渝前请，犹豫不肯如期出兵，致误朝廷，虚有调发，即相度机便移兵讨除。其临敌利害，事干机速，中覆不及者，随宜措置施行。”下略。）

种谔攻米脂寨。（《长编》三百十六）八月，攻宋临川堡。

鄜延路走马承受杨元言：“西人二万余于无定河临川堡出战，斩获首级。”帝曰：“朝廷于诸城寨未尝侵犯夏国，未知有何道理辄领大兵入寇？缘所定师期尚远，宜下鄜延路经略司，令保安军牒宥州诘问，庶使彼辞愈曲，我师出境其名益直。”已而李宪率兵来，与遇于西市新城，战却之，俘去酋首三人，首领二十余人。（《宋史·神宗本纪》及《长编》三百十五）

遣使至绥德索降人。

初，中国下诏招纳西人，颇多降附。酋长或下令禁止，或逼之远徙，使不得近边。蕃部讹麦等十余人，家属百口，潜从大理河北内投。梁氏令人数至绥德索之。种谔帅所部驻绥德城外，遣诸将招接降人。乙卯盛兵决战，不胜。（《长编》三百十五）

复掠丰州。

执弓箭手沈兴等数人，河东经略司请移牒理索，宋帝以业已兵讨，更勿行牒。（《长编》三百十五）

宋诏诸路：应投来首领等，令边臣密问以夏国变乱及今点集、屯聚处所、动息以闻。（《长编》三百十五）李宪败夏人于汝遮谷。

宪既败夏人于西市新城，复进兵兰州，遇夏人数万于汝遮谷。宋师前涧后山而阵，夏人逆战，自午至酉，夏人退保大涧，大涧深阔，宪虑有伏兵，不欲迫袭。夜与夏人对垒交射。中夜，夏人遁。（《宋史·神宗本纪》及《长编》三百十七）

遣使求救于辽。（《宋史·夏国传》。按《长编》：是月丙寅，诏王中正：将来大兵出界，虑辽人亦遣兵征讨，或为援助，或于境上自防。若与诸路兵相遇，即先遣使臣说谕或移文，以夏国内乱，囚制国主，不知存亡；朝廷回赐贺正天节并遣使赐生日等物无人承受；鄜延路累牒问宥州，皆不报；近又累犯边，朝廷遣兵问罪，与北朝不相干涉。如阻隔进兵，或先犯官军，方得应敌。令中正密掌之。）

九月，李宪复兰州古城。

汝遮之败，残卒退保龛谷，龛谷城坚，多窖积，夏人号为“御庄”。闻李宪兵至，戍守奔溃。宪发窖，取谷及弓箭之类，进兵取兰州。令新顺首领巴令谒三族分所部攻撒逋宗城，破之。遂上言：“兰州古城，东西约六百馀步，南北约三百步，距西市城约百五十馀里。将至金城，有天涧五六重，仅通人马。自夏人败衄之后，所至

部落皆降，今招纳已多。请筑城，建帅府，以固羌夏之心。”宋帝从之。版筑方兴，夏人隔河而营，宪令死士绝河斫之，遂引退。（《长编》三百十六）

遣梁永能帅师援米脂寨，败绩。

种谔始膺安抚使之命，即次境上。宋帝以谔先期轻出，使听令于王中正。敌屯兵夏州，闻汉兵四出，分遣诸监司兵，委大帅梁永能总领拒之。戒令析作三处：一以当战；一以旁伏；一以俟汉兵营垒未定，伺隙突击。又于通道堑绝山谷，设为阻险，守备甚谨。及中国师期屡改，永能屯御久，不得一战，使人持嫚书投鄜延境上激之。种谔遂率本部及畿内七将兵九万三千，出绥德城，攻米脂。甫三日，永能兵八万赴援，营于大川。宋将高永能时为前锋，谓弟永亨曰：“彼恃众集易，吾军营当大川，宜严阵待其至，张左右翼击之，可破也。”翌日，夏兵自无定川出，直抵宋军，将合米脂之众夹攻。谔命后军移阵城下，沟其门隧，使城中人不得出；命前军及属羌循两山，伏山谷中，以左右中军御敌于川口。及两军合战，谔鼓之，诸将齐进，伏兵旁发，断敌兵为二，首尾不相救，诸将从高前后击之，敌奔溃。所斩杀及自相蹂践颠仆而死者，横数十里，银水为之赤，擒其将都按官麻女吃多革等七人（《长编》，种谔言：“捕获西界伪枢密院都按官麻女吃多革，熟知兴、灵等州道路、粮窖处所及十二监军司所管兵数，已补借职，军前驱使）。获首五千馀级，获马五千，孳畜、铠甲万计。城犹未下，密遣谍说降其东壁守将，衣以文锦，导以鼓吹，耀诸城下。（《长编》三百十六、三百十八及《宋史》种谔、高永能传。按宋王允中《郭景修墓志》：元丰四年，从种公谔拓至地米脂，而城峻，势不可攻。谍报戎主遣牙头将总铁骑三万以援米脂，覘者报，以为然。公请问言曰：“今吾军远来，利于速战。乃顿兵坚城之下，日久未拔，馈饷将不继，士气不振。今强敌在前，若一鼓而破，则米脂可传檄而下。万一王师小却，前有强敌，后有坚城，或贼以轻骑阻吾粮道，则事可虑矣。今元帅威望素著，信赏必罚，第宜自重，不可履危陵险。请分公麾下千人自山背转而上，假为公以督战，则诸军莫敢不用命。”种公然其计。公至则坐胡床指麾，诸军望之，以为真种公也，短兵驰击，无不一以当十者。然贼焰方炽，王师自巳至午未利，公曰：“危矣！”即以所领精兵千骑驰下，击其中坚，公身先士卒，手刃二巨酋，诸将乘之，贼兵大溃，尸相枕籍，无定河水为之赭。至晚，诸部献馘，种宣言曰：“微郭侯，几败大事。”米脂伪守知单弱无援，即日乞降。种曰：“果若公言。”见山东新出土拓本。）

宋敕榜来招谕。

曰：“眷兹西夏，保有旧封。爰自近世以来，尤谨奉藩之职。忽奸臣之擅命，致弱主之被囚。迨移问其端倪，辄自堕于信约。暴驱兵众，直犯塞防，在神理之莫容，因人情之共愤。方切拯民之念，宜兴问罪之师。已遣将臣，诸道并进。其先在夏国主左右并嵬名诸部族同心之人，并许军前拔身自归，及其馀首领，能相率效顺，共诛国仇，随功大小爵禄赏赐，各倍常科，许依旧土地住坐，子孙世世，常享安荣。

其或违拒天兵，九族并诛无赦。盖天道助顺，必致万灵之归；王师有征，更无千里之敌。咨尔士庶，久罹困残，共坚向化之心，咸适更生之路。敢稽朕命，后悔何追！”（《长编》三百十六。又《长编》：九月甲申朔，知镇戎军种谔言：“兴、灵州等处多旧汉人，皆元昊所掳致者，常有思汉之心。乞明降指挥，言梁氏残害其主，使众心解离。如有首领来归，特与官爵。”诏送高遵裕，降敕榜二十道付熙河都大经制司，令广募间人，传示贼界。）

十月丁巳，米脂酋令介讹遇出降宋，米脂遂陷，种谔留千人守之。

种谔既下米脂，令入城敢杀人及盗者斩，收城中老小万四百二十一口，给以衣巾，仍命讹遇等各统所部以御敌。（《宋史·神宗本纪》及《种谔传》）

庚申，宋熙河兵至汝遮谷，复与夏人遇，战败之。（《宋史·神宗本纪》）

己巳，种谔入银州。（《长编》三百十八。按《宋史·神宗纪》：入银州，不书其人。徐氏《通鉴后编考异》谓，《种谔传》明云谔留千人守米脂，进次银、石、夏州，不见敌。《东都事略·种谔传》同。是知入银州者，必谔也。或云蒙上省文，当属刘昌祚，考《昌祚传》并不言及银州，自当属谔。）

庚午，宋环庆经略使高遵裕取清远军。（《续纲目》。按《宋史·神宗纪》作通远军，薛氏《通鉴》因之，而《续纲目》则书清远。考宋制，地入西夏者，概不列职方，《地理志》：熙宁五年，以秦州古渭寨为通远军；《遵裕传》：熙宁中，命知通远军；是通远未没西夏者。惟清远在今庆阳府环县北，遵裕出庆州趋灵武，为必由之道，当以《续纲目》为是。《长编》亦作清远。）

遵裕将步骑八万七千出庆州，遂攻清远军，取之。张守约言于遵裕曰：“此去灵州不三百里，请以前军先出，直捣其城。今夏人以一方之力应五路之师，横山无人，灵州城中惟僧道数百，若裹十日粮疾驰三日可至，军无事矣。”不听。（《宋史·夏国传》及《张守约传》）

种谔遣曲珍等领兵，通黑水、安定堡路，遇夏人，与战，破之，斩获甚众。（《宋史·神宗本纪》）

种谔进攻石州，遂破石堡城，驻军索家平。（《宋史·神宗本纪》。按《长编》：石州属河东，兼岚、隰为一路，又合三州置巡检使。三朝、两朝史《地理志》皆不载陷贼年月，不知何故，贼弃而去。考夏自有石州监军司，此必非河东之石州也。）

癸酉，宋师入韦州。

高遵裕至韦州及监军司，令将士勿毁官寺、民居，以示招怀。（《长编》三百十八）王中正入宥州。

中正出麟州谿辞，自言代皇帝亲征。提兵六万，才行数里，即奏已入夏境。屯白草平，九日不进。后乃渡无定河，循水北行，地皆沙湿，士马多陷没。暮至横山下神堆驿，而种谔亦领兵至，两营相距才数里。初，谔奏，乞不受中正节制，会谔有米脂之功，帝许之。翌日，诏书至，谔不复见中正，引兵先趋夏州。先是，朝旨禁入夏境抄掠，夏人亦弃城邑皆走河北，士卒无所得，皆愤悒思战。诸将谓中正曰：“鄜延军先行，获功甚多，我军出界近二旬，所获才三十馀级，何以复命？且食尽矣，请袭取宥州，聊以籍口。”中正从之。遂入宥州，屠居民五百馀家，杀所得马、牛、羊以充食。（《宋史·夏国传》及《长编》三百十八）

乙亥，李宪败夏人于屈吴山。

宪既克兰州，宋帝诏宪领兵直趋兴、灵。董毡亦称，欲往宜乘机协力，入扫巢穴，若兴、灵道阻，即过河取凉州。宪不奉诏，乃总兵东上平夏，入于高川石峡，进至屈吴山，营打啰城，与夏人遇，败之，降其酋裕藏颖沁萨勒。（《宋史·神宗本纪》、《李宪传》及《长编》三百十八）

丁丑，鄜延路钤辖曲珍与夏人战于蒲桃山，败之。

是日未明，曲珍领步骑先与夏人接战，分锐兵绕蒲桃山出其后，首尾合击走之，斩首四百级，获器甲二千，马五十，宣敕七，铜印一，降四十馀人。（《宋史·神宗本纪》及《长编》三百十九）

戊辰，种谔入夏州。

谔以蕃官刘良保、麻乜讹赏为军向导，抵夏州。知夏州索九思遁，谔因入城，发官私窖谷，未几去。（《长编》三百十八至十九。按《宋史·神宗本纪》作戊寅种谔入贡州。《长编》于入夏州条注云，夏州或作贡州，盖字误。又于己卯种谔言收复夏州条注云，戊寅乃二十五日，据密院《时政记》，谔奏十月十五日入夏州，其奏以二十六日到，则十五日戊辰，二十六日己卯也。《宋史》本纪既误戊辰为戊寅，又讹夏州为贡州，不考甚矣。）

遣使结吐蕃董毡来归，不从。

董毡承宋帝诏，遣酋长抹征等率三万人赴党龙耳江及陇朱诃诺，又集六部兵十二万，约以八月分三路与宋军会。夏人欲间其好，遣使许割赂斫龙以西地，云如归我，即官爵恩好一如所欲。董毡拒绝之。（《宋史·吐蕃传》）

梁永能遣兵攻德靖寨。

永能从米脂败后，知德靖弓箭手尽随种谔自东路出界，乃潜遣兵从西路入犯德靖，知延州沈括以兵拒却之。（《长编》二百十七）十一月丁亥，种谔败夏人于黑水。（《宋史·神宗本纪》）

己丑，李宪败夏人于啰逋川。（《宋史·神宗本纪》）

辛卯，种谔降横河平人户，破石堡城，斩获甚众。（《宋史·神宗本纪》）高遵裕攻灵州，大败。

谍言宋师五路会兴、灵，夏人乃清野以待，悉其精锐渡河保兴、灵。泾原副总管刘昌祚、总管姚麟率蕃、汉兵五万，受高遵裕节制，令两路合军以出，既入境，而庆兵不至。昌祚出胡卢川，次磨齐隘，与统军国母弟梁大王遇，大王厄险，不可前。昌祚挟两盾先登，夏人小却，师乘之，遂夺其隘，追奔二十里，斩其首领没啰卧沙、监军使梁格崑等十五级，获统军侄乞多埋等二十二人，斩首千七百级。进次鸣沙川，取其窖粟，遂薄灵州。城未及阉，先锋夺门几入，遵裕疾昌祚成功，驰遣使止之，昌祚曰：“城不足下，脱朝廷谓我争功，奈何？”令按甲勿攻。是日，庆兵距城三十里而军，遇敌接战，昌祚遣数千骑赴之。未至而敌已退。

先是，昌祚言军事不称旨，帝赐遵裕手札云：“昌祚所言迂阔，必若不堪其任者，宜择人代之。”遵裕由是轻昌祚。既而昌祚先至灵州城下，或传昌祚已克灵州。遵裕未至灵州百里闻之，亟具表称臣遣昌祚进攻，拔灵州城。寻知所传皆虚，乃斩谍者以徇。于是昌祚诣遵裕，遵裕讶应援之缓，有诛昌祚意。既见，问下城如何，昌祚曰：“比欲攻城，以幕府在后未敢，前日磨齐之战，夏众退保东关，若乘锐破之，城必自下。”遵裕弗内，曰：“吾夜以万人负土囊傅垒，至旦入矣。”怒未解，欲夺其兵付姚麟，麟不敢受，乃已。

明日，遣昌祚巡营，凡所得马粮，悉为庆兵所取，泾师忿噪。遵裕围城十八日，不能下，夏人决七级渠以灌营，复抄绝饷道，士卒冻溺死，馀兵才万三千人，遂归。昌祚手剑水上，待众济然后行，夏人追及，战退之，惟将官俞平为夏人所斩。（《宋史·神宗本纪》、《刘昌祚传》及《长编》三百十九。按孔平仲《谈苑》：遵裕围灵州，州城甚坚，莫有守者。吾师营漠中，治攻具。西人约降，遵裕信之，驻军五日不进，故敌得为备。与《长编》异。）

宋师还。

李宪既败夏人于屈吴山，遂军于天都山下，焚夏之南牟内殿并其馆库，追袭其统军仁多丁，败之，擒百人，遂班师。泾原总兵、侍禁鲁福、彭孙护馈饷至鸣沙川，与

夏人三战，败绩。种谔至索家平，会大校刘归仁以众溃，而军食又乏，复值大雪，乃引还，死者不可胜计，入塞者仅三万人。王中正至宥州，行至奈王井，粮尽，士卒死亡者已二万，亦引还。皆未至兴、灵。高遵裕、刘昌祚至渭州粮尽，士卒无复行伍，亦败归。虽至兴、灵，无功。李宪师既不至灵州，董毡亦失期无功。宪欲以开兰、会邀功弭责，孙固请诛之，宋帝不听。初，夏人闻宋大举，梁太后问策于廷，诸将少者尽请战，一老将独曰：“不须拒之，但坚壁清野，纵其深入，聚劲兵于灵、夏，而遣轻骑抄绝其馈运，大兵无食，可不战而困也。”梁后从之，宋师卒无功。（《宋史·夏国传》及种谔、刘昌祚、孙固等传并《长编》三百十八）

宋下浮图城。

时河东兵十二将东还，道鄜延之鄙，沈括使骑将焦思耀兵于绥德城，声言括兼护河东十二将西讨。夏人觇知军势盛，夜遁去，不失一镞而下浮图城。由是吴堡、义合势孤，皆空壁去，得三垒辟土，东属银、夏。（《长编》三百十九）

宋增修清远军城垒。

高遵裕言：“清远军正当隘险，可以屯聚兵粮，合依旧置军，增修城垒。其韦州在横山之北，西人恃此为险厄，故立监军司，屯聚兵马，防拓兴、灵等州。臣今相视地形，亦合因旧聚落置堡寨，以为控守通活道路。”诏高遵裕相度如何以照管通接粮道，即依所奏修葺。（《长编》三百十九）

遣谍间宋将刘绍能，不得。

绍能世为边将，为敌所忌，每设疑以间之。宋帝独明其不然，手诏云：“绍能战功最多，忠勇第一，此必夏人畏忌，为间害之计耳。”绍能捧诏感泣。（《宋史·刘绍能传》）

卷十八

西夏称大安十年春正月，大举犯兰州。

初，宋李宪以兰州为西夏必争地，夏众为王文郁击退后，犹数至河外，而相羊不进。意必大举，乃增城守堑壁，楼橹俱备。至是，果大举入犯，步骑号八十万，围兰州，意在必取。督众急攻，矢如雨雹，云梯革洞，百道并进，凡十昼夜不克，粮尽引去。（《宋史·李宪传》及《九朝编年备要》。按《长编》正月甲辰，诏李宪“深戒将吏，勿轻冒贼锋，误国事。”丁未，又诏李宪“速遣谕事信熟人，檄董毡、阿里骨出兵攻讨，更广求间路，探候城中息耗。仍谕在城官吏，伺察奸细，守城人频令番休，勿使倦怠。”及围解，又诏李宪：“贼倾国而来，彼费已大，泊入汉境，盘泊旬日，卒无所得，大众伤夷而归，在我已收全功矣。宜遍谕诸将，勿以不能尾击、多斩虏首为恨。”又赐李宪诏曰：“西贼虽已伤败散去，然凶酋仁多丁倔强任气，深虑耻于伤残，不快所欲，忿不思难，出我不意，其人如犬彘，乘隙忽有奔冲，不可不念。宜多方广布斥堠，督责守将，无怠防虑。仍颁弓箭、火炮之类百万有馀，以备御贼。”）

与阿里骨等战于河上，败绩。

宋李宪遣间谕阿里骨等，选骑渡河来攻。至是，与夏人遇，战，夏人败绩。（《宋史·李宪传》）

二月，李宪乞招讨西人及上《挠耕策》。（《长编》三百四十三。又《长篇》二月戊子，手诏李宪：“得回奏浅攻扰贼春耕，若如所划，理固甚善。所未可知者，我兵出境，非十馀万众，果可以致倾国点集否？又天都小老苟闻大兵之出，果不震惊奔骇渡河，而肯置之会州之侧，使我得以招携否？使上件聚落如我所料，团聚不散，则所谓二十二钤辖者，果可以一呼使之改怀内附否？此事首尾恐未详密，则不若且如去年三月中及暮秋李浩、苗履、杨吉等出塞，已见事验，为忽往倏归之计甚便。宜审图之。”又诏李宪：“夏人自连岁不时点集之后，人固已有受其弊者，又围犯兰州大众伤败之余，士气摧丧，在理可知。兼凶酋仁多丁残忍，虐用其人，今既不能如欲，上则必得罪于其国中，下须逞其躁心。及彼羌户，必有不自安之人。疑可乘时开以重利，俾有内向之心，广肆招来，以衰贼势。仍时出精锐塞外，挠其春耕，为今之宜，最为困贼上计尔。宜图之。”仍赐钱一百万缗，绢五十万匹，为修筑备御锡赉之费。又诏宪：“西贼自兰州挫锐伤夷之后，闻其中欲得内附者甚多，未知虚实。可责委守将，多方招徕。或专遣一二近上有机智官如康识辈主其事，此于方今边计，不为小补，兼系贼强弱，事实不细。”）

集兵练家流，争葫芦河。

国人讹传中国欲城葫芦河。秉常发河南、河北人马十分之九，期集练家流争之。宋边吏以闻，帝诏：“宜明远斥堠，探敌所向，清野城守，则为制敌上策。”帝又批诏尾云：“本路挠耕之兵，数出俘斩，殆以千数。羌人俗重酬报，今所聚人马，不见汉兵，势不空回，必于诸路钞掠。诸路中本路且有瑕衅，必恐首撓敌锋，不可不厚为之备。”（《长编》三百四十四）

三月，以兵入安丰寨，焚民居，杀掠。（《长编》三百四十五）河西鞑靼国攻甘州。

鞑靼，西蕃别种，与回鹘东境相邻。乾德中，尝入贡中国，后以道远隔绝。其俗犷悍喜斗，轻死好利，与夏国世仇。尝以兵侵略北境，俘夺人民鬻之辽。时闻夏国与中朝构兵，驱其众抄掠右厢监军司所。熙河经略司以闻，宋帝命右班殿直皇甫旦持诏谕西蕃，使结其兵共图夏国。旦至青唐，羌酋鬼章留之冢山寺，不得达。（《长编》三百四十六）

夏四月，攻宋延州，与安塞堡将官吕真战，败绩。（《长编》三百四十五）犯宋塞门、安远寨，刘昌祚拒破之，杀其统军叶悖麻、咩讹埋。

二人盖始谋攻永乐者，昌祚图其形以献，宋帝喜，遣近侍劳军。（《宋史·刘昌祚传》。按《长编》：五月丙寅，上批付刘昌祚：“夏人昨者不承诏命，继举大众攻围兰州，伤夷败散，续为诸路讨击，势颇摧丧。近于本路出没，又为边吏斩其酋豪，自此忿气，应更增倍。若不开示招徕，深虑蜂虿有毒，困兽犹搏，用兵未有休时，卿可相度其可与不可，开道朝廷恩义以闻。”）

六月，攻宋德顺军，杀其巡检王友。（《宋史·神宗本纪》）秋八月，宋诏陕西、河东经略制置司，选人入境刺探。

枢密院言：“诸路谍报西人大点集，若至秋深入寇，诸路方出兵牵制，浅攻别无所恃，徒困兵马。若不乘其未备掩袭，使敌得并兵一路为寇，于枝梧亦为费力。”诏陕西、河东经略制置司：“选人深入钩探，如对境一二百里有敌兵，不至重大及有收秋人户住止，可以倏往忽归，乘便讨杀。即度事力发将兵仍计万全，毋得深入虚空之地。”（《长编》三百四十八）

宋命兰州设备。

诸路谍报：“西人广造攻具，竭国点集，声言欲入兰州。”宋帝虑守臣将士狃于前胜，轻易待敌，或为诱战，别致失宜。令康识往兰州，与当职官经划为备及募人深入刺候，谓：“如敌果入寇，务在谨重过于去年，照管守御兵将，昼夜悉力应付，以取全胜。仍度人情，时与犒给。候大河冰开，方得往他处巡历。”（《长编》三

百四十八)

宋指挥诸经略司乘隙出兵，入境蹂秋稼。

宋帝既虑获事已毕，戎骑或来，命刘昌祚更筹划。谓：“如未可出，即谨守前约，内外备戒，勿承顺朝廷一时指挥，妄有举动。”（《长编》三百四十八）

九月，围宋定西城，与熙河将秦贵战，败绩。

夏原川子路距定西及会州之安西、平西诸城仅百里，可朝发夕至。秉常遣兵入熙河界，围定西城，烧毁龛谷族帐。第五副将秦贵与内殿崇班韦万引兵拒之，乃却。（《长编》三百四十八至四十九）

遣使如青唐，欲因董毡乞和于宋。

宋得董毡蕃字书，即命使臣引伴赴阙，并令熙河经略司审验，有无夏国表文及奏陈事。又虑奸意未可知，或以此疑本路边备，诏制置司过为堤备，毋得因此稍弛。（《长编》三百四十八。又《长编》：九月己亥，诏李宪应接董毡与夏国首领议事。）

冬十月，攻宋熙河，首领仁多丁败死。（《宋史·卢秉传》作仁多嵬丁，此从《夏国传》。）

夏境胡卢川，距塞二百里，恃险远不设备。知渭州卢秉遣将姚麟、彭孙袭击之，俘斩万计。夏酋仁多丁，举国侵宋。秉治兵瓦亭，分两将驻静边寨，指夏人来路曰：“吾迟明坐待捷报矣。”及明，夏人果至，见宋师惊曰：“天降也！”宋人纵击之，皆奔溃，丁死焉。（《宋史·神宗本纪》及《卢秉传》）

宋诏边吏，用浅攻计，扰夏耕获。（《长编》三百四十八。又《长编》：是月癸巳，手诏李宪：“得所论夏贼即今国中虚实，形势强弱、用事首领、举动妄谬之状，甚善。贼情大概其尽于此矣。然夏国自祖宗以来，为西方巨患，历八十年。朝廷倾天下之力，竭四方财用，以供馈饷，尚日夜喘惴然，惟恐其盗边也。若不乘机隙，朝廷内外并力一意，多方为谋经略除此祸孽，则祖宗大耻无日可雪，四方生灵赋役无日可宽。一时主边将帅得罪天下，后世无时可除，俯仰思之，所以今日有此申谕。昨得泾原奏，体访去兴、灵州迂直道径，方知兰州渡河去贼巢甚迹。今若于四五月间，乘贼人马未健，加之无点集备我之际，预于黄河西上以兰州营造为名，广置排筏，克期放下，造成浮桥，以本路预集选士健骑数万人，一发前去，荡除巢穴，纵不能擒戮大憨，亦足以残破其国，使终不能自立。未知其计如何，宜密谋于心，具可否，令至亲谨密之人亲书奏来，无或少有泄露。昔王浚取吴、高颖平陈、曹彬

等下江南，莫不出此计，卒皆能立奇功，除一时巨患。尔宜亲阅其实，加意潜谋审念之。又得译录到温锡沁等蕃字及遣来蕃僧禄尊口陈，边谋甚悉。苟直如来约，实大利也。不知羌酋信诞所在尔，更宜加意置心经营。盖时者难得而易失，古今通患，其星多哩鼎，若委如所谋，从中而起，外以汉兵如今月二十一日所论合势而东，则大事成矣。惟在尔多方以智图之，则巨患可除，国愤纾有日矣。”）

犯宋泾原，民多以火死。（《长编》三百四十九）

十一月，攻宋清边寨，杀其队将白玉、李贵。（《宋史·神宗本纪》。按《夏国传》作清远，《长编》作静边。）秉常遣使入贡于宋，且乞兰会壤土，不许。

宋泾原副总管姚麟言：“夏人囚其主，王师是征。今秉常不废，即为顺命，可因以息兵矣。独兰会不可与，愿戒将帅飭边备，示进讨之形，以绝其望。”从之。（《宋史·神宗本纪》及《姚麟传》。按《长编》：夏人入朝，管勾熙河兰会经略司机宜文字穆衍请杀礼待之，使董戡无校量轻重之别，不报。）

十二月，西蕃兵入境。

阿里骨遣兵掠境，获蕃部二人。令首领赍蕃字书至熙州献，宋帝诏依蕃丁例刺配。（《长编》三百五十）

西夏称大安十一年

春正月，韦州蕃官伯德叛附于宋。

率丁口二百五十。宋帝授供备库副使、本族巡检，赐银、绢三百。（《长编》三百五十一）二月，梁乙埋死，子乙逋自为国相。

自乙埋专政，数扰边。廊延经略使赵高以书言：“何苦与汉为仇，恐所得不能偿所失也。能改之，吾善遇汝。”遗之战袍、锦彩。乙埋亦因酋渠嵬名阿吴辈多反侧顾望，怀内顾之忧，不复自将窥塞，至是死。（范百禄《志赵高墓》云：“高既结好乙埋，因复纵间，使微泄其事，国中固疑乙埋不犯汉也，又闻受吾馈，果杀之。《宋史》因之立传。”沈括《笔谈》叙乙埋事甚悉，不言被杀，恐《志》未实）。初，谅祚立梁后，特许乙埋世袭，子乙逋遂自立为相，独秉国政。（李氏《长编》云：“乙通不知于乙埋何如也？”吕大忠《奏议》言：“夏国自梁氏兄弟用事以来，虐用其民，上下怨嗟，皆欲食其肉。”考沈括《笔谈》，谅祚立梁后，以其弟乙埋为家相，许其世袭。既而乙埋死，子乙逋嗣。又章粲《奏议》：秉常死，梁乙逋挟其妹梁氏之势辅立，非嵬名氏之种，潜滋篡夺之计。则乙逋为乙埋子，秉常妻梁氏为乙逋妹也。吕氏以为兄弟，误。见《西夏书事》。）

三月，宋帝崩于福宁殿。皇太子煦即位，是为哲宗。（《宋史·神宗本纪》）攻葭芦寨，杀其供奉王英。

自熙宁用兵以来，所失寨地若环庆之安疆，河东之葭芦、吴堡，鄜延之米脂、义合、浮图，皆深入本国境界，势在必争。秉常日思恢复，又以李宪等兵入界焚掠，遂假复仇为名，纵兵数万入河东，攻葭芦寨，寨居山巅，形势险绝。英恃险出战，败歿。（《宋史·夏国传》及《长编》三百五十六。按《九朝编年备要》，杀王英在元丰五年五月。）

梁乙逋犯兰州，宋军袭陵井啰城（今作抡井罗噶尔），破之。

乙逋既执政，遣兵三万屯兰州界上，将俟中国怠，袭之。宣州观察使李宪选精兵万馀，令将王文郁由瑞博坡（今作瑞巴普）渡河，围陵井啰城，克之，斩五百级，获器械、马驼八万馀。（《长编》三百五十三）

宥州监军拽厮鬼名宿兵贺兰原，与知庆州赵高战，被擒。

鬼名，夏驸马，为宥州正监军，宿兵贺兰原，四出俶扰，恃胜不设备。高遣将李照甫、耿端彦、蕃官归仁分兵三路袭之。高与端彦计曰：“贺兰险要，过岭即沙碛，使敌入平夏，无由破之。”乃别遣三蕃官，各率轻骑五百，由间道邀截归路，端彦等引大兵直抵贺罗子，鬼名率万骑迎敌，战败，果趋平复。伏发，鬼名被擒，亡失战马、牛、羊三万馀。（《宋史·赵高传》及《长编》三百五十四）

夏四月，宋知太原吕惠卿遣步骑二万袭夏人于聚星泊，破六寨，斩首六百级。

宋帝即位，敕疆吏勿侵扰外界，惠卿不奉诏。（《宋史·哲宗本纪》及《吕惠卿传》。按《吕惠卿家传》云：“初，惠卿至河东，管勾麟府路军马公事燕夏屡乞以兵入界讨荡，为俟往忽来之计，使贼不得安居。惠卿使诸将会议，皆以为夏人屡遭掩击，族帐远徙而斥候严警，间谍莫如其详，浅攻无利，深入可虑。惠卿以为然，遂令诸将分地弛守备、务耕牧，以疑贼计。八年四月，朝廷以国恤敌谋入寇，诏惠卿出师。先之，惠卿谍知屯聚所在，遣将邢佐臣、折克行、訾虎以蕃汉步骑二万二千出左厢，至聚星泊、满朗嘉伊、克罗朗三角等处，破贼六寨，斩首六百馀级，几首领十三人，获铜印十四颗，骆驼、牛、马以万计，追奔数十里，振旅而归。”见《长编》三百五十四。）

蕃部伊实乡道入西界，杀副监军等首级。鄜延经略司以闻，宋帝诏与下班殿侍。（《长编》三百五十四）宋遣使以神宗遗留物来赐。

枢密院言：“旧例，合差官押赐遗留夏国主银器一千五百两、绢一千五百匹。”诏

如故事，仍令学士降遗诏。（《宋史·夏国传》及《长编》三百五十七）

六月，遣兵攻肃远寨。

秉常以嵬名被擒，用兵数败，心怀恐惧。会宋神宗崩，潜使减庞族人马入延安路攻肃远寨。蕃官慕化与第二将戴宗扼要害力拒，乃退。（《长编》三百五十七）

秋七月，遣丁拿嵬名谖铎、副使吕则陈聿精等如宋奠慰。

宋帝令夏使见辞仪制依嘉祐八年：进慰表于皇仪殿门外，退赴紫宸殿门，赐帛。朝辞，诣垂拱殿。后屡遣使至宋，宋帝访吕大防以待遇之计，大防言：“夏本无能为，然屡遣使而不布诚款者，盖料我急于议和耳。今使者到阙，宜令押伴臣僚叩其不贺登极，以观其意，足以测情伪矣。”故宋帝从之。（《宋史·夏国传》及《礼志》、《吕大防传》）

银、夏州大旱，饥。

自三月不雨，至于是月，日赤如火，田野龟拆，禾麦尽槁。秉常遣官祈禳二十日，不应，民大饥。群臣咸请赈恤，秉常令运甘、凉诸州粟济之。（《西夏书事》。按《长编》：是年十月，范纯仁言：“近枢密院降到熙河奏邈川大首领温锡沁所探事宜言，夏国今年大旱，人煞饥饿。及泾原路探到事宜亦言，夏国为天旱无苗，难点人马。臣亦恐西界只似昨来陕西沿边少雨，其传多有，当如汉诏所谓传闻尝多失实是也。向来未举灵武之师，诸处皆言西夏衰弱，及至永乐之围致诸将轻敌败事。此可以为近鉴也。”）

梁氏围环州，宋知庆州章楶遣兵逆战，夏师大败。

时宋务戢兵，戒边将毋妄动，且议捐葭芦、安疆等寨与夏人。夏人闻之益骄，楶言：“夏嗜利畏威，不有以惩艾，边不得休息，宜稍取其土疆，如古削地之制，以固吾圉。”遂乘便出讨，以致夏师。梁氏遂率兵围环州。楶先用间知之，遣骁将折可适往御之。可适先得其守烽姓名，诈为首领行视，呼出尽斩之，烽不传，因卷甲疾趋，大破之于尾丁。回次柰杨沟，正午驻营，分骑据西山曰：“彼若蹶吾后，腹背受敌，必败。”夏人果举军来，可适所部才八千，转战至高龄，乃从间道趋洪德城，设伏邀其归路。伏兵识梁氏旗帜，夏军至，鼓噪而出，斩获甚众。又预毒于牛圈渚水，夏人马饮者多死。梁氏逾山而遁，焚弃輜重，虽帷帐首饰之属亦不返。众相踏藉，赴崖涧，死者如积。（《宋史》章楶及折可适传）

攻宋鄜延。

报惠卿六寨之役也。时龙安以北，兵力减弱，延安主帅患之。录事判官游师雄请发义勇以守，多聚石城上。夏兵至，急攻之。守城者发石如雨，被伤无算。夏人知不能克，乃还。兵出顺宁寨，保安军巡检张子式伏兵以待，监军嵬名理直误入伏中，力战死之，夏师大溃还。（《宋史·吕惠卿传》、《游师雄传》及《西夏书事》）

八月，复犯鄯延。

夏俗不耻奔遁，败三日，辄复至其处，捉人马射之，号曰“杀鬼招魂”，或缚草人埋其地，众射而还，以为厌胜。夏人侦知鄯延解严，猝以五千众傍城大掠，尽得其牛、羊、驼、马，获兵、民辄射杀之，为嵬名理直报仇。已闻鄯延二州兵出击，即全师退。（《西夏书事》）

转攻三泉、荒堆诸寨。

荒堆、三泉，自鄯延直达河东，中若有兵扼之，则两路声援，猝难相应。夏人乘鄯延之胜，转攻三泉，守将拒守不支，弃城遁。攻荒堆。荒堆，麟府藩蔽，主将孙昭有干略，清野聚粮，择蕃、汉健勇者统以牙兵，登陴捍御。梁乙逋同侄梁阿格并马巡城，指挥攻具。昭一矢中阿格颈，坠马下。乙逋怒，并众力攻，城将溃，会梁氏疾作，秉常遣使召还。（《西夏书事》）

冬十月，遣芭良嵬名济赖、昂聂张聿正如宋，进助山陵礼物。（《宋史·夏国传》。按《哲宗纪》作进助山陵马。）宋诏，赐夏《新历》。（《长编》三百六十）

国母梁氏卒，遣吕则嵬名怀普等如宋报哀。（《长编》三百六十）遣使报哀于辽。（《辽史·道宗本纪》）十二月，以国母梁氏遗留物马、白驼献于宋。

秉常言：“母氏临终属臣曰：‘世受朝廷封爵，恩礼备至。今虽边事未已，属纆之后，宜奉遗留物以进，示不忘恭顺之义。虽瞑目无恨。’臣谨遣使，进遗马、白驼诣阙。”（《宋史·哲宗本纪》及《长编》三百六十二）

司马光曰：“秉常是岁凡四遣使矣，礼虽不备，卑屈稍形。然窃料其意有三策焉：一者冀朝廷万一赦其罪戾，返其侵疆；二者阳为恭顺，使中国休怠，阴伺间隙，入为边患；三者久自绝于上国，国中贫乏，使者往来，既得赐赉，且可因为市贩。岂真畏服而来乎？”（司马光《论西夏札子》）

宋以朝散郎、刑部郎中杜紘充祭奠使，东头供奉官、阁门祗候王有言充吊慰使来。

时夏人方修贡。宋使入境，迎待之礼犹倨。迺者至，衣毛裘，设下入座，蒙以黦，且不跪受诏，纮责之曰：“天王吊礼甚厚，今不可以不加礼。”夏人畏惧，乃加敬。（《宋史·夏国传》及《杜纮传》）

宋诏备边。

谍报夏人集九监军司人马，欲犯兰州。熙河兰会路经略司以闻，宋帝命赵济探敌所向，先设备。又诏：“夏人如果来攻城，即坚守应敌，以取全胜。勿为敌诱，轻易出兵，仍豫为清野之计，俟其回兵，即审量追袭。”（《长编》三百六十二）

西夏称天安礼定元年

春正月，宋诏鄜延路经略司，以改元来报。（《长编》三百六十四）二月，宋禁边民与夏人为市。

左正言朱光庭言：“累降指挥下陕西、河东逐路经略司，禁止边人不得与夏人私相交易。访闻私易无所畏惮。”诏将官及城寨使臣，告谕地分蕃部首领及弓箭手人员、把边将校等觉察，违者治之。（《宋史·哲宗本纪》及《长编》三百六十四）

遣使如宋谢吊慰。

李清臣言：“伏见朝廷近遣郎官杜纮吊慰，夏国今复遣使来谢，朝廷必欲因此之际，特示招怀。所有每年时服，近罢给赐，欲乞自枢密院检举施行，关牒西人开示恩意，及昨来用兵，擒到近上首领多在南方拘管，乞择其三二人，可使归还者，推恩释放，庶其戴荷天恩，共思款服。”又云：“近遣使人辞旨恭顺，因此推恩释放，甚协朝廷之体，兼可以窥察敌情。”（《长编》三百六十二）

使贡于宋。

使者至宋，请归复旧疆。刑部郎中杜纮逆之至馆，使欲入见有所陈，纮止之，答语颇不逊，纮曰：“国主设有请，必具表中，此大事也，朝廷肯以使人口语为可否乎？”随语连扯之，乃不敢言。（《宋史·哲宗本纪》及《杜纮传》）

闰二月，太白犯荧惑。

术者谓：“国有兵丧。”群臣上表请禳，秉常不许。（《西夏书事》）三月，宋以疆界未定，诏边将设备。

枢密院言：“夏国自神宗皇帝上仙及彼国主母丧，后来疆界未曾商议，虑逐路缘边

弛备，敌人不测冲突。”宋帝诏鄜延、环庆、熙河、河东、兰会路经略司，诫边将为守御备。（《长编》三百七十三）

夏五月，遣鼎利罔豫章如宋贺即位。

先是，鄜延路经略司言：“顺宁寨主许明声称，西人叶乌玛等来界首，言兴州衙头差下贺登宝位人使多时，为国信不来，未敢过界。”宋帝诏鄜延路经略司指挥保安军：“如西人再来计会，即答与昨来皇帝登宝位，为夏国未修常贡，朝廷难为先遣押赐使命。若夏国差人贺皇帝登宝位，朝廷必须依例差人宣赐。如西人将到公牒，亦仰依此意回牒。”至是，夏国使来贺登宝位，宋帝诏西京左藏库副使王克询押赐。（《宋史·夏国传》及《长编》三百六十八、三百七十四）

移宋边吏，请复岁赐。

夏人自犯麟府、环庆后，宋即绝岁赐。至是，遣使至宋边通意，欲请复岁赐。知秦州吕大忠曰：“夏人强则纵，困则服。今阳为恭顺，实惧征讨。宜且命边人诘其所以来之词，若惟请是从，彼将有以窥我矣。”（《宋史·吕大忠传》）

环州路纵所掳人马还。

环庆蕃官朗伊等，硬探入夏界，掳野寨戍卒五人，马四匹。经略使范纯粹责以引惹边事，将所掳人马令第三将于原捉处纵之。（《长编》三百七十八）

六月，复遣讹罗聿如宋，求兰州、米脂等五寨。

初，神宗于熙河路增置兰州，鄜延路增至塞门、安疆、米脂、浮屠、葭芦五寨。帝即位，夏国遣使来贺登极，还未出境又遣使入界。宋知其有请地之意，大臣议弃守未决。苏辙言曰：“顷者西人虽至，疆场之事初不自言。度其狡心，盖知朝廷厌兵，确然不请，欲使此议发自朝廷，得以为重。朝廷深觉其意，忍而不予。情得势穷，始来请命，一失此机，必为后悔。彼若点集兵马，屯聚境上，许之则兴兵，而予不复为恩，不予则边衅一开，祸难无已。间不容发，正在此时，不可失也。”司马光亦言：“此边鄙安危之机，不可不察。灵、夏之役，本由我起，新开数寨，皆是彼田，今既许其内附，岂宜靳而不予？”时异议者众，惟文彦博与光议合。太皇太后将许之，光又欲并弃熙河，安燾、邢恕固争之。于是，议但以葭芦四寨来归。宋帝阴诏曰：“除原系中国及西蕃旧地外，自元丰四年用兵所得城寨，候送到陷没人口，当委边臣勘会，分划给赐。”（《宋史·夏国传》、《苏辙传》、《安燾传》及《长编》三百九十）

秋七月，秉常薨，年二十六。在位二十年（就下改元计算只十九年，史误），改元

乾道二年，天賜禮盛國慶五年，大安十一年，天安禮定一年。謚曰康靖皇帝，廟號惠宗，葬獻陵。（《宋史·夏國傳》。按《紀元編》：秉常有西安年號，為《宋史》本傳所無，《年號韻編》以為秉常時投南界牒文如此。）

卷十九

崇宗圣文皇帝李乾顺，惠宗秉常子也，母曰昭简文穆皇后梁氏。惠宗薨，干顺甫三岁，大臣嵬名阿吴等不欲立，独梁乙逋利于持权，与梁氏立之。于天安礼定二年七月嗣位，改明年为天仪治平元年。是月，遣使如宋贺坤成节，复遣使如宋求侵地（《长编》：是月癸亥，夏国以疆事遣使春约勒阿拉雅赛、副使吕则田怀荣见于延和殿，辄妄奏曰：“神宗自知错。”上起立，变色怒，久之，内侍张茂则云：“与押伴理会。”移时方退）。冬十月，遣吕则罔聿谟等如宋告哀。宋诏学士院撰赐干顺诏，止嘉其继承恭顺之意，更不须言袭封地界事。宋遣金部员外郎穆衍充祭奠使，供备库使张懋充吊慰使来（《长编》：先是，张懋押赐夏国主生日礼物，内殿崇班阁门抵候安愈押赐仲冬时服。嗣以国主死，夏来告哀。所有仲冬时服，诏特差安愈押赐，仍差张懋充吊慰使。并赐诏曰：“故夏国主嗣于干顺，维尔先人，世修职贡。讣音忽至，潜悼良深，相与诸臣，同增悲慕。惟忠可以保国，惟孝可以得民，各祗乃心，以服朕命。”）是月，宋许以浮图、安疆、葭芦、米脂四寨来归。时宋大臣并欲弃熙、兰，穆衍以为兰弃则熙危，熙危则关中震。李周亦曰：“陇右故为唃氏所有，常为吾藩篱。今唃氏破灭，若弃之，必归夏人。彼以区区河南，百年为敌，苟益以河湟，是尽得吐蕃之地，非秦、蜀之利也。”孙路亦谓司马光曰：“自通远至熙州，才通一径。熙之北已接夏境。今自北关辟土百八十里，濒大河，城兰州，然后可以捍蔽。若捐以予敌，一道危矣！”议遂止。

是月，杀归汉蕃族。初，夏国蕃族内附，中国必为招接。宋帝以干顺新立，诏逐路经略司：“如有夏国首领归汉，毋许收纳。若人数众多，不肯听从，即量以人马，约出汉界。”于是中途约回者，梁乙逋悉遣人执杀之。十一月，遣使如宋贺兴龙节，进御马五匹，常马二十五匹，橐驼二十头。十二月，遣使以秉常遗物献于辽，遣使如宋贺正旦。（《宋史·哲宗本纪》、《夏国传》、穆衍、李周、孙路等传，《辽史·西夏外纪》及《长编》三百八十四、三百九十、三百九十三。按《长编》是年九月辛酉，鄜延路经略司言：“夏国主秉常七月十日卒。”诏太常寺检会礼例施行。又己卯，诏夏国告哀使副赴阙，见辞例物，筵会、买卖，并依去年夏国母亡告哀人例施行。又礼部尚书韩忠彦言：“夏国主卒，遣使诣阙告哀，看详欲权就垂帘日引使副并从人两班朝见太皇太后，拜礼如阁门仪，见毕退于殿门屏外立，俟皇帝坐，卷帘，再引两班朝见如上仪。朝辞准此。其衣装，元丰八年十月内夏国母告哀例：使副素色、三裱、黑鞵。磔躐，亦听服紫终，不用红色锦绣。”从之。又太常寺言：“秉常卒，合辍视朝三日，缘在谅暗中，于礼不举哀挂服。”从之。又十月丙申，枢密院言：“诸路探报，夏国主秉常身死，立嗣事不同，合行封册，要知的实。”诏令赵高：“选慕信实之人，厚与金帛，各令深入西界采探，立何人为嗣；母氏存亡？何人同管国事？审问的确以闻。其探人如有据，当议酌赏。”又枢密院言：“夏国自秉常身死，诸路探到立嗣未定，酋豪相攻，人情不安。所奏率多不同，深虑好功立异之人，缘此复生边患。”诏令陕西、河东诸路帅臣体认，累降约束，凡事精加采探，务在得实。仍诫谕边吏，毋失御备。）

西夏称天仪治子元年

春正月，宋遣枢密院都承旨公事刘奉世为册礼使，崇仪副使崔象先副之，来册干顺为夏国主，仍节度、西平王。

宋臣张舜民上言：“西夏强臣争权，不宜加以爵命。”宋帝不听，乃遣刘奉世、崔象先赍册，封干顺为夏国主，如明道二年元昊除节度使、西平王例。册曰：“皇帝若曰：於戏！尧建万邦，黎民时雍；周立五等，重译来贡；此帝王之所同，而国家之成法也。咨尔干顺，惟我列圣，顾乃西陲，锡壤建邦，卫于王室。保姓受氏，同于宗盟，爵命褒嘉，恩礼甚渥。今尔承其胄绪，绍兹藩屏，而能事上钦肃，饬躬靖虔，申遣使人，宋陈方物，达于朕听，实惟汝嘉。是用稽酌典故，表显宠名，锡尔以茅土之封，加尔以服乘之数，诞颁丕册，以绥一方。今遣朝奉大夫、起居郎、直集贤院、上轻车都尉、赐紫金鱼袋刘奉世，崇仪副使、上骑都尉、安喜县开国男、食邑三百户崔象先，持节册命尔为夏国主，永为宋藩辅。夫笃于好德，乃克显光；忠于戴君，永膺福祉；往祗明命，无忝予一人之猷训。”（《宋史·夏国传》、《张舜民传》及《长编》三百九十四。按《长编》二月丁亥，枢密院言：“夏国嗣子干顺，降诏封册为夏国主。按庆历八年封册谅祚，熙宁二年封册秉常，皆不曾更赐印。”诏如故事。）

遣使以秉常留遗物进于宋。（《长编》三百九十四）三月，遣使如宋谢奠慰。

使人见于延和殿，称故夏国主嗣子干顺言：“昨父国主薨，蒙遣使祭奠吊慰，前已附表称谢。谨差大使祝能野乌裕实克、副使吕宁勒喀玛等，进马、橐驼共一百七十头匹，诣阙称谢。又遣大使映吴嵬名枢密、副使广乐毛示聿等谢太皇太后。”（《长编》三百九十六。按映吴二使名，从《宋史·夏国传》。《长编》大使作杨乌威明裕默，副使作恭罗们色勒裕勒。）

宥州牒宋，送陷蕃人三百一十八口。

宋帝诏鄜延经略司：“候到，其葭芦、米脂、浮图、安疆四寨并行给赐。其余不系可还城寨、地土，各委官划定界至，开立壕堠。”（《长编》三百九十七）

宋河东帅滕元发不肯以葭芦来归。

宋既许以四寨来归，葭芦在河东，元发请先划境而后弃，且曰：“取城易，弃城难。”命部将訾虎领兵护边，夏人不敢近。（《宋史·滕元发传》）

求宋塞门、金城二寨，且声言与辽合从，宋不听。

塞门旧是汉城，弃陷以来，年岁未远，与其馀城寨有殊，宋因此不许。（范纯粹《乞以弃地易被虏之人贴黄》及《论息兵失于欲速疏》）夏四月，牒宋索朱梁川，遂入泾原掠蔺家堡。

夏人闻兰州城西关堡将筑龛谷寨，令宥州移牒言：“界内朱梁川系本国地土，中国不得擅有兴筑。”不俟回牒，纵兵入泾原，抄蔺家堡，掠人畜，焚汉蕃庐舍殆尽。（《长编》四百一）

五月，围宋南川寨。

宋归四寨与夏，君臣体分已定，惟有分划地界，所较无多。夏欲以绥德城为比，划境出二十里外。而宋边将贪功生事，不乐罢兵。将去城寨二十里外，宋帝已许给赐，或向来用兵之时不曾保据之地，指为要害，却欲筑城占守。故议不定，岁赐亦不与。夏人遂围宋南川寨，而兵端又起矣。（《宋史·哲宗本纪》及《范忠宣集》）。按《长编》：是月己巳，洮西缘边安抚司言：“西贼围闭南川寨八日。”诏札与刘舜卿多设方略救援。又乙亥，枢密院言：“西蕃贼马攻围河州南川寨，逐州、军见屯汉、蕃兵马，当暑暴露，当行体恤。”诏刘舜卿：“躬问士卒劳苦，粮食多寡，从宜抚恤。仍依仿旧例，随事资助，使无愁苦，乐于赴敌，以称朝廷抚士之意。”又言：“河州南川寨，自初二日被围，日夕望救。其王光祖、王贍、姚兕、种谊等，各统领所部军马，前去会合牵制，至今多日，未奏解围次第。请令刘舜卿严谕光祖等，体认南川寨人力、粮储有限，当此围闭日久，势力危固，务要应援，分解贼围。不得以伺便为名，任贼攻围，玩寇损威，误国大事，以至师老粮匮，坐取困乏。仍厚给金帛，召募死士，许以重赏，令取间道前去南川寨投下文字，使知救兵已到，安心守御。俟贼退，其守城出战人等，自当优赏。”并从之。）

连西蕃阿里骨兵，犯宋定西城。

梁乙逋卑辞厚礼，约阿里骨入犯。如得地，以熙、河、岷三州归西蕃；兰州、定西城归夏国。于是阿里骨袭破洮州，乙逋率数万众出河州会之，同围南川寨，大肆焚掠。又攻定西城，设伏诱战，击败宋军，杀都监吴猛等。（《长编》四百）

六月，掠宋陇诺堡。

时夏人以数千骑入秦州，抵甘谷城，围陇诺堡。守将姚雄以兵逐之，夺夏人战马六匹。（《长编》四百二）秋七月，卓罗监军仁多保忠攻宋镇戎军。

梁乙逋以干顺命，胁保忠率万人寇泾原。保忠于乙逋不协，甫入境，遇总管刘昌祚大众截之，一宿即还。（《西夏书事》）遣大首领嵬名阿吴如青唐。

梁乙逋谋取熙河，遣嵬名阿吴入青唐，约阿里骨及首领青宜结鬼章，期大举。阿里骨囚中国使人高升，许以兵应。（《长编》四百四）攻宋三川诸寨。

为守将韩绪、赵说所败。（《长编》四百四）九月，复攻镇戎军。

时仁多保忠率十万众入泾原，声言国母亲将攻镇戎西寨，围泾原十一将兵于城内。总管刘昌祚病，知军张之諫不敢战。保忠令军士四散樵采，焚庐舍，毁冢墓五日。知庆州范纯粹遣副总管曲珍，领兵自环州深入牵制，昼夜驰三百里至曲律山，纵兵击破族帐，斩首千馀，俘老幼妇女数百人。保忠闻之，将解围，潜于所扎寨内如常起烟火，量以兵守，一夕遁回。比城中知，追之，不及。（《长编》四百五。按范祖禹《太史集》载，王奎言：“元祐二年秋，西人数十万点集，半年方起，至镇戎城下，五日而去。本无意入寇，乃梁乙逋欲篡，以此举观人情也。三家共一驼，载干粮，人甚苦之。既无所得，自后未易点集。乙逋更以恩结人心，又欲立功，以服国人。）

与吐蕃鬼章扰宋，鬼章为宋将种谊所擒，夏师引还。

夏人怨失兰州，约鬼章扰宋，尽召十二监军兵聚于天都山，而鬼章亦驻兵常家山，前锋已屯通远境上。军器监游师雄将先发以制之，告于熙帅刘舜卿，舜卿曰：“彼众我寡，奈何？”师雄曰：“在谋不在众。此机一失，后将噬脐。傥不济焉，愿为首戮。”三夕而后从之。总管姚兕、种谊请分兵两路，急装轻赍，并洮水而进。兕部洮西，领武胜正兵，合河州熟户，破六逋宗城，斩首一千五百级，攻讲朱城，遣人走间道，焚黄河飞桥，青唐十万之众不得渡。宜部洮东，以岷州蕃将包顺为前锋，由哥龙谷会通远蕃兵，宵济拜金川，黎明至洮州城下，版筑未收，一鼓而破，遂擒鬼章青宜结，并获首领五人，槛送京师，斩馘数千，牛羊、器械、刍粮以万计，馀众奔溃溺死者数千，洮水为之不流。于是奏捷曰：“臣闻懽天威，震皇武，所以讨不庭也。今西夏授策而不谢，辄阴援吐蕃鬼章，结衅构奸，欲为边患。臣与主帅合谋，将义兵行伐，赖陛下圣神，陷城克敌，斩获以万计。生擒元恶，系送北阙下，愿戮尸槁街，蛮夷邸间，以示万里。”书奏，百僚班贺。（《长编》四百二及四百四）

宋以梁乙逋擅权逆命，诏诸路帅臣严兵备。

宋三省、枢密院言：“夏国自秉常告丧，既吊恤其国，又封册其子，两宫赐与甚厚，国中部落老幼无不欢跃，知朝廷更无征伐，从此可保无事。不谓彼国强酋，独有异意。风闻干顺不治国事，有梁乙逋者，擅权立威，凡故主近亲及旧来任事之人，多为所害。以为若边塞无事，则奸谋不成，故辄敢犯边。以请地为名，不遣贺正成节，谢封册使反复邀乞，别怀异图，背恩逆理，莫此为甚。若不即加诛，无以威示边境。”宋帝诏：“夏国政乱主幼，失藩臣礼，皆乙逋等擅权逆命，其君民非有罪

也。兴师讨伐，有所未忍。诸路帅臣，宜严兵自备，如能改图效顺，许其自新。”（《长编》四百四）

宋知院事安焘，请复讲攻扰之策并行间。

时宋复洮河，擒鬼章青宜结，二边稍清。而并塞犹苦寇掠，安焘言：“为国者。不可好用兵，亦不可畏用兵。好则疲民，畏则遗患。今朝廷每戒疆吏，非举国入寇，毋得应之。则固畏用兵矣。虽仅保障戍，实堕其计中，愿复讲攻扰之策。且干顺幼竖，梁氏擅权，族党酋渠多反侧顾望，若有以离间之，未必不回戈而复怨，此一奇也。”其后，夏人自相携贰，使来修贡，悉如焘策。（《宋史·安焘传》）

冬十月，宋诏：“《新历》勿颁夏国。”以干顺谢封册及贺坤成节使未至故也。（《长编》四百六）

十一月，宋诏鄜延路经略司：“如夏人欲通和，即令疆吏告谕，先具谢表及尽纳陷没人，分划边界毕，乃敢奏达，候旨通贡。”（《长编》四百七）

十二月，宋诏环庆经略使范纯粹，选人入西界探事并行间。

纯粹奏曰：“用间之策，虽兵家之善计，须时然后行，则可济大事。苟势有未宜，则不徒无益。盖梁氏一族，用事国中，既已久矣。凡势力之相忌者，颇已遇害。故一国之众及其酋豪，心虽怨忿，而敛手听命，未闻有敢辄动者。彼梁氏者，亦虽有窃据之渐，然犹须挟立嵬名氏之子，以临其众者，盖知国人不附而诸酋尚可畏也。彼心有所图，而事有未谐；旁有所畏，而众不为用。惟其如此，故虽间有猖狂，而未能专心致意以抗中国，在于今日，实中国之利也。今朝廷委臣以术用间，欲如往日野利之类。臣窃谓野利得众善战，实元昊之腹心，间而去之，诚为我利。今夏国酋豪，惟梁氏一门而已，凡其中外亲党，靡不持权用事，方叶心同恶，共有深谋。一切间言，固未可入。其余首领，虽幸存者，彼皆置之散地，于国事兵权无得干预。其粗有权位许其管勾人马者，不过如嵬名特克、济沙克星多、贝中彻辰之类，三数人而已。是皆梁氏之忌且畏者，方日夜求端，欲得除去，恨无自以发之者。若间言一出，实梁氏之奇货，彼三数人者不戮则亡，是特为梁氏除仇敌也。仇敌尽除，则梁氏者然后得肆意于边患矣。若谓欲离间嵬名之余党，使之怨毒梁氏而内有所图，则余党之怨梁氏固已甚矣，但力有不胜，故敛手于其下，而无所为也。臣愚虑如此，未审朝廷之议以为如何？除用间一节，臣未敢轻试外，其选募出汉之人深入探听等事，臣见精审施行。”（《长编》四百七）

西夏称天仪治平二年

春正月，太白昼见。司天言：“不利用兵。”梁乙逋不听。（《西夏书事》）

出兵侵府州。守将钳宗翌击败之。（《长编》四百八）宋诏备边。

枢密院言：“夏人逆命，不修贡职，继而举国大犯泾原，狼狽空回。诸路牵制，斩获亦多。度其奸心，必图再举。尚不闻诸路探报到举措次第。观其谋，但外则示弱，为款我之计；内则阴集，潜俟和暖，直来奔冲。窃虑失于探候，有弛堤备。”诏陕西、河东逐路经略司：“严戒边将及城寨官，募人探伺，先知所向，常若寇至，过为之备。”（《长编》四百八。又《长编》二月己卯，枢密院言：“羌贼多谋，贵在先虑，不失备御。自去冬雪寒，今已仲春，尚多阴晦。窃虑夏人阴蓄奸谋，以前日泾原攻围无利，诸路牵制讨杀，穷寇轻忿，狂图深入，以觊侥幸。”诏陕西、河东逐路帅臣：“悉心讲划，多方以待之。”）

二月，辽使来诒贺正。

梁乙逋以辽不颁封册，遂不遣贺正使人。辽使参知政事正维来诒其故。（《西夏书事》）

三月，攻宋德静寨。将官张诚等逆战，夏人败绩。（《宋史·哲宗本纪》。按《宋史·夏国传》：三年三月，攻德静寨。诸将米赟、郝普战死。诏刘昌祚以泾原万人驻德顺军，熙河五千人驻通远军，扼秦凤要害，以为犄角。与此异。）

攻宋龛谷寨。寨兵及东关堡巡检等逆战，不利，宋兵死者几百人。（《宋史·夏国传》）宋诏赵高审量夏人是否挠耕或作过，宜严戒。

枢密院言：“西人屯聚逐寨，各止三四百人，声言作过，欲我清野以妨春种，或自为护耕之计；或示寡弱，诱致官军，伏藏重兵，以邀战胜；或欲于别路作过，牵制本路应援之师。”诏赵高：“审量敌计，若止是挠我春耕，即讲求护耕之策，勿令敌为我患。若欲作过，即随宜应变，深计利害，以取全胜。仍严戒诸将使臣，勿为敌诱或激怒，轻易举动。”（《长编》四百九。又枢密院言：“陕西、河东路并边民人，以夏贼屯聚境上，往往不敢耕种。挠耕之策，反为彼用，实于边民为患不细。请令赵高等按实以闻，仍讲求护耕之策，以破贼计。”从之。又四月，宋诏陕西、河东路巡检堡寨使臣：“透漏西人入界，第四次以上冲替，其兼两地分以上者，加一次。”又五月，宋诏陕西、河东路经略司：“如承他路报夏贼入寇，即审详贼势，出兵牵制，令贼顾虑，不敢久留。仍远斥堠，如无伏兵及有可乘之利，方得进讨，务取万全。”）

夏五月，宋诏延帅赵高，无轻受夏人纳款。

初，夏人求纳款，赵高辄与应答，既而犯边不绝，仍不时遣人求和。宋帝诏高：“如夏人再来有言，先令把边人重迭诘问虚实，俟其意坚，徐引至顺宁寨，问所欲言

。然后谕以反复，因依遣之，仍录所说语言，疾置以闻。若牒送到谢罪表匣或空牒请和，亦令将寨官语以未敢承受。如半月以外，即云经略司令先见公牒，有可凭信，即收接当奏取朝旨。”（《长编》四百十）

宋诏以治平臣僚所上互进方略授逐路帅臣，讲求困敌之策。

宋帝欲使夏人疲于奔命，拟选将练兵，先募间谍，深入探候，出其不意，使敌莫测，故授此方略。环庆路经略使范纯粹言：“窃详治平臣僚所上困贼方略，固为精尽。然兵马数目、以至将佐头领、遣应次第，即与目今全然不同。臣仰悉朝旨，密作经营，但不失今降朝旨大意而已。须诸路动息相闻，首尾相照，互相为力，使西人于逐路山界，各有所畏。分兵待敌，不敢并兵一路，则我计方行，不至重困。自馀亦不须合治平之意，所有朝旨内先令具经划措置事件闻奏。缘边机务，难以预定，贵在临时处决，即先事无可预陈。所有准备西人防庇边民一节，即不异见今备寇之策。”（《长编》四百十一）

夏六月，攻宋塞门寨。

宋帝诏陕西、河东经略司：“严戒城寨，当职官增完守备。如夏人攻犯，非逼近城下，决可取中，勿多施行，自致缺误。”（《长编》四百十二）宋师袭洪州。

梁乙逋数遣使入中国，示欲伏罪请和，而于使介往来间，乘边人观望，辄出兵掩袭，冀有所得。延安帅赵鼎檄庆州将刘安、李仪曰：“贼即犯塞门，汝径以轻兵捣其腹心。”于是安等袭洪州，斩掳五百馀，焚荡族帐万二千，获孳畜、铠仗万三千。（《长编》四百九。按《宋史·赵鼎传》作梁乙埋扰边。《长编》注谓此事当改，不知乙埋与乙逋何如。）

秋七月，辽使来册封干顺为夏国主。（《辽史·道宗本纪》）早讹言将入犯，宋诏选人入西界探测。

宋帝闻夏已点集兵马，欲来作过。又闻西界今年天旱，点集不起。帝以为疑，因诏问诸路：“夏国今岁事力，果是如何？或实经凶欠，只扬言大举，以劳我堤备；或实欲入寇，却反言天旱，以款我边防。有此二端，正要精加探测，先事破谋。”旋经环庆路经略使范纯粹言，点集不实，乃止。（《长编》四百十三）

宋诏备秦凤边。

夏人点集军马，声言欲犯泾原、熙河路。宋虑移犯秦凤，扰及城寨，特命将寨官远斥堠，广探伺。并令泾原、熙河两路各选兵将，于德顺、通远接近秦凤边面顺便堡寨驻扎，以为犄角之势。（《长编》四百十二）

移牒宥州，不报，旋请疆土于宋。

宋枢密院言：“鄜延路七月移牒宥州，逾月方有回文，专请疆土，殊无悔罪谢恩之意。又托名议事，实欲迁延以款我师。今诸路皆报，欲举国并寇一路。莫若先为大举之状，精选兵马，多发将官，广张声势，移屯近边，扬言约日互进。时出轻兵，倏往忽来，令敌疑畏，不知所备。使不敢并一路，则敌势自分，我逸彼劳，亦多方误之之意。设令遂犯一路，必自顾望，亦不取深入，待其情归，可以伺便击之。”诏陕西、河东帅臣，从宜行谕以闻。（《长编》四百十三。按九月丁巳，熙河、兰会路经略使刘舜卿言：“夏国若遣人赍文字议和，许与不许收接？”诏许收接，仍令于鄜延正路计会。又己未，鄜延路经略司言：“宥州差人来延州，陈述事理。已令至日差官引伴赴州。”诏令赵高：“除依详前后所降朝旨应答外，虽西人言语倔强，邀乞意坚，亦节次婉顺以理开谕。即不得一起折难，遽然阻绝。务要迁延，不绝其意，以缓入寇之谋。”）

宋闻夏有变，故命赵高等选人体访。

枢密院言：“诸路所奏，夏国主物故，今威明噶勒藏管勾国事，国母更不管勾，颇相符合。惟鄜延路不同，虑国中自有变故，用此迁延，以疑边备。”诏赵高、范纯粹：“选信实之人，体访有无变异，钩索西人情伪，参验事实以闻。”（《长编》四百十七）

以重兵压宋延州境，延帅赵高遣人来诘，遂退。

夏兵抵延州界，声言大举，宋边将亟请益戍兵为备。高徐谕之曰：“第谨斥堠、整戈甲，无为寇先，戍兵不可益也。”因遣人来诘，夏兵遂去。（《宋史·赵高传》）

使贡于宋。

前宋册封之使入境，金钱币帛相属于道。边人父老，观者太息，以为宋帝仁厚，而干顺受册之后，不遣谢使，不贺坤成，国中士民皆不直其上。梁氏惧，乃遣使入贡请和。（《西夏事略》）

西夏称天仪治平三年

春正月，宋帝以夏人通好，诏边将毋生事。（《宋史·哲宗本纪》）二月，遣使如宋，谢封册。

梁乙逋以岁饥不能点集，令宥州移牒保安军言，将遣使入谢封册，请先议疆事。朝

议以谢使未至，即议疆事，不许。于是使嵬名善哩贡马，谢封册，请和。（《宋史·夏国传》及《长编》四百十八。按《长编》：是月乙卯，夏国遣使谢封册，诏学士院降回诏。）

三月，月入东井，犯西扇北第二星。

群臣以国家用兵过多，请息民力为言，梁氏善之。（《西夏书事》）宋诏边臣，毋以夏国遣使失备御。

枢密院言：“诸路奏报，并边时有人马及谍言：敌界亦有点集。虑边臣见夏国遣使，因失备御。”宋帝诏陕西、河东逐路经略司：“密伺敌意，过作枝梧，仍戒敕沿边城寨兵将官，明远斥堠，用意堤防，无致缓急，堕其计中。”御史中丞傅尧俞言：“臣闻夏人款塞，传者谓必缘地而来。臣窃思之，方今边防未丰，士气未振，民力未全，赏罚不明，将帅难倚。其尤可虑者，议论不齐，平居讲事，或经时旷日而不能合。苟必至于用兵，岂能迎机猝应、制变于千里之外哉！臣窃为陛下忧之。自古和戎，未有能抗天威而快人意者。惟所屈者益深，则所伸者益远。愿陛下姑务柔之以德，专以继好息民为意，则天下幸甚。”（《长编》四百二十九）

夏六月，遣使入贡于宋。

遣人请以所许葭芦四寨易兰州、塞门。押伴、护部员外郎穆衍折以理，使辞屈，左谏议大夫梁焘言：“朝廷昨来割弃陕西、河东堡寨已失于前，今外议又传大臣欲以兰州、定西一带割赐西人。臣闻《周诗》‘昔先王受命，有如召公，日辟国百里’，正今日之戒也。大臣不务划策制伏外敌，使远人怀德而畏威，但日欲割弃疆土，以捐国势，非尽忠也。臣闻此地皆西人要害之处，必欲得之，胜得他处。前日盖尝有此议，范纯仁、吕大防争之，得止。今纯仁去，大防独当国柄，宜申前议，不当含糊畏避也。”戊申，干顺上表奏告事宜。宋赐答诏曰：“省所奏事具悉，所有兰州、塞门两处地土，前诏指述已明，毋复更有论请。其永乐陷没人口，缘自牒报后来，经隔岁久，虑其间实有死亡，或后来却有续寻到人数，今已降指挥下鄜延路经略司，候将来送还到日，若与原报人数不同，亦令据数交割，计口支与赏绢。仍将葭芦、米脂、浮图、安疆四寨，约一日给赐。所有应合立界至去处，并依已降朝旨及自来体例计会。”鄜延路经略司关牒逐路帅臣：“各委官随宜相度，认定守把，不得更相侵越。”从之。丁巳，又赐诏曰：“省所奏，昨差人赴延州计会，将永乐等人口及所还四处城寨，交换塞门、兰州两处地土，实在朝廷酌中裁决事具悉。尔嗣守世封，虔修贡职，顷属罢兵之后，继陈复地之言。累降诏音，备谕朕志。岂谓历时之久，尚稽闻命之行。忽览奏封，深谅诚款。顾改图之议，犹有披陈。然事大之恭，实听裁决，再惟忠顺，殊用叹嘉。虽易地之求，当一遵于前诏；而酌中之请，宜别示以优恩。除汉蕃地土指谕已明，难从换易外，所有岁赐，据前降诏命，合候地界了日依旧。今推特恩，敕有司更不候地界了当，便仰检会，依例施行。尔其

体朝廷恩信之隆，谨封疆慎守之戒，永思安靖，用保悠长。”（《长编》四百二十九）

遣使如辽谢封册。（《辽史·道宗本纪》）

宋遣崇仪使董正叟、如京使李玩押赐夏国生日礼物及冬服来。（《宋史·夏国传》）秋七月，使宋贺坤成节。

赵高言：“夏人近遣使诣阙谢恩，续遣使贺坤成节，请严戒边吏，勿侵犯引惹。”诏陕西、河东经略司：“戒约沿边兵将官，不得容纵边人以巡绰硬探为名生事。”寻赐回诏云：“节纪诞弥，庆均临照。眷守邦之虽远，亦执贄以来同，嘉与朝臣，咸称寿聿，载惟忠恪，宜有宠颁。”（《宋史·夏国传》、《长编》四百二十九及《苏魏公集》）

宋诏：“令保安军牒宥州：应立界处，恐山斜不等，仰所委官随宜分划。”（《长编》四百三个）宋颁《历日》来。

诏曰：“赐夏国主，迎日推策，校疏密于一周；钦象授时，纪便程于四序。眷言侯服，作我翰垣。爰赐《小正》之书，俾兴嗣岁之务。布宣于下，共袭其祥。今赐卿元祐五年《历日》一卷，至可领也。故兹诏示，想宜知悉。冬寒，比平安好否？书指不多及。”（《苏魏公集》）

九月，移牒请受地。

宥州牒保安军言：“已鸠集永乐等处陷没人口，于十一月十日押付界首。应给四寨，亦即差官同日领受。并乞许令将弃地内人户、官物迁移般运，于交送生口日前毕事。”（《长编》四百三十四）

冬十一月，归永乐俘，复米脂等四寨地。

初，宋帝诏夏主曰：“昨永乐城将吏兵夫尽忠固守，力屈就擒，众多生齿沦于异域。念其流落，每用侧然。虽已诏汝发遣，当给赐可还之地。然念城初失守，众即散亡，或为部落所得；或为主者转粥，非设购募，恐有所遗。汝可深体朕意，访求发遣。当据送到者，每人别赐绢十匹。命官以上，加优赐给所得之家。”乙逋命宥州牒言：“永乐人户，除累年死亡外，鸠集到一百五十五人，敢赴界首交付。”及至交领时，仅一百四十九人。尽复米脂、葭芦、安疆、浮图四寨地。时议分划地界，熙帅范育请先划疆界，后归四寨。刘昌祚亦力陈不可，且曰：“异日请兰州，亦将许之乎？”宋帝皆不听。（《西夏书事》及《东都事略·刘昌祚传》。按《宋史·夏国传》：元祐四年六月，稍归永乐所获人。《哲宗纪》：元祐五年二月己亥，夏

人归永乐所掠将士百四十九人。《传》、《纪》互异。)

宥州牒：“已指挥所委官，临时有可相近取直处，令相照接连，取直分划。”（《长编》四百三十五）十二月，遣使如宋贺兴龙节。（《宋史·夏国传》）

是月，宥州牒：“去城十里作熟地，外十里两不耕作草地。”（《长编》四百三十六）

西夏称天仪治平四年

春正月，遣使如宋，贺宋帝及太皇太后正旦，并进马、驼。

宋帝诏曰：“诏夏国主，省所差人进奉贺正马、驼共一百头匹事具悉。春朝讲礼，外服输忠，走专使以来庭，絜良蹄而在御，风宜所尚，岁贡靡愆。省阅之余，嘉叹良厚。今回赐银、绢、茶等具如别录，至可领也。其差来人所赐物色，亦具赐目。故兹诏示，想宜知悉。春寒，比平安好否？书指不多及。”太皇太后诏曰：“诏夏国主，览所差人进奉贺正马驼共一百头匹事具悉。眷惟列土之邦，世奉勤王之职。载临元朔，远效贡珍，羁地产之奇毛；实天闲之外厩。言观备物，益见输忠。今回赐银、绢、茶等具如别录，至可领也。其差来人所赐物色，亦具赐目。故兹诏示，想宜知悉。春寒，比平安好否？书指不及多。”（《苏魏公集》）

梁乙逋请婚西蕃，约取邈川。

乙逋威权日甚，其弟、侄皆握重兵，阴谋篡夺。闻阿里骨与温溪心构怨，思并邈川。遣使青唐，请为子结婚，互为应援。阿里骨许之，亦遣搬察约攻邈川城。使人近北往来，不由邈川，恐温溪心知也。搬察，乃蕃部使役之称。（《长编》四百四十四）

三月，保安军牒索陷将景思谊。

思谊以永乐之围，缒城被执。及还陷没人口，思谊已死，中国未知。延帅赵高移牒来索，乙逋令宥州回牒报之。（《长编》四百三十九）宋移牒宥州，议界至。

鄜延路经略使赵高言：“夏人商量分划界至，催索公牒。准枢密院札子，除塞门寨于东、西、北三面各取二十里为界外，其兰州界并定西城堡寨及本路义合与河东吴堡寨，比接诸城，边面齐截去处，于城外打量二十里照直为界，择地卓立封堠，修建堡铺。仍详此大意，润文修定牒本闻奏。”诏鄜延经略司，令保安军移牒宥州乞奏。（《长编》四百三十九。又《长编》：是月，宥州牒，除塞门屈曲分划，其馀比接诸城，取直划定，其间地土虽甚阔远，亦割属汉。）

夏五月，请废兰州之质孤、胜如新堡。

二堡，古榆塞地，汉赵充国屯田所。中膏腴五十馀顷，据两川水泉，以资灌溉，国人称为“御庄”。自李宪城兰州，筑堡其地，土人悉走天都山及会州境，饥羸难以存活。秉常尝令蕃众自为争复计。元丰六年，兰州被兵，西关堡破，二堡遂废。熙河遣兵耕种，辄为夏人所杀。及议划界，二堡在兰州界内，熙河将范育等修葺故址，屯兵为守。乙逋欲得其地，令宥州牒保安军，请废所筑新堡。（《长编》四百四十二及四百四十四。按请废质孤、胜如二堡，宋诏熙河岷兰路经略司：“密勘会胜如、质孤两堡内见屯蕃汉兵马并巡检使臣等人数，其城壁楼橹宁御之具，各有何次第？自元丰五年修后，有何事迹或文据可为西界照验？今当何辞折难回牒？及所称广割岭是何处？绘图以闻。”）

六月，攻质孤堡，毁之。

乙逋请废二堡不得，以五千余人乘大雾猝至质孤，荡平之。进攻胜如，纵火焚掠而还。（《长编》四百四十四及四百四十八。按毁质孤、胜如二堡，秋七月，宋诏移牒宥州诘问。）

与宋赵高会议，分划疆界。

夏人来言：“划疆界者不依绥州内十里筑堡、铺供耕牧，外十里立封堠作空地例，以辨两国界。”诏曰：尔逋领蛮畿，恪循世守，佯来称币，廷阅奏书。永言疆场之安，未及沟封之划。两界绳直，罄忠顺而可嘉；十里荒芜，沥愀忱而有请。力析矜许，蚤遂底宁。惟析壤之求，初无故事；念安边之议，亦既累年。顾省恭勤，特行开纳。然绥德城本无存留草地，诏旨今既欲于汉界留出草地，即于蕃界亦当依数对留。应见今合立界至处，并须明立封堠，内外汉、蕃各对留草地十里，不令耕种。仍各于草地以里，自择安便处，修建堡、铺。如熟地内不可修建，即于草地内修立，各不得逼近界堠。其馀疆划未尽事，已令押伴官委曲开谕，进奉使副讫及。”已，诏鄜延路经略司：“夏国如欲议事，许差人赴延州计议。眷方陲悦义之心，既输悃悞；而朝廷绥远之意，已示优容。宜深体于恩怀，亟保和于封略。”（《宋史·夏国传》及《长编》四百四十五）

秋七月，遣使如宋贺坤成节。

使至京师，正边臣报兵躡质孤堡时，使者略不顾惮，盖知中国不敢苛留使人也。（《长编》四百四十五及苏辙《三论熙河边事札子》）冬十月，复毁胜如新堡。

初，夏兵犯质孤等堡，胜如巡检计守义擒杀游卒四人，修葺所毁城门。工甫竣，乙逋复率兵焚毁之，杀守义，掳其兵役而还，二堡遂不复作。（《长编》四百四十八）

及四百五十二按十二月壬辰，枢密院言：“熙河兰岷路经略司奏，十月内，西贼累犯胜如、质孤堡。纵穿城虽无所伤，缘夏国见商量分划地界，今乃不遵诏命，先起事端。乞朝廷定牒本，下鄜延路经略司，移牒宥州诘问。”诏令本路经略司移鄜州问故，定牒本降下。又按是月乙未，鄜延路经略司言：“宥州移牒，称先为定划疆界，有诏汉界留出草地十里，蕃界依数对留。欲于蕃界令存留五里为草地，夏国于所存五里界内修立堡铺。今拟到回牒云：‘朝廷务敦恩信，特从所乞。应见今分划界至处，许于蕃界内存留五里空为草地，汉界草地亦依此对留五里为两不耕地，各不得于草地内修建堡铺。’从之。）

十一月，遣首领允领举入熙河议疆事。

夏初议界至，请以绥州例二十里为界，中国从之。继请留生地十里，又从之。乙逋见委曲迁就，遂议于非所赐城外，总以撙直二十里相照取直。而熙河路兰州质孤、胜如二堡，指为非旧堡寨，欲自龛谷寨打量取直，则兰州质孤、胜如，皆为夏界熟地。又自定西城熨斗平第三寨接连取直，则南牟山、呿累州、结龙川一带，亦属夏国。议久不决，乃令宥州牒称：“现于纳叶经克节进筑，所有兰州耕种处及屯驻人骑，乞行毁徙。”知熙州范育不敢应，乙逋寻令允领举诣熙河石硖子，坚执前议，以分界至。育等令往鄜延路再议，允领举至延安，因言辞不协，径还。（《长编》四百五十二）

十二月，遣使如宋贺兴龙节。（《长编》四百五十二）

卷二十

西夏称天佑民安元年

春正月，遣使如宋，贺正旦。

初，夏人遣使入贡及为境上之议，故为此去彼来，牵制劳苦，每违期日。王岩叟请预戒边臣：“夏违期，一不至则不复应。”自后，不敢复违。（《宋史·夏国传》、《王岩叟传》。按《长编》：六月甲寅，枢密院进呈：“西人初报十五日过界，既而寂然无耗。至十九日，忽然却来计会。盖每岁不来界上，必令人去体问招呼。今岁预戒边臣，如不来则勿问，所以今日自至。”太皇太后曰：“不计会甚善。”按此即从王岩叟之议。）

三月，复遣首领嵬名麻胡（一作玛乌叶）入鄜延，议疆事。

夏国入边有三路。故事：文移至环庆者，皆附鄜延会议。时使人议画界至，辄云：“前后反复，朝廷昏赖实多。”及令赴延安商议，又云：“延州无可断之理，本国已差官发赴熙河兰岷路，就六处界首相会。”又云：“如中国实有就和之意，请勿再言陇诺堡上取直及质孤、胜如二堡事。”言词不合，辄掉臂还。经略使赵高连牒宥州促之，不至。会梁乙逋使生蕃乙吴麻（一作叶乌玛）入延州，吴麻乃出入汉边，达言语、通事类者，顺宁砦获之，高厚与金帛，使以中国怀柔意归谕乙逋曰：“朝廷令汝国遣人来听疆议，非憚汝也。特以和好垂成，不忍遽自绝耳。乙逋欲和即来；不欲，从汝自便。移书往返，不若面议之详。”时乙逋方聚兵密木关，将犯熙、兰。吴麻至，乃缓师期，遣嵬名麻胡及乙吉丹等入延州。呼前，诘折开谕累日，麻胡等词穷曰：“公言无不是，皆为国为民，奈吾国不利何！”（《长编》四百五十六及四百六十。按《长编》：是年春正月辛未，鄜延路经略使赵高言：“熙河路所占西人良田极多，乞朝廷酌中处置。”枢密院议，夏国见通常贡，岁时赐恩一切如旧，止是分划封疆木毕，如高所陈是实，西人观望，难于驯服。诏高详累降朝旨及赵伋开谕悉心讲究，候西人再来界首，即尽理折难，务令听伏。伋先被诏，持地图去延安议分划事，高长子也。又三月乙亥，鄜延路经略使赵高言：“若西人来延安府商议分划熙兰界至，一向倔强，要还本国，未审如何回答，不敢阻绝。”诏赵高以前后指挥敷演节次，令所委官婉顺应折。如坚不听从，便欲归国，即徐云此来开谕，于理当然。今既全不相听，即当具此申复枢密院，以俟指挥。或西人须要暂归本国，亦听其便。仍谕以使副到本国，亦须更与近上首领详悉商议。若申复枢密院后，万一别有处分，当令人于界首相招，即请来延安府商议，务要羁縻西人，不致阻绝。其西人未肯听从，合申复事，令赵伋赴三省、枢密院稟议。）

夏四月，攻宋熙河兰岷、鄜延诸路。

夏人数万侵定西之东，通远之北，挑掘七厓巉堡，杀掠三日，转侵泾原及河外鄜、府州，众遂至十万。熙帅奏：“乞因其退，急移近里堡砦于界，乘利而往，不须复守诚信。”宋帝下大臣会议。苏辙曰：“当先定议欲用兵耶，不用耶？”吕大防曰：“如合用兵，亦不得不用。”辙曰：“凡用兵，先论理之曲直。我若不直，兵决不当用。朝廷顷与夏人议地界，欲因庆历旧例，以彼此见今住处当中为直，此理最简直。夏人不从，朝廷遂不固执。盖朝廷临事，常患先易后难，此所谓先易者也。既而许于非所赐城砦依绥州例，以二十里为界，十里为堡铺，十里为草地。要约才定，朝廷又要两寨界首侵夏地一抹取直，夏人见从。又要夏界更留草地十里，夏人亦许。凡此，所谓后难者也。今欲于定西城与陇诺堡一抹取直，所侵夏地凡百数十里。陇诺，祖宗旧疆，岂所谓非所赐城寨耶？此则不直，致寇之大者也。”刘摯曰：“不用兵虽美，然事有须用兵者，亦不可不用也。”辙奏曰：“夏兵十万压熙河境上，不于他处，专于所争处杀人、掘厓湏，此意可见，此非西人之罪，皆朝廷不直之故。熙河辄敢生事，不守诚信，臣欲诘责帅臣耳。”后屡因边兵深入夏境，宣仁后遂从辙议。（《宋史·哲宗本纪》及《苏辙传》。按《长编》：五月己未朔，三省、枢密院同进呈熙河、延安二捷报。苏辙奏曰：“近日边奏稍频，西人意在得二堡，今盛夏犹如此，入秋可虞，不若早商量了当。”意欲与之。吕大防曰：“此不可。国家岁以二十五万银、绢赐与，在西夏当一百万，岂可恣其侵侮，亦须恩威并行。”王岩叟曰：“形势之地，岂可轻议弃与？不知既与，保其后不更要否？”太皇太后曰：“夷狄无厌。”刘摯曰：“夷狄诚无厌。”岩叟曰：“不可一向示弱。”韩忠彦曰：“看道理如何耳。”遂退。忠彦意与辙同。独岩叟以为质孤、胜如两堡，自元丰用兵有之。元祐讲和划界，当在我地。而西人力争，盖兼形势膏腴之利。失之，则兰州、熙河遂危，故主范育议，谓不可弃。而赵鼎意在与之。辙自执宪，主高议，故进说如此。又七月甲申，三省、枢密院会都堂，议西界分划事。而王岩叟以为质孤、胜如，兰州之形势，又膏腴地，夏人所必争。而苏辙自为中司，即论乞弃二堡，及执政常执前意。韩忠彦在可否之间。通远军之定西城、熨斗平堡、通西寨、榆木垒堡，夏人皆欲就逐城打量二十里为界。而辙与忠彦又以为当然。熙河帅范育以为：“质孤、胜如二堡，自用兵初得之，至今两巡检未尝废，而夏人妄以为边。臣缘议和旋修，又朝廷从初文字，但云通远军之定西城以北，相照接连取直，未尝及熨斗平、通西、榆木垒，而夏人乃欲并三堡直南北打界至，遂将南逼通远大路。如其言，则通远一带有难保之势。”知边事者莫不以为然，独辙与忠彦直夏人语。）

六月，熙河等路来归俘掳。

夏兵入熙河、泾原诸路，虽肆杀掠，而首领被执者亦众。宋帝令悉放归，并诏逐路经略司谕宥州言：疆事虽未理毕，夏国安得辄侵边境。今既生擒，即合斩首，缘意在好生，又夏国现输常贡，且放回本国。宜明谕梁乙逋并近上首领，今后不得纵放兵马，擅有侵犯。（《长编》四百五十八）

秋七月，遣使如宋贺坤成节。

熙河诸路奉诏谕诘宥州，梁乙逋回牒，以通远十万众为些小侵犯；又没泾原之役不答。宋帝以言辞傲慢，欲绝岁赐，闻坤城使已在境上，乃止。（《长编》四百六十二）

毁镇戎军封堠。

镇戎官吏于军界近边立封堠八处，梁乙逋遣兵拆毁。令宥州牒保安军言：“请勿再修，且宜依旧。”（《长编》四百六十一）八月，宋鄜延路都监李仪等以兵袭夏境，败死。

宋帝以仪等违旨，夜出袭人死，不赠官。（《宋史·哲宗本纪》。按《夏国传》作九月围麟府，事与此异。）攻怀远寨。

梁乙逋既杀李仪，知镇戎军无备，遣兵乘胜攻怀远。守将李逊出战，不胜，闭城谨守。围五日始解。（《长编》四百六十四）

毁宋安定堡地分内新移修增子、土门两堡。（《长编》四百六十四）宋戒约边臣纵深入西界。

三省、枢密院奏事。苏辙言：“兰州近以远探为名，深入西界，杀十余人。边臣贪功生事，不足示威，徒败乃事耳。乞行诘问或戒约。”王岩叟曰：“贼兵在境，若不远探，何由得知？苟失机宜，岂不误事？”吕大防曰：“今以李仪、许兴无故入界，致陷没，更不推恩。遍告诸路，亦足以示戒约也。”枢密院先下复上，逢大防及刘摯谓韩忠彦曰：“已得旨，令戒约。”岩叟复奏，因进曰：“戒约之事，更乞陛下体察，有未便处。”太皇太后曰：“适三省要戒约。”岩叟曰：“所见偏，所奏未尽理。自来朝廷常指挥，令明远斥候，又却不得差人深入，如此乃是不会事。”又曰：“贼兵在境上，若失机宜，奈何？”太皇太后曰：“如此则难责彼也。”岩叟曰：“边臣全赖朝廷主张。”忠彦曰：“若生事，亦不便既罢戒约。”苏辙他日又言：“兰州近以防护打草为名，杀西界六、七人，生擒九人。已令送还九人，此甚善。边臣冒昧小胜，不顾大计，极害事，可遂行戒约。”大防不欲曰：“李仪、许兴等深入陷没，已责一行人，足以为戒约矣。”辙曰：“李仪等深入，以败事被责；兰州深入有功。若不戒约，将谓朝廷怒其败事，而喜其得功也。”太皇太后曰：“然。”乃行戒约。（《长编》四百六十四）

闰月，宋严饬陕西、河东诸路边备。

枢密院言：“累据诸路沿边探报，夏国首领梁乙逋将统河南、北人马，扬言谋欲犯

边。”诏陕西、河东诸路经略司：“严飭边备，仍不得先自张皇，希功赏，引惹生事。”（《长编》四百六十五）

九月，攻麟、府二州。

杀掠者三日，焚荡庐舍、蹂践禾稼无算。（《宋史·哲宗本纪》。按《长编》九月丁亥，枢密院言：“河东经略司奏报，西夏深入麟、府州，攻围城壁。诏本司丁宁诫敕麟府路军马司，宜谨重精审，仍张大声势，集兵应援，务令敌兵早退，城寨无虞。仍令范纯粹审择便利，如可出兵，即依前诏，牵制策应。”又庚寅，枢密院言：“西夏入寇麟、府州，未退。”诏河东路经略司诫谕张若讷，张大军声，占据地利，审度敌势，选募骁勇敢死之士，出奇逼逐，或乘师老惰归之际，择利邀击。又壬辰，枢密院言：“夏人犯麟、府州，虽已遁去，今据陕西沿边奏报，见各于并边啸聚，窃恐复寇别路。”诏陕西、河东逐路经略司：“如遇西夏入寇本路，兵力不胜，即速令互行关报，牵制策应。及令逐路帅臣精心讲究利害，如何经划措置，密具方略以闻。”其麟、府州界，人常为敌所杀掠，烧荡屋舍者，令经略司：“人以老幼，屋以多寡，等第给赐钱、绢。或被焚毁粮斛，蹂践田苗，亦随宜赈济。”）

宋复绝夏岁赐，禁和市。（《长编》四百七十九）

宋押赐国主生日礼物及仲冬时服，使臣安伦等至延安，称疾不至。

故事：夏主生日礼物及仲冬时服，例于九月十一日以后过界，其岁赐银绢则于二十五日过界。时使臣安伦、刘程已抵延安。经略使范纯粹以夏国今年大兵三举，猖狂已甚，又虑朝廷闻河东遭寇，遣使别有更改，令伦等用公文称疾，移牒照会。梁乙逋使宥州回文，言辞简倨，不肯少屈，于是伦等不至。（《长编》四百六十六）

鞑靼国来伐，梁乙逋回师援之，不及。

鞑靼闻乙逋兵入河东，率所部袭贺兰山，入啰博监军司，所劫杀人户千馀，掠牛羊、孳畜万计。乙逋回兵援之，至达尔结罗，鞑靼兵已退。（《长编》四百七十一。按本条，章榘奏曰：“夏国叛命，违天逆理，宜取诛灭。其西南则有邈川，东北则有鞑靼，皆其邻国，今不能和辑，而并边侵扰，此盖天人共所不容之效也。兼勘会宝元、康定之间，元昊犯顺，亦尝遣使唃氏，当时颇得其用，盖以远人攻远人，古人之上策。今邈川既已怀服朝廷威德，可使为用。而鞑靼独以隔远，未知向化之路。今若于河东或邈川界，求间道遣使至鞑靼，陈述大宋威德，因以金帛爵命抚之，使出兵攻扰夏国，以与邈川相为犄角，则蕞尔之国，三处被患，腹背受敌。彼知国中，内外多事，宜亦自折，可使不日请命，此固贼之一端也。”）

宋沿边诸路，用浅攻计来扰。

环庆经略使章资策也。竊言：“羌、戎为孽久矣！自庆历以来，前后入寇，非举国之众，不能深入。今者自八月聚兵境上，凡四十五日。其众始集，初欲寇鄜延、环庆，一夕，忽趋麟府。舍近取远，必有意谓。盖疑两路之兵亦聚，故分其半以寇河东。然则朝廷著牵制之令，最为得策。又惟夷狄之小邦，土地有限，人民有数，自今夏涉秋，凡举全国之师，其众可谓劳矣，不能无怨；其力亦已屈矣，不能无困。以劳屈之众，而当圣朝仁义之兵，虽不战可以待其自毙也。为今之计，宜敕戒诸路，休养兵民，修严警备，事事整办，毋妄作轻举。蕃寇小入，使城寨及诸将各据地分驱逐剪除之，出疆而后已。举国入寇，则坚壁清野，勿当其锋，俟其引退，审察前军已远，遣将据要害便利之处，分头讨击之，或剪其尾，或邀其归路。一路被寇，诸路皆出兵策应牵制，彼岂能枝梧哉？此备御之策，未足以深害之也。夫夷狄无城郭之固，无营卫之兵，啸聚则为用，既散则难集。虽沿边有土蕃守御之人，每处众不满百，谓宜乘间捣虚，扰耕践稼，勿限其常，为浅攻之计。皆付之逐路帅臣，审度而为之。或遣两将以上，悉任其施設，不必全用正兵，蕃、汉弓箭手最为可任，益之以选募土兵，参杂于蕃兵之间，所得人口、孳畜、钱财，皆差等分给出塞之人。如此，则人人乐为之用。诸路之师，更出迭入，虏亦不能知其时，则近塞三百里之贼境，既不能为生，又不能自存，彼贼不困，未之有也。行此之策，不二三岁，必束手归命。”（《长编》四百六十六。按《长编》十月辛酉，诏陕西、河东逐路经略司：“常切体探西贼对境二百里内，贼兵屯聚及部族所在，如有可乘，即遣谨重有谋将佐及劲勇人马，为倏往忽归之计，痛行讨杀。及令诸路兵马更迭出归，使贼奔命不暇，早致围弊。”以枢密院言，夏贼寇边未已，平时恃众，出我不意故也。诸路浅攻之策，盖自此始行。）

冬十月，宋诏用间。

梁乙逋方用事，宋枢密院言：“泾原路探报，梁乙逋近犯麟、府界，为人杀死。梁阿格、乙逋，为夏国所诛。”宋帝诏逐路经略司：“如探报得乙逋尚用事，即宜乘隙用间，以谋诛灭。仍谨选可用之人，厚遗金帛，优许职名，密切经划施行。”既而秦凤路经略使吕大忠言：“夏国自梁氏兄弟用事以来，虐用其民，壮者劳于征役，老弱困于资助，以至侥幸非据，残害忠良。上下怨嗟，皆欲共食其肉，特未发尔。近闻乙逋、阿格，并就诛戮。嵬名族人欲预国事，又择种姓以为之主。羌中以尝累寇诸路，深虑朝廷乘此危疑之际，或有举兴，遂遣使请和，以观吾变。正是可以经营之际，不若因而指挥鄜延路，只作经略司意度，移问夏国，今来乙逋、阿格已死（就使未死，亦可激怒众心，使之反侧），委是嵬名族人复预国事，其所主立众共推服从。今一心恭顺，更不敢别有邀求，速希回报，以凭申奏朝廷，乞行封册（乙逋之变，本国方以为讳，今明言之，以夺其气）。如此，则忠党遂安，永戴恩德，此边防莫大之利。”（《长编》四百六十七。又小注引《旧录》云：“时乙逋率众犯麟、府、河外三州，杀戮甚众，莫之敢御。而奸臣谓已诛死，欺罔为甚。”）

宋以勒住夏国岁赐，分给与河东、陕西经略司，添助汉、蕃功赏。（《长编》四百六十七）宋诏范育等，招致仁多保忠，不得。

枢密院言：“夏国首领仁多保忠，乃昔日丁之子，久据西南部落，素为桀黠，与邈川首领温溪心邻境相善。已令温溪心委曲开谕招致，许除节度使，令保守旧土，自为一蕃。后以梁乙逋擅权用事，猜忌保忠，自此中辍不复议及。近据诸路奏报，多称梁乙逋身死，保忠屡来边上，虑夏国首领各怀携贰，可以乘此招致。盖昔人用此获利甚多，如太宗殄灭突厥，亦先因归附，形势既分，然后李靖得伸其策，最为明验。”宋帝诏范育、刘舜卿乘此机会，密切措置，其后卒不能致。（《长编》四百六十七）

宋诏赈恤小民为西人侵掠者。（《长编》四百六十七）冬十一月，宋环庆军攻韦州。

中国既绝岁赐，环庆经略使章榘陈浅攻策，令都监张存统兵入韦州，攻安州川、霄柏川诸处，蕃部被杀者千余人。（《长编》四百六十八）

西夏称天佑民安二年

春，攻宋绥德城。

并以重兵压泾原境，留五旬，大掠，筑垒于没烟峡口以自固。（《宋史·夏国传》）二月，宋诏陕西、河东边要，进筑守御城寨。

仍谕不得深入敌境，致落设伏奸便。（《宋史·哲宗纪》及《长编》四百七十）三月，集兵韦州，窥环庆，与宋泾原官军战，败绩。

时乙逋声言，集兵三万于界上，入取环庆四路。经略使章榘侦知：夏国边寨各相去二三十里，每寨止八百余人，马皆羸瘦不堪战。使折可适统泾原兵八千，一日夜驰至韦州，寨兵惶遽走。可适直入监军司所，悉获牲畜、器物。师回，夏兵从后蹶之，可适设伏要害，夏兵大败，首领被斩者二人，死士卒无算，失甲马千计。（《长编》四百七十一）

夏四月，西蕃厮那（一作斯纳）等族来附，梁乙逋纳之，阿里骨以兵备一公城。

西蕃溪巴温，董毡疏族也，自阿里骨立，去依陇逋（一作隆博）部，河南诸羌皆归之。厮那、心牟（一作森摩）二族，向属青唐。阿里骨杀董毡妻心牟氏，厮那等不

平，与陇逋、心牟二族率众奔夏，乙逋纳之，共谋青唐。阿里骨聚兵一公城以备。（《长编》四百七十四）

六月，遣使如辽乞援。

夏为宋侵，遣使乞援于辽。辽令涿州移牒雄州，称奉辽主旨，夏使告乞应援，缘南北两朝通好年深，难便允从，委涿州牒雄州，闻达南朝，相度施行。宋帝诏雄州回牒涿州，具夏国犯边事状闻达照会。（《辽史·道宗本纪》及《长编》四百七十六）

宋欲以质孤、胜如二堡与夏，不果，遂筑城李诺平（一作李内彭），并进修汝遮（一作努扎）诸城。

质孤、胜如二堡，延帅欲以与夏人。宋臣种谊、穆衍等言：“兰与通远皆绝塞，中间堡障不相接，腴田多弃不耕。请于质孤、胜如二堡之间，城李诺平以控要害。”二堡不果弃。遂城李诺平，赐名“定远”。兼从提点刑狱游师雄言，于定西、通渭之间，建汝遮、纳迷、结珠龙（《长编》作纳克密、聚卜结隆，此从《宋史·夏国传》）三寨，及置护耕七堡。自是宋兰会、熙河诸边境藩篱益固。（《长编》四百七十）

宋臣章榘谋取横山，请筑洪德寨西北白马川、灰家嘴等寨，不果。

章榘奏：“检会西人去秋无故辄举大众侵犯麟州，驱掳人民，劫掠孳畜，河外篱落为之萧条。朝廷所重人命，所惜民力，未即讨罪。但绝朝贡，犬羊獠狠，不知创艾。今春以来，屡寇绥德，复以重兵压泾原之境五十馀日，肆其毒螫，无所顾惮。又于没烟峡口筑垒自固，将为家计于此。而数令劲骑窥伺边隙，贪噬之势未有已时。盖乙逋专国，利其有事以为资籍，包藏祸心，阴谋窃据。虽朝廷仁民爱物，不忍生灵肝脑涂地，而敌情变诈，乘吾不意辄来侵扰，是朝廷专以不杀为务，而其实未能止杀也。向者朝廷令诸路讲浅攻牵制之法，然如昨来举数十万众与泾原对垒，而近边部族皆先起遣，深入平夏，盖出师牵制，亦有不可用之时。然术固有不杀而能扼敌之咽，不战而能伐敌之谋者，惟择地筑垒，逼近横山以渐困之，乃今上策也。大率敌人平日辄敢跳梁叛援，少屈而复振，暂服而愈骄者，无他，得横山之利以为资，恃横山之险以为固而已。今若因其寇犯，筑垒两界之间，以示必取横山。彼如震恐，所忧者，疆土日蹙也。彼既忧恐，则休兵有期。且敌之长技，便于野战。中国之利，所恃者城守。因吾所利，以夺其资；用吾所恃，以披其固。以静制动，以逸待劳，以不杀止杀，帝王之师尽于此也。”遂乞进筑洪德寨西北白马川，地名灰家咀，及修复大顺城废安疆寨。皆不从。（《长编》四百七十四）

宋诏诸路牵制。（《长编》四百七十四。按是月辛酉，诏：“夏贼犯河东五万以上

兵，难以枝梧，合消诸路牵制者，麟府路令府州军马司，岚石路令石州都巡检司，举横烽入鄜延路报；以次路分，仍各别举横烽至太原府帅司纳火。麟府路仍听军马司径报诸路出兵牵制。其河东路得诸路横烽，除报帅府外，亦别以一路横烽转报府州军马司纳火。仍令诸路遇贼入寇，合要牵制策应。除移牒逐路经略司外，更径报麟府路军马司照会。其诸路得河东横烽，若麟府军马司得诸路横烽，并简习军马，便为牵制之备，速赴顺便堡寨驻扎，未得出界，各候被贼路分报到，审验得实，可以牵制，即依累诏，从长取利进兵。”先是，河东经略司言，横烽之法，本路与陕西路难以一律，故有是诏。）

秋七月，宋将折可适破尾丁（一作尾丁囉。）

梁乙逋见中国于熙河筑定远城，择于沿边对境百里之外，各作头领，排布人马，东西相属，约地远近，一二日之内可集兵三、五万。待汉兵入界，并力拒战。尾丁砦于诸路尤近，以兵五千屯其地。章高令折可适将兵六千，潜入境，侦得守砦卒姓名，诈为首领行视，呼出尽斩之，卷甲疾趋，袭破尾丁砦，获人、马、器、甲干计。回次怪杨沟，夏兵逐之，战于高岭，又败。（《宋史·折可适传》及《长编》四百六十八）

宋诏泾原御备。

谢麟为泾原路经略使，宋帝诏麟：“本路今春以来，西人筑城没烟，多为出没，诱致汉兵。如闻本路自二月间已遣人户入城，勾集人马，致有失业及孳畜颇多死损。详西人蓄谋，乃正以多方欲误官兵，边民不得休息，合如何御备？仔细究心讲议，条划以闻。”（《长编》四百七十五）

八月，宋诏西边诸将严备，毋轻出兵。

先是，有诏许诸路择利浅攻。而边将频出兵讨擄，多杀老小，虑诸路贪功致寇，故因防秋，复加条约。（《长编》四百七十六）西蕃阿里骨献邈川图，梁乙逋执其使。

邈川，古湟中地，南距河州一百九十馀里，东至兰州二百馀里，东北控甘凉一带，西接宗哥、青唐二城，部族繁庶，形势险要。始阿里骨以女许梁乙逋子，约攻邈川，杀温溪心，不果。及闻乙逋纳叛蕃厮那等族，因复入贡中朝，宋帝封其妻溪尊勇丹为安化郡君，子邦彪{钱}为鄯州防御使，弟南那支为西州刺史。乙逋数征其兵入寇，不应。至是，闻温溪心内投，叠受官爵，惧其离间，复以邈川地图献夏国，约将兵来取，而诱温溪心至青唐拘之。乙逋恶其反复，羁执使人，兵不发。（《长编》四百七十六至七十七。按《长编》：九月癸卯，范育言：“准朝旨，若夏贼累攻邈川，即本路合如何施行？令臣深计熟虑，预为方略。臣前所陈，乞定河南之策，

正为此也。前日河南之人，密输诚款，欲因而抚定，非贪土地，盖河南既定，足以威制外夷，下临河北若视诸掌，其众尽为属国，可以控夏贼腹背，制其死命。脱使贼攻邈川，本路力不足，则前日所陈边势之利，反为夏贼所有矣。枢密院言：“河南诸羌，怀汉愿附。虽是久远边防之利，第以青唐未有失节，而夏贼方谋合纵，故未可轻议。所以前降指挥不得擅便施行，令抚定河南部族，又岂能制夏贼死命。”诏范育依详前降指挥悉心讲虑，预为谋划。贼果犯邈川，难以出兵，即张大军声于要害处，遥为声援，以解贼势。若所探非实，不得张皇。）

冬十月，国母梁氏自将攻环州。

环州洪德寨西北白马川灰家嘴，地距清远军仅八十里，依山据险，当青冈峡济干、同家二堡大路。若骑兵自欢乐峰直达汉川，半日可至。梁氏集兵十万于奇鲁朗，声言犯泾原。一夕，趋环州，围之。（《长编》四百七十八及四百八十）

攻环州七日，不克，解围退，败于洪德寨，易服走还。

环州境外皆沙磧，距城百里有牛圈潜水。章榘于兵未至时，夜遣人置毒水中。夏兵至，人马饮者辄死。攻七日，不克，谋解围退。榘预料精兵万人授折可适，衔枚，由大虫谷趣洪德城；分遣蕃官慕化等别驻肃远寨，约举火为识，以邀归路。夏兵还过之，烽起，士卒识梁氏旗帜，争鼓噪出。梁氏纵“铁鹞子”数万迎斗，可适等皆死战，梁氏见众败，急令青幕遮道，尽弃帷帐、首饰，易服走免。兵士相蹈藉，死者崖涧皆满。（《长编》四百七十九。按是月丁卯，环庆路经略司言：“西贼入寇，诏令章榘丁宁各城寨，专作守计，但能坚守无虞，即为有功。密诫诸将，凡事慎重，勿与贼锋迎斗。仍选募死士，夜击贼寨。或俟惰归及分掠之际，择利邀击，痛行杀戮。”并下鄜延、泾原两路，虑贼马恃重分兵寇犯，亦仰丁宁过设提备。又辛未，环庆路经略司言：“贼稍欲引退，本路六将已从间道前去邀击。时西贼入寇方数日，今忽引归，虑别蓄奸谋，复来冲突。”诏经略司：“候贼退日，丁宁诫谕沿边将官使臣，过为提备，不得幸贼解去，便为懈情。兼虑贼知邻路赴援环庆，辄乘虚入别路作过。仰审度贼势，若渐欲引退，即于泾原两路策应兵马，量度先次遣回。”）

西蕃阿敏来投，使守革罗城（一作喀罗城）。

阿敏，温溪心弟，阿旺格子。阿里骨拘温溪心，邈川大乱。阿敏闻梁乙逋执青唐使人，乃改名丹卓麻（一作丹卓勒玛），率属投入夏国。梁氏使为衙头首领，将兵守革罗城，备阿里骨也。（《长编》五百六）

十一月，复遣使乞援于辽。

辽主因夏州叠次求援，拟遣枢密使牛温仁泛使中国，诘问兵端。已，闻乙逋点集频数，部族疲于奔命，议者谓其“非中国敌，岂可因之弃吾旧盟”，罢温仁不遣，止令涿州移牒雄州诘之（《长编》四百八十二小注）

绥州钤辖移浪心讹（一作伊朗僧鄂）叛附于宋。

宋授内殿承制。其从人绥移曾入夏国侦事，斗敌被伤，特予副兵马使。（《长编》四百七十九）

复遣兵犯麟、环二境。（《长编》四百七十九）

西夏称天佑民安三年

春正月，假辽国命，牒保安军请和。

宥州牒保安军言：“本国准北朝札子，备载南朝圣旨，称夏国如能悔过上表，自当应接，予以自新。今既北朝解和，又朝廷素许，因此再上表章，即欲遣使诣阙。”宋帝以辞引北朝非例，令鄜延经略使以意谕之。先是，知延安府李南公以保安军所得宥州牒来上，执政共议，欲许夏人上表。尚书左丞梁焘曰：“牒内不当引北界解和之语，恐怀诈不诚，未可据听，且使边臣谕令退换牒文，更伺其意，如果效顺、诚实不诈，许之未晚。”持之累日，未决。会焘在告，遂如南公奏。翌日，焘出至帝前，力陈自割弃要地，一失之后，羌人屡犯边内侮，朝廷恩信不行，威势不立，岂可今日更失处置？西域既请纳款贡奉，乃引北朝解和为端，此最害事，恐开他日生事之渐，不可不虑。况北人未尝预西事也，愿追止已降指挥，且令退换牒文，更俟探伺诚实之意，事虽稍迟，庶无后悔。于是诏从焘议。（《长编》四百八十。按《长编》：是月壬辰，诏以夏国请命，未测情伪，今陕西、河东帅臣，约束缘边过为备御，仍戒约兵马，不得于边界生事。又《长编》：是月，枢密院言：“陕西、河东诸路，每探知西贼大兵入寇，即起遣人户清野坚壁，专为守计。近来贼情狡狴，每欲犯边，即所在虚声，令诸路分兵处处为备，募出一路；或示形于此，却往他路；或大举入寇，以重兵分守城寨，使汉兵不敢轻出，而遣抄骑四散掳掠。如近日于奇鲁朗口，齐集泾原为备，乃寇环州。虽本路预作准备，城寨幸无疏虞，而边民被害数已不少。兼闻边民安恋旧居，曾因虚声起遣人户，不以贼来为信，逮实有寇逃避不及，悉罹杀掠。纵驱迫入城，城中窄隘无屋可容，人畜之类昼夜暴露，薰染死损，深可矜恻。又西贼每举兵犯塞，必虚张声势，动称数十万，边将不过闭壁自守，坐观焚掠，纵有战兵在外，既不能遏其奔冲，亦未尝出奇掩杀，致贼往来坦然，若涉无人之境。若不别图方略，何以保民待敌。”诏令陕西、河东路帅臣，讲究的确利害，具方略以闻。）

二月，于闐上表于宋，请讨夏国，不许。

于阗夙与西夏最睦。近有隙，故有是请。（《长编》四百八十一）

夏四月丁未朔，遣使如宋谢罪，献兰州，乞赐塞门砦，不许。（李焘曰：“兰州未尝以还，夏国今又何献也？”）

诏曰：“省所上表，遣使诣阙，悔过上章，及献纳兰州一境地土，绥州至义合寨亦取直划定，却有塞门乞还赐夏国等事具悉。朕统御万邦，敦示大信。眷尔嗣藩之始，亟驰请命之诚，爰给土疆，复颁岁币。岂谓受赐而后，辄兴犯顺之师，中外交章，神民共愤。朕以尔在位未久，势非自由，姑戢伐罪之大兵，聊用御边之中策，仍敕疆吏，许尔自新。今则遣使来庭，托词悔过，何乃谢章之初达，遽形划境之烦言。况西蕃故疆，中国旧地，已载前诏，不系可还。其分境虽曾商量，在用兵亦合隔绝。然则塞门之请，殊非所宜。定西以东，已有前谕。除河东、鄜延路新边界至许从前约，令逐路经略司依前后诏委官开立壕堠外，兰岷路未了地界，亦已令兰岷路经略司依先降朝旨委官，候夏国差到官，详先降指挥同共商量分划。缘夏国自元祐通贡受赐，后来累次犯边，仍候诸路地界了日，可依例别进誓表，然后常贡岁赐，并依旧例。”（《长编》四百八十三）

乘间犯宋延、麟二州。（《长编》四百八十三）

冬十月，遣兵扼神流堆，与泾原将张蕴战，败还，遂失宥州。梁乙逋闻张蕴引兵入境，令众三千扼大吴神流堆。堆距宥州四十里，拒战不胜，宥州守兵溃走，监军梁阿移引铁骑数千趋松林堡赴援，蕴顿兵长城岭。铁骑数挑战不得，既倦，蕴纵兵奋击，阿移大败。（《宋史·张蕴传》）

西夏称天佑民安四年春正月，入贡于宋。（《宋史·哲宗本纪》）二月，使宋进马，助太皇太后山陵。

宋宣仁后崩于元祐八年九月，至此始葬。（《宋史·哲宗本纪》及《夏国传》）遣使如宋，再议易地，不允。（《宋史·夏国传》）夏四月，遣谍入鄜延，被获。

梁氏因请地不得，遣谍至鄜延觐事，经略使范纯粹方大阅，观者不得入。俄而骑两翼环围之，命观者列坐，皆五人结一保，中有十馀无保者，呼诘之，即夏谍也。尽坐帐前，阅技毕，曰：“我之兵精乎？归语尔主，欲为寇，幸早来。”与食遣回。（《却扫编》）

冬十月，梁乙逋伏诛。

梁氏一门二后，乙逋恃其威势，独专国政。日与中国抗衡，缘边悉被荼毒。国人畏之，不敢言。既又潜谋篡夺，刑赏自专，梁氏亦为所制。自麟府还，族子阿革战死

，势稍杀。环庆之役，梁氏自将，不使与兵政，乙逋不悦，叛状益露。大首领嵬名阿吴、仁多保忠、撒辰等知其谋，集部众讨杀之，灭其家。（《西夏书事》）

西夏称天佑民安五年

春二月，筑堡石门峡。

石门峡距渭州境仅三十里，东带兴、灵，西接天都，濒葫芦河形胜，宜耕牧，为国界要害。梁氏遣兵筑堡戍之，中国探骑遂莫敢过界。（《长编》四百八十六）

夏五月，宥州蕃属朱智用，由邈川奔宋。

智用有意附宋，为夏国各路把截，无由遂达。后入邈川，为温溪心部下搬察。至熙州密申向汉意，携其宗族内奔。宋帝嘉其诚，授三班奉职。（《长编》四百八十七）

冬十一月，遣使如辽，进《贝多叶佛经》。（《辽史·道宗本纪》）是岁，宋罢分划之议。

时章惇为相，欲开边衅，谓十年之间，容忍夏人备至，而犯边如初，用谢景温之说，宜罢分划，以马迹所至为境。遂令熙河兰岷、邈延、河东路地界诸路沿边当职官司，更不商量分划，只以巡绰卓望处守把。牒报夏国，分划之议遂罢，而边衅又起。（《宋史·谢景温传》及《东都事略》）

西夏称天佑民安六年

春二月，攻宋义合寨。（《宋史·哲宗本纪》）三月，围宋塞门寨。（《宋史·哲宗本纪》）

六月，夏人犯宋边。（《东都事略》）秋七月，阿里骨以夏人师期入告于宋。

宋赐诏曰：“阿里骨累据熙河路经略安抚司等奏，及近准进奉渴失纳馀龙到阙，累以夏人情状传报朝廷事具悉。卿嗣有封域，世为藩垣，而能屡觇敌情，密陈边计，緬惟诚笃，深眷馀怀。”（《西夏纪事本末》）

八月，攻宋顺宁寨。

泾原将张蕴伏兵隘中，约（战急），闻呼则起，夏兵遂败，被俘、斩者数百人。（《宋史·哲宗本纪》及《张蕴传》）九月，与宋将折可适战于鸡靶岭，败绩。（《

东都事略》)

与宋将折克行战于青冈岭，败绩。又与战于遮没，复大败。（《西夏事略》）干顺自将，攻宋鄜延。十月，陷金明寨。

夏人大入鄜延，西自顺宁、招安寨，东自黑水、安定，中自塞门、龙安、金明以南二百里间，烽火相继不绝，至延州北五里，将以全师围延安。知延州吕惠卿修米脂诸寨以备。寇至，欲攻则城不可近，欲掠则野无所得，欲战则诸将按兵不动，欲南则惧腹背受敌，留二日拔栅去。十月，忽自长城一日驰至金明，列营环城。国主子母亲督桴鼓，纵骑四掠，知麟州有备，复还金明。而后骑之精锐者留龙安，宋边将悉兵掩击，不退，金明遂陷。守兵二千八百人，惟五人得免。城中粮五万石、草千万束，皆尽。杀其将官皇城使张俞。夏师既还，留一书置汉人颈上，曰：“贷汝命，为我投于经略使处。”其言曰：“夏国昨与朝廷议疆场，惟有小不同，方行理究，不意朝廷改悔，却于坐团铺处立界。本国以恭顺之故，亦黽勉听从，遂于境内立数堡以护耕。而鄜延出兵，悉行于荡。又数入界杀掠，国人共愤，欲取延州。终以恭顺，止取金明一寨，以示兵锋，亦不失臣子之节也。”延帅吕惠卿上其书于枢密院，而不以闻。初，宋帝闻夏师入境，泰然笑曰：“五十万众深入吾境，不过十日，胜不过一二寨，须去。”已而果破金明引还。（《宋史·夏国传》及《吕惠卿传》）

宋人破没烟峡。

宋泾帅毛渐乘夏人攻金明时，遣将捣其虚，遂袭没烟，破之。（《宋史·毛渐传》）

十二月，遣使如辽，献宋俘。（《辽史·道宗本纪》）

西夏称天佑民安七年

春正月，与宋泾原路钤辖王文振战于没烟峡，败绩。

夏兵死者三千人。（《宋史·夏国传》）二月，于阗黑汗王来攻甘、沙、肃三州。

遣其子以闻于宋，宋诏厚答其意。（《宋史·哲宗本纪》及《于阗传》）

复以七万众攻宋绥德城，鄜延将兵战退之。（《宋史·夏国传》）三月，以数万众围宋麟州神堂堡。

宋将贾岩以数百骑来援，令其下曰：“国家无事时，不惜厚禄养汝辈，正以待一旦之用耳。今力虽不敌，吾誓以死报！”众感厉。即循屈野河行且五里，据北栏坡岭上，一矢殪其酋。夏众骇溃，围遂解。（《宋史·哲宗本纪》及《贾岩传》。按《长编》侵神堂堡作闰二月）

宋筑胡山寨。（《宋史·哲宗本纪》）与宋三班奉职陈淬战于乌原，败绩。夏寨主被擒，死者数十人。（《宋史·陈淬传》）

宋知渭州章楶筑城于好水河之阴，出兵争之，败绩。城成，名“平夏”。

楶上言，城葫芦河川，据形胜以逼夏。宋帝许之。乃以三月集熙河、秦凤、环庆四路之师，阳缮理他堡壁数十所，自示其怯。或以楶怯，请曰：“此夏人必争之地，夏方营石门峡，去我三十里，能夺而有之乎？”楶又阳谢之，阴具版筑守战之备，帅四路师出葫芦河川，筑二城于石门峡江口、好水河之阴。夏人闻之，帅众来争。楶令姚雄部熙河兵策应，与夏人鏖斗，流矢注肩，战采厉。夏师引却，追蹙大破之，斩首三千级，俘虏数万。先五日，折可适败于没烟；峡，士气方沮，雄贾勇得隼诸道，始得并力。二旬有二日，城成，赐名“平夏”。既而环庆、鄜延、河东、熙河，皆相继筑城，进拓其境。夏人愕视不敢动。（《宋史》章楶、姚雄传及《东都事略》。按王允中《郭景修墓志》：绍圣四年，泾原城灵平、平夏二城，公以本道第六将为行营中军将，帅臣章公楶俾公预议军事，功未半，会夏国左右厢监军嵬名阿埋、昧勒都逋等以全军十馀万挠筑，兵皆六州精锐。公说护军种朴曰：“夏人剽悍，今空国而来，宜持重以待之。”朴乃谏之子，雅知公深沉有谋，用公之说，遂破贼。）

宋取葭芦寨，夏人以数千众掩至城下，知石州张构等击走之。（《宋史·哲宗本纪》）宋西上阁门使折克行破夏人于长波川。（《长编》作长沙川）

斩首二千馀级，获牛、马倍之。（《宋史·哲宗本纪》。按《长编》：枢密院言：“河东路自去秋及今，折克行等统军出塞，数奏肤功。近出师应援，修筑葭芦，复将兵照应泾原，进筑直至长沙川，焚荡贼众，不敢并边耕牧。近鄜延路经略司奏，西贼遇夜直至大理河耕种，昼则却归贼界。盖是本路军声不振，不敢出击，致贼界敢尔轻视。欲令鄜延、环庆路经略司，多方体探贼马屯聚，决有万全可乘之利，即选遣精锐痛行讨荡。况今西人已困，当乘势攻扰。如诸路帅臣能选精锐为迭出之计，使贼知我不测，分兵为备，仍乘伺间便，出其不意，则贼界部落不得安居。兼近边人户疲困，无以为生，易为招纳。”诏令熙河、泾原、河东路经略司：“依已降指挥，若贼界对境委是有利可乘，即不限时月，出兵掩击。”）

夏四月，争灵平会，败走。

知渭州章榘以夏兵猖獗，议守泾原之灵平会，命锺傅与部将苗履统众城之。梁氏遣兵力争，傅将步骑二万，出不意造河梁济师作金城关，扼其险要，夏兵遂败。（《宋史·哲宗本纪》及《锺傅传》。按《长编》：是月甲午，泾原路经略司言：“同统制折可适申，有西贼一千馀骑与伏云路慕化人马斗敌，即时将带前军救应，追捉到没烟峡，接战至午时退。续据苗履言，差熙河马军照应折可适等，行七八十里遇西贼接战间，伏兵起隔断，拥入沟涧，除汉，蕃兵外，有同总领岷州蕃兵供备库副使张德等未知存亡。”诏折可适，令泾原路经略司疾速取勘，仍先具的实伤折亡失人马数目。又是日，西贼十馀万众寇泾原所筑新城，王文振、马仲良等击之。）

宋知保安军李沂帅兵来伐，破洪州。

沂于本月五日，统制两将人马入西界讨荡，七日到洪州。监军嵬名济率众赴援，与沂军战，不胜而走，城遂破。内外首领、人民、族帐，尽被焚毁。（《宋史·哲宗本纪》及《长编》四百八十五）

宋环庆军破盐州，寻复之。

环庆钤辖张存率兵入夏界，至三角川，遣锐卒攻破盐州，俘戮甚众。及还，夏人追袭之，存上高原平少憩，夏兵纵火四面攻击，杀蕃官承制赵宗锐等，复取盐州。（《长编》四百八十六）

左厢首领密约（一作没药）叛附于宋。

密约奉顺宁寨蕃官，元祐六年投入夏国，官左厢首领。顺宁寨巡检刘延庆遣蕃部均凌凌诈投西界，说令反正。密约携所部归宋，授右侍禁，令依元部住坐。（《长编》四百八十七。按《长编》：是月，又有西夏右厢一带首领，遣人通知信息，愿举族归汉。锺傅以闻，宋诏以金帛、官爵招抚。）

宋取细浮图寨，置克戎城。（《宋史·哲宗本纪》）五月，宋取安疆寨，旋城之。（《长编》四百八十九）宋诏陕西、河东诸路，具措置方略。

枢密院言：“去秋西人举众寇鄜延，除环庆系邻路差那兵将前去策应外，其余路分并曾出兵牵制，内泾原入界破荡没烟新寨，广有斩获。熙河乘此进筑安西城毕，稍沮贼气。比累据环庆等路探报，敌界今年秋点集河北诸监军司人马，已降朝旨下诸路过为提备。窃虑西人兵并寇犯一路，其余路分观望不为出兵牵制，被寇路分难以枝梧。若西人分兵侵犯，诸路合行策应。如此则西人于分兵、并兵，皆无以得志，此最为备边困敌之要。”宋帝以为然，命陕西、河东诸路，详具方略以闻。（《长编》四百八十八）

六月，以宋人置壁垒于要地，遣使入告于辽。（《宋史·西夏外纪》）宋熙河路筑青石峡成，名“西平”。（《宋史·哲宗本纪》）秋七月，饥。

国中大困，民鬻子女于辽国、西蕃以为食。（《西夏书事》）秋八月，宋鄜延将王湑取宥州。

自张蕴兵还，梁氏复取宥州。鄜延经略使吕惠卿命诸路出兵讨击，熙河将王湑兵抵宥州，洪、宥、韦三州都统军贺浪啰（一作贺朗赍）率众援赴，湑击败之。追奔二十里，遂入宥州，焚官署、仓狱、行宫并文籍簿书，屯兵淖河。贺浪啰复遣首领移卜淖（一作伊实诺尔）、结讹遇以千骑邀宋军后，与湑等转战而南，至秦王井，并为神臂弓射却，死者甚众，因退据高原不敢追。（《长编》四百九十）

宋筑威戎城。（《宋史·哲宗本纪》）宋诏，罢赐夏国《历日》。（《长编》四百九十）与鄜延都监刘安战于朗沁沙，败绩。

宋遣刘安击夏州，至朗沁沙与敌遇，破其众，斩首五百馀级，牛、羊千数。（《长编》四百九十。按《长编》：是月己酉，枢密院言：“西贼点集人马，待往泾原作过。窃虑西贼暗蓄奸谋，掩我不备，长驱入近里，于隆德、静边治平寨以来人烟繁富地分，或闲慢城寨备御不至之处劫掠攻打。”诏泾原路经略司：“详上项事理，多方预行讲议措置，若遇缓急，贼马奔冲，深入近里，合差是何将佐，如何移那兵马，于是何要害地分控扼，得贼马来路准备捍御，不使近里城寨及人民繁富地分为所抄略攻打，落贼奸便。仍不时与大兵首尾照应，会合掩杀贼众，必取全胜，先具已如何讲议措置，选充领兵将官职位、姓名及将带若干人马于甚处驻扎，及应干准备应敌方略施行，次第闻奏。”）

九月，蕃官妹纳僧哥（一作穆纳僧格）附宋。

妹纳僧哥为带牌天使，闻中国敕榜招谕，遂奔宋。授礼宾副使，充兰州部落子巡检。（《长编》四百九十一）冬十月，辽为夏牒宋，请毁废所筑城寨及归所侵地土。

三省、枢密院同呈：“涿州牒雄州，称西夏本当朝建立，两曾尚主，近累遣使奏告，被南朝侵夺地土，及于当朝侧近要害处修城寨，显有害和好，请追还兵马、毁废城寨，尽归所侵地土。如尚稽违，当遣人别有所议。”众深讶其不逊，章惇笑曰：“元奉中，牒亦如此，一牒便已。”宋帝亦深骇其牒语太峻，遂退检元丰中牒，首尾语言大约相类，当时回一牒，更不复来。其后数因国信往还诘问，然亦不甚力。又韩忠彦使虏，接伴韩资睦但云：“不得已。深恐贵朝疑，断不敢以小国害大国和好。”（《长编》四百九十二）

十一月，宋熙、秦军破白草原，抵天都山，无所得而回。

中国屡行讨荡夏国天都山，属蕃尽将牛、羊、窖粟预行远徙。时熙、秦两路兵四万骑出塞，将至铨子山，监军司以十万骑阵白草原拒战，不胜，拨营西走。两路军直入天都监军司所，搜挖无所得，军士粮竭，饥死者半，乃回。（《长编》四百九十三）

卷二十一

西夏称天佑民安八年

春正月，宋鄜延军入界，拒之十里井，杀顺宁寨监押石福。

鄜延副总管王湑率诸将由塞门入界，大首领凌吉讹遇合洪、宥两监军兵迎战不胜，退至十里井。福与部将贺文密恃胜来追，带金环首领数人皆战死，文密亦重伤，福殁于阵。（《长编》四百九十四）

二月，宋筑兴平寨。（《宋史·哲宗本纪》。按《长编》：三月壬戌，枢密院言：“去年累降朝旨，令诸路期约，乘西贼未能点集之时，出其不意，前去讨荡，渡河深入，直捣贼巢。后来诸路各行进筑，未曾同时举动。缘西贼去岁不熟，今来春深，正是人饥马瘦，上下离贰，事力困弱，不能点集。又诸路进筑，各有次第，可以期约，并兵深入，覆贼巢穴之时。”诏：“吕惠卿、孙览、章粦、孙路、陆师闵、锺傅详此，候进筑城寨毕日，人马歇泊，预选统制官、将佐、使臣及分擘队伍，整齐战具，计置粮草，乘西贼未能点集之际，相度机会，互相关报。期约兵马去至兴灵以来破荡贼巢，务在措置精审，决保万全，方得举动，不得轻易败事。”时执政议，遂欲合诸路兵取兴、灵。知河东孙览曰：“兴、灵未可取也。”乃移书二府，具言兴、灵非余力可下，且曰：“兴、灵之举，曩尝闻馀议于相君矣。要使陕西不知用兵，而以岁月下之，窃私美至计长策无已。而今反欲速，何耶？”不听。更上书论其事，二府怒览，寻坐责。）

犯大定城。

大定属兰州与夏国分界处，梁氏兵屯界上，肆行抄掠，闻兰州知州王舜臣兵出金城关，乃退还。舜臣追至右厢监军司地，夏兵返战不克，带牌天使数名皆死。（《长编》四百九十四）

三月，宋筑米脂寨成。（《宋史·哲宗本纪》）

宋筑熙河通会关。（《宋史·哲宗本纪》。按《长编》：是月辛亥，枢密院言：“泾原经略司奏，被旨差发将兵进筑城寨，探得西界点集，在近边盘泊，虑捣虚深入作过。已选将分布照管边面，乞候师还，照管得地分无虞。许本司量功效大小，比类出寨进筑官员、使臣、军兵奏乞，等第推恩。”从之。）

宋师趋灵武，宋将郭成击破夏人于漫移隘。

至城下，有夏将乘白马驰突阵前，大将刘昌祚曰：“谁能取此者？”成跃马，梟其

首以去。（《宋史·郭成传》）监军阿燕（一作阿雅卜）率族降宋。

与其子襄渠及家口人户约千人。阿燕老将，多计谋，习边事，常出兵寇环庆。自中国取安疆寨，阿燕惧罪，经略使孙路使人谕之曰：“汝失安疆，在汝国所系甚大，汝主欲擒汝而戮之。乃欲以鼠窃之微劳，赎失地之大罪，盖已疏矣。吾若遣人以利害问尔主，汝得生乎？吾度汝可用，欲以为篱落，故未忍也。汝自计当如何？”因出敕榜示之。阿燕感，遂内附。部族闻其降，节次投者共二千七百人，马、驼、牛、羊四千馀。宋帝特除阿燕宥州刺史，充环庆路沿边兼横山一带蕃部都巡检使，赐名“怀明”。襄渠授三班奉职，赐名“世忠”。已而蕃部默吹、萌山等，亦从鄜延、泾原路请降。默吹补内殿崇班，萌山与副兵马使。（《长编》四百九十五及四百九十七至九十八）

夏四月，泾原官军出没烟峡来攻。

泾原兵三次来袭，羊、马被掠甚众。至是，统制官孙文将九千骑出没烟峡，直抵屯兵所，斩级、获孳畜而退。（《长编》四百九十七至九十八。按《长编》：是年三月庚申，泾原路经略使章楶言：“归顺部落子都勒、满登等，称西贼点集大兵已到没烟峡口，虑旦暮入寇，难以枝梧，已牒环庆、秦凤经略使，依先降朝旨策应，乞更赐指挥。”诏逐路经略司候见泾原路关报，立选将佐人马前去策应，毋致缺事。其余合牵制路分，亦令照会，仍令泾原路经略司密切审问都勒、满登等投汉情实闻奏。又是月乙酉，鄜延奏已差王潜、苗履统制扰耕。泾原奏进筑没烟前峡，乞秦凤、环庆兵各万人，从之。续令环庆辍骑兵五千，秦凤三千，仍选精锐，又令秦凤整龔其战士及馀丁，以俟熙河会合。）

大首领嵬名药默降附于宋。

药默，干顺疏族，领会州一带蕃部。是时由熙河路内归中国，令补西头供奉官兼本族巡检。（《长编》四百九十八）监军嵬名济入鄜延，围顺宁寨。

济围顺宁，副将张守德以轻兵邀击。济退走长城岭，至赤羊川被斩十二级，失马四十匹。时有降羌潜告师期，守德预为备，故济不得逞。（《长编》四百九十八）

蕃部喝强山、讹心（一作额森）奔宋。

二人乃监军妹勒都逋亲随，由泾原入降，俱授左班殿直。强山言夏国欲以今秋并兵寇一路，不攻城砦，但觅便深入，杀掠人户。经略司以闻。（《长编》五百）

夏五月，吕惠卿帅师，使苗履等败夏人于大沙堆。

沿边人户因官军连次讨击，并于大沙堆建栅聚族自保。时鄜延路以顺宁之围，遣钤辖苗履统诸将出塞，攻夏州。梁氏恐官兵焚荡大沙堆蕃族，遣嵬名乞勒、那哆丁（一作威明噶勒、丹嘉纳克多凌星）驻兵南面防护。苗履挥众奋击，乞勒等大败，丧失万计，退走五十里。（《长编》四百九十八）

六月，遣使如辽乞援。

干顺屡次乞援，辽主但牒雄州，令还夏国疆土，不肯发兵。梁氏乃自为表请之，多怨望语。辽主不悦，声言点集人马应援夏国，仍次境上不出。（《辽史·道宗本纪》及《西夏书事》。按《长编》：是年三月，雄州言：“涿州牒称，为夏国告计会南朝，却令还复旧所夺疆土城塞。”诏枢密院定牒本付雄州，回牒涿州。先是，范鎰使北朝，接伴问夏国事，且言夏人数遣使来彼求助，欲祈罢兵。仍云要地多为汉家所据，及云曾移牒，鎰答以不知。是日，进呈涿州牒，诏令以四月中旬回牒，而章惇言未可回牒，寻已之。）

秋七月，以兵入泾原。

梁氏以中国筑没烟前、后两峡，控扼天都形势，于是编拦人马，出没隆德寨、九羊谷，又于怪沟段大道掘壕作堑，纵游骑侵杀边铺戍卒。守将折可适同蕃官慕化，率兵伺懈出击，方止。（《长编》四百九十九。又是月甲子，泾原、河东皆奏：“西贼杀边铺戍卒。”秦凤路师闵奏：“近数有西贼出没，疑其来谗道路，万一并兵犯塞，无以枝梧。”诏：移那近里兵将过为备御，馀如五日所降条划施行。）

掠熙河平西寨，掳熟户二十馀。（《长编》五百）宋欲进筑天都，取兴、灵，不果行。

宋泾原既筑没烟前、后峡城寨，去天都咫尺。章榘欲乘势进筑，举兴、灵。知渭州章榘以为未可。曾布因对三省，为帝言：“边事累年未了，今泾原已逼天都，势不可已。然今秋见西人举动，即可以知其强弱，若果困敝，有可以灭亡之理，亦须年岁间便为殄灭之计。若西人未有殄灭之势，年岁间未可殄灭，亦须随宜收敛，休兵息民，以图安静。今诸路进筑城寨，所据羌人地土已多，其势固已穷蹙，若容其纳款，必无不向顺。若分划疆界在我，则西人亦不敢不听。要之，动息皆须在年岁间了当则可。若一向贪嗜不已，恐所忧不在西戎也。北狄于宝元中固尝以兵压境，为挠我助彼之计，今日安知其不出此？但朝廷经营西夏有涯，彼必有以相挠。至于青唐，唇齿之势，亦须观衅而动，但一方有警，即无以枝梧。此朝廷安危大计，岂可忽而不虑？若天都进筑了当，与西人约以划河为界，此乃非常之功也。”章榘曰：“若此措置，则安可便望划河为界？”布曰：“臣尝言划河为界，章榘已大骂，以为非计。前日臣反复诘难，榘乃以臣言须于年岁之间了当为是。”榘曰：“曾布言臣欲取兴灵，是害心风。”布曰：“章榘言臣云西人有灭亡之势，乃可图；若未有

灭亡之势，何可强？竦云若无可取之势，又不害心风，须要取臣蠢直。实曾答之云，平时闻议论，亦有似心风处。”竦曰：“但得横山及天都一带，亦可结绝。”布曰：“若得横山、天都，亦非常不世之功也。朝廷出师常为西人所困者，以出界便入沙漠之地，七、八程乃至灵州，既无水草，又无人烟，未及见敌，我师已困矣。西人之来，虽已涉沙碛，乃在其境内，每于横山聚兵就粮，因以犯塞，稍入吾境，必有所获，此西人所以常获利。今天都、横山尽为我有，则遂以沙漠为界，彼无聚兵就粮之地，其欲犯塞难矣！此所以为我之利不细，何必举兴州，然后为快哉！”帝及同列莫不然之。帝屡顾执政曰：“民力已困。”众皆曰：“然。”布曰：“何止民力，公家之力且无以继矣！”（《长编》五百。先是，曾布言：“章竦近以咨目抵臣，云天都未可进筑，其言颇有理。盖谓没烟峡以里，皆有山险可恃，贼马来路易于控扼，又后倚城寨为家计，故易于般运进筑。今天都去没烟六十里，既出峡则平原大川，四面皆是贼马来路，复去城寨远，声援不相及，搬运材植、粮饷百倍难于平夏。虽合三路兵马进筑，不惟粮运可忧，又虑西人以轻骑旁出，深入近里城寨侵掠，内无救援，势必受祸。兼城寨一扰，则军前人心亦摇矣。假令进筑已成功，四面无篱落可恃，何以固守？兼兵马数少，不免须索，恐无以应副，欲来日进呈。”许将、蔡卞亦皆以为当进呈。又环庆报西人大点集，上谓曾布曰：“章竦莫不以为然。”布曰：“竦昨晚坚不肯约束诸路为备，往复再三乃听。”方进呈时，竦曰：“此必虚声。”上曰：“安可测？”布又乘间为上言：“朝廷承平无事百四十年，陛下当与天下休息，共享太平之乐，乃日为可忧之事而不肯已，殆作非计。”上深然之。布又尝言：“西人今秋必并兵一路作过。”许将曰：“得他来则好。”上遍顾执政曰：“如何得他来，却好？”将色沮。）

八月，嵬名济（一作威明特克济沙）以兵保青岭，与鄜延将苗履战，败绩。

初，中国闻强山言，谋纵兵讨荡。于是王舜臣出熙河，张世永出河东，折可适出泾原。鄜延遣履护七将九千骑，于是月七日会于柳青平。诘旦，至青岭。济屯兵岭北拒之，履等奋击，济大败，被杀五百余人，亡牛、羊万计。岭南、北一带，禾稼蹂践殆尽。（《长编》五百一）

九月，有星出东井西，如太白状。

占者曰：“宫中有忧。”梁氏闻之恶，复谋举兵。（《西夏书事》）御史中丞仁多楚清举族降宋。

楚清官在蕃宰相、枢密使下，父丁死，侄保忠代为统军。楚清职虽高，不得专兵权，尝请于梁氏，不许，心常快快。时国兵入犯，楚清携家口四十余人，从间道内投，赍生金二百两，并冠服、宝玩、鞍鞴、绣龙帐入献。熙河经略司视之，俱世家物，诸羌不及也。宋帝诏赴阙，还所献物，授甘州团练使，右厢卓罗一带都巡检使。（《长编》五百三。按照熙河奏，王赡得蕃书云，仁多保忠有归汉意在十月。）

宋诏备泾原。

泾原路落蕃兵士归报，夏人点集百五十万，欲入汉界十程打劫。诸路降羌及俘虏皆言，羌人大点集，决趋泾原。诏章榘多方措置备御。榘以书遗曾布言：“敌不来则已，来必堕吾策中。”布亦谓经营已久，宜其无所不备也。（《长编》五百二。又《长编》十月壬午，枢密院言：“西贼点集大兵，在泾原近边盘泊日久，未见出没，虑却于别路作过。”诏陕西、河东路经略司：“精加探候，过作提备。邻路除依条策应牵制外，如贼马于秦凤路作过，即仰熙河、泾原相度贼形，选差兵将，择利乘便，或攻其左右，或击其后军，探伺老小輜重，用精兵掩击，务令西贼有反顾之忧，不能深入久留，肆为边患。毋得畏避观望及轻易举动，如贼马入别路，其邻路并依此。其或稽迟，定行典宪。”又乙酉，枢密院奏：“累据探报，西贼在泾原近边盘泊日久，未见出没。若地未冻以前，已见兵马退散次第，即泾原路可乘此间隙，于额勒色克中路进筑堡子。”诏：“令章榘、孙路详此，速行相度。如委是兵马已退，地土木冻，及相度事力可以举动，即依此各行进筑。如合要邻路兵马添助，出入泾原，即于环庆路勾抽兵一万人马，内三千骑应副，余依前后已得指挥，仍先具相度可与不可举动事状奏闻。”）

冬十月，干顺自将围平夏城。

渭州之西，地数百里，而平夏处其中。初，泾源经略使章榘谓诸将曰：“新边控扼，谁可付者？”皆曰：“非郭成不可。”遂辟成第十一将，以戍平夏。西人自失地之后，朝夕愤恚，常曰：“唱歌、作乐田地，都被汉家占却。”又云：“夺我饭碗。”至是以兵号三十万犯塞，国主与其母自将攻平夏城。自己卯至壬辰，昼夜疾攻。成等城守益坚，夏人乃造高车以临城，载数百人填壕而进。俄有大风震折，夏人一夕遁去。夏主母惭愤，劈面而还。（《长编》五百三。参四百八十五章榘奏议语。按《长编》：是月庚子，诏陕西、河东：“勿以西贼遁去，便弛边备，须过为捍御。缓急缺误，重行典宪。”）

十二月，宋章榘遣其将折可适，擒西寿统军嵬名阿埋、监军妹勒都逋。

二人皆勇悍善战，屡为边患，朝廷密诏图之。榘知其虚可袭，会二酋以放牧为名窥伺境上，遣可适等间以轻骑二千，衔枚捷走出荡羌，六道分进，敌不及知，夜入其室执之（曾布《日录》云：“时为向导者，乃妹勒都逋部将药亨，惧罪来降，故尽知二人所在，又侦知其居无兵马，直入卧内擒之）。尽得其家属，俘馘三千余人，获牛、羊不啻十万，种羌震慑。计其地，即天都山也。可适因请以秋苇川为寨，南牟为州。诏名寨曰“临羌”，州曰“西安”，而以可适知州事。曾布白帝：“此非常之功，可贺。”帝曰：“可贺否？”布曰：“鬼章亦贺及告陵庙，此功不在鬼章下。”榘等皆曰：“此奇功也。”捷至，帝御紫宸殿，受百官贺。榘在泾原四年，凡创州一，城寨九，荐拔偏裨，不问厮役，至于夏降人，折可适、李忠杰、朱智用

，咸受其馭。自平夏之败，西夏不复能军。窋边攻遂为西方最。（《长编》五百四及《宋史·章窋传》。按《长编》：是月壬辰，泾原奏：“贼攻平夏甚急。”熙河奏：“已遣王潜往右厢牵制。”又己亥，枢密院言：“泾原路经略司章窋奏，西贼犯塞，从灵平寨分布人马，数十里间约三千万，专意攻平夏城，凡十三日，逐处将、寨官晓夕捍御，遂保无虞。”诏章窋特除龙图阁学士、左中散大夫，赐茶药及银绢一千疋、两。又按《宋史·郭成传》：夏兵攻平夏，成与折可适议乘势深入，以骑异道并进，遂俘阿埋、都逋二人。商氏《续纲目》：冬十月，夏人寇平夏城，章窋大败之，获其将嵬名阿埋。似属一事。考《窋传》，窋擒阿埋在攻平夏后，《哲宗纪》及《夏国传》二事时月亦异。）

彗星见，干顺为敕国中。（《宋史·夏国传》）

辽遣知右夷离毕事萧药师奴、枢密直学士耶律俨使宋，讽与夏国和。（《辽史·道宗本纪》）复遣使如辽求援。

初，梁氏围平夏，恐诸路赴援，遣驸马都尉罔罗（一作旺罗）屯罗萨岭，御熙河路；大首领怖心（一作布沁）屯梁桎台，嵬名济驻白池，御鄜延、秦凤诸路。攻城甫十二日，闻熙河王潜入界斩罔罗，鄜延刘安、张诚入界败怖心、嵬名济等，军中遂无斗志。及还，检丧人马二万馀，牛、羊、马驼数万。数百里中，族帐、蓄积，焚毁殆尽。国中夺气，乃遣首领嵬名咩布至辽乞兵，犹恐汉兵深入，于诸州分掘窖粟，点集诸监军司兵，践踏沿边食用，为清野计。（《辽史·西夏外纪》及《长编》五百三）

潜师入泾原，犯乾兴、天圣等寨。

梁氏既解平夏围，人马仍在泾原近边盘泊，见官军尽屯葫芦河，知声势不相应，潜遣精锐入镇戎军，掩至二寨焚掠。甫二日，闻援军至，走回。天大雪，人马僵冻过半。（《长编》五百三及五百四）

月犯东井。

犯西扇北第二星，太史奏：“主兵丧。”梁氏不省。（《西夏书事》）

西夏称永安元年

春正月，国母梁氏卒。（《宋史·夏国传》。按《长编》注引《吕惠卿家传》，谓梁氏之死，谍言辽遣人鸩杀之，与《宋史》异。）辽诏干顺伐拔思母等部。

拔思母部，辽国西南招讨使所辖。大安末，与达里底部频为辽难，杀四捷军都监特

抹等，左金吾卫上将军萧阿鲁带击降之。已而复叛，辽屡讨不悛，命干顺举兵伐之。（《辽史，属国表》）

与宋将折克行等战于藏才山，败绩。

嵬名阿埋等至中国献计，请以人马三万取灵武。于是折克行等令副将折可大领人马入界，抵藏才山。夏兵迎战，不胜，被斩千馀级，丧失牛、羊、孳畜甚众。（《长编》五百五）

复因辽使至鄜延议事。

初，夏人至边，每言已干辽国乞和。嗣闻辽使萧昭彦至中国，因遣使如鄜延云，欲议事。宋帝诏经略司面谕边吏：如有文字，密录奏报，不得擅接。但云已申取保安军指挥，奏听朝旨。（《长编》五百五。按辽使萧昭彦谓接伴刘逵曰：“北朝遣泛使，只为西人煎迫住不得，若南朝肯相顺，甚善。”逵曰：“事但顺理无顺情。”是日，辅臣进呈逵语录，众皆称之。上问曾布：“何如？”布亦称善。）

南路都统军嵬名律令（一作律凌）遗书熙河，请修贡。

蕃部嵬名密赍律令书入熙河，称夏国欲遣使再乞修贡。经略使孙路上其书，宋帝以擅接夏国文字降路官，以书还使者。（《长编》五百六）二月，遣使如宋告哀，且谢罪。宋却其使不纳。

西界首领移勿乜赍到宥州牒，称正月二十日国母薨，遣使诣阙讣告，兼附谢罪表状。鄜延经略使以闻，枢密院言：“西人犯顺日久，前后寇边不一，兼近于泾原路作过，狼狈遁归。今计穷请命，理难便行接收。假令朝廷异日许以朝贡，亦须划河为界，即于边防经久稳便。今来却只欲巡绰、探望人所至处为界。许令通进牒本，显于事机有害。”宋帝诏吕惠卿指挥保安军顺宁寨，令谕移勿乜等：“彼界累年作过，今国母已死，有谢罪表状，缘止是空文，别无实事，未敢闻达朝廷。今若是恭顺实情，即令遣亲信谨密可委之人，同移勿乜等界首说话，候移勿乜等果将到本国亲信人，即令自来有主谋献计作过之人，如嵬保没、结讹遇（一作圭布默玛、结鄂裕）等，先次拘执，进献与朝廷谢罪。本路有可凭信，即敢具事理奏闻，候得朝廷允许，方可商量。”仰吕惠卿详此指挥顺宁寨官，依此说谕，逐旋对答语言奏闻。（《宋史·哲宗本纪》及《长编》五百六。又是日，上以西人叩关请命，甚悦。辅臣皆言：“祖宗以来，边事未尝如此。元昊猖狂，朝廷之遣使告北敌令指约。今其计穷引咎，可谓情见力屈，朝廷威灵固已震动远人，兼边事自尔收敛，于公私为利不细。”上亦曰：“公私之力已不堪。”章惇等又言：“北敌方遣使劝和，今彼已请命，更无可言者，此尤为可喜。”上曰：“庆历中，乃至于求北敌。”惇曰：“此是吕夷简及臣从祖得象为此谋，其人皆无取，故至于此。及富弼奉使，增岁赂二十

万，半以代关南租赋，半以为谢弹遏西戎之意。”曾布曰：“近世宰相，夷简号有才，其措置犹如此。今日边事，乃出于陛下睿明，应接听纳之际，动中机会，故能如此。”上曰：“夷简实有才。”布曰：“夷简、丁谓皆宰相之有才者，然趣操皆不正。”上曰：“丁谓小人。”惇曰：“谓诚有才，非夷简比。当元昊旅拒时，或谓若丁谓在朝，应接必有理。元昊以戊寅岁叛，谓以丁丑岁卒。”布曰：“丁谓虽有才，然实小人也。”布再对，上又曰：“边事可喜，祖宗以来未尝如此。”布曰：“臣以谓陛下睿明听纳之际，动中机会，故能如此，古人以谓好谋而能听，人主于能听最为难事。若能听者，当何事不济！今日边事，朝廷但示以经划大方，一切责在帅臣，令其见利则动，不强其所不能，故举有成功，而无败事。夷狄所以震动，屈服亦以是也。”）

宋鄜延钤辖刘安败夏人于神堆。

干顺以中国并建城寨，数遭掩击，部族离散，归汉者益众，令驄结讹遇率数万众于神堆及波济立（一作巴勒济圪克）、鲁逊埋（一作鲁逊满达勒）诸险要驻营扼之。鄜延钤辖刘安、张诚自星勒泊、乌延川袭击，斩四千级，降五百余人，讹遇大败还。（《宋史·哲宗本纪》及《长编》五百六）

三月，辽遣签书枢密院事萧德崇如宋，为夏人请缓师，仍献玉带。

萧德崇等见宋帝，遂言：“北朝皇帝敢告南朝皇帝，西夏事早与休得，即甚好。”宋帝令答之曰：“西人累年犯顺，理须讨伐，何烦遣使？”德崇等唯唯而退。其国书略曰：“粤惟夏台，实乃藩辅。累承尚主，迭受封王。近岁以来，连表驰奏，称南兵之大举，入西界以深图，恳求救援之师，用济攻伐之难。理当依允，事贵解和。盖辽之于宋，情重祖孙；夏之于辽，义隆甥舅。必欲两全于保合，岂宜一失于绥存？而况于彼庆历、元丰中，曾有被闻（按“被闻”字未详），皆为止退。宁谓辄违先旨，仍事远征，倘蔽议以无从，虑造端而有自。”因诏遣郭知章报聘，复书曰：“载书藏府，固和好于万年；使节驰轺，达诚心于二国。既永均于休戚，宜共嫉夫凶奸。惟西夏之小邦，乃本朝之藩镇。曲加封植，俾获安全。虽于北尝预婚姻之亲，而在南全居臣子之分。涵容浸久，变诈多端。爰自累岁以来，无复事上之礼：赐以金缯而不已，加之封爵而愈骄，杀掠吏民，围犯城邑，推原罪恶，在所讨除。聊飭边防，稍修武事，筑据要害，扼控奔冲。辄于去岁之冬，复驱竭国之众，来攻近塞，凡涉两旬，自取死伤，数以万计，粮尽力屈，众溃宵归。更为诡诞之词，往求拯救之力，狡狴之甚，于此可知。采听之间，固应洞晓。必谓深加沮却，乃烦曲为劝和。示以华缙，将之聘币，礼虽形于厚意，事实异于前闻。缅料雅怀，诚非得已，顾于信誓，殊不相关。惟昔兴宗致书仁祖，谕协力荡平之意，深同休外御之情，至欲全除，使无噍类，谓有稽于一举，诚无益于两朝。祖宗谄谋，斯为善美，子孙继志，其可弭忘。今者详味缙词，有所未喻，辄违先旨，谅不在兹。如水念于前微，宜益敦于大信，相期固守，传示无穷。矧彼夏人，自知困蹙。哀祈请命，屡叩

边关。已戒封疆之臣，审观情伪之状，倘或徒为空语，阴蓄奸谋，暂示柔伏之形，终怀窥伺之志，则决须讨伐，难议矜容。若出自至诚，深悔前罪，所言可信，听命无违，即当徐度所宜，开以自新之路。载惟聪达，必亮惴惴，方属清和，冀加葆啬。续遣使人咨谢。”次又回白< 卩>子曰：“夏国自李继迁之后，建国赐姓，莫非恩出当朝，所有疆土，并是朝廷郡县之地。昨自元丰以来，累次举兵犯塞。中间亦曾赦其罪戾，加以封册，许令朝贡，兼岁赐金帛，又遣官与之分划疆界。而狡诈反复，前后于陕西、河东作过不一。无非母子同行，举国称兵，攻围州军城寨。去冬又于泾原路攻打城寨近二十日，攻城之人被杀伤者不肯万数。势穷力屈，方肯遁归。比之日前愆过，不为不重。所以诸路边臣，务须出兵，讨逐捍御，及于控扼贼马来路，修筑城寨，御其奔冲。夏人自知罪恶深重，乃更缔造诡词，饰非文过，干告北朝，求为救助。缘南、北两朝，百年和好，情义至厚，有同一家。夏国犯顺，罪恶如此，在北朝所当共怒。兼详庆历四年，兴宗皇帝致书仁宗皇帝云：‘蠢尔元昊，早负贵朝，叠遣林牙，赍诏问罪。尚不悛心，近诱去边民二、三百户。今议定秋末，亲领师徒，直临贼境’。又云：‘恐因北军深入，却附贵朝，或再乞称臣，或依常作贡。缅维英晤，勿赐允从’。又庆历五年书云：‘元昊纵其凶党，扰我亲邻。属友爱之攸深，在荡平之亦可。’又云：‘藩服乱常，敢贡修之不慎；亲邻协力，务平定以永绥。’又皇祐元年，再报西征云：‘元昊伺窥边事，特议讨除。再幸边方，欲歼元恶。而夏国驰告，元昊云亡。嗣童未识于矜存，狡佐犹怀于背诞。载念非缘逃户，可致亲征。熟料凶顽，终合平荡。苟有稽于一举，诚无益于两朝。’至皇祐二年，报西征回，则云：‘爰自首秋，亲临戎境。先驱战舰，直济洪河。寻建浮梁，泊成戍垒，六军蓄锐，千里鼓行。’又云：‘专提骑旅，径趣泉巢。群物货财、戈甲印绶、庐帐仓廩、橐驼之属，焚烧殆尽。螫毒寻挫，噍类无遗。非苟窜残旅，全除必矣。’又云：兼于恃险之津，已得行军之路。时加攻扰，日蹙困危。虽悔可追，不亡何待？’载想同休之契，颇协外御之情。深维北朝兴宗皇帝，惇笃欢和，情义兼致。方夏人有罪，则欲协力讨除；及西征胜捷，则驰书相庆；虑彼称臣修贡，则欲当朝勿赐允从。自来两朝欢好岁久，契义日深，在于相与之心，宜有加于前日。今乃以夏人穷蹙之故，诡词干告，既移文计会，又遣使劝和，恐与昔日兴宗皇帝书意稍异。况所筑城寨，并无与北朝边界相近之处，即非有违两朝信誓。必料北朝臣僚不曾检会往日书词及所立誓约，子细闻达，寻具进呈奉旨。据夏人累年于当朝犯边作过，理合讨除。况今来止是驱逐备御，于两朝信誓及久来和好殊不相干。兼夏人近以事力困穷，累次叩关请命，且云国母丧亡，奸臣授首，欲遣使告哀谢罪。缘夏国久失臣节，未当开纳，今以北朝遣使劝和之故，见令边臣与之商量。又缘夏人前来，曾一面修贡，一面犯边。虑彼当计穷力屈之时，暂为恭顺，以缓我边备。候边臣审察，见得情伪，若依前狡诈，内蓄奸谋，俟后少苏，复来作过，则理须捍御，及行讨伐。若果是出于至诚，服罪听命，亦当相度应接，许以自新。”初，德崇坚乞国书内增“休退兵马，还复土疆”等语，往复议论，卒不从。德崇留京师凡三十七日乃归。（《长编》五百七及五百九。按德崇如宋，与夏国二人同行，见《长编》五百五。）

宋筑环庆路定边城。（《宋史·哲宗本纪》）首领吴名革、李讹移率部族、孳畜，叛附于宋。宋皆授以官及赐钱、帛有差。（《宋史·哲宗本纪》）

宋知府州折克行，获夏国钤辖令王皆保。（《宋史·哲宗本纪》）

夏四月，宋筑鄜延、河东路暖泉、乌龙寨，又筑威羌城。（《宋史·哲宗本纪》）诛嵬保没、结讹遇等，遣使入告于宋。

初，国中用事臣嵬名阿吴死，仁多保忠等皆统军在外，嵬保没与讹遇日劝梁氏开边。及辽使解和，嵬名济等劝干顺遣大使嵬名布移聿介入告哀，且谢罪。宋帝令擒二人入献，即与接收表章。干顺乃以梁氏死归罪二人，杀之。遣蕃部创格裕至顺宁寨告其事，且云：“已差大首领庆瑭嵬名科卜、磋迈喀结桑来计会，今国主恭顺，乞朝廷早赐接收。”庆瑭、磋迈，皆蕃官名也。（《长编》五百八）

毁鄜延路烽台，经略司遣兵追，不及。（《长编》五百十）五月，宋筑鄜延路金汤城。（《宋史·哲宗本纪》）宋建西安州及天都等寨。

兰州，本汉金城郡地，为宋极边，恃河为固。每岁河冰合，必严兵以备。兰州录事参军张叔夜曰：“此非计也。不求要地守之，而使敌迫河，则吾既殆矣。有地曰天都者，介于五路之间，乃夏人啸聚之区，凡欲举兵以犯诸路，则必就彼点集，然后议其所向。以故每一聚兵，则五路不得安枕，此当今之所宜先。”书再上，枢密行其策，果得其地，乃建为西安州。自是，夏人不敢窥兰州。（《宋史·哲宗本纪》及《张叔夜传》）

辽药师奴等使宋，回奏宋罢兵。（《辽史·道宗本纪》）兰会正钤辖革瓦娘（《长编》作格斡宁）以部落叛降于宋。宋授官，赐银、绢、缗钱。（《宋史·夏国传》）

六月，复遣使赍牒诣鄜延告哀。

使人再至鄜延，朝议固却其表，无以示收纳意，令保安军移牒谕之。干顺遣首领德明雅卜裕木攀至顺宁寨，但有告哀公牒，无谢罪表状。寨官李子明诘问，使言：“夏国与朝廷是父子之国，今已恭顺，旧例先送告哀公牒，然后差使副赍表状赴阙。”子明以与前议不合，申经略司吕惠卿以闻。宋帝命再牒宥州谕之。惠卿因上疏曰：“西敌之所以在河外者，以有河南为之限；所以有河南者，以有横山为之阻。今若划河为界，则皆失之彼，岂不思一苇可渡而据横山之险？他路臣不能知，如本路所筑九寨，与暖泉、金汤二寨，幸皆就绪，东西殆千里。而新筑之外，更拓二三十里，以为堡铺，则形胜膏腴，占据殆尽。干顺因其母死，归咎奸臣，杀之以谢罪，而请入贡。则我虽未能一举而覆巢穴，然自有国以来，用兵西方，未有如今日之盛

也。”既而干顺四遣使者来，词益恭。朝廷亦得其近上首领，道其密谋，以为急则纳土北归。于是，诏趣惠卿接纳焉。（《长编》五百八及五百十一。又《长编》：是月戊寅，鄜延奏，西人说话次第，令依五月指挥施行。又壬午，鄜延再奏：“西人来议告哀，云已收接公牒，欲便谕以已奏朝廷，乞发遣告哀使赴阙，朝廷必须允从。”上许之，辅臣皆称善。吕惠卿言：“诸路进筑未已，不尔无以取信也。”）

宋筑定边白豹城。（《宋史·哲宗本纪》。按《长编》：白豹城进筑毕工条小注载《陈师道与曾布书》，乞罢进筑，其略云：“进筑不已，则兵不得罢，盖先已之乎？若谓可以制敌，则汉取阴山，匈奴过而恸哭；开西域，发兵争之，故谓断其右臂。师道居东，莫知今之可否？但闻诸路竞进，日夜奏功，而未闻西人举国而争，则必非其所急也。苟不能制其命，则老师费财，杀人盈野，何所用之？若谓且筑且进，渐据横山，然后可制其命，既数岁矣，横山安在耶？若复数岁，则诸将穷富极贵矣。人情得所欲，肯复出力，蹈其所难乎？则是横山终不可得，徒为将帅取富贵之资尔。横山天险也，下临平夏，存亡所系，彼必举国争之，恐亦未易得也。若谓今之所据即横山也，则师道闻之，宥州在横山之下，南距米脂三舍，而近今延安奏功广地四百里，则宥在其腹，然不云得宥州也，则四百里之广岂可信哉？胡地惟灵、夏如内郡地，才可种荞豆，且多沙磧，五月见青，七月而霜，岁才一收。以银州草惟柴胡，萧关之外有落藜与咸菽，以此知不宜五种也。即可种，安得人实之？若不徙民，则募军，二者孰从乎？内地空此以实彼，舍易而即艰，何益？且辟土益广，则去府益远，平常缓请急报，卒不相及，河东、麟府之患，世所知也。若谓今所据可以制敌而不争者，非不敢，乃不能尔。敌虽蕞尔，然元昊用之以抗中国，其地与民固自若也。而今反不能争其所急者，非养其力以有待，则无其人，无其人则诸部不为用也。若此，则师道之忧，有甚于前也。”）

秋七月，宋知环州种朴，获夏国盐军讹勃啰。（《长编》作额伯尔）

朴檄赤羊川，获赏罗讹乞（《长编》作尚罗格依）家百五十馀口，孳畜五千。夏人千馀骑往追，朴战却之，擒监军讹勃啰及首领戾丁讹遇（《长编》作埒丹鄂特裕勒）。朴送讹乞等家属至京，宋存恤之，旋遣人持其家属信号，来招讹乞三人。（《宋史·夏国传》。按《长编》：七月甲子，环庆路经略司言：“知环州种朴领兵至赤羊川，收接到尚罗格依家属共一百五十馀口，孳畜五千。夏贼千馀骑来追，与战，生擒监军额伯尔并首领埒丹鄂特裕勒。先是，尚罗格依遣纳木依申报欲归汉，朴以兵迎接。是日，值监军点检野寨鄂济尔与首领辈皆往候之，朴乃获其骨肉及首领扎实等数家以归。”诏环庆经略司：“更切体问，额伯尔如委是西界监军，即取问在西界日所管地分、人、马数目及彼界有何家属并见闻事，速具状以闻，仍管押赴阙。所有尚罗格依之家属，即多方存恤，无令少有失所。及选差信实之人，通达木家信号，前去招诱鄂济尔，令早出汉。”又九月戊辰，环庆路管押到生擒西界监军额伯尔引见，上谓近臣曰：“此人颇魁伟，夏人多令鞫狱问，与旺莽额甚族属附

？”译者对云：“是侄。”又问：“是与不是？”殿上人对曰：“是。”问：“甚时差出？”对曰：“四月内，小大王差出来。”称罪者再三。上宣谕释缚贷死，旋送潭州编管。）

毁宋鄜延新修堡子。（《长编》五百十四）八月，宋取会州。

元丰中，宋虽加兰会与熙河为一路，而会州实未复。至是，始取会州城之，以西安城北六寨隶焉。（《宋史·哲宗本纪》及《地理志》）宋建葭芦寨。

知太原孙览领是役，顿兵吐浑河，约勒部伍为深入穷讨之状。夏人疑惧，不敢争。（《西夏事略》。按《长编》：六月，太原府路铃辖张世永等，探闻得西界地分、名胜、罗默隆横川一带贼马屯聚，寻领兵马前去掩杀得功，人并推恩。）

宋河东道筑八寨，通道鄜延。（《长编》五百十四。按《长编》：七月甲辰，诏陕西、河东严戒边吏，不得以传闻西人遣使告哀、谢罪，便于边备懈弛；及进筑之际，不过为提防捍御之计，如缓急小有误事，帅臣以下当重行黜责。）

熙河军入界，杀首领仁多洗忠。

洗忠，仁多保忠弟。熙河遣硬探入界。洗忠挺身斗，被杀。夏众出援，夺其尸而回。（《长编》五百八十四）遣众围南宗堡。

初，西蕃阿里骨死，其子瞎征残暴嗜杀，部曲离贰。洮州安抚使王赡率兵取其地，瞎征众溃，遂自青唐入降。大酋心牟钦毡与董毡妻契丹公主、阿里骨妻夏国公主（即董毡子蔺逋比妻），迎董毡疏族溪巴温入青唐，立其子拢拶为主。假夏国公主书请援，干顺遣兵五千余人攻南宗堡，王赡以熙河蕃兵击之，乃退。（《长编》五十四）

九月，遣使如宋谢罪。

见于崇政殿，其表辞曰：“伏念臣国起祸之基，由祖母之世。盖大臣专僭窃之事，故中朝兴吊伐之师。因旷日以寻戈，致弥年而造隙。寻当冲幼，继袭弓裘，未任国政之繁难，又恐慈亲之裁制。始则凶舅擅其命，顿生衅端；继复奸臣固其权，妄行兵战。致貽上怒，更用穷征。久绝岁币之常仪，增削祖先之故地。咎归有所，理尚可伸。今又母氏薨殂，奸人诛窜，故得因驰哀使，附上谢章。矧惟前咎之所由，蒙睿聪之已察；亦或孤臣之是累，冀宝慈之垂矜。特纳赤诚，许修前约。念敕西陲之弊国，得反政之初；愿追烈祖之前猷，赐曲全之造。俾通常贡，获绍先盟，则质之神灵，更无于背德，而竭乎忠荃，永用于尊王。”宋帝旋赐诏曰：“省所上表，具悉。尔国乱常，历年于此。迨尔母氏，复听奸谋，屡兴甲兵，扰我疆场。天讨有罪

，义何可容。今凶党歼除，尔既亲事，而能抗章引愿，冀得自新。朕喜尔改图，姑从矜贷。已指挥诸路经略司，各据巡绰所至处，明立界至，并约束城寨兵将官：如西人不来侵犯，即不得出兵过界。尔亦当严戒缘边首领，毋得侵犯边境。候施行讫，遣使进纳誓表，当议许令接收。”帝谓曾布曰：“西人未尝如此逊顺。”布曰：“诚如圣谕。元祐中固不论，元丰中表章极不逊，未尝如今日屈服也。”（《长编》五百十五。按《长编》：七月，鄜延奏：“已接收宥州公牒，遣来使赍白札子谕其主，令遣使赴阙。”戊申，鄜延奏：“已回牒宥州。”吕惠卿初但以白札子遣西人还，令遣使赴阙，有旨令回牒故也。癸丑，鄜延奏：“缴宥州牒，已遣告哀谢罪人使十二人赴延州，七月十日过界。”又奏：“西使过界，乞发遣赴阙。”从之。令以二十三日行下。八月甲戌，吕惠卿奏：“西人欲于旧界首约回人马，遂以新定巡绰处，靠旺并谕之。寻即听命。”己丑，鄜延奏：“缴宥州牒本，云人使未见赴阙，已是疑阻。又诸路修筑城寨，虏掠人口未已，请止绝。答以诸路进筑系西夏作过已来，先得朝旨，本路难议移文止绝。人使已于二日赴阙，候到朝廷，必有处分。”辛卯，吕惠卿奏：“乞许西人依例遣使遗进及行吊祭。”令奏听朝旨。乙未，鄜延奏：“宥州牒，西夏欲以国母亡遣使遗进。”吕惠卿言：“西人恭顺不虚，乞与接收表状及行吊祭之礼。”诏令受宥州牒，谕以候奏，得朝旨牒报。九月，吕惠卿缴奏：“宥州牒遣遗进使副。”诏以夏国自知梁氏系有罪之人，难议收受遗进及行吊祭之礼，以国主能悔过谢罪，已降诏候遣使进纳誓表，特与接收。令牒报宥州照会。惠卿又乞以回诏先报宥州，从之。）

以二千骑出浮图岔，与宋师战，败之，杀其供奉官陈告差使李戴。

时谢罪之使甫还，宋帝以侵犯汉界、有违誓表，诏鄜延路经略司，令保安军移牒宥州闻知本国主，令遵依已降诏书施行。（《长编》五百十五）闰九月，统军仁多保忠率兵助西蕃围湟州，不克。

王瞻击降拢拶，以邈川为湟州，青唐为鄯州。二城距兴、灵止二百里。南有讲珠、罗啰二城，与湟州北阿讹城相接。羌酋心牟钦毡、{钱}罗结聚数千人围湟州，遣使数辈乞师。干顺使保忠及达摩等三监军兵十万助之，先断炳灵寺桥，烧星章峡栈道，四面急攻。分兵破南宗堡，获守将刘文圭，驱至城壕，谓总管王湑曰：“吾所欲城与地耳，第以城归我，当舍汝。”湑谓文圭曰：“为吾语夏人：天子俾吾守城，能杀我，城可得也。”攻围十六日，湑守益坚。保忠令于南城积薪数万，将焚门。会诸将苗履、姚雄、李忠杰各率所部赴援，战于青唐危，烟尘亘天，夏人不知多少，惶遽渡湟水还，钤辖嵬名移遇被获。（《长编》五百十六）

冬十月，移牒鄜延，请申约束。

初，宥州牒鄜延，请遣使进誓表。中国以湟州之役，不肯接收，回牒诘犯塞之故。至是，复牒鄜延，言已约束首领，不得更犯汉界。（《长编》五百十七。）

宋诏保安军牒宥州，无得犯青唐界。（《长编》五百十七。按《长编》：是月丙辰，章惇留身奏事甚久。曾布再对，上谕布曰：“章惇以夏人犯邀川，欲因此讨伐，遂灭夏国。”布曰：“不审圣意以为如何？”上笑曰：“何可听？”布曰：“陛下圣明远虑，此天下之福。近岁诸路进筑城寨，兵民劳敝，财用、粮食俱缺乏。幸而西人款塞，遂可休息。今青唐用兵，士卒困敝日甚。若更经营诛灭夏国，如此即忧在中国，不在四夷也。兼臣在熙宁中，见朝廷欲灭交趾，尝与主将郭逵言：‘交人虽海隅尺寸之地，然有国百年，兴衰存亡必自有天数，岂人力所能必？’既而果无功。况夏国岂交人之比也。”上深然之。）

遣使如宋，贺天宁节。（《九朝编年备要》）十二月，遣令能嵬名济如宋，进誓表。

表曰：“臣国久不幸，时多遇凶，两经母党之擅权，累为奸臣之窃命。频生边患，增怒上心，衅端既深，理诉难达。幸凶党伏诛，稚躬反正。遐驰恳奏，陈前咎之所归；乞绍先盟，果渊衷之俯纳。故班昭而申谕，获贡誓以输诚。谨当飭疆吏而永绝争端，戒国人而常遵圣化。违约则凶咎再降，背盟则基绪非延。约束事条，恭依处分。”宋帝诏报曰：“尔以凶党造谋，数干边吏，而能悔过请命，祈绍先盟。念彼种人，均吾赤子，措之安静，乃副朕心。嘉尔自新，俯从厥志，尔无爽约，朕不食言，自今以往，岁赐如旧。”（《宋史夏国传》。按《长编》：十一月己卯，鄜延奏，西夏进誓表官称，昨一奏便蒙听许，岂敢不依回诏指挥。兼别有谢恩表，诏差工部员外郎韩跂押伴。又诏诸路，未降誓诏以前收接西界投来人户，候降誓诏，别听指挥。又十二月庚子，夏国差使副哩宁威明济寨等诣阙，进上誓表谢恩及进奉御马。诏依回赐银器、衣着各五百匹、两。又癸丑，诏陕西河东经略司，夏国已进誓表及降誓诏，令不得侵犯及收接投来人口。）

遣使如宋，乞贺正旦。

先保安军牒言，誓表内“诫国人而”字下一字犯真宗皇帝庙讳（按《长编》作诫国人而恒遵圣化。恒为真宗名，故谓犯庙讳。《宋史·夏国传》改恒为常）。干顺遣使谢罪，且乞遵例贺正。使人并言：“国主效顺，皆大首领嵬名济辅导之力。今贺正届期，济劝国主遣使贡奉，因誓诏未至，不敢遽进。”（《长编》五百十八至十九）

以宋罢兵，遣使谢于辽。（《辽史·道宗本纪》）

是岁，宋取讲朱城。（《西夏书事》）

西夏称永安二年

春正月，宋哲宗崩。弟端王佖即位，是为徽宗。（《宋史·哲宗本纪》）宋赐国主银绢。

诏曰：“诏夏国主，朕钦承骏命，嗣守丕基。眷西土之世臣，实本朝之藩衍，宜推庆赐，昭示宠恩。今差左藏库副使李昭珙赐登极银、绢，具如别录，至可领也。故兹昭示，想宜知悉。夏热，比平安好否？书指不多及。”（《西夏纪事本末》）

西蕃以南宗堡来附，不受。

南宗，北控夏国，南接星章峡，西连宗哥城，形势天险。自{钱}罗结叛，诸堡残破，及官军出，羌众溃散，诸城咸即归顺。独南宗负固不下，姚雄、苗履屡攻不克。羌人请附夏国，干顺不受，惟假兵数百戍之。（《长编》五百十九）

秋九月，遣使如宋奠慰及贺即位。（《宋史·夏国传》）冬十月，入贡于宋。（《宋史·徽宗本纪》）使宋贺天宁节。（《宋史·夏国传》）宋赐国主《历日》。

诏曰：“诏夏国主，朕始承天命，恭授人时，眷言西陲，世稟正朔。乃前嗣岁，诞布新书，俾我远民，咸归一统，尚遵时令，益懋政经。今赐元符四年《历日》一卷，至可领也。故兹昭示，想宜知悉。冬寒，比平安好否？书指不多及。”（《西夏纪事本末》）

十一月，表请于辽，请尚公主。（《辽史·道宗本纪》）十二月，宋赐进登位土物，回诏。

诏曰：“西夏国主，省表具所贺登位，并差人进奉御马一十匹、长进马二百匹、驼一百头事具悉。朕丕承七圣，光宅万邦。眷西土之世臣，效本朝之贡职。黄朱布乘，陪隶在廷。备见惓成，弥嘉恭恪。其差来人所赐物色，亦具赐目。故兹昭示，想宜知悉。冬寒，比平安好否？指书不多及。”（《西夏纪事本末》）

卷二十二

西夏称永安三年

春正月，辽道宗洪基薨。孙延禧即位，是为天祚，改是年为乾统元年。（《辽史·道宗本纪》）夏五月，遣使如宋，进助山陵。

宋葬钦圣宪肃皇太后、钦慈皇太后于永裕陵，干顺遣使献物助工。（《西夏书事》）六月，遣使如辽慰奠。

干顺遣御史中丞苏愈如辽，时与高丽使并至。愈礼节娴雅，馆伴耶律德伦特重焉。（《辽史·天祚本纪》及《西夏书事》）十二月，遣使如辽，贺即位。（《辽史·天祚本纪》）

是岁，始立国学。

自元昊创建蕃学，国中由蕃学进者，诸州多至数百人，而汉学日坏。士皆尚气矜，鲜廉耻，甘罹文网。干顺患之。御史中丞薛元礼上言：“士人之行，莫大乎孝廉；经国之谟，莫重于儒学。昔元魏开基，周、齐继统。无不遵行儒教，崇尚《诗》、《书》，盖西北之遗风，不可以立教化也。景宗以神武建号，制蕃字以为程文，立蕃学以造人士，缘时正需才，故就其所长以收其用。今承平日久，而士不兴行，良由文教不明，汉学不重，则民乐贪顽之习，士无砥砺之心。董子所谓‘不素养士而欲求贤，譬犹不琢玉而求文采也’，可得乎？”于是干顺命于蕃学外特建国学，置教授，设弟子员三百，立养贤务以廩食之。（《宋史·夏国传》。及《西夏书事》）

恤仁多洗忠家。

洗忠战没熙河，子幼未授职。仁多保忠请之，干顺命先以廩禄赐其家。（《西夏书事》）

西夏称贞观元年

春二月，与河西节度使赵怀德结婚。

怀德即朮拶。中国以羌人久乱，王贍等不能定，议弃鄯、湟，赐朮拶姓名曰“赵怀德”，授河西军节度使，其弟邦辟勿丁𠵿曰“怀义”，同知鄯、湟二州事。干顺见西蕃恢复故土，重申姻好，以宗室女妻怀德。（《宋史·吐蕃传》）

复遣使如辽，请尚公主。

干顺使殿前太尉李至忠、秘书监梁世显如辽，贡献请婚。辽主问干顺为人，至忠对曰：“秉性英明，处事谨慎，守成令主也。”辽主善其对，命徐议之。（《西夏书事》）

遣李造福、田若水如辽求援。时干顺为宋所攻故也。（《辽史·天祚本纪》）秋八月，筑沿边堡寨。

国中素少城寨，干顺仿中国制，于东北沿边多树寨栅。廊延路以闻，朝议举兵牵制。知秦州何常争之，兵不出。（《宋史·何常传》）冬十月，汧丁讹遇自环州还。

初，讹遇以信号与种朴，令招其家人及其所部，并谕讹遇降。讹遇不可，囚之土室中三年。至是赂守者，得脱还。干顺嘉其不屈，擢为监军使，使守赤羊川。（《西夏书事》）

西夏称贞观二年

宋筑石堡四城。

陶节夫知延安府，筑石堡等四城。石堡以天涧为隍，可趋者唯一路，夏人窖粟其间以千数。既为宋有，其酋惊曰：“汉家取我金窟圉！”亟发铁骑来争。节夫分部将士遮击之，斩获统军以下数十百人。（《宋史·陶节夫传》）

春二月，建卧佛寺于甘州。

干顺自母梁氏卒，辄供佛，为母祈福。甘州僧法净于故张掖县西南甘浚山下，夜望有光，掘之，得古佛三，皆卧像也，献于干顺。干顺令建寺供之，赐额“卧佛”。（《西夏书事》。按《甘肃通志·明宣宗敕赐宝觉寺碑》云：“甘州城西南隅有卧佛寺，西夏永安元年建。李乾顺之时，有沙门族姓崑咩，法名思能，蚤从燕丹国师妙领真乘，深造茱萸，阖境贵贱耆老，敬信无间，号之为国师。一日，敛神静居，若闻梵呗之声，起而求之崇邱之侧，其声弥近，若在潜翳之下者，发地尺馀，有翠瓦罩焉，复下三尺，有金甃覆焉，得古涅槃佛像，乃建斯寺。”据此，则建寺之年与甘州僧名俱异，宝觉寺即卧佛寺易名。）

三月，羌人围鄯州，河西军节度使赵怀德请援。

羌人多罗巴奉唃廝囉裔溪赊罗撒，谋杀怀德以复国，举数万众围鄯州。怀德遣使至夏国请兵，干顺遣仁多保忠帅兵援之。兵未至，多罗巴三子皆善战，怀德力不支，

弃州奔河南。（《宋史·王厚传》及《西夏书事》）

夏五月，宋议城南宗寨。

王厚与童贯及诸将议曰：“南宗寨在州之北，距夏国卓罗右厢监军司百里，而近夏人交构诸羌，易生边患，今若城之，可以控制夏人。”（《西夏纪事本末》）

六月，复遣使如辽，请尚公主。（《辽史·天祚本纪》）秋九月，封弟察哥为晋国王。

察哥，干顺庶弟，雄毅多权略，引弓二石馀，射洞重甲。尝偕仁多保忠援{钱}罗结，兵败，前迫湟水，不得渡。察哥持弩拒之，一发中苗履副将，宋兵退，乃免。任都统军，镇衙头。建议言：“自古行师，步骑并利。国家用‘铁鹞子’以驰骋平原，用‘步跋子’以逐险山谷，然一遇陌刀法，铁骑难施；若值神臂弓，步奚自溃。盖可以守常，不可以御变也。夫兵在审机，法贵善变，羌部弓弱矢短，技射不精，今宜选蕃汉壮勇，教以强弩，兼以標牌，平居则带弓而锄，临戎则分番而进。以我国之短，易中国之长，如此则无敌于天下矣。”干顺是其策，封晋国王，使掌兵政。（《西夏书事》。按《宋史·兵志》：政和三年，何常奏：“西贼有山间部落谓之‘步跋子’者，上下山坡，出入溪涧，最能逾高超远，轻足善走。有平夏骑兵谓之‘铁鹞子’者，百里而走，千里而期，最能倏往忽来，若电击云飞。每于平原驰骋之外，遇敌则多用‘铁鹞子’，以为冲冒奔突之兵。山谷深险之处，遇敌则多用‘步跋子’，以为击刺掩袭之用，此西人步骑之长也。”）

冬十月，复遣使如辽求援。（《辽史·天祚本纪》。按毕氏《通鉴》云：“是岁，宋童贯、王厚遣兵复河湟。”夏盖闻之而求援耳。）十二月，遣使如宋，贺正旦。

使臣田守义朝贺毕，就馆燕。时中国谋伐夏，馆伴吕约试探虚实，守义正色曰：“如君所言，岂使臣分内事耶？”约愧而止。（《西夏书事》）

西夏称贞观三年

干顺执卓罗右厢监军仁多保忠。

保忠与国有隙，欲叛降宋。宋蔡京秉政，侦知之，使熙河兰会路经略使王厚招之。厚云：“保忠虽有归意，而下无附者。”章数上，不听。京愈责厚，厚急，乃遣弟诣保忠。还为夏之逻者所获。干顺遂追保忠赴牙帐而夺其权。（《宋史·夏国传》）

春三月壬寅，宋童贯、王厚帅大军发熙州，遣知通远军潘逢权领湟州，知会州姚师

闵权领兰州，控御夏国边面。（《西夏纪事本末》）夏四月，援青唐。

以万众阵子临宗、乳酪河之东，会闻谿谿罗撒败于宗哥，敌气沮伤。王厚即遣张诚率师赴之，夏人望风而退。（《通鉴长编纪事本末》）六月，遣李造福、田若水如辽求援。（《辽史·天祚本纪》）

冬十月，攻宋泾原。

干顺既执保忠，蔡京犹责王厚诱致，厚曰：“虽不为所杀，亦不能复领军政，使得之，一匹夫耳，何益于事？”京怒，必令金、帛招致之。夏人乃点兵，延、渭、庆三路各数千骑出没，声言假兵于辽矣，遂入泾原。（《宋史·夏国传》。按《李南公传》：知延安府，夏人攻泾原，南公出兵捣其虚，夏兵乃退。）

与宋熙河路钤辖赵隆遇于铁山，战，败绩。

时夏人入泾原。宋帝令熙河兵深入，毋令专向东方。宋师至铁山，与夏人遇。隆先登，士皆殊死战，夏人乃解去。（《宋史·赵隆传》）围宋平夏城。

宋诸校欲出战，泾原副都总管王恩曰：“贼倾国远寇，难以争锋，宜以全制其敝。彼野无所掠必携，携而遇伏必败。”乃先行万人设伏。夏既退师，果遇伏，亡失甚众。（《宋史·王恩传》）

攻宋镇戎军。

初，蔡京听鄜延经略邢恕之言，使熙河造船，直抵兴、灵以空夏国巢穴。其谋皆迂诞，有类儿戏，夏人笑之。至是夏人犯镇戎，京知不可用，乃徙邢恕知太原。（《宋史·邢恕传》。按《九朝编年备要》：崇宁三年，夏人寇边，先犯鄜延，又犯泾原。至是，又引大军，直犯镇戎，趋渭州，掠数万口而去。既而又遣渭州蕃落兵士翟胜，持檄抵镇戎军城下，自称诘斥蔡京、蔡卞主权，故京、卞必欲举兵讨之，实因此檄也。四年，林摠使辽，陈夏国之罪，亦举此为词。按《十朝纲要》斥蔡京弄权肆情，无蔡卞。）

西夏称贞观四年

春正月，遣李造福等如辽求援，且乞伐宋。

辽旋遣枢密直学士高端礼等，讽宋罢伐夏兵。（《辽史·天祚本纪》）三月，辽以族女南仙封成安公主来归。（《辽史·天祚本纪》）宋攻银州，陷之。

宋延安人韩世忠，以郡兵从攻银州。夏人婴城自固，世忠斩关杀敌将，掷首陴外，诸军乘之，夏人大败。既而以重兵次蒿平岭，世忠率精锐鏖战，解去。俄复出间道，世忠独部敢死士殊死斗，敌少却。顾一骑士锐甚，问俘者，曰：“监军驸马兀移也。”跃马斩之，夏众大溃。（《宋史·韩世忠传》。按孙覿《鸿庆居士集·韩世忠墓志》，尝从统制官党万战银州，方解鞍顿舍，而贼骑出间道，直捣其营。万狂顾不知所为，公袒裼，持一戈，率其徒战却之。万兵来援，殿而还。又尝遥见一酋，金甲朱旗护兵，意得甚，公驰一骑刺杀之，后牒知为贵将驸马郎君无移者。大帅张深表其功状，上之朝。而宣抚使童贯怒不先己，黜其功不录。）

诱吐蕃合兵逼宋宣威城，执其将高永年，杀之。

宋用蔡京计，命西边能招致夏人者，毋问首从，赏同斩级。又令陶节夫在延安大加招致。夏主欲纳款，遣使翼请，皆弗纳。又令杀其放牧者。夏人遂入镇戎，略数万口，与羌酋溪赊罗撒合夏四监军之兵逼宣威城。知鄯州高永年出御之，行三十里，逢羌帐下亲兵，皆永年昔所抚纳蕃部熟户也，永年不之备，羌遂执永年以叛，遂为多罗巴所杀，探其心肝食之，谓其下曰：“此人夺我国，使我宗族漂落无处所，不可不杀也。”（《宋史·夏国传》及《高永年传》）

攻塞门寨。（《宋史·徽宗本纪》）攻银州，不克。

宋既得银州，议城之。谍告夏人已东，陶节夫料必西趋泾原，官属不肯从。节夫曰：“吾计之熟矣。”乃遣裨将耿端彦疾驱至银州，五日城成。夏人果从泾原至，则城备已固，遂遁去。（《宋史·陶节夫传》）

宋师薄灵州川，不利，引还。

宋知河南府锺傅建言：“河南要地，灵武为根本。其西十五州，六为王土。其东由清远距罗山，走灵州不及百里，夏以五监军统焉。若选将简师先击之，以趋韦州，可断其右臂。徐当拊纳离叛，渐规进取，讫成萧关，可断其左臂。”乃条上十四事，未报。诏诸道进讨。锺傅遣将折可适领锐骑出萧关，即薄灵州川。夏人扶老挟稚，中夜入州城。明日，俘获甚众，而庆兵不至，会别将高永年没于西，而可适又遇雨失道，为夏人所乘，覆师数百于踏口，乃引兵还。（《宋史·锺傅传》及《折可适传》）

夏四月，辽遣萧良如宋，为夏求还侵地及退兵。

时西边驿骚，辽遣良来为泛使，言南朝出兵侵夏国，今大辽以帝妹嫁夏国主，请还所侵地。宋帝谓辽书词悖慢，蔡京草答书，言甚峻，令易之，曰：“夷狄当示包容，今西边方用兵，北边不宜开隙。”赵挺之曰：“陛下信所谓以大字小，乐天者，

保天下也。”（《宋史·徽宗本纪》及《九朝编年备要》）

攻宋临宗寨。

临宗属湟州，围之数重，伏兵乳酪河西，邀截中国援兵。知州辛叔宪，遣部将李宁将兵出战，先以铁骑蹂伏处，纵兵奋击，遂败。（《宋史·徽宗本纪》）

五月，攻宋顺宁寨及湟州北蕃市城，又败。

陶节夫既城石堡、银州，上言：“洪、宥诸州，已在顾盼中。横山之地，十有七八。兴州巢穴浅露，直可计取。”因陈取兴、灵之策。蔡京令西边储粟以待。干顺闻之，先以兵攻顺宁寨，鄜延第二副将刘延庆奋击，乃退。转攻湟州北蕃市城，又为辛叔宪所败。（《宋史·徽宗本纪》及《陶节夫传》）

六月，遣使如辽谢及贡方物。（《辽史·天祚本纪》）宋遣林摠如辽，议与夏约和。

摠使辽，因蔡京密谕见辽主，跪上国书，仰首曰：“夏人数寇边，朝廷兴师问罪，以北朝屡遣讲和之使，故务含容。今逾年不进誓表，不遣使贺天宁节，又筑虎径岭、马练川两堡，侵寇不已。北朝若不穷诘，恐非所以践劝和之意。”时辽主狃于宴安，闻摠言，虽怒不欲加责让，以起边衅，但遣使来告而已。（《宋史·徽宗本纪》）

复遣李造福等如辽乞援。（《辽史·天祚本纪》）

西夏称贞观五年

春正月，辽遣知北院枢密使萧得里底、知南院枢密使牛温舒使宋，讽归所侵西夏地。

夏为宋所攻，来请和解，故辽主有是役。温舒等至宋，方大燕，优人为道士装，索土泥药炉，优曰：“土少不能和。”温舒遂起，以手藉土怀之。宋帝问故，温舒对曰：“臣奉天子威命来和，若不从，当卷土收去。”宋人大惊，遂许夏和。（《辽史·天祚本纪》及《牛温舒传》）

三月，与宋平。宋废银州为银川城，罢五路经制司，徙陶节夫知洪州。（《通鉴纲目》。按《九朝编年备要》：蔡京任节夫帅鄜延，节夫诞妄特甚，每进筑一城寨，即奏云：“此西人要害必争之地。”未一年，自常调迁至枢密直学士，然未尝遣一骑一卒出塞，盖与虏战则有胜负，独进筑则无虞；又皆远灵武数百里之地，虏所不

争，故皆得就功论赏，而京力主之。俄京遂使节夫经制五路，节夫尽檄诸路兵将，以城本路城寨，人率不平。会上意厌兵，宣谕曰：“北戎遣使和解，西边用兵，朝廷既许其叩关请命矣，安用经制五路为？”乃罢节夫五路之命。）

夏四月，纳款于宋。宋悉还崇宁以来侵地。

干顺奉表谢罪，词极恭顺。答诏略曰：“除先朝所划之疆，捐崇宁新取之地。”时知枢密院张康国奏，诏内难为带北朝遣使和解之语。帝曰：“北朝于夏国以此为恩，若不言及，疑中国不信。”赵挺之曰：“陛下之言，神人咸悦。大哉王言，今真见之矣。”乃诏夏国：其城堡，誓表至则赐之。夏又言：故事，地界先定，载于誓言，所以守之也。未肯进誓表。（《契丹国志》及《九朝编年备要》）

六月，遣李造福如辽，谢与宋讲和恩及贡方物。（《宋史·天祚本纪》）

秋八月，与宋通好。宋遣礼部侍郎刘正夫如辽报聘。（《辽史·天祚本纪》）

西夏称贞观六年

入贡于宋。

会中国大宴飨。故制：外国使预宴者，夏使于西廊南赴坐，交使以次歇空，进奉、押衙次交州，契丹舍利、从人则于东廊南赴坐。大中祥符四年，升交州于朵殿，夏州押衙于东廊南头歇空坐。七年，又升龟兹使副于西廊南坐。自后遂为定制。是时于阗、龟兹、涪州夷入贡，贡使坐三使上，成礼而退。（《宋史·夏国传》及《西夏书事》）

西夏称贞观七年

夏六月，以兵戍盖龙垵。

中国既复洮州，复攻溪哥城，西蕃王子臧征扑哥降，建积石军，距盖龙垵不及百里。干顺恐被侵掠，以兵五千戍之。（《西夏书事》）秋九月，移牒定边军，请罢筑堡。

定边军向距甜井嘴、多移岭界堠十馀里，尝筑观化、通化二堡，扼逋祈岭、通祖岭诸隘。至是又于勒崖原筑神堂堡，去卓望处仅三里。干顺移牒请罢役，不报。（《西夏书事》）

冬十月，遣使如宋，贺天宁节。

中国尽收西蕃地，宋帝下诏，曲赦熙河兰湟、秦凤、永兴军路，兵民欢悦。使人由熙河入，一路迎者咸加礼。（《西夏书事》）是岁，入贡于宋。（《宋史·徽宗本纪》）

干顺以成安公主生子，遣使告于辽。（《辽史·西夏外纪》）

西夏称贞观八年

春二月，遣焦彦坚至泾原定疆界，不果。

自绍圣后，西边疆议不定。干顺屡以为言，特遣彦坚入泾原，请划界至。知怀德军种师道留与议，彦坚必欲得故地。师道曰：“如言故地，当以汉、唐为正，则君家疆土益蹙矣。”彦坚无以对。（《宋史·种师道传》）

三月，以宋不归侵地，遣使告于辽。

使人焦彦坚归，干顺与群臣谋曰：“身膺宗社之重，不能复先朝故土，耻也。然宋恃兵威，非仗北朝之力，势且不能。”因使人告于辽，请遣信使谕宋。（《辽史·西夏外纪》及《西夏书事》）

是岁，入贡于宋。（《宋史·徽宗本纪》）

西夏称贞观九年

春正月，入贡于宋。

干顺请辽谕宋，辽主不许。复使入献方物，冀得要请。押伴、左司员外郎范坦应对有节，使不敢争。（《宋史·徽宗本纪》及《范坦传》）夏六月，遣李造福等贡于辽。（《辽史·西夏外纪》）

秋九月，瓜、沙、肃三州饥。

瓜、沙诸州素鲜耕稼，专以畜牧为生。自三月不雨，至于是月，水草乏绝，赤地数百里，牛、羊无所食，蕃民流亡者甚众。监军司以闻，干顺命发灵、夏诸州粟赈之。（《西夏书事》）

冬十月，太白昼见。

群臣咸谓主兵丧，请修省，不报。（《西夏书事》）

西夏称贞观十年

入贡于宋。

夏国入贡，正旦、圣节居多。元丰末，神宗诏夏使见辞仪永依嘉祐八年例。至是中国重立仪制，使人遂遵新仪廷见。（《宋史·徽宗本纪》及《礼志》。按《礼志》：宋定夏使新仪：夏使见日，俟见班绝谢班前，使奉表函引入殿庭，副使随入，西向立。舍人揖躬。舍人当殿躬，奏夏国进奉使姓名，以下祇候见，引当殿前跪。进奉表，舍人受之。副入内侍省官进呈，使者起，归位，四拜，起居，舍人宣有敕赐某物，兼赐酒馔。跪受，箱过，俯伏兴，再拜。舍人曰：“各祇候揖，西出。”次从人入，不奏，即引当殿四拜起居，舍人宣赐分物，兼赐酒食，跪受，箱过，俯伏兴，再拜。舍人曰：“各祇候揖，西出。”辞日，引使副入殿庭，西向立，舍人揖躬。舍人当殿躬奏夏国进奉使姓名，以下只候辞，引当殿四拜，宣赐某物、酒馔，再拜如见仪。）

遣使贡于辽。（《西夏书事》。按《辽史·本纪》、《外纪》、《属国表》俱不载）秋八月，夏州大水。

大风雨，河水暴涨。汉源渠溢，陷长堤入城，坏军营五所，仓库、民舍千馀区。（《西夏书事》）

西夏称贞观十一年

春二月，命选人以资格进。

凡宗族世家，议功、议亲，俱加蕃汉一等。工文学者，尤以不次擢。（《西夏书事》）夏六月朔，白虹贯日。

干顺命诸臣直言得失。御史大夫谋宁克任疏言：“治法之要，不外兵刑；富国之方，无非食货。国家自青、白两盐不通互市，膏腴诸壤浸就式微，兵行无百日之粮，仓储无三年之蓄，而惟恃西北一区，与契丹交易有无，岂所以裕国计乎！自用兵延、庆以来，点集则害农时，争斗则伤民力，星辰示异，水旱告灾，山界数州非侵即削，近边列堡有战无耕。于是满目疮痍，日呼庚癸，岂所以安民命乎！且吾朝立国西陲，射猎为务。今国中养贤重学，兵政日弛。昔人云：‘虚美熏心，秦乱之萌。’又云：‘浮名妨要，晋衰之兆。’臣愿主上，既隆文治，尤修武备，毋徒慕好士之虚名，而忘御边之实务也。”干顺善之，不能用。（《宋史·徽宗本纪》及《西夏书事》）

冬十月，遣使如宋，贺天宁节。

宋制：蕃使同日见辞，先夏国，次高丽，次交趾，次海外诸蛮，所以优夏也。时新置知客省、引进、四方馆、东西上阁门使等官，使者朝辞，蔡京等故作矜严，以示降抑。使回，干顺不悦。（《宋史·徽宗本纪》、《礼志》及《西夏书事》）

西夏称贞观十二年

春三月，遣使入贡于宋。

中国以天赐元圭，册告永裕、永泰二陵，大享群臣。夏使至，燕赆过优，以夸其盛。（《宋史·徽宗本纪》及《西夏书事》）

夏六月，使贡于辽。（《辽史·天祚本纪》）

西夏称贞观十三年

冬，叛将李讹移及其子遇昌复来归，遂遣兵围宋定远城。讹移为宋环州定远大首领，以书遗统军梁咄移曰：“我居汉二十年，每见春廩既虚，秋庾未积，粮草转输，例给空券，方春未秋，士有饥色。若卷甲而趋，径捣定远，唾手可取。定远既得，则旁十馀城不攻而下矣。我储谷累岁，阙地而藏之，所在如是，大兵之来，斗粮无赍，可坐而饱也。”咄遂以万人来迎。宋转运使任谅先知其谋，募民尽发窖谷。咄围定远，失所藏。越七日，讹移遂以其部万馀来归。未几，讹移复围观化堡，而边储已足，乃解去。（《宋史·夏国传》。按李遇昌引夏人入寇，《东都事略》系大观时。）

筑臧底河城。

宋保安军之北，南界上有湫流，名臧底河。夏人近是筑城，为要害必争之地。（《宋史·夏国传》）宋帅刘延庆筑天降山寨，夏人据之，宋人来争。

延庆令裨将韩世忠守北门，世忠夜缒城而上，斩二级，割护城毡以献。（《名臣碑传琬琰集》赵雄、韩世忠碑）

西夏称雍宁元年

春正月，女真完颜阿骨打称皇帝，更国号曰“大金”，称收国元年。（《金史·太祖本纪》）宋熙河将刘法，败夏人于古骨龙。

法将步骑十五万出湟州，秦凤经略刘仲武将兵五万出会州，童贯以中军驻兰州，为两路声援。仲武至清水河，筑城屯守而还。法与夏右厢军战于古骨龙，大败之，斩

首三千馀。（《宋史·夏国传》）

侵宋定边，筑佛口城。童贯以知西安州种师道之兵来争，夏人往御，败绩。

师道率师来夷佛口城。始至，渴甚。师道指山之西麓曰：“是当有水。”命工求之，果得水满谷，夏人以为神。（《宋史·种师道传》）秋，宋师攻臧底河城，夏人败之，遂大掠萧关。

刘仲武、王厚复合泾原、鄜延、环庆、秦凤之师，来攻藏底河城，败绩，死者十四、五，秦凤第三将全军万人皆没。未几，夏人以数万骑略萧关而去。（《宋史·夏国传》）

冬十月，入贡于宋。（《宋史·徽宗本纪》）

西夏称雍宁二年春正月，宋刘法攻仁多泉城，屠之。

法与刘仲武合熙、秦之师十万攻夏仁多泉城，知兰州何灌炮伤足不顾，攻愈力，三日不克。夏援兵不至，城中请降。法受其降，而屠之，获首三千级。（《宋史·夏国传》及《何灌传》）

宋渭州将种师道，以十万众复攻藏底河城，克之。

宋诏帅陕西、河东七路兵征藏底河城，期以旬日必克。既薄城下，夏人守备甚固。官军少怠，列校有据胡床自休者，师道立斩之，尸于军门，令曰：“今日城不下，视此！”众股栗。安边巡检杨震拔剑先登，众噪而登城，斩首数百级，城即溃。时兵至才八日。（《宋史·夏国传》及《种师道》、《杨震传》。按《宋史·地理志》：政和三年，贾炎乞进筑藏底河城，不果。六年，知庆州姚古克之，即威德军。与《种师道传》异。）

秋七月，李讹移被获，伏诛。

讹移在夏国渐用事，与子遇昌常引兵入寇。至是入边侦事，为熙河逻卒所获。宋帝诏诛之，函其首于甲库。（《宋史·徽宗本纪》）宋筑震武城。

由是，唃廝囉之地，悉为宋郡县矣。（《宋史·徽宗本纪》及《九朝编年备要》）冬十一月，攻宋泾原，屠靖夏城。

报仁多泉之役也。时久无雪，夏先使数万骑绕城，践尘涨天，兵对不睹，乃潜穿壕为地道入城中，城遂陷，屠之而去。（《宋史·夏国传》）宋城席苇平。

种师道督诸道兵，城席苇平。方赋工，而夏人来争，坚壁葫芦河。师道阵于河浒，若将决战者，阴遣偏将曲充径出横岭，扬言援兵至。夏人方骇顾，而折可世潜军其后，姚平仲以精甲裹击之，夏人大溃，斩首五千级，获橐驼、马、牛万计。其酋仅以身免，卒城而还。（《宋史·种师道传》）

宋环庆部将郭浩率百骑抵灵州城下，夏人以千骑追之。浩手斩二骑，以首还。（《宋史·郭浩传》）

是岁，入贡于宋。（《宋史·徽宗本纪》）

西夏称雍宁三年

围宋丁星原。

丁星原在乳酪河西，距湟州绥远关四十里。初，刘法解灵武围，于瞎令古城北连筑德通、石门两城堡。干顺畏逼，遣兵入丁星原围之，见御备固，旁掠六日而还。宋帝诏再筑靖夏、伏羌、制戎等城为备。（《东都事略·西夏二》及《宋史·地理志》）

益麻党征叛降于宋。

唃廝囉氏旧据青唐，方董毡入朝于宋，益麻党征走西夏来降。贞观间，羌人假其名以附宋，宋优待之，赐姓名“赵怀恭”。至是，宋刘延庆来攻成德军，夏酋赏屈被擒，益麻党征遂降于宋。（《宋史·刘延庆传》）

侵宋泾原。

宋统制李庠率兵堵御，驻兵柏林堡，斥堠不谨，为夏人所薄，兵将溃。泾原路第三将曲端力战，夏军败绩，庠与端重整军还。（《宋史·曲端传》）

西夏称雍宁四年

春二月，夏人犯边，宋将官张迪死之。（《续宋编年资治通鉴》。按是月，夏人寇边，张迪死事，《东都事略》、《宋史·本纪》、《西夏传》、陈桎、薛应旗、毕沅《通鉴》诸书皆不载。惟《九朝编年备要》所载正与此同。李《干朝纲要》亦详其事，云二月癸丑朔，环庆路奏，夏贼攻济义原堡，将官张迪战死。足资参考。）

夏六月，筑割牛城。廓州防御使何灌袭之，城不守。

童贯见中国进筑不已，于七六岭分界处筑割牛城，屯重兵守之，为东南捍蔽。童贯使灌由肤公城夜出兵袭据之。贯以闻，赐名“统安”。（《东都事略》及《西夏书事》）

西夏称雍宁五年

春三月，与宋帅刘法战于统安城。法败走，夏人追杀之，遂围震武军。

童贯谋进筑横山，以太尉将秦、晋锐师，深入河陇，薄于萧关、古骨龙，谓可制夏人死命。遣大将刘法取朔方，法不可，贯逼之曰：“君在京师时，亲授命于上所，自言必成功。今难之，何也？”法不得已，引兵二万出。至统安城，遇夏国主弟察哥郎君率步骑为三阵，以当法前军，而别遣精骑登山出其后。大战移七时，前军杨惟忠败入中军，后军焦安节败入左军，朱定国力战，自朝至暮，兵不食，而马亦渴死多。法乘夜遁，比明走七十里，至盍朱危，守兵见而追之，法坠崖折足，为一别瞻军斩首而去。是役死者十万。察哥见法首，恻然语其下曰：“刘将军前败我于古骨龙、仁多泉，吾尝避其锋，谓天生神将。岂料今为一小卒梟首哉！其失在恃胜轻出，不可不戒。”遂乘胜围震武。震武在山峡中，熙、秦两路不能饷，自筑城三岁间，知军李明、孟清，皆为夏人所杀。至是，刘仲武令河东将何灌救之，灌以众寡不敌，但张虚声吓之，摄帅事刘鞬出奇兵败之。察哥曰：“勿破此城，留作南朝病块。”乃自引去。而宋宣抚司受解围之赏者数百人，实自去之也。诸路所筑城寨皆不毛，夏所不争之地，而关辅为之萧条，果如察哥之言。（《宋史·徽宗本纪》、《夏国传》及童贯、何灌、刘鞬等传）

令边吏叩摄震武帅刘鞬，请平。

夏人来言，愿纳款谢罪。宋人皆以为诈，鞬曰：“兵兴累年，中国尚不支，况小邦乎？彼虽新胜，其众亦疲，惧吾再举，故款附以图自安，此情实也。”密疏以闻，诏许之。（《宋史·刘鞬传》）

夏四月，宋童贯以鄜延、环庆兵大破夏人，平其三城。

童贯令种师道等出萧关，夏人弃永和、割踏两城而遁，宋师遂千之，追及鸣沙，无所见而还。由是，横山之地悉为宋人所有。（《宋史·徽宗本纪》及《东都事略·西夏二》）

五月，宋败夏人于震武。（《宋史·徽宗本纪》）六月，纳款于宋，宋诏六路罢兵。

初，夏国恃横山诸族帐强劲善战，故用以抗中国。种鄂谋取横山，故兴灵州之师。

及王师失利，李宪始献进筑之议，神宗厌兵，不克行。童贯旧常从李宪，得其仿佛，故献议进筑，遂得横山之地。夏人失所恃，遂因辽人进誓表。而宋时与金人约夹攻辽，故许夏纳款，诏令六路罢兵，而一意于辽，而夏亦自是少衰矣。（《宋史·徽宗本纪》及《东都事略·西夏二》）

宋筑葺平寨。

夏人据塞水源以渴宋师，宋将郭浩率精骑数百夺之。夏人攻石尖山，浩冒阵而前，流矢中左胁，怒不拔，奋力大呼：“得贼乃已。”诸军从之，夏人败走。（《宋史·郭浩传》）

冬十月，遣使如宋贺天宁节。

宋以誓诏报使者，不受。童贯不能屈，但迫馆伴强之。使持还，及边弃之而去。宋边臣贾琬得而上之，贯始大沮。（《宋史·夏国传》）

西夏称元德元年

春三月，干顺立妃曹氏。

曹氏，元昊时把关太尉曹勉孙也，年十四入宫，性温柔贞静，动以礼法，常侍仁安公主。主素严肃，氏身承起居，顺适其意，因劝干顺纳之。始命为才人，至是进位贤妃。（《西夏书事》）

冬十一月，封宗室子仁忠为濮王，仁礼为舒王。

仁忠父景思尝从秉常于木寨，当河津阻绝，罔訛萌等潜使窥伺，欲施鸩毒，景思左右抗护，以计脱者再，秉常德之。已复位，欲加显擢，为梁氏父子阻抑，不遂志死。时仁忠二人尚幼。及长，俱通蕃、汉字，有才思，善歌咏，始任秘书监，继擢仁忠礼部郎中，仁礼河南转运使。至是，二人自陈先世功，乃晋爵。（《西夏书事》）

是岁，入贡于宋。（《宋史·徽宗本纪》）

西夏称元德二年

是岁，攻宋西安州、怀德军，陷之。

宋帝问西事，李浩曰：“臣去任已闻警，虑夏人必乘间盗边，愿选将设备。”已而

果攻泾原，取西安州、怀德军。绍圣开边之地，复尽失之。（《西夏书事》）

约辽夹攻宋，辽主不听。

知宋有事北边，故与辽国书，议乘隙夹攻也。（《东都事略·西夏二》）

西夏称元德三年

夏四月，金降将耶律坦犯境，以兵备河西。

坦奉金将斜也命，将兵胁降辽西南招讨使所属诸部，直至夏境，声势甚盛。干顺遣兵备河西诸郡，坦解去。（《金史·太祖本纪》及《斜也传》）六月，遣李良辅率兵三万救辽，金斡鲁、娄室败良辅于野谷。

五月，金兵克辽中京，辽主出居庸关。金兵复来攻，辽主自鸳鸯泺西走，娄室等追至白水泺，获其内库宝物。娄室遂与闾母攻破西京，复与闾母至天德、云内、宁边、东胜，其官吏皆降，获阿疏。夏将李良辅将兵三万救辽，兵次天德境。娄室使突撚补斡以骑二百为候兵，夏人败之几尽，阿土罕复以二百骑往，遇伏兵，独阿土罕脱归。时久雨，诸将欲且休息。娄室曰：“彼再破吾骑兵，我若不复往，彼将以我怯，即来攻我矣。”乃选千骑与习失拔离速往，斡鲁壮其言，从之。娄室迟明出陵野岭，留拔离速以兵二百据险守之。获生口问之，其帅李良辅也。将至野谷，登高望之，夏人恃众而不整，方济水为阵。乃使人报斡鲁。娄室分军为二，迭出迭入，进退转战三十里。过宜水，斡鲁军亦至，合击，败之，杀数千人，追至野谷，涧水暴至，漂没者不可胜计。（《金史》斡鲁、娄室等传及《辽史·天祚本纪》）

秋七月，遣使如辽问起居。

辽主既失西京及沙漠以南，遂由讹莎烈走石辇驿。金将蒲家奴追败之，辽主悉弃辎重走。干顺遣大臣曹价奔问起居，馈以粮糗。（《辽史·天祚本纪》及《宗望传》）

八月，攻金天德军，不克。

金阿骨打追袭天祚于国崖，擒其都统萧规，天祚脱身去。夏引兵数万袭天德军，阿骨打遣偏师七千击破之。（《西夏书事》）

西夏称元德四年

金宗望来议和。

宗望至阴山，以便宜与夏国议和，其书曰：“奉诏有之，夏主辽之自出。不渝终始，危难相救。今兹已举辽国，若能如事辽之日以效职贡，当听其来，毋致疑贰。若辽主至彼，可令执送。”（《金史·西夏传》）

春正月，复发兵救辽，次可敦馆，不得进。

干顺奉辽主命，遣兵屯于可敦馆，相为声援。金将娄室以兵戍朔州，筑城霸德山阻之，不得进。（《金史·娄室传》）宋人侵金新赐地，遣使如金求援兵。

金帅斡鲁奏曰：“夏人不尽归户口、资帑，又以宋人侵赐地求援兵。宋之边臣将取所赐夏人疆土，盖有异图。”金主诏曰：“夏人屡求援兵者，或不欲归我户口，沮吾追袭辽主事也。宋人敢言自取疆土于夏，诚有异图。宜谨守备，尽索在夏户口，通闻两国，事审处之。”（《金史·斡鲁传》）

夏五月，请辽主临其国。金宗望以檄来谕。

宗望使使谕夏国，示以和好，盖以沮其救辽之心也。宗望迫辽主至天德，干顺遣人迎护辽主，将渡河矣。宗望闻候人吴十回知之，乃传檄夏国曰：“果欲附我，当如前谕，执送辽主。若犹疑贰，恐有后悔。”干顺得檄乃惧。（《辽史·天祚本纪》及《金史·宗望传》）

六月，辽主使来，册干顺为夏国皇帝。（《辽史·西夏外纪》）

金太祖薨，太宗即位，改是年为天会元年。（《金史·太宗本纪》）

遣使如金吊慰。（《西夏事略》。按《金史·太宗本纪》及《交聘表》、《夏国传》俱不载。）

西夏称元德五年

春正月，奉表于金，请以事辽之礼称藩，金许之。

夏请受割赐之地，金宗翰承制，割下寨以北、阴山以南、乙室耶敕部吐禄泺西之地，以赐之。（《金史·西夏传》）三月，使把里公亮等如金上誓表。

表曰：“臣干顺言：今月十五日，西南、西北两

路都统遣左谏议大夫王介儒等赍牒奉宣，若夏国追悔前非，捕送辽主，立盟上表，仍依辽国旧制及赐誓诏，将来或有不虞，交相救援者。臣与辽国，世通姻契，名系

藩臣，辄为援以启端，曾犯威而结衅。既速违天之咎，果罹败绩之忧。蒙降德音，以宽前罪；仍赐土地，用广藩篱。载惟含垢之恩，常切戴天之望。自今以后，凡于岁时朝贺、贡进表章、使人往复等事，一切永依臣事辽国旧例。其契丹昏主今不在臣境，至如奔窜到此，不复存泊，即当执献。若大朝知其所在，以兵追捕，无敢为地及依前援助。其或征兵，即当依应。至如殊方异域，朝覲天阙，合经当国道路，亦不阻节。以上所叙数事，臣誓固此诚，传嗣不变。苟或有渝，天地鉴察，神明殛之，祸及子孙，不克享国。”所谓西北、西南两路都统者，宗翰也。盖宗望以太祖命与夏人通书，而宗翰以便宜割地议和云。（《金史·西夏传》）

闰月，金遣王阿海、杨天吉来赐誓诏。

誓诏曰：“维天会二年，岁次甲辰，闰三月戊寅朔，皇帝赐誓诏于夏国王干顺：先皇帝诞膺骏命，肇启鸿图，而卿国据夏台，境连辽右，以效力于昏主，致结衅于王师。先皇帝以为忠于所事，务施恩而释过；迨眇躬之纂绍，仰遗训以遵行。卿乃深念前非，乐从内附，饬使輶而奉贡，效臣节以称藩。载锡宠光，用彰复好。所有割赐地土、使聘礼节、相为援助等事，一切恭依先朝制诏。其依应征兵，所请宜允。三辰在上，朕岂食言。苟或变渝，亦如卿誓。远垂戒谕，毋替厥诚。”（《金史·西夏传》）

秋七月，以兵侵武、朔二州。

武、朔，辽山后地。金取武州归宋，朔州守将韩正亦举城内附，中国筑固疆等堡为守。干顺数以兵攻之。宣抚使谭稹遣部将李嗣本督兵出战，相持数日，不解。（《西夏书事》）

九月，子仁孝生。

仁孝，曹妃所出，生时异光满室，成安公主见而爱之，请名“仁孝”，令保母持至宫中，时抚摩不忍释。（《西夏书事》）冬十月，遣使如金，谢赐誓诏。

初，金以山西九州与宋人，而天德远在一隅，缓急不可及，故割以与夏，而宋人复侵取之。干顺至是使上表，谢赐誓诏，并论宋所侵地。金主诏曰：“省所上表具悉。已命西南、西北两路都统府，从宜定夺。”（《金史·太宗本纪》及《西夏传》）

遣使如金贺天清节。

天清节，金主晟诞也。夏使次于宋使、高丽使后，赐宴亦如之。（《金史·太宗本纪》及《礼志》）是岁，入贡于宋。（《宋史·徽宗本纪》）

与金人约攻宋麟州，以牵河东之势。（《宋史·夏国传》）

西夏称元德六年

春正月，遣使如金贺正旦。

干顺表略云：“斗柄建寅，当帝历更新之旦；葭灰飞管，属皇图正始之辰。四序推先，一人履庆。恭惟化流中外，德被迩遐。方熙律之载阳，应令候而布惠。克凝神于突{穴奥}，务行政于要荒。四表无虞，群黎至治。爰凤阙届春之早，协龙廷展贺之初。百辟称觞，用尽输诚之意；万邦荐祉，克坚献岁之心。臣无任”云云。大使武功郎没细好德、副使宣德郎季膺等奉表以闻。（《金史·太宗本纪》及《松漠纪闻续》）

遣使如金奠币及贺即位。

金太祖葬于和陵，干顺奉表致奠，并贺金主即位。时藩使馆见仪未有定制，使至逾月，殿中少监刘箬始详定焉。（《金史·太宗本纪》及《刘箬传》）

二月，辽主逃至应州，为金完颜娄室所获，辽亡。时耶律大石自立，是为西辽。（《辽史·天祚本纪》）秋八月，金兵来侵。

辽主延禧被获，耶律大石率部西走。金诸帅讹传，干顺约大石取山西诸郡，因纵兵入境，掠取人畜。干顺遗书娄室责之。都统完颜希尹以闻，金主命严备之。（《金史·希尹传》）

九月，世子仁爱卒。

仁爱幼聪颖，长多才艺。初，金兵破辽，辽主西走，即恸哭，请兵赴援。宜水之败，咄嗟者累月。及干顺臣金，泣涑不听，悒郁而卒。（《西夏书事》）

辽成安公主卒。公主伤辽亡，又痛世子，不食卒。（《西夏书事》）冬十月，使金贺天清节。

时金人潜分两路伐宋，军务旁午。夏使与宋使俱不得见，就馆赐燕而还。（《金史·太宗本纪》）十二月，攻宋丰、麟二州。时金人围宋太原，金帅粘罕来约侵宋故也。（《东都事略》）

宋帝内禅皇太子桓即位，是为钦宗。以金兵逼迫故。（《宋史·徽宗本纪》）遣使如宋贺正旦。

干顺闻钦宗即位，遣使表贺，且覘虚实。（《西夏书事》）

卷二十三

西夏称元德七年

春正月，使金贺正旦。

金主始朝日，礼毕，方命各国使人入贺。（《金史·交聘表》及《礼志》）二月，围宋杏子堡。

贺正使回，干顺知金人围汴益急，乘隙围杏子堡。堡在延州平戎寨北，两山对峙，地险厄。鄜延副总管刘光世据之，不能克。（《宋史·刘光世传》）

三月，取宋天德、云内、武州及河东八馆。

先是，金人灭辽，粘罕遣撒拇来许割天德、云内、金肃、河清四军及武州等八馆之地，约攻麟州以牵制河东之势。至是，夏人乘金与宋攻战之际，遂由金肃、河清渡河，自取之。（《宋史·夏国传》）

夏四月，陷宋震威城，杀其兵马监押朱昭。

夏人知宋戍边士卒入援汴京，遂乘虚入侵，河外诸城悉望风褫气，遂至震威。震威距府州三百里，最为孤绝。昭率老、幼婴城。诸城既先下，敌怒不得昭，遂约金人并力来攻。昭募锐卒千余人，与约曰：“贼知城中虚实，有轻我心，若出其不意攻之，可一鼓而溃。”于是夜缒兵出，薄其营，果惊乱，城上鼓噪乘之，杀获甚众。夏人设木鹅梯冲以临城，飞矢雨激，卒不能施。然昼夜进攻不止，其酋悟儿思齐介胄来，以毡盾自蔽，邀昭计事。昭常服登陴，披襟问曰：“彼何人，乃尔不武！欲见我，我在此，将有何事？”思齐却盾而前，数宋朝失信，曰：“大金约我夹攻京师，为城下之盟，划河为界。太原旦暮且下，麟府诸垒悉已归我。公何恃而不降？”昭曰：“上皇知奸邪误国，改过不吝，已行内禅。今天子圣政一新，汝独未知耶？”乃取传禅诏敕宣读之，众愕眙，服其勇辩。是时诸城降者多，昭故人从旁语曰：“天下事已矣，忠安所施？”昭叱曰：“食人之禄，死人之事。汝既背义偷生，不异犬彘。尚敢以言诱我乎？今日我唯有死耳！”因大骂，矢石乱下，夏众散走。凡被围四日，城多圯坏。昭以智补御，皆合法，然力竭不可支。昭乃下城坐厅事，召诸校谓曰：“城且破，妻子不可为贼污，幸先戕我家而背城死战，胜则东向图大功，不胜则暴骨境内，大丈夫一生之事毕矣！”众未应，昭幼子戏阶下，遽起手刃之。长子惊视，又杀之。径领数卒屠其家人，昇尸纳井中。部将贾宗望母适过前，昭起呼曰：“媼乡人也，吾不欲刃，请自入井！”媼从之，遂并覆以土。将士将妻孥者，又皆尽杀之。昭谓众曰：“我与汝曹，俱无累矣。倘我先死，汝曹有得脱者，愿驰至府谷，言我今日事。”会部落子有阴与夏人通者告之，曰：“朱昭与其徒

各杀其家人，将出战。人虽少，皆死士也。”夏人大惧，以利啖守兵，得登城。昭勒众于通衢接战，自暮达旦，尸填街不可行。昭跃马从缺城出，马蹶坠堑。夏人欢呼曰：“得朱将军矣！”欲生致之。昭瞋目仗剑，无一敢前，旋中矢而死，年四十六。凡被围百日而城陷云。（《宋史·夏国传》及《朱昭传》）

宋赐国主诏书。

时金人犯阙，夏人亦起兵。鄜延路缴进夏人檄书，宋帝命草诏赐夏国主，解其意以慰抚之。诏曰：“朕居春宫，十有馀载，勿敢怠逸，四方所闻。道君太上皇帝，享国日久，厌万乘之繁，爰议内禅。朕辞不获命，遂登大宝。深惟祖宗基构之隆，上皇付托之重，夙夜兢惕，惧不克任。而金人不道，乘郭药师背叛之故，陷没燕山，俶扰边境，达于都畿，肆为贪残，劫质以往。永念卿屏翰之旧，信誓皎然，义当戮力，同济艰难，以敌王忭。而陕西奏报，乃言卿国点集重兵，五路深入，攻陷城堡，杀伤兵民。朕惟卿明允笃诚，世济忠孝，主于西陲，藩屏帝室，多历年所，英声流闻。今至于兹，殆朕德弗类，嗣政于初，未能绥抚之所致也。西顾怅然，良自伤悼。及得鄜延路帅臣章疏，缴到卿国檄书公牒，省览再三，乃知构兵起于误听。檄书初言中国失德数事，皆曩时大臣误国，上皇已降诏书，深自悔悼。今朕克己求治，以俭先天下。凡淫巧奢丽之具，一切屏去；蠹国害民之臣，咸已窜诛。前日之事，所不复论。中言贺正人使之归，所见京城整饬兵甲、修治楼櫓，疑有奸臣变乱，此乃提防金人之故，岂有他哉！终言于本朝信誓之久，义须救援。以此知卿忠义有素，误听致此，初无他心。至于过差之辞，朕初不之辜也。公牒言国书之宝，与旧不同。此乃有司用宝差误，已重窜责。凡兹细故，朕既释然，卿亦宜亮。夫金人以蕞尔海隅之国，背天逆神，灭绝契丹，遂陵中国，淫暴滋甚。使其得志，何有于卿哉！孤军深入，理当剿殄。朕以皇弟肃王在其军中，第命将士驱逐出境，边城宴然。前遣康随、郑惟康道意，必亮此诚。诏到，卿宜释去疑虑，抚谕将士，抽回甲兵，修好如故。高爵厚赐，朕何爱焉！今遣武功大夫王佑、武功郎马持告谕。故兹诏示，想宜知悉。夏热，卿比平安好？遣书指不多及。”（《李忠定公文集》）

金人袭夺夏所侵宋地。

金贵人兀室以数万骑阳为出猎，掩至天德，逼逐夏人，悉夺天德、云内、河东八馆武州，惟金肃、河清在大河西，金不能取之。初，金人约以兵取关中，以三城八馆报之。既而夏人自取其地。至是金复背约，袭夺之。于是绝好。（《宋史，夏国传》）

秋八月，犯宋泾原。

统制李庠聚兵柏林堡拒之，夏兵分番迭进，庠兵溃，泾原第二将曲端力战，乃却。（《宋史·曲端传》）九月，陷宋西安州。

元符中，以南牟会新城建为西安州，在兰州西北，逼邻夏境，干顺袭取之。（《宋史·钦宗本纪》及《地理志》）

冬十月，与辽亡将小鞠 录驱幽、蓟兵围宋建宁寨，破之，杀其寨主杨震。

初，辽亡将鞠 录西奔，扰宋麟、府，为杨震父宗闵所败，俘其父母妻子。鞠 录乃走西夏，约共攻宋建宁寨报仇，遂杀震。（《宋史·杨震传》）

使金贺天清节。（《金史·太宗本纪》）十一月，陷宋怀德军，杀其知军事刘詮、通判杜翊世。

初，经略使席贡牒知怀德军刘詮，詮奉檄即日就道。夏人素闻詮名，乃屯兵绵亘十里而围之。詮昼夜修战守之备，敌百计攻城，詮悉以术破之。后矢尽粮绝，詮度力不支，乃同通判杜翊世聚焚府库，环牙兵为三匝，出战譙门中，官军歼焉。翊世同妻张氏义不受辱，遂火其室，举家死于烈焰中，翊世自缢死。詮欲自裁，已为敌所执。夏太子遣人置之别室，将官之。詮骂曰：“我宁死，顾肯降贼耶！我苟不死，决不贷汝！”遂遇害。是役，吴玠以百馀骑追击夏人，斩首百四十级，卒以众寡不敌退守。（《宋史·钦宗本纪》及《吴玠传》、《四川总志》）

遣使如金请和，金人执其使。（《宋史·夏国传》）十二月，攻宋兰州，入通川、圆子诸堡，大掠。

兰州恃河为固，每岁河冰合必严兵以备，士不释甲者累月。元符中，兰州录事参军张叔夜筑寨天都山，夏兵不敢窥境。自西安、怀德失守，干顺遣兵攻天都，围兰州，力攻五日，大俘二堡人畜而还。（《西夏书事》）

西夏称元德八年

春正月，遣使如金贺正旦。

金主以宋帝誓书、地图示使人，使人稽首称贺。（《金史·交聘表》及《西夏书事》）宋以河西三州畀夏，旋复取之。

金人再犯宋，宋同知枢密院聂昌出河东为金人所劫，以便宜割河西三州隶西夏。晋宁军民大恐，曰：“弃麟、府、丰，晋宁岂能独存？”徐徽言曰：“此使人矫诏耳。三郡在河西，设有诏，犹当执奏，况无之耶？”遂率兵复取三州，夏人所置守长皆出降。徽言慰遣之。（《宋史·徐徽言传》）

二月，金人陷宋汴京，以徽、钦二帝北行。（《金史·太宗本纪》）三月，金人割

宋陕西北鄙地与夏。

金人立宋异姓少宰张邦昌为大楚皇帝，乃划陕西分界：自麟府路洛阳沟东距黄河西岸，西历暖泉堡、鄜延路米脂谷至累胜寨、环庆路威边寨，过九星原至委布谷口、泾原威川寨、略古萧关至北谷川、秦凤路通怀堡至古会州，自此直距黄河，依见今流行分熙河路尽四边以限封域。复分陕西北鄙以易天德、云内，以河为界。及娄室定陕西，婆卢火率兵先取威戎城。军至威戎东与敌遇，击走之，生致二人，问之，乃知为夏将李遇取威戎也，乃还其人而与李遇通问。李遇军威戎西，蒲察军威戎东，而使使议事于娄室。娄室报曰：“元帅府约束，若兵近夏境，则与夏人相为犄角，毋相侵犯。”李遇亦使人报娄室曰：“夏国既以天德、云内归大国，大国许我陕西北鄙之地，是以往此。”蒲察等遂旋军。既而金元帅宗翰不欲以陕西北鄙与夏，会金主欲罢陕西兵并力南伐，河东诸将不可，曰：“陕西与西夏为邻，事体重大，兵不可罢。”宗翰曰：“初与夏约夹攻宋人，而夏弗应。而耶律大石在西北交通西夏，吾舍陕西而会师河北，彼必谓我有急难。河北不足虞，宜先事陕西，略定五路。既弱西夏，然后取宋。”宗翰盖有意于夏人也。议久不决。（《金史·西夏传》及《宗翰传》）

夏五月，宋徽宗第九子康王构即皇帝位于南京，是为高宗。改元建炎。自是宋南渡矣。（《宋史·钦宗本纪》）金人为夏求侵地于宋。

金既夺夏地，乃责偿于宋，遣左监军希尹以国书授通问使傅秀，为夏国请熙宁以来侵地。（《宋史·夏国传》。按《建炎以来系年要录》：是月，赵子松建三屯之议，大略以为开边之患，验在目前，不可不虑。其熙河五路进筑州军堡寨，欲望将不系紧要控扼去处并罢，明谕夏人，示以德意。）

秋九月，金人来约侵宋，许之。

金兀术回云中，遣保静军节度使杨天吉如夏，约侵宋，同取陕西，许之。金尝渝盟于西夏矣，而干顺许之者，盖畏其威，亦欲从而掳掠耳。（《宋史·夏国传》及《大金国志》。按宋熊克《中兴小纪》：金人左副元帅尼雅满之自驰归云中也，遣使往夏国，约同入陕西，夏人从之。与此作无术不同。）

十月，遣使入金贺天清节。（《金史·太宗本纪》）

是岁，改元正德。（《宋史·夏国传》）

西夏称正德二年

春正月，遣使如金贺正旦。

金主问夏国事宜，使者以岁饥告，命发西南边粟市之。（《金史·高宗本纪》及《西夏书事》）宋遣主客员外郎谢亮持诏来谕。

亮西入关，鄜延经略使王庶遗亮书曰：“夏国为患小而缓，金人为患大而急。方其挫锐熙河，奔北鄜延，秋稼未登，兵士困饿。阁下苟能仗节督诸路协同义举，虽未足尽雪旧耻，亦可驱逐渡河，全秦奠枕，徐图恢复矣。”亮不能用，遂由环庆入西夏。庆历后，夏国主尝以宾礼见使者，亮至，干顺乃倨然见之，留居数月，始与约和罢兵。亮归，而夏兵已蹶其后。（《宋史·夏国传》）

取宋定边城。（《宋史·夏国传》）冬十月，遣使如金贺天清节。（《金史·太宗本纪》）金遣使来求天德八馆之地。

初，夏国因契丹为金人所败，遂率众取其天德八馆之地。八馆者，膏腴产稻，夏国得之殊喜。至是，金人怙强，遣使求之，谓他日以陕西奉偿，夏国惧不敢违，而中怀怨愤。又夏国世为知府州折氏所困，时可求已降于金，故金欲因折氏以并夏国。（《中兴小纪》）

西夏称正德三年

春正月，遣使如金贺正旦。

金诸将兵破陕西诸郡，蕃、汉由绥德城逃入夏界者甚众。使人入见，金主谕谨守边备，勿纳流民。（《金史·太宗本纪》及《西夏书事》）二月，遣书宋边臣，索鄜延。

金帅娄室连陷长安、凤翔，宋陇右大震。夏人谍知关陕无备，遂檄延安府言：“大金割鄜延以隶本国，须当理索，敢违拒者，发兵诛讨之。”帅臣王庶檄报曰：“金人初犯本朝，尝以金肃、河清畀尔，今谁与守？国家以奸臣贪得，不恤邻好，遂至于此。贪利之臣，何国无之，岂意夏国躬蹈覆辙！比闻金人欲自泾原径捣兴、灵，方切寒心，不图尚欲乘人之急。幕府虽士卒单寡，然类皆节制之师，左支右吾，尚堪一战。果能办此，何用多言。”因遣谍间其用事臣李遇，夏人竟不出。（《宋史·夏国传》）

七月，宋再使谢亮来。

宋知枢密院事张浚使川、陕，谋北伐金，欲通夏国为援，奏请国书二封，一如常式，一用敌国礼。宋帝诏从之，故有是役。（《宋史·高宗本纪》及《系年要录》）

冬十月，遣使如金贺天清节。

金蒲察、娄室悉取鄜、坊二州地，与夏境接壤。干顺惧其兵威，遣使先期至，金主命仍随高丽使同见。（《金史·交聘表》及《西夏书事》）是岁，取宋保安军德静寨。

时宋鄜延之东皆金人，西北即夏境，其属宋者唯保安一军、德静一寨。安抚使郭浩间道之德静，置司招收散亡，与夏人对垒一年，敌不敢犯。浩去，夏人复来，权帅耿友谅战败，仅以身免，遂取保安、德静寨。于是，宋陕以西诸路尽失。（《宋史·郭浩传》）

西夏称正德四年

春正月，遣使如金贺正旦。

宋兵败于高桥，宋帝航海，金将阿里蒲卢浑状闻，金主出示高丽、夏二国使人，以夸其盛。（《金史·交聘表》及《西夏书事》）宋谢亮还。

干顺已称制，不得要领而还。（《宋史·高宗本纪》及《夏国传》）冬十月，宋环庆路统制慕洵叛宋来附。

张浚富平之败，斩环庆经略使赵哲。哲将统制官慕洵为环州豪族，遂自庆阳叛附夏国，干顺纳之。（《宋史·高宗本纪》）遣使贺金天清节。

金人立刘豫为齐帝，豫遣使谢封册并贺天清节。夏使遂班于齐使、高丽使之下。（《金史·交聘表》及《太宗本纪》）金遣使来索故辽耶律大石。

使来言，闻耶律大石在和州之域，常与夏人合谋，请执与之。干顺报曰：“小国与和壤州地不相接，且不知大石所住也。”（《西夏书事》）

西夏称正德五年

春正月，遣使贺金正旦。（《金史·交聘表》）二月，宋同州观察副使刘惟辅弃德顺军求附，不受。

金人略宋熙河，惟辅不能守，焚积粟去。金人追及，所部皆走。惟辅与亲信数百匿山寺中，遣人输款于夏国，求附。夏人拒不纳。其亲信军诣金人降，金人杀惟辅。（《宋史·夏国传》。按《高宗纪》刘惟辅死节系于建炎四年十二月甲午，与此异。）

秋八月，宋始不颁《历日》。

自兵交以来，虽未修职贡，宋犹岁颁《历日》。至是，宋帝始诏，以夏本敌国，毋复颁《历日》。（《宋史·夏国传》）冬十月，遣使贺金天清节。

和州回鹘执耶律大石之党撒瓜迪里突迭献于金，金主知夏国不与大石合，使人入见，谕慰之。（《金史·交聘表》及《西夏书事》）慕洧叛降于金。

金将撒离喝攻庆阳，破之。慕洧见金兵强，遣使以城降。（《金史·撒离喝传》）十一月，宋川陕宣抚使吴玠始遣人来通书。

川陕地，金已十得其四。时玠败金将兀术于和尚原，西路稍通，乃贻书夏国，使背击金人。干顺不应。（《宋史·夏国传》及《吴玠传》）

西夏称正德六年

春正月，使金贺正旦。

时金以陕西地赐刘豫。干顺遣使贺正，请环、庆二州，金主不许。（《金史·交聘表》及《西夏书事》）秋九月，遣人答吴玠通书。

时与金人有隙，屡遣使至宋吴玠、关师古军中通意。（《宋史·夏国传》）馀睹（《系年要录》作伊都）叛金来附，不纳。

馀睹谋结燕云之人图女真，为辽复仇。粘罕侦知，欲诛之。馀睹父子微觉，以游猎为名，逃入夏国。干顺问兵几何，答云：“亲兵二、三百。”干顺以其兵少不纳，遂投鞬鞞。金人乃分捕馀睹叛党。于是，河东八馆五百户、山金司、兀宝王府、南北王府四部族衙诸契丹相温酋首率众蜂起，逃入夏国，亦或北奔沙漠。契丹赴金者由此一乱，几成灰烬。（《辽史·馀睹传》、《宋史·夏国传》及《松漠纪闻》）

冬十月，使金贺天清节。（《金史·交聘表》）

西夏称正德七年

春正月，使金贺正旦。

金主以纳契丹叛人诘责，使人顿首谢罪。（《金史·交聘表》及《西夏书事》）秋八月，攻金怀德城，不克。

靖康中，夏兵破怀德，设兵戍之。及金人以陕西地界刘豫，命夏国割怀德与之，干顺心怏怏。时豫寇伊阳，知其无备，以五万众攻之。知军事庞迪开门以待，夏兵疑不敢入。迪以数千骑分门突出，夏众惊溃，失军资、牛、羊甚夥。（《金史·庞迪传》）

冬十月，使贺金天清节。

使人与齐使同入，见齐使，以攻怀德告，金主令持诏还谕责之。（《金史·交聘表》及《西夏书事》）

西夏称天德八年

春正月，使金贺正旦。

干顺命使人奏告，请于陕西互市，金主不许。（《金史·交聘表》及《西夏书事》）秋七月，宋命吴玠来通信。（《宋史·高宗本纪》）冬十月，使金贺天清节。

金主有疾，不视朝，命使人就馆燕。（《金史·交聘表》及《西夏书事》。按是年，奉使者当是宥州刺史王圭。周氏春《西夏书》云：“王圭者，宥州刺史也。金天会十二年冬十一月，皇弟都统经略郎君撻懒向猎于梁山之阳，至唐乾陵，殿庑颓然，爰命有司鸠工修饰。是时复谒陵下，绘像一新，回廊四起，不胜欣怿，与礼阳太守酣饮而归，遂刻乾陵无字碑阴为行记。时圭与职方郎中董应期从行。”）

十二月，答吴玠书。

玠奏末帝言：“夏国数通书，有不忘本朝意。”（《宋史·夏国传》）金遣人来索马，却之。

金帅粘罕既取辽，将谋夏，夏为备已久。忽求衅于夏，言欲马万匹，夏人从其请。先以所练精兵每一马以二人御之，给言于金人曰：“万马虽有，然乏人牵挽，今以五千人押送，请遣人交之。”粘罕选善骑射者往取，实欲窥之也。至境，未及交马，夏人群起，金兵悉毙，复持马归。粘罕气沮，由是不敢西向发矢。（《挥麈后录》）

西夏称大德元年

春正月，金主薨于明德宫，皇孙亶嗣位，是为熙宗。（《金史·太宗本纪》）金遣使来报哀，并告继位。（《金史·熙宗本纪》）

三月，遣使如金吊祭，诏赐宴，不举乐。（《金史·熙宗本纪》）夏五月，归孝子程俊母邵氏。

俊会州人，幼时父母陷于夏国，常号泣自毁。迨长，捐家财数十万往赎，未至，北向号泣，寝食俱废。夏人感动，还其母邵氏。俊日夕承顺，奉养备至，乡里称为至孝。（《甘肃通志》）

秋九月，以濮王仁忠为中书令。

仁忠性谨严，持法峻，人不敢干以私。晋王察哥广起第宅，横征多诛求，蕃、汉苦之。仁忠上疏劾，察哥为之罢役，朝野肃然。干顺嘉其风力，使由左枢密进中书令。察哥阴间之，不问。（《西夏书事》）

西夏称大德二年

春正月，使金贺正旦。（《金史，交聘表》。）

使金贺万寿节。

熙宗本七月七日生，以同皇考忌日，改用正月十七日。（《金史·熙宗本纪》）夏六月，金人以主名来报。

伪齐刘豫表请金主，以御名音切及同音字号降示。金主从礼臣议，并报夏、高丽二国。（《西夏书事》）秋七月，取乐州，复取西宁州。

夏州乳酪河与二州相近，干顺遣兵袭取乐州，进攻西宁、保塞，绥边诸寨俱溃，守将弃城遁。（《西夏书事》）

西夏称大德三年

春正月，使金贺正旦。（《金史·交聘表》）使金贺万寿节。（《金史·交聘表》）降蕃赵继忠奔宋。

继忠，吐蕃瞎征子，初名董合，神宗时与兄木征以洮河降，赐姓名，授六宅副使、西蕃三十八族大首领。梁乙逋与中国构难，遣兵胁降之，遂为役属。至是，因西川宣抚使请内附，夏国遂失右臂。（《宋史·夏国传》）

知西安州任得敬，纳其女为妃。

得敬，本西安州判，夏兵取西安，率兵民出降，干顺命权知州事。有女年十七，使其弟德聪饰之以献，干顺纳为妃，赏赉甚厚，擢得敬为静州防御使。（《西夏书事》）

秋九月，遣使乞地于金，金与以河外三州地。

干顺既得西宁，与金积石等州邻逼，遣使以厚币如金，表乞河外诸州。金主以积石、乐、廓三州与之。时秦人在三州者数千，皆愿归金，金主请约之。权枢密院事刘箐曰：“三小州不足为轻重，恐失两国大信。”遂以其地来归。（《金史·刘箐传》）

冬十月，宋鄜延故将李显忠谋执金帅撒里曷（《金史》作撒离喝）归宋，不克，遂来奔。

显忠青涧人，自唐以来世袭苏尾九族巡检。显忠年十七，随父永奇出入行阵。金人陷延安，授永奇父子官，永奇聚泣曰：“我宋臣也，世袭国恩，乃为彼用耶？”会刘豫令显忠帅马军赴东京，永奇密戒之曰：“汝若得乘机，即归本朝，毋以我故贰其志。事成，我亦不朽矣。”显忠至东京，乃密遣其客雷灿，以蜡书赴行在。已而刘豫废，兀术授显忠知同州。显忠至憩省父，永奇教显忠曰：“同州入南山，乃金人往来驿路，汝可于此擒其酋渡洛、渭，由商、虢归朝。第报我知，我当以兵取延安而归。”显忠赴同州，即遣黄土成等持书由蜀至吴报归朝事。金元帅撒里曷来同州，显忠以计执之，驰出城至洛河，舟船后期不得渡，与追骑屡战皆胜。显忠憩高原，望追骑益多，乃与撒里曷折箭为誓：“不得杀同州人，不得害我骨肉，”皆许之。遂推之下山崖，追兵争救得免。显忠携老、幼长驱而北，至鄜城县，急遣人告永奇。永奇即挈家出城，至马翅谷口为金人所及，家属二百馀口皆遇害。是日天昏大雪，延安人闻之，皆泣下。显忠仅以二十六人奔夏。（《宋史·李显忠传》）

冬以兵自河清军渡河，由金云中府、天德军界取所亡马于鞑靼，既而回国，往返并不假道。

昔粘罕尝欲假道夏国以攻宋川陕，夏人拒之。今乃擅越金境，以取所亡马，金亦莫之问罪。盖是时粘罕、兀室罢军事，彼知撒里曷无能为也。（《大金国志》）

西夏称大德四年

春正月，使金贺正旦及万寿节，请通互市。

时齐国已废，金尽收陕西地。干顺使请于绥德诸州互市，金主以陕西新定，不许。（《金史·交聘表》及《西夏书事》）夏五月，更积石州为祈安城。

积石蕃族强悍，干顺以兵威胁之，诸部皆服，因更其城名“祈安”。（《西夏书事》）秋八月，立任氏为皇后。

任氏壮重寡言，御下有恩意，与曹氏并居妃位，相得甚欢。得敬欲后其女，常以货贿馈朝贵及宗室执政权者。于是御史大夫芭里祖仁言：“古者，天子娶后，藩国来媵，诸侯一娶九女，盖奉宗庙、广继嗣，阴教之职不可缺，中宫之位不可虚也。伏见陛下，两妃并立，位号相夷，而无嫡以统之，则势必近争情且生妒，岂所以防淫慝、塞祸乱乎？今宜择簪纓名家、勋庸世族、素优才行，配合坤仪，庶几上协神祇之心，下副臣民之望。”干顺询之群臣，咸谓门第才德，无过任妃。干顺遂使芭里祖仁持册，立为皇后，授得敬静州都统军。（《西夏书事》）

是岁，李显忠擒青面夜叉（一作野义）。

显忠之宋奔也，夏人甚喜，遣翰林学士杨某郊劳，礼意良厚。杨推诚，显忠亦无隐，自是无彼我之间。杨因暇日语及金人自得志中原，恃其强盛，每见侵陵，亦有并吞之意，知显忠雄杰，故深相结纳，将倚为用。适有间自延安来报，自显忠之西，金人即飭兵分捕显忠家属二百口，无长幼悉遇害。会大雪，显忠中夜自挈壶酒过杨，杨延之卧内，相与对酌。显忠因泣数行下，具言父母妻子之亡，切齿疾首，恨不即死，愿得二十万人，生擒撒里曷，取陕西五路归于夏，显忠亦得报不共戴天之仇。杨恻然。翌日，为显忠请于干顺。干顺曰：“尔能立功，则不靳借兵。”时有酋号青面夜叉者，有射骑数万，恃勇桀骜，要索无厌，扰边十馀年矣。夏主患之，顾国中无能制之者，以是属显忠。显忠欣然自任。问须兵几何，显忠曰：“当以计取，得精锐五百足矣。”夏主曰：“此虏未易轻图，与骑三千。”命裹粮卷甲，昼夜疾驱。既逼其境，遇行者，俘以自随。奄至其穴，乃伏骑于旁冈阜间，噪其三面，虏仓卒惶骇。夜叉者，金冠铁面具，画如鬼物，故号“夜叉”。未几，夜叉持大刀，跨马名赤驼，指呼布阵。显忠谓之曰：“汝徒恃犬、羊众，实不勇。果勇，能与我挑战乎？”夜叉问显忠为准？显忠曰：“因汝不臣其主，汝主有请大国，命我伐汝。无多言，速出战！”夜叉怒，挥刀跃马而前。显忠预戒一骑：“俟我与之交驰，从旁过之。”及锋未接，一骑出焉。夜叉顾视间，显忠伺隙投枪，手搏其背，夜叉身偃仆，遂挟以归。其徒窘迫溃走，伏骑乘之，众悉降。干顺大悦，以显忠为静难军承宣使、鄜延歧雍等路经略安抚使，遂许出师。（《宋史·李显忠传》及《名臣碑传琬琰集》、《名臣言行录》）

西夏称大德五年

春正月，使金贺正旦及万寿节。

时高丽贡使未回，金主赐燕，夏使与高丽三使并会。（《金史·交聘表》及《西夏书事》）是月，太白、荧惑合于井。司天谓不利兵。干顺不听。（《西夏书事》）

二月，慕洧攻宋环州，宋以陇右都护刘錡来救。

先是，錡与夏人战屡胜，有威名。夏人儿啼，辄怖之曰：“刘都护来！”啼遂止。（《宋史·高宗本纪》及《刘錡传》）金慕洧请降，复纳之，以为山讹首领。

洧入金，仕至熙河经略使。及金人与中国议和，归陕西、河南地。洧以官守随例当留关中。洧惧诛，谋潜师袭取关陕。泾原路经略使张中彦与环庆赵彬合兵声讨，洧兵败，亡入夏国，干顺纳之，授以官。（《金史·张中彦传》及《西夏传》）

三月，攻府州，取之。

建炎中，府州守将折可求以城降金，撒里曷许废刘豫立之。及豫废，和议成，割河南、陕西归中国，府州在陕西属中，撒里曷恐可求失望生变，假会饮，鸩杀之。干顺知府州无主，遣兵乘间取其城。（《宋史·夏国传》及《西夏书事》）

灵芝生于后堂高守忠家，干顺作《灵芝歌》，俾中书相王仁宗和之。

干顺以所作《灵芝歌》刻石学校。（《宋史·夏国传》及虞集《幹相公画像赞》）夏五月，遣李显忠等伐金。

显忠既立功，干顺乃许出兵二十万骑，以文臣王枢、武臣移讹为陕西招抚使，显忠为延安招抚使，统之伐金。显忠所至，无不望风迎降，独延安闭门拒守。显忠谓之曰：“吾之此来，只求捕害亲者。若得其人，吾于延安之人何憾焉。”已而兵马都监薛昭榘城见显忠曰：“始告捕者苏常、柳仲二入耳。”俄有捕二人以献者，显忠诘之遂服，因剖心以祭。（《宋史·李显忠传》及《名臣言行录》）

显忠自夏归宋。

显忠军至延安，总管赵惟清大呼曰：“鄜延路今复归宋矣！已有敕书。”显忠与官吏观敕书，列拜。显忠大哭，众皆哭，百姓哭声不绝。乃以旧部八百余骑往见王枢、移讹，曰：“显忠已得延安府，见讲和敕书招抚，可以本部军归国。”移讹不从，曰：“初经略乞兵来取陕西，今既到此，乃令我归耶？”显忠知势不可，乃出刀斫移讹，不及，擒王枢缚之。夏人以铁鹞子军来，显忠以所部拒之，驰挥双刀，所向披靡，夏兵大溃，杀死蹂践无虑万人，获马四万匹。显忠揭榜招兵，以绍兴九年为文书，每得一人予马一匹，旬日间得万人，皆骁勇少壮。行至鄜州，已有马、步军四万馀。撒里曷在耀州，闻显忠来，一夕遁去。显忠至宋，宋帝抚劳再三。（《宋史·李显忠传》。按《宋史全文》六月壬申，签书枢密院事楼招至长安留十馀日

，李世辅因遂说夏人南归，夏人多怀土，独与愿从者二千人来。照闻之，因与宣谕使周聿，皆以书招世辅归朝。）

六月，夏招抚使王枢赴行在。

宋枢密行府准备差遣王晞韩以夏国招抚使王枢至行在，楼照言：“陕西新复，正与夏国为邻，此等留之无益，还之可使知恩。”乃诏阁门引见，令临安府燕犒，差行在官馆伴。秦桧又召枢至都堂，谕讲和意，并还近所获夏国之俘百九十人归之，仍命晞韩伴送至境上。晞韩，兴化军人，宣和六年进士，楼照宣抚关陕，辟为属，改京秩。朝廷欲借兵西夏，犄角金人。至是管押生蕃人口归夏，道无疏虞。（《宋史·高宗本纪》及《西夏纪事本末》）

干顺薨，年五十七，在位五十四年，改元天仪治平四年、天佑民安八年、永安三年、贞观十三年、雍宁五年、元德八年、正德八年、大德五年，谥曰圣文皇帝，庙号崇宗，葬显陵。（《宋史·夏国传》。按《宋史·夏国传》作年五十七，考干顺于宋哲宗元祐元年六月嗣位，时方三岁，是年岁在丙寅，至高宗绍兴九年己未，以甲子计之，当年五十六。《宋史》五十七，盖史臣以纪元计数，而高宗建炎元年即钦宗靖康二年九月，或误以一年作二年也。）

卷二十四

仁宗圣德皇帝李仁孝，崇宗干顺长子也，大德五年六月四日，崇宗薨（按《宋史·本纪》：辛亥，夏国主干顺卒。《夏国传》作辛亥六月三日也。毕沅《续通鉴》作丁亥，尤误。丁亥乃七月九日，六月无丁亥，见《资治通鉴后编·校勘记》），仁孝即位，时年十六。（按《文献通考》注，继干顺而立者，正史作天祈，《朝野杂记》作仁孝，未知孰是云云。盖马氏所见正史，与今异）。十月，遣使如金告哀。十一月，遵其母曹氏为国母。十二月，纳后罔氏。（《宋史·夏国传》及《金史·熙宗本纪》）

西夏称大庆元年

春正月，使金贺正旦。（《金史·交聘表》）使金贺万寿节。（《金史·交聘表》）

三月，宋命陕西宣抚使胡世将与夏人议入贡，夏人不报。

干顺臣金后，不复贡中国。宋帝因金人议和划界已定，命鄜延、秦凤、熙河诸路招纳陷没夏国人民，并命世将遣使至国，议入贡礼。仁孝不应。（《宋史·高宗本纪》）

夏州统军李合达，据城叛。

合达本萧姓，为辽国挹马，扈成安公主至夏，有口才，骁勇、长骑射，干顺留之，始授文思使，转右侍禁，尝从征讨有劳，升副都统，赐国姓。统安之役，诸将畏刘法勇，莫敢当其锋；合达奋击败之，率死士数百人，追至盖朱垵，得法首还，以功擢都统，镇夏州。继干顺臣金，上书切谏，不听；及公主卒，益怏怏不自适。闻耶律大石在西北，遣间使访之，不得要领而返。是时，因仁孝新立，自恃宿将有功，谋作乱。都押牙刘洪裕不从，削发逃去，合达尽散家财给军士，据州城叛，遣兵四出俶扰。（《西夏书事》）

夏五月，金使来赙赠。（《西夏事略》。按《金史·熙宗本纪》、《西夏传》、《交聘表》俱不载。）

金使来册仁孝为夏国王，加开府义同三司、上柱国。（《金史·西夏传》）六月，合达围西平府。

合达遣使至阴山，结乙室、耶剌旧部，议立辽后，共约恢复。于是，河东八馆，山金司、南北王府前置北鄙诸契丹蜂起应之。合众数万，围灵州。监军司使罔存礼拒

战，数败。（《西夏书事》）

秋七月，合达分兵陷盐州。

合达分遣契丹诸部袭盐州，州城低陋，半夜破之。据盐池，发仓库，尽掠诸州所牧地，游骑直逼贺兰，兴州大震。（《西夏书事》）八月，静州统军任得敬请兵讨夏州。

合达遣使以重币约河南诸州同叛，或拒之不纳，或执使以献。独得敬善待使人，探问贼中机事，尽得其实。乃上表言：“贼素无谋，众皆乌合，所恃者契丹馀部，以戚里连谋，然其势易离也。陛下城下令安抚，敕其以往，许其自新，约还旧部，给以资粮，当必有响应者。又贼顿兵灵武，已逾两月，今新破盐州，士气骄甚。夏州距灵州五百馀里，定然无备，臣请以州兵合诸将袭之，可获全胜。”仁孝遂命得敬出师。（《西夏书事》）

九月，使金谢赙赠。（《金史·熙宗纪》）是月，又遣使如金谢封册。（《金史·熙宗纪》）冬十月，任得敬复夏州。

得敬闻命，阴为部署，外示闲暇。一日晨起，选精卒三百往夏州，尽缚其守烽卒，续以骁骑五千疾驰入城，贼众仓皇接战，皆溃走，尽获合达妻孥，抚谕兵民，开仓赈给，夏州遂定。（《西夏书事》）

进攻盐州击萧合达，大破之，合达走死。

合达闻夏州已失，急解灵州围回救，部众散亡者甚夥，诸契丹亦走回本部。至盐州与得敬遇。得敬挥众击之，合达兵败，策马北奔，至黄河口不得渡，从人斩首来献。（《西夏书事》）

十二月，以任得敬为翔庆军都统军，封西平公。

得敬献捷，仁孝欲擢内职，濮王仁忠言：“得敬兵威震慑河南，今大乱甫平，遽解兵柄，非所以靖反侧也。宜崇其爵秩，以系军民之望。”仁孝授以都统军，封西平公，赏赉甚厚。（《西夏书事》）

西夏称大庆二年

春正月，遣使如金贺正旦。（《金史·交聘表》）遣使如金贺万寿节。（《金史·交聘表》）

金许置榷场。仁孝请之也。（《金史·熙宗本纪》）使金请上尊号。（《金史·交聘表》）夏四月，慕洧破新泉寨，进攻会州，为宋将朱勇所败。

洧忿，将益师入侵川、陕。宣抚使胡世将遗书勉以忠义，洧愧而止。（《宋史·高宗本纪》及《西夏书事》）六月，慕洧弟浚谋反，伏诛。

浚仕夏，为枢密使。时金人渝盟，复取陕西地。浚思归金，与洧谋，挈族走。遣使求金策应，过灵州，逻者获之。统军任得敬以闻，仁孝遣兵杀洧、浚，夷其族。（《金史·西夏传》：慕洧奔夏，及撒离喝再定陕西，洧谋归，夏人知之，遂族洧。《宋史·夏国传》十一年夏六月，慕洧与弟浚谋反，伏诛。二传不合。）

秋七月，金使来诒。

仁孝以诛慕洧故表闻于金，金主诒其专擅，仁孝报使谢之。（《金史·西夏传》）金始遣贺生日使来。

初，王阿海等以金太宗誓诏来赐，干顺以契丹旧仪见使者，阿海不肯，曰：“契丹与夏国，甥舅也，故国王坐受，使者以礼进。今大金与夏国，君臣也，见大国使者当如仪。”争数日不能决，于是始起立受焉，厥后不遣贺生日使，至是始遣使来。（《金史·夏国传》。按《金史·张汝弼传》：上问：“高丽、夏皆称臣，使者至高丽与王抗礼，夏王立受使者拜，何也？”左丞相对曰：“故辽与夏为甥舅，夏王以公主故受使者拜。本朝与夏约和，用辽故礼，所以然耳。”汝弼曰：“誓书称一遵辽国旧仪，今行之已四十年，不可改也。”上曰：“卿等言是也。”其言颇与此相发。）

冬十二月，使金贺受尊号。（《金史·熙宗本纪》。）

群臣上仁孝尊号曰“制义去邪”。（《宋史·夏国传》）

西夏称大庆三年

春正月，使金贺正旦，又使贺金万寿节。（《金史·交聘表》）

夏六月，金定夏使臣辞、见仪。

凡入见，先宋使，次夏使。其朝辞，则夏使在宋使之前。朝辞之赐，则遣使就赐于会同馆，使臣班品仍依旧。（《金史·礼志》）金晋宁军守将折彦文侵府州。（《西夏书事》）

秋八月，攻金晋宁军。（《金史，张奭传》）九月，国内饥。（《宋史·夏国传》）

冬十月，金使来归侵地。（《金史·张奭传》）

西夏称大庆四年

春正月，使金贺正旦，又使金贺万寿节。

金主均以皇太子丧，不御正殿，使臣诣皇极殿遥贺。（《金史·熙宗本纪》）三月，地震。

逾月不止，地裂，涌出黑沙，阜高数丈，广若长堤，林木皆没，陷民居数千。御史大夫苏执义言：“自王畿地震，人、畜灾伤。今夏州又见变异，是天所以示警于陛下也，不可不察。”于是仁孝下令曰：“二州人民遭地震、地陷死者，二人免租税三年，一人免租税二年，伤者免租税一年；其庐舍、城壁摧塌者，令有司修复之。”（《宋史·夏国传》及《西夏书事》）

秋七月，大饥，诸州盗起。

诸部无食，群起为盗。威州大斌、静州埋庆，定州箠浪、富儿等族，多者万人，少者五、六千，肆行劫掠，直犯州城。州将出兵击之，不克。（《宋史·夏国传》及《西夏书事》）

八月，行赈法。

郡、县连章告急，诸臣请兵讨击。枢密承旨苏执礼言：“此本良民，因饥生事，非盗贼比也。今宜救其冻馁，计其身家，则死者可生，聚者自散。所谓救荒之术，即靖乱之方。若徒恃兵威，诛杀无辜，岂所以培养国脉乎？”仁孝善之，命诸州按视灾荒轻重，广立井里赈恤。执礼，执义弟也。（《宋史·夏国传》及《西夏书事》）

冬十月，西平都统军任得敬讨诸州盗，平之。

得敬遣官抚谕诸盗，宥其首恶，解散余党，诸乱渐平。惟定州箠浪、富儿二族，恃险拒守。得敬夜发兵袭其寨，擒首领哆讹诛之，余众泥首降。（《西夏书事》）

始建学校于国中，立小学于禁中，夏王亲为训导。（《宋史·夏国传》。按《西夏书事》载，凡宗室子孙，七岁至十五岁皆得入学，设教授，仁孝与后罔氏，亦时为

条教训导之。较史加详。)

取宋会州。

宋宣抚使吴玠进兵取金三路，屡遣间来结，凡六、七往，夏人终不报。至是，乃与金人合兵夺之。（《西夏事略》）

西夏称人庆元年

春正月，使金贺正旦，又使金贺万寿节。

时中国复与金和，遣贺使至夏，使与高丽使同班其后。（《金史·熙宗本纪》）夏五月，遣使如宋，贺天中节。

夏国贺使不至中国者二十年，仁孝心慕正朔，遣间使入贺，献珠一、囊金带一、衣七对、绫罗纱五百匹、马百匹。（《大金国志》）秋九月，彗星见，改元。

星见坤宫，五十馀日而灭。占其分野在夏国，群臣上言：“彗星者除旧布新之象，宜改元应之。”遂以大庆五年为人庆元年。（《宋史·夏国传》及《西夏书事》）

冬十二月，遣使如宋贺正旦。

献金酒器六事、色绫罗纱縠三百匹。（《大金国志》。按《宋史·高宗本纪》不载入贺二事，考《夏国传》：绍兴二十九年，归宋官李宗闰上书言：“夏国副使屈移尝两使南朝，以为衣冠礼乐非他国比。”即指此。）

西夏称人庆二年

春正月，使金贺正旦，又使金贺万寿节。

金主如东京，夏使与宋使、高丽使同至行在贺。（《金史·熙宗本纪》）

夏四月，金以右卫将军撒海、兵部郎中耶律福为横赐使来。（《金史·交聘表》）六月朔，日食于井。仁孝下诏求直言。（《西夏书事》）秋八月，作大汉太学，亲释奠。

弟子员赐予有差。（《宋史·夏国传》）

西夏称人庆三年

春正月，使金贺正旦，又使金贺万寿节。（《金史·交聘表》）

金以德威城、西安州、定边军等沿边地与夏。从所请也。（《金史·地理志》）尊孔子为文宣帝。

令州郡悉立庙祀，殿庭宏敞，并如帝制。（《宋史·夏国传》及《西夏书事》）

西夏称人庆四年

春正月，使金贺正旦，又使金贺万寿节。

仁孝尽收德威等城沿边地，设官置守。至是，因贺正上表谢。（《金史·交聘表》及《西夏书事》）策举人，始立唱名法。（《宋史·夏国传》）夏五月，西平公任得敬表请入朝。

得敬在镇，日事诛杀，僚佐有谏者勿听，自以有大功，冀与国政，使人上表，请入觐。仁孝欲许之，御史大夫热辣公济言：“窃见戚臣任得敬上表请朝，其心盖为干政地也。从古外戚擅权，国无不乱。得敬虽属懿亲，非我族类，能保其心不异乎？惟陛下察之。”濮王仁忠亦言其不可，遂止。（《西夏书事》）

冬十月，赐李崇德中书舍人。

崇德，宗室士，仁孝爱其才，特赐之。（《西夏书事》）

西夏称人庆五年

春正月，使金贺正旦，又使金贺万寿节。

沿途雨雪，贺正使至已后期乃与贺节使同入见。（《金史·交聘表》及《西夏书事》）二月，金遣哥鲁葛波古等为横赐使来。（《金史·熙宗本纪》）

复建内学，选名儒主之。（《宋史·夏国传》）新律成。

西夏音乐，经元昊更张，久非唐末遗音。仁孝使乐官李元儒采中国乐书，参本国制度，历三年始成，赐名《新律》，进元儒等官。（《宋史·夏国传》及《西夏书事》）

冬十一月，中书令、濮王仁忠卒。

仁忠长身、美髯须，立朝侃侃，动中礼法。弟舒王仁礼监军韦州，私受吏民钱，遗书责之，勉以官箴，仁礼辄还所受。已卒，家无担石储。仁忠悉以廩俸给之，己与家人日食粗粝而已。任得敬谋内召，潜令任太后授意朝臣，太后惮仁忠严，数年不敢泄于外。至是卒，赠吴王，谥恭显。（《西夏书事》）

西夏称天盛元年

春正月，使金贺正旦，又使金贺万寿节。

金右丞相完颜亮阴蓄篡谋，恩结群下。夏使与宋、高丽使入贺，亮请厚赉之。（《金史·交聘表》及《西夏书事》）秋七月，召西平公任得敬为尚书令。

得敬闻濮王卒，以金、珠赂晋王察哥言于仁孝，请召得敬，仁孝令得敬入为尚书令。得敬谄事察哥，两人颇相得。（《西夏书事》）

冬十二月，金岐王亮弑其主亶自立，改元天德。（《金史·熙宗来纪》）贺金明年正旦，使中道还。

使至广宁，不纳。夏人间曰：“圣德皇帝何为见废？”不肯纳。金主乃使有司以废立之故移文报之。（《金史·西夏传》及《交聘表》）

西夏称天盛二年

春正月，金遣完颜撒改来告即位。

且伺夏之意也。（《金史·完颜撒改传》。按《交聘表》正月辛巳，以名讳告谕夏，再遣使报谕夏。当即指此。）金始置市场，弛铁禁。

市场在金云中西北过腰带上石楞坡，天德、云内、银瓮口数处有之。契丹亦置市场，惟铁禁甚严，夏国与鞑靼人不得夹带交易。至金，唯利是视，其禁始弛。（《西夏事略》）

秋七月，遣御史中丞热辣公济、中书舍人李崇德如金，贺登宝位。再遣开封尹苏执义、秘书监王举如金，贺受尊号。（《金史·交聘表》）冬十月，进任得敬中书令。

得敬日尊宠用事，仁孝任以中书令，得敬佯表辞，不许。（《西夏书事》）

西夏称天盛三年

春正月，使金贺正旦，又使金贺金主生辰。（《金史·海陵本纪》）秋九月，遣使如金，表请不去尊号。

金主以上年冬十二月癸卯白虹贯日，诏去尊号。仁孝表请上之。（《金史·交聘表》）

金遣经武将军、修起居注萧彭哥来贺生日。（《金史·交聘表》。按《金史·职官志》有信武、显武、宣武，无经武，未详。又此为赐夏生日之始。）

冬十二月，以斡道冲为蕃、汉教授。

道冲，先世灵武人，从夏主迁兴州，世掌夏国史。道冲字宗圣，八岁以《尚书》中童子举，长通五经，译《论语注》，别作《解义》二十卷，曰《论语小义》，又作《周易·卜筮断》，以其国字书之，行于国中。（《道园学古录·斡道冲像赞记》）

西夏称天盛四年

春正月，使金贺正旦，又使金贺金主生辰。

夏使与宋使、高丽使同赐宴。（《金史·交聘表》。按《大金集礼·曲宴仪》：金主即御座，引臣僚至丹墀，舞蹈毕，各上殿。次引宋使从人入，至丹墀再拜，不出班奏：“圣躬万福。”又再拜，有敕赐酒食，又再拜，引左廊立。次引高丽、夏从人入，分引左、右廊立。果床入，进酒。金主举酒，时上下侍立官并再拜，接盏毕，候进酒官到位，当坐者再拜，坐，即行臣使酒传宣，立饮毕，再拜，坐。次从人再拜，坐。至四盏，饼、茶入，至语。闻鼓笛时，揖臣使并人从立，口号绝，坐宴并侍立官并再拜，坐。次从人再拜，坐。食入，五盏，歇宴。教坊谢恩毕，揖臣使起，果床出。金主起入阁，臣使下殿归幕次。赐花，人从随出，戴花毕。先引入从人左右廊立，次引臣使入，左右上殿位立。金主出阁坐，果床入，坐立并再拜，坐。次从人再拜，坐。九盏，将曲终，揖从人至位，再拜，引出。闻曲时，揖臣使起，再拜，下殿，至丹墀谢宴，分引出。）

秋九月，金遣吏部郎中萧中立来贺生日。（《金史·交聘表》）

西夏称天盛五年

春正月，使金贺正旦。

金主以皇弟兗薨不朝，诏有司受贡献。（《金史·交聘表》）又使金贺金主生辰。（《金史·海陵本纪》）畏吾儿国来献。畏吾儿居伊州外，见夏国日盛，遣使献方物。（《西夏书事》）

秋九月，金遣翰林待制谋良虎来贺生日。（《金史·交聘表》）

西夏称天盛六年

春正月，使金贺正旦。

金主不豫，不视朝，赐使臣就馆燕。（《金史·海陵本纪》）又使金贺金主生辰。（《金史·海陵本纪》）三月，使王公佐如金，贺迁都。（《金史·交聘表》）

秋九月，遣使如金谢恩，且请市儒、释书。（《金史·交聘表》）

冬十二月，使贡方物于金。（《金史·交聘表》）

西夏称天盛七年

春正月，使金贺正旦，又使金贺金主生辰。

金主淫暴日甚，仁孝使贺，特遣枢密使、御史大夫等官为使，以示敬礼。（《金史·交聘表》）夏五月，遣使如金谢恩。（《金史·交聘表》）是月，日有食之。

越日，大风雨，雷电震坏宫殿鸱尾。仁孝以天变，肆赦国中。（《西夏书事》）秋九月，赐尚食官阿华银币。

仁孝猎于贺兰原，有骏马损足，命执治道者戮之。阿华侍侧，谏曰：“田猎非人主所宜。今为马多杀，贵畜贱人，岂可闻于四境乎？”仁孝讶而止。还，以语罔后，后赐银币奖之，以愧从臣之不言者。（《西夏书事》）

是岁，侵金太原。

与折氏为仇也，折氏侵夏地，故报之。金以张奕知太原尹晋宁军来御夏师，奕至境上，按籍各归所侵土。还奏曰：“折氏世守麟、府，以抗夏人，本朝有其地遂以与夏。夏人夷折氏坟陇而戮其尸，折氏怨入骨髓而不得报也。今复使守晋宁，故激怒夏人，使为鼠侵而条上其罪，苟欲开边衅以雪私仇耳，独可徙折氏他郡，则夏人自安。”金主从之。遂移折氏守青州。（《金史·张奕传》）

西夏称天盛八年

春正月，使金贺正旦，又使金贺金主生辰。

金主自九月废朝，数月不出。是月庚戌，始复视朝。夏使贺正不得见，生辰使乃得与宋、高丽使同入贺。（《金史·海陵本纪》）夏四月，晋王察哥卒。

察哥为将贪，虽多战功，时论鄙之。晚年货赂公行，威福自用。仁孝以其尊行，勿之间。卒年已七十馀，犹姬妾充下陈。有园宅数处，皆攘之民间者，仁孝悉令还其主。（《西夏书事》）

九月，以任得敬为国相。

晋王察哥在朝，得敬犹知顾忌。及察哥卒，益易仁孝，势日专横，政由己出，举朝侧目。（《西夏书事》）

是岁，金命与夏国边界对立烽堠，以防侵軼。（《金史·地理志》）

西夏称天盛九年

春正月，使金贺正旦，又使金贺金主生辰。

金主以大房山山陵礼成，遍赐百官。诸国贺正使至，亦厚赉之。（《金史·海陵本纪》）夏四月，金遣宿直将军温敦干喝为横赐使来。

仁孝使枢密都承旨梁元辅、中书舍人赵衍为馆伴。元辅有口才，议论风生，干喝不能难。使回，称夏国多才，较昔为盛。（《金史·交聘表》及《西夏书事》）

六月，任得敬以弟任得聪为殿前太尉，任得恭为兴庆尹。二人倚势弄权，请谒贿赂辐凑其门。秘书监王举劾之，罢官去。（《西夏书事》）

秋九月，金遣宿直将军仆散乌里黑来贺生日。（《金史·交聘表》）

西夏称天盛十年

春正月，使金贺正旦，又使金贺金主生辰。（《金史·海陵本纪》）秋九月，金遣宿直将阿鲁保来贺生日。（《金史·交聘表》）是岁，始立通济监铸钱。

自茶山铁冶入于中国，国中乏铁，常以青、白盐易陕西大铁钱为用。及金人据关右

，置兰州等处榷场，若以中国钱贸易，价辄倍增，商人苦之。仁孝乃立通济监，命监察御史梁惟忠掌之，铸“天盛永宝”钱（汉阳李哲明曰：“今所见钱文，皆是天盛元宝。”），与金“正隆元宝”钱并用。金主禁之，仁孝再表请，乃许通行。（《宋史·夏国传》及《西夏书事》）

西夏称天盛十一年

春正月，使金贺正旦，又使金贺金主生辰。

夏使与宋诸国使同宴，高丽使臣、知枢密院金淳夫与夏使问难，折以礼，乃屈。（《金史·海陵本纪》及《西夏书事》）三月，金遣兵部尚书萧恭来经划边界。（《金史·海陵本纪》）

秋九月，金遣昭毅大将军、宿直将军加古挾懒来贺生日。（《金史·交聘表》）归宋官李宗闰。

宗闰上书言：“夏国副使屈移尝两使南朝，以为衣冠、礼乐非他国比。怨金人叛盟，夺其所与地，此其情可见。壬子岁，粘罕尝聚兵云中以窥蜀，夏人谓将图己，举兵屯境上，以待其至。今诚遣辩士往说之，夏国必不难出兵，庶足为吾声援，以图恢复。”书奏，不报。（《宋史·夏国传》）

西夏称天盛十二年

春正月，使金贺正旦，又使金贺金主生辰。

金主谋伐宋，夏使入见，命修战守备为应。（《金史·海陵本纪》·及《西夏书事》）冬十月，任得敬请废学校。

得敬凌虐朝士，见仁孝尊崇儒学，深恶之。上言：“经国在乎节俭，化俗贵有权衡。我国介在戎夷，地瘠民贫，耕获甚少。今设多士以任其滥竽，廩廪禄以恣其冗食，所费何资乎？盖此中国之法，难以行于我国者，望陛下一切罢之。”仁孝不报。（《西夏书事》）

是岁，封其相任得敬为楚王。

得敬出入仪从，几与国主等。御史中丞热辣公济上疏劾之，不报。（《宋史·夏国传》及《西夏书事》）

西夏称天盛十三年

春正月，使金贺正旦，又使金贺金主生辰。

时金主禁朝官饮酒，犯者死。三国人使燕饮者罪，不成享礼而还。（《金史·海陵本纪》）秋八月，金使来贺生日。

时金主议平宋之后，以兵由陕西定夏国，遣太常博士萧谊忠贺夏主生日。仁孝以兴庆尹赵良、中书舍人芭里昌明伴宴。谊忠探问虚实，二人以“任相功大、举国归心”为言，谊忠闻之默然。（《金史·海陵本纪》及《西夏书事》）

以任纯忠为枢密副都承旨。纯忠，得敬侄也。（《西夏书事》）冬十月，宋四川宣抚使吴玠使来征兵，不报。

先，金主亮分兵攻四川，扰大散关。玠遣使檄夏国，合兵讨之。仁孝报以书曰：“仰维钜宋之兴，咸托群心之辅，列圣承休于洪祚，深仁克浹于寰区。繄我小邦，赖为盟主，二百年讲修于信息，亿万姓陶冶于淳浓。嗟夫！弗率之女真，不自安于微分，鼠窃一隅之地，狼贪万乘之畿。天地所不容，神明为咸愤。故此用兵薄伐，尚敢肆志不庭，毁先庙以示战士之威；杀君母而杜谏臣之口。似此盈科之罪，难逃负櫟之诛。幸使命之来临，快輿情之奋厉。共切驱羊公忿，敢辞汗马勤劳。布告庶邦，遐迩僉来苏之后；奋扬师旅，鼓行解倒悬之民。以至仁伐不仁，因多助攻寡助。请同李广，勿令一骑生还；毋效丁公，遂听片言返旆。此上天之假手，宜壮士之同心。允穆师言，恭行天讨。尔众士既造于南土，我小国当应于西偏。前冲而九野生欢，左顾而千军振色。从兹歃血，动有馀威。誓将灭其众而犁其庭，相与寝其皮而食其肉。成大功于不日，守中夏于历年。不取必有天殃，今其时矣；一征当自葛始，君其念之。馀需报捷之临，别候献琛之贺。使还勉报，旨不及酬。”然闻金兵势盛，兵不敢出。（《西夏书事》）

金人立其东京留守葛王雍为皇帝。十一月，金完颜元宜等弑其主亮于扬州。（《金史·世宗本纪》）立翰林学士院。

以焦景颜、王奩等为学士，俾修《实录》。（《宋史·夏国传》）侵金。

时金人攻宋，宋人入秦、陇，夏人亦乘隙攻取荡羌、通峡、九羊、会川等城、寨，宋人亦侵入夏境。（《金史·西夏传》）冬十二月，归所侵金城寨。

且乞兵复宋侵地，金主诏书嘉奖。（《金史·西夏传》）

西夏称天盛十四年

夏四月，遣左金吾卫上将军梁元辅、翰林学士焦景颜押进，枢密副都承旨任纯忠如

金，贺登位及进方物。（《金史·交聘表》及《世宗本纪》）再遣武功大夫贺义忠、宣德郎高慎言如金，贺万春节及求互市。

金主宴夏使贞元殿，金主察其食不精腆，曰：“何以服远人之心？”掌食官皆杖六十。使者朝辞，乞互市，金主许之。（《金史·交聘表》及《世宗本纪》）

六月，宋帝自称太上皇，禅位于太子昀，是为孝宗。（《宋史·高宗本纪》）犒金兵于界上。

金移刺窝斡叛，兵败西奔。御史大夫白彦敬在西北招讨司市马，防其走入西夏，以兵屯两国界上截之。仁孝遣使犒焉。（《金史·白彦敬传》）

秋八月，使左金吾卫上将军苏执礼、匭押使王琪押进，御史中丞赵良如金，贺上尊号。（《金史·交聘表》）

秋九月，金遣尚书左司员外郎完颜正臣来贺生日。（《金史·交聘表》）攻宋不克，还。

夏人闻金人南侵宋，亦以骑兵二千至宋蔡园川及马家嶮、秃头岭，将分道入攻。宋宣抚使吴玠命镇戎守将秦弼来说和，旋闻金兵败，乃还。（《宋史·夏国传》）

移置中书、枢密于内门外。（《宋史·夏国传》）大禁奢侈。（《宋史·夏国传》）

封制蕃字师野利仁荣为广惠王。（《宋史·夏国传》）

西夏称天盛十五年

春正月，使金贺正旦。

使人为武功大夫芑里昌祖、宣德郎杨彦敬。昌祖后官至殿前太尉，彦敬由翰林学士进参知政事，二人皆为夏国名臣。（《金史·世宗本纪》及《交聘表》）

宋臣陈康伯等致国主书。

书曰：“隆兴元年正月二十二日，特进尚书左仆射、同中书门下平章事兼枢密使、信国公陈康伯等谨致书夏国主殿下：“昔我祖宗与夏世修盟好，岂惟当无事时共享安平之福，亦惟缓急同休戚、恤灾患，相与为无穷之托。中更变故，壤地阻绝，虽玉帛之聘弗克往来，然朝廷未尝忘祖宗之志也。乃者皇天悔祸，輿图寝归。会今天

子绍登宝位，慨然西顾，宣谕大臣曰：‘夏二百年与国也，岂其不念旧好而忘齐盟哉！’某等恭以国主英武聪哲闻于天下，是敢辄布腹心于执事，愿留神图之惠以报音。当告于上，议所以申固欢好者，同心协虑，义均一家，水为善邻，佳之万世，岂不美欤！有少币仪，具如别幅，伏惟照察，不宣。某等谨白。”（陆游《渭南文集》）

三月，使武功大夫讹留元智、宣德郎程公济如金，贺万春节。（《金史·交聘表》。《金史详校·世宗纪》：庚寅，高丽、夏遣使来贺万春节。按庚寅乃二月二十九日，此两国使臣到阙日也。其实贺节在三月壬辰朔，下五年、六年同。）

夏六月，金遣宿直将军阿勒根和衍为横赐使来。（《金史·世宗本纪》。按《交聘表》作五月。）秋七月，金来市马。（《金史·交聘表》）

八月，金遣宿直将仆散习尼列来贺生日。（《金史·世宗本纪》。按《交聘表》作九月。）

冬十月，遣金吾卫上将军苏执礼、匭匣使李子美如金，谢横赐。（《金史·交聘表》）

西夏称天盛十六年

春正月，使金贺正旦。

金制：宋使朝辞，庭赐礼物，夏使就赐于会同馆。时武功大夫嵬移执信、宣德郎李师白礼对姻雅，金主嘉之，特赐衣各三对，人从衣各二对，使副币、帛百四十段，金镀银束带三，金涂银闹装鞍辔三，金涂银浑里书匣、间金涂银装钉黑油诏匣及包书诏匣袱各一，复赐人从银二百三十五两，绢二百三十五疋。其后遂为定制。（《金史·交聘表》及《礼志》）

二月，以翰林学士焦景颜兼枢密都承旨。

景颜性严毅，守正不阿，尝与副都承旨任纯忠论事，纯忠恃得敬势强辩不肯下，景颜面斥其奸。仁孝知纯忠理屈，谕解之，擢景颜职。（《西夏书事》）

三月，遣武功大夫纽卧文忠、宣德郎陈师古如金，贺万春节及求免索正隆以来所掳人口。

夏人已还金侵地，而所掠人口、财、畜尚未还。金边吏屡以为言，金主下诏来索。至是附状奏告，略曰：“众军破荡之时，幸而免者十无一二，继以冻饿死亡，其存

几何？兼夏国与宋兵交，人畜之被俘谬亦多。连岁勤动，士卒暴露，势皆朘削，又坐为末人牵制。使忠诚之节无由自达，中外咸知，愿止约理索，听纳臣言，不胜下国之幸。”金主不许。（《金史，交聘表》及《西夏传》）

秋九月，金遣宿直将军宗室乌里雅来贺生日。（《金史·交聘表》）

冬十二月，遣奏告使殿前太尉梁惟忠、翰林学士枢密都承旨焦景颜再上奏告，乞免征索所掳人口。（《金史·交聘表》）

卷二十七

神宗英文皇帝李遵顼，齐国忠武王彦宗子，襄宗安全族子也，遵顼始以策试状元及第，充大都督府主（按《西夏书事》载：彦宗材器英敏，善骑射，饶武略，遇事敢为。任得敬害其能，中以蜚语，贬守凉州。在郡有政绩，蕃汉畏怀。得敬诛，召入为马步军太尉。卒，谥忠武。遵顼端重明粹，少力学，长博通群书，工隶篆。纯佑廷试，进士唱名第一，令嗣齐王爵。未几，擢大都督府主）。皇建二年七月三日，襄宗废。有世子承祜不立，立遵顼。《宋》、《金史》俱不载其废立之由，无可考。遵顼时年四十有九，改是年为光定元年。（《宋史·夏国传》及《金史·西夏传》）

秋九月，连陷金邢、洺。

时蒙古兵围金中都，中都戒严，故夏兵乘隙得陷之也。金帅韩玉传檄州郡，有云：“事推其本，祸有所基。始自贼臣贪容奸赂，继缘二帅贪固威权。”又云：“裹粮坐费，尽膏血于生民；弃甲复来，竭资储于国计。要权力而忘形势，连岁月而守妻孥。”又云：“人谁无死，有臣子当为。事至于今，忍君亲之弗顾。勿谓百年身后，虚名一听史臣。只如今日目前，何颜再居人世。王侯将相，宁有种乎！富贵功名，当自致耳。”时玉募兵万人出屯华亭，与夏人战，败之，获牛、羊千馀。（《金史·韩玉传》及《归潜志》）

冬以兵五万众围金平凉，复与韩玉战于北原。夏兵疑蒙古军至，夜解去。（《金史·韩玉传》）

又以兵五万围金东胜，金西南路马军万户纥石烈鹤寿来救，突围入城，夏兵解去。

时他将侵金者，亦为蒲察郑留击败而还。（《金史·纥石烈鹤寿》及《蒲察郑留传》。按《蒲察郑留传》：大安二年知庆阳府，三年夏人犯边，击走之。考《卫绍王纪》：夏人犯庆阳在至宁元年六月，不在大安三年，疑《传》有误。）

西夏称光定二年春正月，遣使如金贺正旦。

是时金屡为蒙古兵所败，居庸关失守。夏人乘其兵衅，侵略边境，而通好如故。（《金史·卫绍王本纪》及《西夏传》）

三月，金遣使来，册遵顼为夏国王。（《金史·卫绍王本纪》。）

攻金葭州，为延安路兵马总管完颜奴婢御之，不克，还。（《金史·卫绍王本纪》）

）冬十二月，遣使如金谢封册。

遵项志与金构难，受册久之，始遣使谢，而贺正使仍不遣。（《金史·卫绍王本纪》）

西夏称光定三年

春，攻金邠州。

初，同知静难军节度使事李平父以邠城颓为忧，谋之州将，为浚筑计不从，故陷。靖难军节度使尚郃国公主驸马都尉乌林答琳来降，遂虏答琳及官属以归。（《金史·乌林答琳传》及元遗山《李寄庵墓碑》）

夏六月，攻金保安军，破之，杀其刺史。攻金庆阳府，破之，杀其同知府事。（《金史·卫绍王本纪》）

秋八月，金胡沙虎弑其主卫绍王永济，而立升王珣，是为宣宗，改元贞祐。（《金史·宣宗本纪》）冬十一月。遣兵数万攻金巩州。

彰德军节度使夹谷守中乘城备守，兵少不能支，城陷，官军尽降。守忠独不屈，夏人壮之。且诱且胁，守中益坚，遂载而西。（《金史·夹谷守中传》）

攻金会州，为都统徒单丑儿击走之。

复与万户乌古论长寿战于窄土峡，不胜。（《金史·西夏传》及《乌古论长寿传》）十二月，陷金泾州。（《金史·西夏传》）进围平凉。

夏兵既掠金镇戎，陷泾、邠，遂进围平凉。时平凉新被蒙古兵，夏兵复往攻，陕西按察副使卢庸与知平凉府蒲察郑留团土兵招溃卒竭力御守。矢尽，庸募人取夏兵射城上箭以济急用，出府库赏有功者，人乐为死，竟不能克。初执夹谷守中也，既至平凉，要以招降府人，守中佯许。至城下，即大呼曰：“外兵矢尽，且遁矣！慎勿降。”夏兵怒，乃交刃杀之。同时有刘德基者，城破不降，杀之。德基大兴人，以进士守官边邑。夏兵攻城，德基坐厅事，积薪其旁，谓家人曰：“城破即焚我。”及城破，其家人不忍纵火，遂被执。胁使跪降，德基不屈。同僚故人给夏帅曰：“此人素疾狂，故敢如此。”德基曰：“为臣子当如此尔，吾岂狂耶！”夏帅壮其义，乃系诸狱，冀其改图。已而召问，德基大骂，终不肯从，曰：“吾岂苟生者哉！”遂杀之。（《金史》卢庸、蒲察郑留、夹谷守中、刘德基等传）

西夏称光定四年

秋七月，以书入四川，议夹攻金人。不报。

夏左枢密使吐蕃路都招讨使万庆义勇，遣蕃僧减波把波赍蜡书二丸至西和州之宕昌寨，欲与共图金人，复侵地。制置使董居谊不报。（《宋史·宁宗本纪》及《建炎以来朝野杂记》）

八月，归金国人乔成，令赍国书与其主。

大概言金边吏侵略，乞禁戢。金主诏移文答之。宰臣言：“既非公牒，今将责问，彼必饰词。徒为虚文，无益于事。”乃止。未几，夏人攻庆原、延安、积石州，金有司乃移文来责问。（《金史·西夏传》）

冬十一月，援金叛人程陈僧于兰州。

金兰州驿人程陈僧聚众叛，败金人于龛谷，遣其统制董九招西关堡都统王狗儿，狗儿杀九，起兵拒。陈僧来乞援，遵頊以兵三千应之。（《金史·西夏传》及《西夏书事》）

蒙古主三入国境，破威哈喇城。（《多桑书》。按威哈喇城即万里长城。）金诏有司来答牒。（《金史·宣宗本纪》）

是岁，攻金西宁县，陷之。主簿张汝翼跳而免。（元遗山《张汝翼神道碑》）

西夏称光定五年

春正月，攻金武延川。

金主曰：“此不足虑，恐由他道入也。”既而闻边吏侵夏境，夏人乃出兵攻环州。环州刺史乌古论延寿及斜卯毛良虎等，败夏兵于州境。金主乃治边吏侵夏境罪。（《金史·西夏传》及《宣宗本纪》）

是月，又攻金积石州，为都统姜伯通所败。遣兵入金安乡关，为都统曹记僧、万户忽三十所却，不克，还。（《金史·西夏传》）三月，金人会议来伐，不果。

陕西宣抚司奏：“往者夏人侵我环、庆、河、兰、积石，以兵应之，悉皆遁去，遽还巢穴，盖为我备也。今兰州溃兵犹未集，军实多不完，沿边地寒，春草始生，未可刍牧，两界无烟火者三百馀里，不宜轻举。”从之。（《金史·西夏传》。按诏议伐夏，《纪》在五月。）

夏四月，围金临洮。

初，金主诏河州提控曹记僧、通远军节度使完颜狗儿讨程陈僧，夏兵往援，遂围临洮，扼渭源堡，内外不通。金统军司募人侦察临洮消息，都统乌古论长寿应募，馘二人，擒一人，问得临洮及夏兵事势以报。城围凡半月。城中兵数千，而粟且不支，众皆危之。知临洮府事陀满胡土门日为开谕顺逆祸福，皆自奋。因捕其党欲为内应者二十人斩之，掷首城外。夏兵四面往攻，金人出兵夜袭夏垒，夏兵大乱，金军乘之，大败，解围还。（《金史·西夏传》及乌古论长寿、陀满胡土门等传）

金诏防秋。

转运使卢庸曰：“自鄜延至积石，虽多沟阪，无长河大山为之屏蔽，恃弓箭手以御侮。其人皆刚猛善斗，熟于地利，夏人畏之。向者徙屯他所，夏人即时犯边，此近年深患也。人情乐土，且耕且战，缓急将自奋。”金主从之。（《金史·卢庸传》）

秋九月，破金西关堡。复攻第五将城，不克。（《金史·西夏传》）

冬十月，入金保安，都统完颜家奴破之。攻延安，又为戍将所败。（《金史·宣宗本纪》）陷金临洮。

夏人入临洮，金总管陀满胡土门不能御，陕西宣抚副使完颜胡失来救临洮，大败于渭源堡。城破，胡失来被执。（《金史·宣宗本纪》及《西夏传》）

十一月，攻金熟羊寨。

夏兵侵金不已，金主以空名宣敕付陕西宣抚使：“夏人入寇，有临阵立功者，五品以下并听迁授。”于是金兵皆力战。夏众数万攻绥德之克戎、绥平，皆败。又攻熟羊寨，陕西副统军移剌塔不也以兵万人拒战，遂却。（《金史·宣宗本纪》）

复遣兵八万围临洮，知府事陀满胡土门破夏兵于城下。（《金史·宣宗本纪》）

是岁，遣兵攻定羌，为金将蒲剌都逆击溃归。（《金史·蒲剌都传》）

西夏称光定六年

夏四月，葩俄族总管汪三郎叛降于金。

葩俄向属夏国，金陕西行省都元帅仆散端遣纳兰伴僧赍谕招之，汪三郎与临洮{艸瓜

黎五族都管青觉儿、积石州都管章罗谒兰冬及铎精族都管阿令结等相继叛附于金，进羊千口。金主命优给之，赐汪三郎姓完颜氏。后力御夏兵，为金名将。（《金史·宣宗本纪》及《仆散端传》）

五月，修河桥以窥来羌城，金兵焚之。

遵頊潜于来羌城之界河起修折桥，以通兵路。金元帅右都监完颜赛不遣兵焚之，俘馘甚多。（《金史·宣宗本纪》）谍者陈岳入金，被获。

遵頊复图临、巩，窥长安，使岳入金界探事，来远镇将获以闻，金主命陕西行省严备之。（《金史·宣宗本纪》）秋闰七月，金人来伐，袭阿弥湾。

夏与金屡起兵端，而奏报尚用金年号。是时，移牒尾署夏国光定年号。鄜延路上之，金主诏封还其牒。命庆阳总管庆山奴出第三将怀安寨，环州刺史完颜胡曾出环州。金主曰：“闻夏人移军，备其王城。尚恐诈我，勿堕其计中也。”提控完颜狗儿抵兰州西关堡，招得旧部曲九人，掩击夏兵于阿弥湾，杀其将士百余人。（《金史·西夏传》）

八月，攻金安塞堡，元帅左监军乌古论庆寿遣军败之。（《金史·宣宗本纪》。按《西夏传》作败夏兵于寇安堡。寇安即安塞，判而为二，殊误。）

又遣兵入金结耶觜川，金将完颜赛不逆击，夏兵败绩。寻复破夏师于车儿堡。（《金史·西夏传》）冬十月，以兵从蒙古入金鄜延，遂克潼关。

遵頊数战不胜，遣人与蒙连兵攻延安、代州等郡，杀经略使奥敦丑和尚，进犯潼关。金西安军节度使尼庞古蒲鲁虎战没，关遂破。（《金史·宣宗本纪》及奥敦丑和尚、尼庞古蒲鲁虎等传。按真德秀《奏议》作鞑靼与西夏并兵，东出潼关，深入许、郑。）

十一月，围金定西城。

遵頊既破金兵，复遣骑四万馀突围定西，犖致攻具，志在必取。金提控赤盏合喜与节度使杨斡烈（即杨沃衍）率兵鏖战，夏兵被斩者二千馀级，失马匹八百，器械无数。（《金史·赤盏合喜传》）

十二月，金议来伐。

金主与皇太子议伐夏，以右监军陀满胡土门、延安总管古里甲石伦（按《弘简录》作汪石伦。《金国语解》古里甲曰汪）攻盐、宥、夏诸州，庆阳总管庆山奴、知平

凉府移刺塔不也攻威、灵、安、会等州。（《金史·西夏传》。按胡土门、石伦、庆山奴三传皆无文，惟《塔不也传》有此语，亦空言耳。）

西夏称光定七年

春正月，金主复谋大举来伐，不果。

金主命胥鼎选兵三万五千，付陀满胡土门统之西征。鼎驰奏，以为非便。略曰：“自北兵经过之后，民食不给，兵力未完。若又出师，非独馈运为劳，而民将流亡，愈至失所。或宋人乘隙而动，复何以制之？此系国家社稷大计。方今事势，止当御备南边，西征未可议也。”遂止。（《金史·胥鼎传》）

遣使如金贺正旦。

使臣互市于会同馆。金外戚有身贸易于其间者，吏部主事聂天骥上章曰：“大官近利，失朝廷体。且取轻外方。”遂忤太后旨，出为知汝州防御使事。（《金史·聂天骥传》）

夏兵三万自宁州还，金帅庆山奴以兵邀击，败之。

时他将侵金者，亦屡为赤盏合喜所败。（《金史·西夏传》及《赤盏合喜传》）

夏入福山以俘户往降于金，金以为同知泽州军州事。（《金史·西夏传》）

金右都监完颜仲元请试兵西夏，出其不意，必获全胜，兵威既振，国力益完。诏下尚书省、枢密院议。（《金史·西夏传》）

夏五月，夏兵入大北岔，金都统纥石烈猪狗掩击，败之。（《金史·西夏传》）金欲与夏议和。

右都监庆山奴屯延安，奏曰：“夏国决不肯和，徒见欺耳。”既而获谍者言，遵頊闻大金将约和，戒谕将士无犯金境。金宰臣曰：“就令如此，边备亦不宜弛。”金主以为然。（《金史·西夏传》）

复援金叛人李平于兰州。

兰州当金夏之冲。金水军千户李平苦提控蒲察燕京贪暴，杀之以叛，遣使至夏陈可取状。遵頊令兵应之。已而平胁其徒张晟俱行，晟以计执平等杀之，夏兵乃还。（《金史·宣宗本纪》）

秋七月，攻金黄鹤岔，为右都监完颜间山所败。（《金史·西夏传》）围金羊狼寨。

都统党世昌与战，完颜狗儿遣都统夹谷瑞夜斫夏营，遂解围，犹屯近地。左都监白撒发定西锐兵、龛谷副统包孝成绯翮翹军合军来击，乃退。（《金史·西夏传》）

八月，以三千兵攻金安定堡，为马家平总押李公直击败。（《金史·西夏传》）九月，金都统罗世晖却夏兵于克戎赛。（《金史·西夏传》）

冬，金将杨沃衍与内族白撒等将兵五千出巩州盐井，至故城，逢夏兵三百，击走之。（《金史·杨沃衍传》）十二月，蒙古兵围兴州，国主遵顼出走西凉。

夏与蒙古自纳女请降，合兵攻金，遂为役属。继征发日多，不堪奔命，礼意渐疏。蒙古主怒，渡河来攻，列城不能御，直抵中兴府围之。遵顼命太子德任居守，已出走西凉。已而遣使请降，蒙古兵退，始还。（《元史·太祖本纪》及《金史·宣宗本纪》。按钱大昕《养新录·大祖纪》：十三年，伐西夏围其王城，夏主遵顼出走西凉，此金兴定二年、宋嘉定十一年也。陈桱《通鉴续编》、薛应旗《宋元通鉴》皆在前一年。今按《金宣宗纪》：兴定二年正月，陕西行省获归国人言，大元兵围夏王城，李遵顼命其子居守而出走西凉。夏与金相去辽远，而金人于是年正月已传闻知之，则必是前一年事。元《纪》误。）

西夏称光定八年

春二月，以秘书监苏寅孙为枢密都承旨。

寅孙风姿奇爽，少力学，善属文，以世荫授秘书监，刚正不挠，遇事敢言无所忌。见遵顼与金构兵，数劝修好，共拒蒙古，至以涕泣争。遵顼知其忠，擢之。（《西夏书事》）

三月，令边吏通好于金，请复互市。不许。

遵顼遗书金之绥德、葭州，乞复互市，以寻旧盟。庆山奴以闻，金主不许。（《金史·西夏传》）夏五月，攻金鄜、延二州。

遵顼因互市不许，以步骑三千引蒙古兵由葭州入鄜延。金元帅左都监庆山奴自鄜州发兵逆战于马吉峰，夏兵被斩数百级，失首领二人。（《金史·庆山奴传》）

秋七月，攻金龛谷寨。

金提控夹谷瑞及其副赵防击走之。未几，复攻龛谷，夹谷瑞又大破之。（《金史·宣宗本纪》）

冬十一月，夹谷瑞败夏人于质孤堡。（《金史·宣宗本纪》。按《金史·夏国传》：兴定二年七日，夏人犯龛谷，夹谷瑞、赵防败之，追至质孤堡。似质孤、龛谷是一事，与此异。

《元朝秘史》：是年，太祖差人去对唐兀惕不儿罕说：“你先说与我做右手，如今回回百姓杀了我使臣，要去与他折证，你可与我做右手。”不儿罕未及言语，其臣阿沙敢不说：“你气力既不能，不必做皇帝，不肯与军。”太祖闻此语说：“阿沙敢不如何敢这般说？将我这军马迳去征他也有何难，但我初意并不征他，若天祐护回回处，回来时却去征他。”按唐兀氏即河西赐姓，《廿二史考异》、《元史·镇海传》：从攻塔塔儿、钦察、唐兀、只温、契丹、女真、河西诸国。按唐兀即河西，吴海《王氏家谱序》云：“元初得天下，惟河西累年不服，最后乃服。世祖以其人刚直守义，嘉之，赐姓唐兀氏。”《传》有唐兀，又有河西，盖史臣不通译语，而误重出耳。）

西夏称光定九年

春二月，复令边吏通好与金。

金元帅、右都监庆山奴以绥德、保安之境各获夏人统军司文移来上，其辞虽涉不逊，而皆有保境息民之言。金主诏尚书省议之，宰臣言：“镇戎、灵平等镇近耗，夏人数犯疆场，此文正缓我尔。宜严备御，以破奸计。”金主然其言。（《金史·宣宗本纪》）

闰三月，破葭州之通秦寨。

通秦寨，旧名升罗岭，本夏国地，宋神宗元丰五年收复，靖康中没于金。至是，以兵袭破之，杀其刺史纥石烈王家奴等，旋弃之归。（《金史·宣宗本纪》）

遣人如宋，请会师伐金。

初，金人南迁后，议徙都长安，遣元帅赤盏合喜以重兵宿巩州，遵頊畏其侵迫，乃遣枢密使都招讨宁子宁忠翼赴蜀，议夹攻秦、巩。蜀帅聂子述俾利州安抚丁育答书许之，饬将吏严兵以待。（《宋史·夏国传》）

夏四月，取通秦堡。

通秦堡，旧名精移堡，在通秦寨北，遵頊以二万骑破之。庆山奴遣提控纳合买住赴援，夏兵逆战不胜，弃堡走。已，复进兵取之。庆山奴自将兵来攻，夏兵被斩五千级，余众由葭芦川遁回。（《金史·宣宗本纪》及《庆山奴传》。按《金史·夏国传》：夏人破通秦寨，纳合买住击之，由葭芦遁去。未免混两事为一，故特从《宣宗纪》。）

五月，金人侵隆州。

夏兵屡犯通秦，金元帅完颜合达出兵安塞堡，抵隆州。夏人自城中出步骑二千逆战，合达进兵击之，斩首数十级，俘十人，遂攻隆州，陷其西北隅。会日暮，乃还。（《金史·完颜合达传》）

六月，宋利州安抚使丁燦复以书来，约伐金。（《宋史·宁宗本纪》）冬十一月，放金前岚州仓使张祐归。

金明昌中，夏破岚、石诸州，获祐，胁之降，不从，羁于衙头。至是求归，遵頊纵遣之。（《金史·宣宗本纪》及《西夏书事》）十二月，金诏有司来移文并答书。

初，夏有书抵金告和。至是，答书曰：“以生民为心，不以细故而忽生民之命。以天下为度，不以私忿而伤天下之功。惟我国家，奄宅中外，威制万里，恩结三方。高丽叛归，却而不受。孽宋既服，免其称臣。苟可利于生灵，有不较其名分。矧惟大夏，特我宝邻，盟誓既百年于兹，恩好若一家之旧。乃者北兵之大扰，因而东道之不通；岂意同盟，堕此奸计；俾我两朝之交质，至于一矢之相加。幸上天开悔祸之期，使赤子有息肩之望。兹紆信使，特枉载书，忍以一朝之违，遽忘累世之好。矧此辅车之势，属我唇齿之邦。与其厌外夷之陆梁，孰若结诸夏之亲昵。维兹不类，乃我同仇。当人心厌乱之秋，见天道好还之意。众既乌合，罪复贯盈。彼物极则终衰，此数离而复合。且阅墙犹可御侮，况同舟何患异心。既有成言，当如来约。”（《金史·西夏传》及闲闲老人《滏水集》）

金议收复兰州，不果。

金廷议：兰州当西夏之冲，久为敌据，将遣内族白撒以兵复之。白撒奏：“臣近入宋境，略河池，下凤州，破兴元，抵洋州而还。经涉险阻数千里，士马疲弊，未得少休。而欲重为是举，甚非计也。不若息兵养士以备。”金主从之。（《金史·白撒传》）

是岁，大举攻金环州。

城中军不满二千，刺史术虎筠寿以老幼妇女乘城。度夏人至木波，地狭道险，利用设伏。自将步骑五百，乘夜袭之。夏兵惊溃南走，被斩千人，掳老、幼四千，获将领一人。夏兵复奔西道，筠寿又邀击之，被斩数百人，掳牛、羊万馀。（元遗山《术虎筠寿神道碑》）

侵金威戎城。

时威戎民饥，且地震城圯，夏兵乘隙攻之，威戎令商衡率蕃部土豪守之，不克。（《金史·商衡传》）

西夏称光定十年

春正月，复遣使往四川，议夹攻金人。（《宋史·宁宗本纪》）二月，攻金镇戎。

先是，金石盩女鲁欢上言：“镇戎赤沟川，东西四十里，地无险阻，当夏人往来之冲。比屡侵突，金兵常不得利。明年春，当城镇戎，彼必出兵来挠。乞于二三月间，征旁郡兵声言防护，且令鄜、巩各屯兵境上，示进伐之势，以掣其肘。臣领平凉之众，由镇戎而入攻其心腹。彼自救之不暇，安能及我？如此则镇戎可城，而彼亦不敢来犯。”金主从之。至是，果城镇戎，夏人往挠其役，金师败绩。（《金史·西夏传》及《石盩女鲁欢传》）

金主以夏人公移语不逊，命词臣草牒来折之。（《金史·西夏传》）夏四月，攻金新泉城，败绩。

遵頊遣兵千人驻鹿儿原，金左都监赤盩合喜遣提控乌古论世显率偏师逐之。已而以千五百人攻新泉，又为都统王定所败。（《金史·西夏传》）金兵入宥州，围神堆府。

金庆山奴兵侵宥州，守将御之败，退守神堆府。金兵穴其城。方登陴，遵頊遣援师至，与庆山奴战，不胜，被斩二千馀。金兵获杂畜三千馀而去。（《金史·西夏传》及《赤盩合喜传》）

宋四川宣抚使安丙遣书，定义夹攻金。

初，宋帅聂子述罢去，丁焞持初议，不肯出师赴夹攻之约。宁子宁遣使复申前说，且责以失期。时安丙为阆帅，始遣书来许之。（《金史·宣宗本纪》及《西夏传》）

秋八月，攻金会州，陷之，降其刺史乌古论世显。

遵頊遣万众围会州，主兵者人、马皆衣金碧，出入阵中。金同知平凉府事郭禄大引矢一发，殪之。又一矢，贯人两手于树。夏兵愤，并力攻之，城遂破。擒禄大及其弟虾蟆，怜其技，囚之。守将乌古论世显降，关右大震。金诏有司移文来议和，遵頊不纳。（《金史·西夏传》及《郭虾蟆传》）

进围定西州，与金节度使乌古论长寿战，不克。

遵頊以兵三万复犯龛谷，为夹谷瑞所却，乃从高峰镇围定西。环城为栅，执乌古论世显至城下，谓长寿曰：“若不速降，即杀汝弟！”长寿不顾，偕刺史爱申阿失刺、提控温郭永昌分兵出战，夏兵退走，失马仗甚众。（《金史·西夏传》及《乌古论长寿传》）

宁子宁以伐金告于宋，宋四川宣抚司命利州统制王仕信引兵赴熙、巩州来会。（《宋史·夏国传》及《宁宗本纪》）九月，破西宁州，再围定西。

夏兵略绥平寨、安定堡，进攻西宁。金行元帅府事赤盏合喜发兵救。未至，夏移兵临洮。乌古论长寿先伏兵五千于定西险要间，夏兵逆战不利。会西宁已破，并攻定西（《金史·宣宗纪》：兴定四年九月庚子，夏人入定西州。己酉，夏人陷西宁州。而《乌古论长寿传》则云已破西宁乃犯定西，《传》《纪》不合），长寿力击不退，攻益急。长寿乘城拒战，矢石如雨，夏兵死者数千，被创者众，乃解去。（《金史·西夏传》及《乌古论长寿传》）

遣兵攻巩州，且使人趣宋师来会。

大将你思丁、兀名二人献计曰：“巩州，帅府所在。破巩州，则临洮、积石、河洮诸城不攻自下。”遵頊从之，遣枢密使宁子宁、嵬名公辅率兵二十万攻巩州，金行元帅府事赤盏合喜遣兵拒敌。一日十馀战，夏兵退回南冈。寻以精骑三万傅城，合喜出城奋击，夏兵败，副将刘押、甲玉等被擒。子宁遣使入四川趣师，宣抚使安丙命利州副都统程信督诸将张威、王仕信分道进兵，克来远、盐川两镇及定边城，会于巩州城下。约以夏兵野战，宋师攻城。既而合攻不克，杀伤者万计，遂焚攻具，拔栅自安远寨退师。合喜先伏甲要地邀击之，夏兵死亡甚众。（《宋史·宁宗本纪》及《赤盏合喜传》）

冬十月，程信使来邀共攻秦州，不从。（《宋史·宁宗本纪》。按黄震《古今纪要》作安丙约夏人合攻秦、巩，夏兵爽约不至，我师败绩。与《宋史》异。）

十一月，杀金会州刺史郭禄大，弟虾蟆逸还。

禄大兄弟被擒，誓死不屈。已而同谋归金，自拔髭须，以改状貌。事觉，禄大被杀，虾蟆逸还。（《金史·郭虾蟆传》）攻金绥德州。

驻兵于柱天山。右都监完颜合达将兵来击，别遣先锋提控樊泽等，各率所部分三道以进，毕会于山巅，见夏人数万馀傅山而阵，即纵兵分击。泽先登，摧其左军，诸将继攻其右，夏军大败。（《金史·完颜合达传》）

西夏称光定十一年

春正月，金诏枢密院议夏事。

枢密院奏曰：“夏人聚兵境上，欲由会州入，已遣行省白撒伏兵险要以待之，鄜延元帅府伺便发兵，以缀其后，足以无虑。”（《金史·西夏传》）

二月，金宁远节度使夹谷海寿破夏兵于搜嵬堡。（《金史·西夏传》）三月，复取金来羌城。

因金叛人窦赵儿之招，遂入据之。孛术鲁合住以重赏诱胁从人为内应，督兵急攻城，拔之。（《金史·宣宗本纪》）夏五月，金内族白撒谕诸蕃族来讨。

初，白撒令临洮路总管女奚烈古里间计约乔家丙令族首领以谕诸族，又别遣权左右司都事赵梅等同往抚谕。未几，梅等报：溪哥城等处诸族与先降族共愿助兵七万八千馀人，本国蕃族愿助兵九千。至是，令古里间将巩州兵三万，合诸蕃族来讨。（《金史·白撒传》）

是月，吏部尚书权鼎雄卒。

鼎雄，凉州人，天庆中举进士，以文学名授翰林学士。安全篡逆，弃官入青岩山不出，遵顼立，召为左枢密使。尝奉使谢金横赐，与接伴争相见仪，金人服其论正。及进吏部，气宇肃然，抑侥幸，拔淹滞，虽在乱离中，无敢干以私者。（《西夏书事》）

冬十月，复以书如四川趣会兵伐金。（《宋史·宁宗本纪》）遣兵从蒙古，取金葭州及绥德州，遂攻延安府。

先是，蒙古太师国王木华黎征陕西，假道于夏，由东胜州涉河引兵而西。国主闻之，遣塔尔海监府等宴木华黎于河南，且遣塔哥甘普将兵五万属焉。是月，木华黎引兵东行入葭州，金将王公佐遁。蒙古左副元帅石天应曰：“西戎虽降，实未可信。此州当金、夏之冲，居人健勇，仓库丰实，加以长河为限，脱为敌军所梗，缓急非

便宜。命将守之，多造舟楫以备，不虞此万世计也。”木华黎然其言，即以天应权行台，留守葭芦。国主愈惧，而木华黎自将兵攻绥德，破马蹄、克戎两寨。国主遣迷仆往会之，迷仆问木华黎相见之仪，木华黎曰：“汝见汝主，汝主见我主，即其礼也。”迷仆曰：“未受命，不敢拜。”因引众去。未几，木华黎攻延安，迷仆始焚马而拜。（《元史》木华黎、石天应等传及《元史类编》）

侵金龛谷及积石，复以万馀众攻定西。金同知兰州军州事郭虾蟆逆战，夏师败绩。

被斩七百人，亡失马五十匹。（《金史·宣宗本纪》及《郭虾蟆传》）复攻龛谷，为白撒所败。（《金史·西夏传》）十一月，蒙古来约共攻金安塞堡。

夏军先至，金完颜合达与征行元帅纳合买住御之。合达策之曰：“比北方兵至，先破夏人，则后易为力。”于是潜军裹粮，倍道兼进，夜袭其营，夏人果大溃。追杀四十里，坠崖谷死者不可胜计。金主闻之，诏曰：“经划如此，彼当知畏。期之数，卿等可以休息矣。”（《金史·完颜合达传》）

是岁，遣兵入宋凤州，约共攻金，不纳。

先是，安丙尝纳夏合从之请，会兵攻秦、巩。而夏兵不至，遂有皂郊之败。至是，夏人复攻，金人遣百骑入宋凤州，邀宋将出援兵。宋帅崔与之使都统李冲来言曰：“通问当遣介持书，不当遣兵径入。恐边民不相悉，或有相伤，则失两国之好，宜敛兵退屯。”夏人知不可动，不复有言。（《宋史·崔与之传》。按《魏鹤山文钞》论择人分四重镇以备金夏鞬事曰：“夏人久有吞噬关陕之志，数通边臣，要结兵援秦、巩之会，弃我先遁。反谓将士少，更请济师。今又远连强鞬，近向全秦，行李往来，邀我未已。利害难于阶度，真伪不可测知。稍失应酬，便生间隙。”又谓：“夏人则令四川制司因其来使谕，以各用所长分道出师，乘便即发，不必即相牵引。凡此者，第以款敌而纾忧耳。”）

是岁，夏将也蒲甘卜率所部叛降蒙古。（《元史·也蒲甘卜传》）

西夏称光定十二年

春正月，陷金大通城，金复取之。

先是，夏兵数十万分侵龛谷、鄜延、大通诸城，遂破大通据之。金主命白撒等发兵袭夏人浮桥，遂趋西凉，别遣将取大通城，出溪哥路略夏地。白撒徐出镇戎，合达出环州，以报二道之役。白撒驰至临洮，遣总管女奚烈古里间、积石州刺史徒单牙武各摄帅职，率兵西入，败夏兵千馀于踏南寺，因围大通城。分兵夺其桥，与夏守

兵七千人战，大败之。几杀其半，入河死者不可计。馀兵焚其桥西遁，金人乃还军攻大通，克之。斩首三千，因招来诸寺族被胁僧、俗人。（《金史·西夏传》及《白撒传》）

三月，与金提控李师林战于永木岭，败绩。（《金史·宣宗本纪》）

夏六月，蒙古来约伐金，由河中葭州路入，许之。（《元史·石天应传》）秋八月，攻金宁安寨。（《金史·西夏传》）

积石州蕃族叛金来附，金巩州提控尼庞古三郎讨之，获羊千口。（《金史·宣宗本纪》）攻金德顺。（《金史·宣宗本纪》）冬十月，掠德顺之神木堡。（《金史·宣宗本纪》）

十二月，与金兰州提控唐括昉战于质孤堡，败绩。（《金史·宣宗本纪》）是岁，蒙古来伐。

及秦州，夏人撤桥梁为备，军阻不得前。蒙古将王楫夜督士卒运木石，比晓桥成，军乃得道。（《元史·王揖传》）

西夏称光定十三年

春二月，以步骑数十万围金凤翔。

东自扶风、岐山，西连汭、陇，营栅连数百里不绝。金元帅赤盏合喜以郭虾蟆统领军事，从巡城壕外，夏一人坐胡床，以箭力不及，气貌若蔑视城守者。合喜指似虾蟆云：“汝能射此人否？”虾蟆测量远近，曰：“可。”虾蟆平时发矢，伺腋下甲不掩处射之，无不中。即持弓矢，伺坐者举肘，一发而毙。已而夏师退。（《金史·赤盏合喜传》及《郭虾蟆传》）

是春，使太子德任伐金，不果。

德任谏曰：“彼兵势尚强，不若与之约和。”遵頊笑曰：“是非尔所知也。彼失兰州竟不能复，何强之有？”德任固谏不从，乞避太子位，愿为僧。遵頊怒，幽之灵州，遣人代将。会天旱，不果。以德旺为太子。（《金史·西夏传》）

蒙古来伐。

金延安庆原元帅府欲乘夏困敝来攻，陕西行省白撒合达以为不可，乃止。（《金史·西夏传》）掠金陇安军。

金陇安军节度使完颜阿邻日与将士宴饮，不治军事。夏人乘之，掠民五千馀口，牛、羊杂畜数万而去。（《金史·西夏传》）秋七月，攻金积石州。

羌界寺族多陷没，惟桑逋寺僧看逋、昭逋、斯没及答那寺僧奔鞠等拒而不从。（《金史·宣宗本纪》）阴坡族之骨鞠门等叛金来降。金元帅夹谷瑞发兵讨之，以捷闻。（《金史·宣宗本纪》）

九月朔，日有食之，食既，色淡无光，兴庆府城外大风拔木。（《西夏书事》）冬十月，蒙古兵围积石州，五日而解。

蒙古以凤翔之役，恶夏无礼，遣将攻积石州，四出抄掠。逾旬，闻金人图其后，解围去。（《西夏书事》。按积石，西蕃溪哥城地，金、夏两有其名。然《宋史》积石军所属，一寨两堡。《金史》城一、寨三、堡三。界至不甚相同，俟考。）

罢御史中丞梁德懿。

蒙古兵虽退，国中荒羸殆甚。遵顼犹集十二监军司家兵图金巩州。德懿上言：“天人之道，理自相通。国家用兵十馀年，田野荒芜，民生涂炭，虽妇人、女子，咸知国势濒危。而在廷诸臣，清歌夜宴，舌结口钳。太子以父子之亲，忧宗社之重，毅然陈大计，献忠言，非得已也，一旦位遭废斥，身辱幽囚，宜乎？天垂变异，岁告灾祲。臣望主上，抚恤黎庶，修睦邻邦，召还青宫，复其储位。庶几臣民悦服，危者得安。”遵顼恶其言，直面诘之，令致仕。德懿虽世胄，性恬退。归后十馀年，逍遥山水而卒。（《西夏书事》）

十一月，金郭虾蟆与巩州元帅来攻会州。

虾蟆率骑兵五百，皆被赭衲，蔽州之南山而下。夏人猝望之，以为神。城上有举手于悬风版者，虾蟆射之，手与版俱贯。凡射死数百人。夏人震恐，乃出降。盖会州为夏人所据近四年，至是乃复为金所有。（《金史·宣宗本纪》及《郭虾蟆传》）

十二月，金主煦薨，太子守绪即位，是为哀宗。（《金史·哀宗本纪》。按《元太祖纪》作十月。）遵顼自称上皇，传位于太子德旺。

夏与金自天会议和，八十馀年未尝有兵革之事。及贞祐之初，小有侵掠，以至构难，十年不解，一胜一负，精锐皆尽。而两国俱敝，复屡为蒙古所攻，力不能支，故有是命。遵顼在位十三年，改元一光定。至乾定四年乃薨，年六十四，谥曰英文皇帝，庙号神宗。（《金史·西夏传》及《宋史·夏国传》）